

續碑傳集卷六十

江陰繆荃孫纂錄

忠節七

贈太僕寺卿運同銜河南補用直隸州田君別傳

李元度

田君諱玉梅字鼎臣龍山人少跳踉不羈從塾師受章句意弗耐也則去之距所居十餘里有巖洞幽險絕人迹君獨居三年日誦陰符遁甲諸書鬼物蛇虎無所擾及出與人言率恢奇澁澆人莫測所以也年二十走京師與人言星象謂天下且苦兵坐妖言陷刑部獄君笑曰我豈妄哉踰年當見信矣既而果得釋咸豐三年走江南大營以策干提督向公榮請潛入江甯城約諸被脅者翻城應官軍有張炳垣者俠士也陷賊中夙與君善君變服夜入城與謀炳垣爲通款數十人皆約內應及期君乘閒登城斬賊首擲城外而官兵負約無至者謀且泄賊拘炳垣鞠其黨備五毒炳垣抵死不言同謀者君伏水竇中五日夜得脫將出城猶襲殺僞官五人門者十餘人凡三出入無知者軍中以此奇君君既恥其言不售復脫身北走投效河南時賊踞正陽關官軍屢攻不下君率川楚軍協勦夜領壯士八人緣埤堦上會風雨大作君與八

人者大呼擲火球賊脅不辨多寡大驚潰官軍蹙之遂克正陽關君擢知縣加五品銜

賞藍翎七年從欽差大臣勝保剿捻寇當是時固始被圍久內外隔絕君領偏師援之至則屯大隊於後而自率精騎數十衝入城復選城中驍騎益之突出蹂賊當者盡靡而大隊自後夾攻之賊腹背受敵大敗

奔圍解

詔加運同銜

賞換花翎

賜號卓勇巴圖魯尋補太康知縣晉同知直隸州十年秋泰西人犯天

津京師戒嚴

上北狩木蘭君上書大府請濟師勤王大府以爲狂三檄止之君投檄抵地罵曰犬馬知衛主烏有食君父之祿不急其難者乃自帥所部行至汝陽沙官橋爲捻匪所阻眾有難色君素輕捻匪又北行急乃忼慨誓師曰吾屬勤王方冀立奇功何遽爲螳賊所闕乃大呼直前搏戰賊敗追奔三十餘里援軍不相屬從者裁十餘騎賊瞰君勢孤乃反鬪圍君數匝君手弓左右持刀且戰且射自昧且至日昃手殺傷數十人賊

卒不退圍益急後軍阻賊不得前君馬中流矢將踣回顧從者僅存一
跛卒乃棄刀下馬拔所佩劍徒步決盪跛卒呼曰賊壘在北公北行圍
益厚不可出必南行吾後軍幸至或得脫乃轉戰而南時已薄暮賊恐
失君以火鎗叢擊之洞胷而死死良久賊篝火求其屍得之將斷其首
屍突起撞持刀賊仆地死賊駭奔驚以為神立即移屯去時八月六日
也年三十二後軍至斂其屍歸葬龍山跛卒佯死伏草中得免具述君
死狀事聞得

旨優卹如典禮

贈太僕寺卿

賜祭葬

子雲騎尉世職

敕汝甯建專祠君饒血性急人之難忘其軀誓不相背負在江甯有陸
某陷賊中君潛入城徧覓得之攜以出或詢賊中事語及張炳垣輒嗚
咽流涕云

贊曰君天下奇男子也其蹤迹奇詭及死事之烈周孝侯曷以加哉軍
興以來吾楚人以義烈著者僂指難畢數而莫奇於君人奇功亦奇年

甫三十卒以奇烈死悲夫孔子曰志士不忘在溝壑勇士不忘喪其元君儻其流亞歟

又田大令傳

陳繼聰

田君玉梅字鼎臣四川酉陽人案豫軍紀略作湖南人好讀史傳下筆千言貌文弱而多力屈其臂數人不能伸性倜儻家貧喜結客不知生計弱冠後輒出門遠遊海內名山五嶽歷其四每遇險要形勝古人爭戰之處必停轡登眺蓋其志趣固不羣也咸豐二年冬粵寇入長江將犯金陵君方在京師慨然思討賊立功驅車南下至則江甯已陷大帥向忠武公屯營鍾山督師攻城不能拔君欲謁見獻策而羈旅無與通其鄉人有駐善橋營者往投之居數日適縣丞胡恩燮以公事道經善橋見君懼若平生君出所著論示之皆切中時弊恩燮奇之爲言於太守趙某趙召與語亦歎爲異才乃薦諸大帥給軍功六品銜當是時江甯諸生張繼庚謀翻城應官軍陰結義士相機而動潛遣人至大營上書者再而幕府終躊躇不果君乃說大帥曰官兵圍賊今旣數月無水師以扼其吭僅城之半耳城高而備多急攻之無益也聞城中有內應者請先爲公入覘其虛實大帥諾之而張繼庚亦以日久恐洩親來大營見將軍

福興痛哭告其事大帥遂遣君行君固機警絕人效賊裝挾匕首至江東門卽賊出入要道所謂買賣街也君手持筐實以餅餌魚肉若買而歸者遂自水西門入訪內應者之居召諸人與之謀復徧厯賊巢習其言語號令又至各門視其路之寬隘遠近爲進兵計皆默識之越三日復自西門出子然孤身守者眈眈視君故從容坐城闔若有所待少頃遙見一騎來導從數十輩君遽拂衣起曰至矣昂然出守者以爲同黨也竟不之詰君歸至大營備述其所經且言內應頗眾但散處不能聚似不可恃惟官軍向神策門進守者寡距僞署稍遠賊卽知有變不及救或可濟也大帥從君言君於是復入城告眾以期而眾以賊耳目多瞻顧未行事久竟洩繼庚被執堅不肯承密遣同志者告君促大軍速至君遂潛身再出言於大帥謂繼庚雖失陷義民甚多但志猛而氣怯難以專任某已結壯士五人必挈以共往大兵繼之而後可圖帥曰吾當以軍應汝此大事好爲之四年二月二十四日君同其徒五人易賈人服入城率諸義士賈鍾麟柳之麒張鴉頭等夜伏神策門延大軍爲破城計君道遇邏卒斬之守陴者悉熟睡亦殲焉僞參護臥堞樓驚而踰垣君以矛衝其喉擲頭於外遂下城將令諸人合攻守門賊而斬關

開門則阻於柵不得前蓋賊於是夕新立木柵高而堅鍵以鐵鎖守賊
悉在其內列礮外向稍覺礮即發無所避天將曙夜巡者見城上死者
纍纍知必有變嗚嗚吹角他處亦應之君曰噫事敗矣賊且大至宜避
之乃皆退而匿已而賊兵麇集大譁下令閉城大索收百四十人殺之
城啟君竟偕五人出先是大帥與君計遣諸將如期往至是夜軍至城
外天明而門不開忽聞角聲四起城上旗幟簇簇知謀不成遂整軍回
咸太息曰田生必死矣及君脫歸眾益奇之大帥以君爲能將賞以官
君上書謂內應旣無功則惟鼓我士氣以下此城將不可使怯兵不可
使驕語太激拂帥意乃寢其賞君復往依趙太守亦無所用之會蘇撫
吉勇烈公督兵鎮江或有言君者署爲軍校經數十戰吉公旋敗歿於
九華山君功遂不得敘後赴湖北軍營胡文忠公以君有膽略堪任戰
疏奏其材保舉以知縣用適值捻寇大擾中州豫撫求援於楚大府檄
君往勦屢戰皆捷然狂氛方熾未易撲滅軍士力且疲而巡撫慶廉益
趣進兵十年八月君從提督承忠勇公擊賊於汝陽城南之野豬岡力
戰陣亡事聞

恩卹如例君爲人風雅自喜軍暇頗嗜吟嘯出則輕衫破玉丰致翩翩

絕無武士習氣然每與同志者言及時事則性情激憤目眦裂恨不得
尺寸柄爲

朝廷殺賊嘗大言曰某百無一長惟不敢愛此身置國事於度外苟有
用我者雖死不惜耳卒勦劇寇歿於行間遂其馬革裹尸之志可不謂
之奇男子哉

論曰田大令入江甯城與內應者謀納大軍上江兩縣志平定粵匪紀
略及馮景亭顯志堂彙俱載之然皆因張炳垣而牽連以書故其事不
詳惟孫澄之撰大令傳言之最悉嗟乎嗟乎大令在大營時名位甚微
而乃三入虎穴刈賊如草事雖垂成而敗而膽智則迴絕人矣惜乎主
者惡其言直擯之不用設使大帥能愛其才付以精兵千人自爲一隊
吾知出奇制勝功名不下於嘉慶間羅桂二公而乃棄千將如鉛刀俾
鬱鬱無所試晚遇胡公方以河南一令爲發軔之始而值妖氛大熾力
疲於奔命竟以眾寡懸殊勦賊以死哀哉然報

國之忠至今猶凜凜如生軍興以來固多奇士若大令者尤其傑出者
也

鹽運使銜浙江簡用道彭君別傳

李元度

君諱斯舉字鴻軒平江人高祖昌鳳乾隆甲子舉人敦學行祔祀宋九
君子祠君逾冠爲邑諸生好讀兵家言咸豐三年粵賊犯長沙平江令
林君源恩募鄉勇扞圍屬君訓練君選壯士五百人日扃門教以坐作
擊刺法綴鐵環足脛閒令習騰蹕承平久人不知兵見者多迂笑之四
年侍郎曾公治師東下檄林君帥平勇從君抵長沙會賊陷崇陽通城
檄平勇回援壁北界上塔市三月四日悍賊數千驟至君堅壁不動俟
近塹開壁馳之勢若風雨賊敗奔斬數十級越日復悉銳來犯時胡文
忠林翼爲貴東道帥黔勇七百援平台擊大破之忠武公塔齊布亦至
遂偕克通崇旣而塔胡皆別勦平勇亦歸防北鄙君以功
賞戴藍翎選用從九品亡何林君中蜚語撤遣所部君以十一月抵九
江謁曾公從戰小池口五年正月余從曾公入江西募平江軍以君將
中營七月自南康渡湖破湖口每戰君必身先晉府經歷縣丞六年移
攻撫州師次東鄉賊掩至敗之遂破文昌橋壘七馘首數千進圍城
西南大小戰五十有六援賊不時至皆敗之九月以分兵克宜崇爲皖
賊所乘師失利改防貴溪始至賊躡上清司擊走之七年三月賊環偏
貴溪踞弋陽安仁東鄉鉛山金谿皆徧大膊於鷹潭各路賊皆退君擢

知縣五月別賊自上清至君語余曰自軍興官軍止決死戰不用設伏張疑法非計也某請試之乃以千人伏店前賊過及半伏發殲焉九月賊圍貴溪爲我軍所敗遂渡江竄安仁別將率八千人逼賊衝壁將軍嶺皆敗潰世以是益重平江軍是役君晉同知八年師防玉山君領千人屯古城江浙分界處也衢州賊分黨來犯君以計勝之會驟雨港水溢敗賊不能渡斬馘多逾月衢圍以解七月賊自閩出圍玉山我軍破其隧道賊來益眾城中食且盡君忽引余登陣曰賊潛遁矣詰旦將畢走問何故曰君視汲者日昨千人跣河水如織今滅大半矣炊煙亦漸稀不去安待乃伏兵截賊輜重果大獲

詔晉君知府

賞孔雀翎當是時曾公再出視師余請急歸省以所部改隸九江道沈公葆楨未幾改隸君君自是獨將五營爲一軍矣九年駐廣信遣將會攻景德鎮數月下之尋駐浮梁浙江提督饒公廷選以師至甚器君遂疏調援浙十年四月抵浙西有淳安之捷淳界皖越之交踞城賊數萬君壁威坪距城三十里賊迎拒圍其營三市君遣死士潛出詐爲援軍至親出突陣賊崩奔酋自刃之不能止斬首千級是夕棄城遁居民遮

道熱香迎軍聲大震浙撫王壯愍有齡上其功

詔以道員留浙用加鹽運使銜遂自嚴州抵杭王公待以國士六月自臨安出於潛昌化駐千秋關僞忠王李秀成率賊十數萬至或謂寡眾弗敵當引還君曰若此何以對王公遂誓師決死戰賊初至走之翼日大至君親搏戰自辰至未不少卻既而火藥罄乃潰圍出行列不亂故少所失亡王公遣材官數輩覘陣具得其鏖鬪狀拊慰有加命增三營防海甯尋駐蘭溪遣水師會攻嚴州下之賊犯常山軼江西君馳援先是湖北大吏遣蕭公翰慶以軍三千援湖州曰訓字營戰比捷而蕭君死綏軍無所屬王公以隸君君慮弗習也辭之部將愆君乃令訓字六營守常山而自率舊部援廣信亡何常山軍潰爭環君索舊餉閱於衢良久乃資遣之君亦厭戎事而是時王公方檄君權金衢嚴道乃以舊部隸郭君式源令駐防江西會常玉道梗久不得報書王公乃改授代者十一年正月君攜親卒二百赴杭州乞假歸修墓王公慰留命充營務處君建議曰會城食米均自甯紹來由望江門入江岸距城三里許法當築甬道護以兵餉路通則城可守也王公善之有迂其說者八月賊大至君固申前議將卽以屬君適閩中礮至檄君驗放礮裂傷君

額角流血數升。越兩月，乃瘳。議遂寢。時賊已合圍，先踞望江門外，鑿塹數重，柵以木。杭紳胡光墉自甯波運米數千石至，爲賊所闔。城上望見之，莫能致也。城中鼠雀皆盡。十一月二十八日，力竭陷。君分守湧金門，親卒戴迪、英等勸隧城，君不可。曰：「若等各逃命，吾當死。」此間後事無所言。取玉抉拾及小皮冠各一，授迪、英。曰：「家中見此二物，如我至家也。」語竟，持鞞刀格賊，遂被戕。同治二年，杭州復戴迪、英等自賊中逸出，哭訴諸當道，始得君死事狀，而抉拾小冠猶幸在，以致其家。君婦大慟，曰：「此先夫故物也。」事聞得。

旨賜卹，入祀平江忠義祠。君卒年四十有三，以兄子澤濤嗣。龔雲騎尉世職。

論曰：浙爲東南大都會，財賦物產甲天下，而會城鮮蓋，藏米皆仰給。明越二州窳其源，立涸辛棄疾有言，斷牛首天下無，援兵決西湖，滿城皆魚鼈。第論形勢不利，建都耳。若軍民之食猶未計及也。甬道議創自君，城中官民數十萬，無見及者。議果行，良足救敗而眾，且迂之卒以同盡。悲夫！豈運數有不可回者耶？余次君傳，特表此議，以諗後之人。見君議之行止，實浙存亡所係也。謀臧不從，汔用身殉骨，且腐始得以死狀聞。

烏序豈不悲哉

孔雲鶴墓志銘

宗稷辰

曩與雲鶴同號舍見其言簡而貌端以爲同年出自聖門心敬之後登第習館業出爲令罕繼覲乃閱三十年友其從弟字華復友其母弟東菴而知雲鶴行誼特詳逮雲鶴以節死海外殊閔之越三年喪始歸既卜祔於曲阜祖林東菴率其兩孤求志其墓何忍辭君諱昭慈雲鶴其號爲

至聖七十一代裔孫乾隆朝官江南布政使諱傳炯者君曾祖也子諱繼申恬退不仕多善行是爲君祖其鄉貢士有名以善教聞諱廣禧君考也君少孤母夫人爲梅文穆公女孫授以學遂早成由四氏學生舉道光辛巳鄉試至癸巳成進士用庶吉士丙申散館改知縣選粵東之饒平治未三月遭母憂服闋揀發福建隨營效力差往廣東購鐵器尋權莆田沙縣攝興化通判實任古田充甲午同考官調閩縣升邵武丞移鹿港以禽賊勞

賞知府銜未幾擢臺灣知府臺澎兵備道加按察使銜兼督學政又以助餉加二品銜在臺五年威信大著外裔內番皆畏服乃以彰化亂民

不靖危城猝陷遂於同治元年三月二十二日盡節彰化城中

文廟年六十有八事聞

卹蔭騎都尉世職民痛其忠籲請贈諡建祠不能已君爲政先去敝俗之爲民害者其治莆田得人心好鬥之民相戒毋鬥以貽賢父母憂林君帖瞻聞之歎爲其邑昔未所聞邑多孔氏寄籍爲勸義學氣習益變後諭禁鹿港積習勸以懲忿保身尤必治正兇民始憚法罷鬥其爲沙縣知土利藝茶少耕植游民率規其地種之暇則事攘奪君爲拔茶禁之而農桑始興人至今頌焉鑒俗吏利己之病深恥弗爲如古田停采買而罷津貼臺郡捐粟平糶多損己益民推之船政鹽法其裁冗費絕私弊類如此若鬻生徒選取更陋之甚者宜痛刈無所累也自聞粵寇犯閩連界諸郡邑倡捐助餉緡錢十萬出自廉餘節羨尤人之所難也其抑洋酋格以情理竟帖然不競而互市僅於雞籠無擾郡邑沿海孰能及之至治盜勦匪如鹿港斗六門鳳山皆能獲其魁平其亂盜之良或重其賢而避之獨至彰化變起倉卒讎一丞先被戕而援兵不至釀變者實亦非欲禍君也故歿後斂殯歸喪眷屬無損繇素所敬忌而致之彼羣醜尚愧歎曰吾儕有負孔使君夫盜雖欲曲全而守城亡與亡

之經不求生於橫逆之手毅然歸命於先聖之前非用力於仁而不爲
心害烏能致此哉君愛才得真士於膠庠場屋既盡其秀彥而重林君
文察材略白其復父讎可宥而薦之殺賊復故土後累功至提軍人謂
滕公薦韓李生薦郭不是過也其善政不勝書書其大要如此配鄭夫
人前卒楊夫人繼之亦卒子二憲曾憲高皆議敘部郎中女四乃爲之
銘曰

受半文非吾徒虐一民無後乎君取前言警坐隅砥廉矢慎嚴範模苟
利

國家忘身圖聞錢轉糶資流輸力疏溝畝耕荒蕪惠綏齋願長鬱紆未
盡格頑憐憫愚致身殉道夫豈迂不忝儒門良牧夫法宜刻名藏黃壚
趙忠節公別傳 李元度

公諱景賢字竹生歸安人父諱炳言道光六年進士官刑部侍郎公少
豪邁負奇氣不拘小節讀書慕古俠烈士喜任人所難有機權臨事輒
能斷道光二十四年舉人以父子異籍被議黜入貲得復授宣平教諭
改官內閣中書未赴丁父憂閉門讀禮鄉人未之奇也同郡徐撫部有
壬獨器之曰君有應變才將爲國柱石慎自愛公亦以時事多故思得

一當以自效咸豐三年賊犯江甯江浙震動

詔舉行團練法公獨任其事輸重金爲眾倡得

旨加道銜以知府發甘肅用未幾甯國復湖州得解嚴十年二月賊復陷甯郡廣德直趨湖州公時在蘇州聞警馳歸與湖州守瑞春歸安令廖宗元烏程令李澍等籌守禦當是時士皆虛伍官無見錢計莫知所出公曰事急矣今市肆雖空百貨未盡徙也宜權取充軍實事成有以謝父老否亦免爲盜齎遂下令有不聽取者治以軍法不半日事粗集公曰未也今城外民廛如櫛賊至窟其中城將不能守乃縱火燬之江南援兵至賊已圍攻西北城公部署既定納鞞刀乘城誓必死遂約援兵夾擊斬賊數千圍三日而解時二月十七日也有

詔以道員用

賞額爾德木巴圖魯賊繇埭溪攻杭州越十日外城陷巡撫羅公遵殿死之將軍瑞昌公死守滿城未下會提督張公玉良自江甯馳援過湖州公遣將引道復杭州王壯愨公有齡繼爲巡撫壯愨夙知公才至是深相倚湖防事一以委公乃益繕城隍備器械造戰艦築牛馬牆分勸各屬鄉鎮治團練閏三月遣將復長興德清安吉孝豐武康五縣時蘇

常迭警援軍皆調歸惟存新軍三千公悉心校練且添募四月蘇州陷
延及嘉興分兵駐南潯鎮以扼其衝未幾僞輔王楊輔清白宜興溧陽
太湖來犯眾十萬沿城大掠火光燭天刁斗聲聞數十里公閉城堅守
意氣自若會記名道蕭公翰慶自石埭來援轉戰賊境五百里將至湖
州馬躡被害所部敗散入郡城公拊而用之兵力稍厚時賊眾已圍五
門公親督隊開北門出血戰數晝夜斬馘多賊遁二次解圍得
旨以道員記名簡用聞張公玉良攻嘉興公卽帥師出南潯進攻吳江
之平望鎮蹋賊數壘據守之思卽復蘇州成不世功僞英王陳玉成忽
自太湖窺湖郡公急回救賊反乘之師潰賊復踞平望并犯南潯鎮公
再集民兵擊走之六月分兵克廣德州時杭州圍解敗賊仍竄湖屬十
月省城再被圍公帥兵往援圍甫解入謁王壯愍忽湖防告急卽馳歸
賊已至南門之峴山副將劉仁福者故興臺也自平湖潰歸通款於賊
率廣勇二千自昌化來僞爲援兵謀入城內應公偵得實陽治具款之
而止其兵城外陰簡精卒出令人束竹筴於腰爲識圍而盡殲之磔仁
福於市竿其頭示賊賊爲奪氣解圍遁十一月嘉興烏鎮之賊分途來
擾雙林鎮等處王壯愍遣副將文瑞來助勦合民兵轉戰十餘日悉破

其壘

詔以三次解圍功

賞按察使銜十一年正月遣兵再克長興有賊自宜興陸路來犯敗之
會太湖之洞庭東西山失陷全湖皆賊有長興既不能守而北路七十
二漚港時被擾遂於大錢口添駐水師聯絡民兵通節道大小數十戰
皆告捷五月大股賊來踞菱湖鎮公親督水師礮船分路夾擊大敗之
奪賊船數百艘生禽數百人七月平望賊竄南潯鎮與石門賊兩路來
犯皆走之九月賊來益眾乃督水陸軍出鏖戰五晝夜賊始敗退適太
湖賊又來犯夾浦連敗之回郡忽報杭州被圍賊營互六十里餉道絕
遂親率水陸軍往援連破賊隘口二十有奇終不能達城下洞庭東山
賊偵公南向乘虛犯大錢口公急回顧且戰且退既至大敗之奪賊二
百餘艘始遁去而從逆之烏鎗船匪肆掠雙林鎮復遣兵聚殲之亡何
杭州陷公歎曰湖郡成孤注矣惟當效死勿去以報
國恩耳遂與在城文武紳民誓死守眾皆曰惟公命僞忠王李秀成遣
二謀遺書招降公立斬之以書達上海呈江蘇巡撫轉奏始奉簡授福
建督糧道之

命時四面皆逼賊烽惟留大錢口一綫路十二月二十七日大雪三晝
夜冰厚數尺如平地礮艦膠不能動同治元年正月二日賊乘夜來犯
大錢口遂爲賊踞自此內外隔絕餽道不能通矣賊屢受湖防之挫死
傷山積恨次骨掘公父墓相戒勿近攻先是賊陷名城率用地道湖郡
地勢低掘地三尺卽見水技無所施又四面環大河雲梯衝車無所用
惟築壘樹柵漸進逼爲坐困計二月朔公選死士三千誓解城圍繇南
北門出擊各埽十餘壘獲賊糧運入城自是賊糧不復屯近處而城內
外水陸兵勇尙八千有奇男婦十一萬餘口糧且盡越二日奉飭赴福
建新任及

賞加布政使銜之

恩命軍氣復爲一振蓋是時

士甚惜公才寄

諭垂詢江督曾公密令輕裝赴任移其捍衛桑梓之力以固閩疆公感
泣誓死益堅密寄帛書至上海報其叔父炳麟有眾志成城守死善道
之語且云使我家出一良臣不如出一忠臣公之志蓋素定矣自三月
以後軍民羅雀掘鼠食草根樹皮皆盡公言笑如常時縣丞某欲通賊

事露立禽斬之有搜掠者仍按軍法五月三日城陷公大呼曰死無憾死我十數萬軍民爲憾耳賊渠譚某擁至局公冠帶見賊喝曰速殺我毋殺軍民譚曰亦不殺汝公拔刀自刎爲所奪執之去僕陸二自刎死公被執至蘇幽諸獄邏禁甚嚴求死不可得脅降不屈李世賢復爲下士狀百計誘說不爲動遂有遣歸之意譚逆不可世賢赴江北時誠勿殺譚稍稍善視之公見輒詈罵一日攜常熟地圖以詢遽投之火二年三月賊自太倉敗歸揚言公將襲蘇譚逆懼十八日日晡招公飲酒半詰公曰汝通妖兵邪公曰我本官兵何謂通汝欲獻蘇州邪公曰蘇本大清土地何謂獻邪又曰汝死期至矣公仰天大笑曰求之一年而不得今何幸也連舉數巨觥罵益厲譚逆舉洋鎗對擊其胸而隕年四十二有二賊目棺瘞之公身材不踰中人貌偉異口可容拳大小百餘戰皆親冒矢石天性好殺嘗曰吾得殺人下酒乃快事耳所俘賊皆浮白斬之後見曾文正解散歌始悟脅從皆獲免湖州旣陷

廷旨數詢公下落死事聞

優詔褒閔且曰趙景賢係在籍紳士無守土之責集團禦侮每戰必捷迨至孤城困守糧餉軍火俱盡仍堅持數月力盡被執賊匪誘脅百端

矢志不移卒以身殉勁節孤忠可嘉可憫其改照巡撫陣亡例從優議卹且賜諡於湖州建專祠其長子趙深彥一併附祀事蹟宣付史館立傳以彰忠蓋次子趙濱彥潤彥滋彥添彥涑彥均俟及歲時送部引見

賜祭葬

予諡忠節公在繫作絕命詩四章有云亂刃交揮處危冠獨坐時又云厚貌徒爲爾孤忠矢靡他偽忠王本欲送公歸致書以漢壽亭侯歸漢爲言公斥其儼不於倫且曰歸我者之爲知己不如殺我者之尤爲知己也初杭州旣陷公知事不可爲盡遺其家屬出而身居守深彥年甫十二寓湖南聞湖州失大慟服毒死南撫爲奏請

旌卹

贊曰軍興以來死封疆死職死綏者屢指難畢數然皆有民社責也若其以鄉紳毀家紆難率民兵登陴效死抗數十萬之賊血戰三年殄賊萬計迨行省陷列郡盡淪賊猶死守孤城六閱月力竭被執幽繫經年百折不可回卒罵賊以死如公者豈非古今所矧見哉雖然烈士徇名矧千古未有之烈茲其所以獨立千古歟

張忠毅公別傳 李元度

張公運蘭字凱章湘鄉人性沈毅有智略初從王公鑫募湘勇轉戰衡

永郴桂各屬累功洊保同知

特旨賞封典咸豐六年武昌賊上犯從王公馳援獨勦通城賊敗諸石

相橋遂駐通城崇陽告急夜馳百二十里犁旦與王公會大破賊於白

蜺橋論功

賞戴孔雀翎七年從王公援江西轉戰臨江吉安敗賊於樂安新城追

擊至廣昌公功皆最王公卒於軍公與王公開化代其任會吉安賊窺

永豐公敗賊於羅湖橋越日賊復大至公出奇兵敗之野甕橋

詔晉知府加道銜留防安福是年八月臨江援賊犯新喻公擬扼峽江

之橋埠灘師抵獅子山賊忽兩路至勢張甚公揮軍敗其西路明日復

敗南路賊於張村盡破賊壘燔其輜重援賊遁遂移營吉水扼賊三曲

灘相持數日血戰十數次斬逆渠黃錫崑賊不敢越贛江一步十一月

偽翼王石達開悉銳來犯公急渡贛江扼之賊不敢逼旣而連敗賊於

朱山橋高橋中坑等處斬逆目數十人明日又及賊血戰朱山橋石逆

大創焚屯遁遂解永豐圍

詔晉守巡道明年自永豐略定樂安宜黃破磁圭賊巢復南豐建昌
詔加按察使銜七月賊復犯南豐擊走之追及新城之杭山降其眾數
千當是時

特詔起侍郎曾公國藩於家治浙江軍務曾公行次江西賊已入閩擬
援福建疏調公及蕭公啟江各帥所部從公赴廣信適賊陷安仁別將
失利公進擊大破之殲賊數千

賜號克圖爾格依巴圖魯將入閩會新城告急公馳援至則劉公長佑
已破賊賊竄閩公遂由杉關入閩破賊順昌賊出竄甯都劉公追擊之
公以景德鎮官軍失利率所部往援十二月抵李村見數十騎列河岸
公曰此設伏誘我也然我軍初至不濟賊且謂我怯乃揮眾渡伏賊萬
餘突起逆渠八人泚水來犯公礮斃其一猛追之八人者皆瘞遂濟河
塵擊斬馘二千有奇解散千計赭其巢時大雪振旅時衣盡白堅冰凝
鞍鞬不能動九年正月饒州軍敗於牛角嶺賊大至公分兵赴援再殲
其眾於栗樹山六年大破景德鎮賊竄浮梁明日我軍復浮梁
詔加布政使銜是年秋粵賊犯湖南公奉檄回援屯郴州破星子九陂
石塘等巢殲賊萬有

旨除開歸陳許兵備道十年曾公以兩江總督授欽差大臣疏調公赴
皖屯旌德遣將會同提督鮑公超復黟又同破賊於盧村賊遁明年二
月克休甯得

旨以按察使記名簡用五月再復黟盡夷其壘賊踞徽州已一年至是
懾軍威棄城遁公留徽尋以病歸同治元年除福建按察使明年奉
詔援廣東擣陽山石塋堅巢降其眾三千禽巨酋李復猷於連州復猷
石達開餘黨也最狡悍為川黔楚粵患數年至是伏誅邊民醉酒相慶
會英德降賊鄧二復叛嘯聚鶴背山公帥師擣其巢禽斬之三年春平
土寇陳仰古屬閩賊鳴張公帥師往援駐武平九月十一日出隊擊賊
遂北數十里而廣東平遠賊適至乘虛攻陷武平公聞警急回賊從聞
道截出我軍首尾莫能顧總兵賀公世楨王公明高副將雷公照雄等
皆戰死公力竭被執大罵不屈賊怒支解之賊竄後都司湯友德得公
遺骨於亂屍中又得其元於學宮面如生狀聞
天子憐閩加等

賜卹

贈巡撫

子諡忠毅

賞騎都尉世職

詔武平及湖南各建專祠弟運桂累功擢總兵

賞花翎

賜號彥勇巴圖魯先公二年卒於軍

贊曰余初未識公聞王壯武卒後賊適大至眾兇懼公屹然不動聲色

三曲灘諸戰力竭援賊使吉安得竟其功意其人必魁傑非常士及公

隸湘鄉相國戲下余與合肥李相國同綜理營務始晤公貴溪恂恂書

生耳而後死事乃獨慘烈悲夫

彭忠壯公別傳

彭公諱毓橋字杏南湘鄉人隸湘軍勦賊以功敘從九品

賞藍翎咸豐八年隨今威毅伯曾公國荃及張忠毅運蘭合攻江西景

德鎮克之遂復浮梁遷縣丞十年從復黟縣建德等城晉知縣加五品

銜僞英王陳玉成率悍黨竄踞小池驛勢張甚威毅思以計取之命公

與營將蕭公孚泗張公勝祿等帥師當其衝別遣守備李公臣典走聞

道潛焚賊館賊正與我軍相持瞥見火起軍遂亂我軍乘之賊大敗及

大軍進規安慶大破賊於菱湖遂合圍明年三月掘長濠困賊陳玉成率悍賊與城賊夾犯我軍翼毀濠公等前後抵擊鏖戰數日夜適提督鮑公超帥師襲賊後敗之賊宵遁鮑公尋殲悍賊於赤岡嶺我軍遂逼城而軍七月玉成復率黨數萬來援以逆眷在圍城中也公與張公勝祿李公臣典分三路迎敵血戰竟日斬級數千玉成遁越八日而安慶復矣同治元年公會諸營攻克巢縣含山和州奪西梁山濡須口諸要隘渡江破太平府奪金柱關遂取蕪湖得

旨以道員記名簡放

賞毅勇巴圖魯名號換戴孔雀翎夏四月大軍進攻江甯公與諸將分途取丹陽鎮秣陵關六郎橋江甯鎮三汊河大勝關等要隘夷賊壘數十進攻雨花臺賊死拒未卽下閏八月僞忠王李秀成率蘇州賊援江甯凡數十萬圍官軍各壘會疫作公等力疾禦卻之賊用地雷法轟壘壘壞者數矣並以公等力禦得完計苦守四十六晝夜賊智勇俱困十月五日解圍遁十二月公帥師奪取六郎橋隘口二年四月破雨花臺僞城嗣是紫金山富橋門尚方門方山土山七甕橋孝陵衛及解溪龍都湖熟純化鎮散岔鎮諸賊壘以次下公皆在事有功三年正月攻克

天堡偽城五月克地堡新補作名至六月十六日而江甯拔矣冊勳

詔交軍機處記名遇有布政使缺出請

旨簡放

賞一等輕車都尉世職久之補汀漳龍兵備道未赴會曾公國荃奉巡撫湖北之

命疏調公領湘軍赴鄂時河南捻寇猖獗竄掠黃州安陸二郡境公帥師進剿戰比有功六年二月十八日師進次蘄水值賊黨大至眾數倍我軍迎剿多死傷公督隊血戰自旦至日晡馬陷泥淖中被禽賊脅之降大罵不屈遂被害年四十有一公行軍謀勇兼懋尤善審地勢每立營必豫籌出入險夷之路使賊不能劫屢遇巨寇挾全力來攻而軍壘屹然公之力也死事聞

詔旌布政使陣亡例議卹

敕湖南本籍及立功地方各建專祠事蹟宣付史館

贈內閣學士銜

賜祭葬

予諡忠壯

賞騎都尉世職子秀珽併襲三等男爵

贊曰鄙語云尺有所短寸有所長以公之勇智殄十數年負嶠勅寇無所衄及戰斬黃卒死擒寇之難豈誠有所短哉天下之變常出於所備外也然公結髮從軍誓以死報

國久矣視裹革沙場直猶衽席耳豈必死矚下乃爲得所哉

徐剛毅公傳略 孫衣言 代馬端敏公

徐剛毅公平生戰功及其殉難漳州之烈喬鶴儕中丞所爲行狀詳哉言之矣剛毅初從呂文節公出辦賊後在袁端敏公軍中時新貽已官皖未相見也咸豐九年副都統伊興額以怨効端敏辭連剛毅皖撫軍翁文勤公屬新貽往廉其實遂與剛毅相見於徐州相得歡甚每見其議論鋒穎不可一世心服之然猶以爲年壯氣勝未能知其深也是年冬端敏事白復督師來臨淮新貽與剛毅皆佐端敏軍軍中多魁傑智略之士而剛毅獨深喜新貽每縱談天下事卽至夜分或有所拂鬱感慨卽狂呼拍案聲震堂屋新貽每竊語人曰徐公殺氣滿面兩目灼灼光射人是殆終以義烈見人或不謂然也而剛毅屢出勦賊戰卽勝當時所謂馬家樓俞家灣烏衣鎮之捷是也剛毅旣屢有功然與軍中人

語輒不合苗沛霖方自言團練助官兵尤害剛毅遂爲蜚語中剛毅端敏知其必不能相下輒遣剛毅歸治江北團練十一年冬簡授福建汀漳龍道明年剛毅將赴閩復來臨淮相視握手欷歔若不忍別甫抵官旋以攝按察使去漳閩中久無事文恬武嬉不可振刷剛毅每與新貽書輒深以爲憂新貽亦輒復書慰勉同治三年九月新貽奉命撫浙復致剛毅書謂相去漸近可喜乃新貽未至浙而剛毅殉漳州死矣蓋剛毅以三年二月去漳州而粵賊棄浙去悉眾南趨閩闖撫徐清惠公方請以剛毅督全省軍務剛毅遂以署按察使守延平戰輒破賊賊頗潰入粵閩嚴解剛毅以七月還漳州而賊復由粵入閩以九月九日陷永安十一日陷武平十二日陷龍巖剛毅僅得練勇二百五十人守漳州十四日漳州破剛毅被執大罵不屈十七日夜遇害漳旣無宿備又援不至故及於難妻王夫人聞城破知剛毅必死賊先絞死其女文姑亦自經以死一子昭勳不知所終嗚呼烈矣新貽之言不幸而中而剛毅則可謂不負其志矣初咸豐九年安徽布政使李武愨公孟羣殉難廬州其絕命詞有家國艱難空涕泪乾坤維繫祇君親之句剛毅在軍中每喜誦武愨此二語擊節悲歌聲泪俱下蓋其志固先定云

黃忠壯公傳

陳繼聰

黃公淳熙字子春江西鄱陽人沈潛好學博涉書史道光二十七年成進士以知縣需次湖南歷署綏甯會同俱有政聲而天性剛直不肯阿曲以徇時由是爲上官所不悅公遂引疾解組以任內事有未完留寓省城益閉門讀書凡郡國利病政治所宜時務之要及水道方輿靡不悉心研求考證精覈出則青袍布履徒步往來見者莫知其爲舊令尹也會駱文忠巡撫湘中訪求人材廉得公之賢數使人致意勸其仕進而公實無心用世遜詞謝焉駱公愈賢公不置親至其邸彊起之七年秋公始幡然再出攝湘鄉篆甫三月政教大敷清結訟案數百每聽訟不施鞭撻雖宿姦巨猾亦使自輸其情反覆研詰必待詞窮心服而後定讞暇輒匹馬獨行徧歷鄉村務求民隱其所規畫皆爲地方久遠之計駱公知其才識過人堪勝大任方欲專疏薦達而公遽丁父憂去值江右大亂鄱陽已陷於賊公乃閒道奔喪旋奉母來湖南駱公令公募勇千六百人保衛省城九年奉檄會討石達開於寶慶尋勦賊目何文彪於江華又追擊於江藍廳皆大破之九月復追勦逆首賴裕新於楚粵交界之牛尾嶺杉木根黃馬寨等處殲其渠十年率師防堵永州道

州綏甯靖州旋又追勦逆首彭大順於宜章桂陽復其城公威望日著
所部增至三千人號果毅營前後積功由直隸州知州晉知府洵升湖
南記名道當是時賊之犯湖湘者屢爲公與諸大將擊破而四川土寇
蠶起迭陷州縣遙與石達開相句結疆臣飛章入告

天子命駱公爲大帥入蜀討賊十四年春駱公統師由荊州上駛令公
率果毅一軍爲前鋒行抵萬縣而賊何國樑何興順已逼圍順慶矣五
月朔日公督所部赴援賊聞大軍至卽撤圍竄往定遠攻圍縣城公復
兼程往救之則賊眾三萬餘人屯聚定遠西南門外並於南門壩作浮
橋欲圖分股渡江牽制官軍公令諸軍進擊氣皆百倍賊不能支棄營
奔逃公窮追至江干沿途二十餘壘望風皆潰禽斬首逆何國樑及其
黨數千人溺水斃者無數遣散脅從萬餘人立解定遠之圍駱公疏奏
公功

詔加按察使銜公軍旣捷復恐餘賊竄入重慶急謀追勦而賊目彭紹
祖在東岸聞信自下游冒雨潛渡而西收集敗眾二三千人由清平鎮
竄往燕子窩二郎場適其黨朱某又率眾數千人由青岡壩至兩賊合
而勢復張遂爲反噬之謀四面設伏而虛二郎場以待二郎場者絕地

也四山壁立谿谷阻深一縷羊腸盤紆曲折公軍至萬古壩離場所二
十里連使探者偵之至則不見一賊詢之民適遇賊問誰之曰賊聞軍
至盡遠颺矣探者還報公遂於月之望夜五鼓統軍前進至燕子窩遇
賊前營曾志友擊之皆走我軍旣昧於地利又視賊蔑如復追之及二
郎場賊反分兩路遶山麓上竄公知有伏急令各營分左右路搜勦而
賊伏已紛起巖阿聞我軍皆逼處於仄徑田中泥淖又深公慮全軍俱
覆令諸將結隊退自督中軍大旗與幕僚候選知縣鄧立心湖南候補
知縣蔡鴻章等各率親兵十數人躍馬前馳未半里賊掩至親兵見事
急爭控馬請退公叱之曰我何可走走則六營將士同盡矣解所佩統
領關防授親兵使歸報主帥而親自搏戰立心鴻章亦突陣而入皆爲
賊害中營參將鄒上元游擊彭克昌都司左春坊望見馳救均中矛死
公遽鞭馬衝陣馬陷於淖遂棄之揮大刀直前賊圍四合公手斫十數
賊而右臂左脇皆中刃血溢出暈絕撲地賊尋擁之去公少甦賊迫令
跪公大罵不屈賊怒抉其首而支解并積烈薪燔之旣而賊遁場中民
拾公遺骸及公之首來獻於軍殮時闔營哀慟駱公在大竹縣以其事

聞

天子詔曰道員黃淳熙追賊遇伏力戰陣亡所部勇丁悉獲保全披覽死事情形殊深悼惜著追贈布政使銜加恩予諡並於四川順慶府城及殉難地方建立專祠公爲人恂恂儒者而駢脇多力習苦耐勞其治軍嚴整有法恩信孚洽遇征討必躬爲眾先嘗日踔百餘里士卒或疲困道路輒令就地休息而率其健者以從及抵賊所則所部往往不及其半臨敵英鷲無前定遠之戰以三千餘人當三萬之眾不過三時之久殲渠盪壘城圍立解祇以不忍殺降致使餘燼復熾及二郎場之役自知已陷伏中奮然以身當之直突橫衝斬其驍悍三四百人我兵死者纔逾百數全部勇丁合長夫五千餘人俱退出免於難器械資糧亦無損失而賊以大創恐官軍復至卽挈眾遁則是戰雖敗而功亦著已論曰黃忠壯公在楚最爲駱公所知胡文忠嘗欲招入幕府而忠壯不之應也駱公言忠壯才任艱鉅卓出輩流之上使得晉任封圻則本朝于清端趙蒸毅之流亞也其稱許至此惜乎干將方試遽遭挫折爲忠臣而不得爲名臣也悲夫

又黃淳熙傳

王闢運

黃淳熙字子春鄱陽人也世農家家令牧牛與傭奴雜作輒尋故書讀

之大父奇其志乃令人學貧不能試府縣或償錢數百人城投卷試卽列高等遂爲縣生員居數年貧益甚躬伐竹木運販江湖閒致資產數千金遂積書通五經三史之學尤習九州方域廣輪形勢畫地圖數十卷道光中以舉人成丁未進士卽用知縣分湖南布衣青鞵非時不謁上官同僚則大詫之性沈毅寡所容納好剛而陵上道光末天下猶號爲承平人重其官州縣初宦踧踖唯謹長吏視淳熙不足置輕重以進士姑容之歲餘署會同縣數月代去以閒居委治長沙發審諸獄訟舊例無所可否淳熙至斷獄如在己有富僧與人訟多通官吏賂請相屬淳熙一訊不直之明日自藩司以下爲說者函五六至淳熙則召僧陳書案上一書輒笞二百遂捶千餘毘入獄訟者盡謹旋署綏甯縣僻小俗悍一以威政爲治羣盜屏息禁絕胥吏扶持良弱縣中疏食水飲二歲大治縣鄰廣西洪秀全亂作而境內清靜上官以淳熙介直欲試困之遣兵數百人到縣防賊索餉縣官淳熙請之不得卽上言綏甯非寇衝不足煩兵今遣兵徒困縣令守土官死於賊有名死兵不可上官服其強會長沙圍急兵餉不發淳熙以便宜發餉給兵事平請抵復不許乃好語陽譽之補官衡陽淳熙旣屢以伉直見疾因此發憤稱疾不

出藩司遂簿責稽考以未完留長沙八年東南已大亂疆臣稍求賢才廉能之士於是曾國藩以侍郎治兵湘衡間聞其名引見甚歡既至九江遂招淳熙將屬以一軍人或甚聞之一夕竟去費用乏絕鬻馬而還湖南巡撫駱秉章用左宗棠言廣用奇吏鎮撫府縣當是時湘勇戰功冠天下縣人文武二品以上近千家聲勢豪赫地大民富知縣常重其選巡撫將起淳熙乃自造門見請之淳熙謝不敢明日藩司牌出署湘鄉委黃令諸州縣皆驚曰此病告六年院司何自委之淳熙知湘鄉土民強弱懸絕多訟難治姦人根株皆託大族強貴有力之家縣令不得行其意卽上書五府辭謝要約顯示其意書出縣中名豪傳觀動色切齒既素知淳熙負氣敢決巡撫方鄉之轉相告語且避此強令淳熙當至其夜出城去者數十人皆杜門自飭不通公事威化大行其聽訟專以摧折姦猾爲本所縛治不問爵秩有罪輒收案大姓悚息小民傳爲神明案行四鄉騎而往暑雨不張蓋鄉人爭言官至矣雖所未往常恐相遇湘鄉地廣數百里民尤苦兩稅土豪吏胥則代貧民輸租其取償責息至數十百倍良懦往往破產官利其便淳熙至令民自納稅羣吏叩頭爭之言小民與官非父子之親今有子隱其父之財者它日民欠

官世受其累淳熙一切不聽乃召會縣中吏役數百人人人計用受值
官自取公費給之有妄取民間者笞死矣淳熙雖廉吏所至善量入爲
出前在會同歲用數百金湘鄉乃至數萬金故能饒贍羣吏吏民皆說
數月政聲流行爲良吏第一以父憂去官姦人相賀於道諸所建置一
日盡罷之所除者盡復之湘鄉民益思淳熙淳熙事在湘鄉者最顯里
巷畫圖歌詠之至其死者老婦孺莫不流涕淳熙至湘鄉五月晡乘章
以其材用未展又居喪不可涖官乃奏令練鄉勇五百人留長沙備賊
當是時鄱陽大亂淳熙父幾不得葬故以母遷長沙兵事方亟遂留領
兵異軍特起無何賊數十萬從江南上至廣西復下出湖南西圍寶慶
湖南兵盡發淳熙從救寶慶屯城下李續宜者自湖北來援負重名簡
默不言兵諸將實輕之援守兵幾十萬各參差觀望淳熙憤怒書抵續
宜言久持必潰續宜不答已而賊大潰去眾又莫肯追淳熙獨率眾進
論功以知府用

賞戴花翎及復宜章桂陽二縣戰力奏保道員淳熙在兵間每忽忽不
樂旦夕思謝去以巡撫遇之厚猶豫未決咸豐十年四川土寇大起數
萬爲聚者不可勝數用兵歲餘未定其年蘇杭復陷三江兩湖軍餉故

仰給四川聞變震恐

朝廷移駱秉章入蜀督兵諸將唯劉嶽昭及淳熙從至荊州嶽昭復留
獨淳熙從秉章以三千人先驅至萬縣聞順慶圍急馳之寇南逸別攻
定遠移兵往去縣二十里止望寇屯城西南連十餘里城東北江水環
繞寇方造浮橋度水東淳熙分三道馳擊之行五里寇整眾從中進當
淳熙卽前搏之寇卻左右軍至遂奔寇聚殊死拒淳熙放兵燒其營寇
大奔二十餘壘悉潰戰三時禽斬萬數淳熙之爲軍善乘勝馳逐敢深
入遇寇卽戰追奔窮日夜蜀寇皆蛾合一戰喪膽以三千人一日夜行
百數十里敗寇三萬蜀人奇偉其功淳熙名大震餘寇在東岸聞敗從
下流潛濟合餘黨南走淳熙欲一戰平定率軍追討之是時道路傳告
楚軍銳甚逢父老問寇所在輒言遯久矣軍士見寇不耐戰爭踴躍赴
擊馳一日或言寇在前二十里遣諜偵不見一騎淳熙輕軍突進寇先
空二郎場設伏以待合兵掩至軍士愕出不意然故易寇追戰寇敗不
退乃反分兩道緣山上淳熙知有伏急整隊將駐以待先日敗寇聞戰
盡合遽絕其後軍恐戰不甚力以淳熙用法嚴懇歸舉不測乃各奔散
淳熙自當寇陷淖墜馬遂獨與麾下百餘人戰死餘眾旣結營自固殺

馬夷竈終夜戒備寇懲前戰畏楚軍其夜乘勝引去駱秉章遣人收集其軍竟終平蜀發端自淳熙也淳熙既以功加按察使銜於其卒秉章乃復論列其績及平昔風操概具疏聞推爲名臣

天子深卹之

追贈布政使以內閣學士例

賜祭葬諡曰忠壯卹其子孫如優例采其行事宣付史館淳熙才識無輩兼長術藝事然特善吏治行陣之用固非其好其將兵三年數十戰及他方略可紀者甚眾非淳熙所以重故不載其於師友誼尤摯與人介介寡合尤顯貴者尤速避之見上官常瞠目而視初治湘鄉或問藩司公識黃子春乎居官聲藉甚果何如人答曰其官聲吾得之耳聞傲兀見之於當面淳熙聞之亦自笑也所治以抑強扶弱爲政湘鄉小民與大姓王氏訟人言王氏必負雖王氏亦自危聽其訟王故理直卒直之人服其公劉氏傅氏共一山爭一墓數百年冢也訟百餘年不決淳熙至令兩族各書葬者男女約發驗不讐者嚴治之兩姓相顧不敢應其訟遂絕大要敏決善億度習於情僞顧不喜鉤距以勤節自勵忍人所不能忍用能絕去顧念獨行其志湖南言吏治者雖甚疾淳熙卒不

能毀其名

贊曰成宣之政傲自州郡法翫盜長上庸下困咎延厲極乃斧其蔓黃
惟邦本弗究其功終亦矯矯踔厲墨銅彼則好諂匪介不容

黃忠壯公傳

王先謙

公姓黃氏諱潤昌字劭坤湖南湘潭人也家貧甚從兄負薪讀書日數
千字有文名爲縣廩生粵寇踞江南公應曾貞幹聘爲軍諮時官軍圍
太湖潤昌建議太湖地險固與潛山賊犄角不易攻不如分兵小池驛
擊援賊陳玉成玉成敗兩縣城賊必遁伏而邀之蔑不殲矣從之皆克
獲如其策賊據安慶不下懷甯人程學啟久陷賊中尤驍桀公獲賊謀
廉知學啟可用入其營說之三反學啟降眾議殺之公力救與臥起飲
食學啟感奮戰敗賊賊磔其妻子學啟戰逾力盡破城外石壘同復安
慶走玉成著績江蘇以提督殉節嘉興諡忠烈公成之也於是皖南三
山賊熾甚曾公國藩欲招之降莫敢往以屬公公單騎至賊巢開示利
害賊皆感動歸者萬人公遂成一軍與諸軍復繁昌南陵太平蕪湖及
魯港金柱關東梁山進攻金陵扼三汊河護官軍運道屢破賊克雨花
臺九洲洲僞天堡地堡二城力戰復金陵歷保至記名按察使

賞花翎勳勇巴圖魯號

賜獎武牌湖南巡撫劉公崑募勇守長沙緝會匪以公統之遣入貴州與席寶田會剿苗賊公督兵入清溪設水師通糧運攻雞鳴關焦溪兩路口克之復鎮遠府衛焚數千苗若議攻施秉黃平通黔瀘驛路會四川援兵寶田遣提督榮維善帥十三營與道員鄧子垣赴之公遂進復施秉破白洗大甕谷瀧降苗賊數十至小甕谷瀧地險狹有黃飄白堡諸隘苗設三卡以待縱榮軍過公繼至木石鎗礮雨集公血戰不得出中礮死榮鄧二軍皆覆同治八年三月二十二日也事聞奉

旨照巡撫例賜卹

予諡忠壯本籍及死事地方建專祠事蹟宣付史館世襲騎都尉兼一雲騎尉公治軍嚴而有恩將弁陣沒哭奠而歸骨其家軍行無擾黔楚開民皆德之年三十有九

史臣曰方楚軍旣復施秉公頗持重欲稍休息觀敵釁而榮鄧二軍促之維善尤猛鷲主客相持莫能統壹用是喪師或以輕進爲公罪非其實也公以二千人人黔三月之內復城三毀苗砦數十前此援黔諸軍未嘗有也功雖不成然已勤矣自軍興以來士徒步起軍伍取富貴不

可勝計公獨雍然有古君子風議論時事多可采不竟其用悲夫

郭光祿公家傳

胡增廓

郭公諱沛霖字仲霽號雨三湖北蘄水人父受城歲貢生性至孝聰穎絕人入塾受經史暇輒留心經濟議論慷慨年十四遭母喪哀毀如成人道光乙未舉人丙申進士戊戌補行

殿試改庶吉士授編修癸卯

御試翰詹擢右春坊右贊善遭父喪服闋後轉左贊善兩充鄉會試同考官時

宣文兩朝勵精圖治累次

召見奏對輒稱

旨託名以道府用發往南河學習初供職翰詹時於河務亟講求抵工後益加擊究每咨詢寅寮父老及弁卒是以洞澈利病謂治河宜識土性水性宜合者合宜分者分因勢利導以馭之則不爲害而爲利否則爲患不堪設想十月檄筦豐工總局兼稽引河每晨親勘至暮與弁卒同甘苦獎勤懲惰百廢俱興凡占數之增減鬆纜之尺寸極微極瑣之事無不斟酌至當力主引河宜逾格寬深俾掣大溜大濬下游安東二

塘雲梯關老鶴河等處先修決口上下之險工全啟各閘洞以分水勢
緩進占緩合龍以期步步追壓到底爲一勞永逸之計異日二次合龍
僉謂寶賴乎此然合而復決則以未盡從公言也先是制河兩帥均重
公初次堵豐工時公與當事不合及緩堵議定某公欲仿嘉慶元年成
案於徐郡北子房山刷隄引水歸黃以利轉漕公力爭不聽糜餉至二
十餘萬而徐州以下運河仍不暢行後議復堵又須籌款某公深以爲
悔故其與人書曰郭公贊之才靳文襄黎襄勤不是過也其推崇亦可
概見矣癸丑三月奉

旨以道員留南河權兩淮鹽運使司兼權淮揚兵備道時廣陵已陷運
司無治所制軍怡公奏請飭公駐泰州督銷引鹽濟餉得

旨允行廣陵爲南北襟喉之地其東南壁虎灣頭金灣舊壩沙河等處
俱爲扼要之所而萬福橋當其衝屢有以堵爲言者公堅持初議寇馬
終不敢過萬福橋一步甲寅七月姜埏莠民及十三里汪曹癘子相繼
作亂公檄州牧鹽捕營會大營之眾先後勦平丙辰正月補淮揚道三
月朔聞揚州兵潰城復陷泰州亦戒嚴公募二萬餘人用奇門九宮法
安營縱橫成行日則旌旗戈甲綿亙如長蛇夜則刁斗相聞火光列布

遠望如繁星之垂芒兵聲大震伏莽讐服迨大兵克揚州人心始定初兩淮鹽莢極盛富庶甲天下卽改鹽法後羣亦以爲膏腴地軍興課稅兩絀昔視爲膏腴者今以荆棘視之故

特簡耆六人僅庚公來二十二日公處極艱危勞心苦思仿劉士安法略爲變通皖揚之餉賴以不匱儲

國裕軍成效漸著丁巳二月回淮揚道本任安撫趙公奏以公督辦裏下河七州縣及通海二州團練公至翁副帥營議進兵所向次年正月公以攻克瓜洲功

賞孔雀翎四月謁河帥庚公議蔣壩禮字河洪澤湖浮山防守事先是甲寅工員議堵禮河公首倡不堵留險遯寇議由是禮河天險得資控扼又以浮山口在洪湖西爲賊必爭地若以重兵守則賊無由窺伺洪湖清淮可以安枕兼可運淮北鹽宜募水勇二千分駐禮河浮山庚公如其策故閱年有五洪湖蔣壩累告急而清淮無虞公卒後大吏撤浮山之眾庚申清河陷矣八月德帥浦口兵潰寮屬謂公不過兼轄揚州耳在此辦善後耳無守揚州責駐紮地在清江浦可至彼辦銷算毋居此危城公不聽勒兵登城激以忠義在城寮屬無一敢言去者然揚州

城闔兵單兼以餉絀公誓與城爲存亡作家書部署身後事九月二日賊擾甘泉山五臺山之軍亦潰兵心愈渙是日戌刻逆眾逼西南兩門然萬炬火光燭天城中士卒僅數百人公激勵皆感奮復募敢死士縋城下殊死戰斬獲甚眾三日黎明賊眾繞攻南門破而入將士競執羈勒鞭馬渡河公手撻之不能禁馳至萬福橋以防東路五日督勇擊賊斬獲甚多張總統國樑渡江攻揚州大破之復揚州十月德帥劾公奉旨削職二月奉

旨發往安徽勝保軍效力公聞

命卽行至定遠翁副帥檄充定遠大營總辦文案時捻逆龔得率數萬人攻定遠公與縣令周怡芳佩濂守城賊圍數重列礮環攻公亦以礮連環排擊死者甚眾復募死士夜出城繞賊後擊之驚走遂解圍追奔十餘里奉

旨賞給五品頂戴龔逆奉捻首張澹並連粵匪陳玉成眾數十萬再攻城時有以文案無守土之責勸者公慨然曰曾爲

朝廷監司若徑去上無以對君父下無以對士民督眾嚴守冒酷暑風雨巡城者八晝夜力憊回寓

少休忽聞東門地雷發卽奮起怒目切齒齧指血書正大光明自盡六
字於壁曰無徒死巷戰可殺寇遂乘馬督十餘人出賊已入公提刀巷
戰刃血濺衣賊少卻復四面縱火攻公公刀起處賊矛輒摧忽一悍賊
從後刺公傷足墜馬叢刺陣亡咸豐九年六月十八日也時年五十有
一幕客金子文茂才福鴻亦同時死難翁副帥以公殉難事上於
朝得

旨復原官照道員陣亡例議卹

予雲騎尉世職公性慷慨好施與雖處艱難之會義舉無不勇爲費數
萬金公歿後官虧七千金賴制軍代償宿逋則至今尙有未償者尤服
膺顧先生日知錄雖在軍旅亦手不釋卷爲

武英殿

國史館纂修時徧閱

史宧官書故於

國朝掌故尤悉邃於術數嘗致書同年友益陽胡文忠曰衍太乙數合
之天象歲在甲子必削平大難再覩

昇平恐某不及見又自知死難日及同治三年金陵恢復捻逆旋亦蕩

平其言均驗日知堂文集三卷詩集一卷外集二卷公牘尺牘各一卷
筆記三卷惟筆記刊行餘俱燬於兵火光緒十四年陳六舟中丞彝奏
准定遠建立祠禮也子階亦攝淮揚海兵備道聘廓掌書記一日出
公行述謂廓曰先光祿公學才卓絕一時大節凜凜使無紀之者恐碩
德懿行之不彰也子其爲作一家傳語未既適山陽許君來述清江近
事眾口稱公之賢後無能繼并惜公之歿者累累百餘語計去公攝淮
揚時已三十餘年矣廓益知公功德之感人者深也又聞公墓側居民
禱雨祈晴輒驗者公子階同治壬戌詣定遠見血書皆黑光緒丁亥公
從子朝吉亦詣定遠則字轉赤次年卽奉建祠之
命嘗攷海忠介坊於崇禎甲申鐫名處血出忠介慟明社之屋公感
聖代褒忠之典盛衰之故則異忠烈之氣則同謹按行述及博采所聞
者傳如左

續碑傳集卷六十一

江陰繆荃孫纂錄

忠節八

湖北崇陽縣知縣師君墓志銘

魏源

道光二十有一年十二月十二日湖北武昌府崇陽縣生員鍾人杰聚黨偏城劫官知縣師長治死事賊遂陷崇陽通城大戰官兵明年正月賊平湖廣總督奏師君遇害始末

詔賜卹如例部議予世襲雲騎尉君故與源同鄉試官內閣又獲交於君之伯父前海州知州亮采故其歸葬也海州命源志其事且銘其幽鳴呼崇陽之事僅爲君歎悼哉崇陽圍萬山中胥役故虎而冠凡下鄉催徵錢糧漕米久魚肉其民生員鍾人杰金太和者亦虎而冠與其黨陳寶銘汪敦起而包攬輸納不數年皆驟富與縣胥分黨角立前知縣折錦元憤不治事一惟胥役所爲致兩次鬪漕據巡撫伍長華所批漕石加收一斗之數造扁送縣毀差房武昌知府明峻惟以調停姑息於是姦民日肆湖廣督撫劾罷折錦元以金雲門往署縣事禽金太和置武昌獄勢少戢是年九月而師君至鍾人杰聞上游檄捕甚急疑其仇

生員蔡紹勳所主使也約黨渡河篡取之至則紹勳已遁入城卽賊其家焚其廬并率數百人躡逐入城城門已閉內外鼎沸知縣師君登城諭之不退城內兵役矢石相持竟夜質明城外人益眾踰缺入大索蔡紹勳不得執知縣迫令申狀言蔡紹勳作亂鍾人杰倡義助捕反者并請上司釋金太和歸縣時武昌知府明竣以事在蒲圻距崇陽一日程師君先令其長子懷印潛出城請明竣來縣彈壓而明竣急回武昌於是眾益張師君遂罵賊死妾吳氏及姪女皆殉之師君莅任甫百日收漕無耗羨鍾人杰無可歸罪乃樁斂而哭祭之言己以報仇倉卒誤害良吏事不獲已遂劫庫獄散倉粟造幟械勒境內四十八堡堡出人若干不從者殺然烏合鄉民無槍械距省僅二百餘里使省城以兵數百星夜馳赴立可散黨禽渠而武昌督標兵因夷寇調赴江浙存城無幾總督裕公以兵二百駐咸甯距崇陽百里以俟提督之至賊得日夜脅從眾數千陷通城又攻蒲圻攻通山眾至萬餘幸官兵挫之蒲圻城外殺賊千餘湖南兵亦分守要隘脅從半散明年正月十八日提督劉允孝至先張疑兵大路而正兵由蒲圻進剿黨羽瓦解鍾人杰窮蹙就縛前後調湖南北兵五千餘請帑二十餘萬所獲首從各犯文武生員至

十餘人嗚呼

國家轉漕七省二百載來幫費日重銀價日昂本色折色日浮以困於是把持之生監與侵漁之書役交相爲難各執一詞弱肉強食如園無端及其癰潰俱傷兩敗雖有善者亦末如何而或代受其禍近年若浙之歸安仁和蘇之丹陽震澤江西之新喻屢以漕事興大獄皆小用兵而崇陽則大用兵不甯惟是距崇陽事未二載而湖南耒陽復以錢漕浮勒激眾圍城大吏至調兩省兵攻捕於瓦子山曾波洲彌月始解散俘生員歐陽大鵬等於京師論功行賞與湖北崇陽一轍嗚呼僅爲師君悼歎哉君道光己卯科順天鄉試舉人前任浙江上虞縣死時年四十有五妻某氏以奉母留揚州不與其難子世杰以某年月日歸葬陝西韓城之某原銘曰

國家大政食與戎漕窮肇兵相激春豪民豪胥維蠹同蚌鷸相持乃相攻吁君之難民之恫維賊猶存三代公崇陽未己耒陽從大刑屢修誰劑窮易爰訟師繼需蒙膠庠獄亦承平功法窮匪變云胡通嗚呼漕賦安所終

知府銜廣西龍州同知王君墓表

王拯

粵自道光二十六年閒李沅發等肇亂羣盜蠢然李嘉耀陳亞貴等數十起各以數千百眾豺狼奔突南甯平樂賓州遷江十餘府州縣城橫行攻掠甚或破焉而時賊志惟在焚劫剽奪往往流而不守守吏苟安偷活者多疆臣始務覆匿因之不加察也而龍州同知王君時獨以殉難聞君諱淑元自號秋查浙江鄞縣人道光辛巳舉人考取景山官學教習數會試不第而教習期滿得官知縣分發廣西厯署雒容馬平等縣一充廣西壬辰科鄉試同考官補天保縣知縣俸滿調臨桂縣知縣升龍州同知加知府銜署太平府知府事旋復爲龍州君性淡雅博聞多識尤工書平時好以詞翰自娛及官粵西所厯偏簡一以撫綏不擾爲治吏民親睦公庭如水雖緼袍羸馬而雅歌飲酒蕭然自得調臨桂首邑稱煩劇君雖簿書奔走勞攘而猶以其燕私時與門生幕僚講論遊息顧所至事理而人安之屢以厯資卓異薦聞旣滿臨桂任其替者某君以增民稅錢事致縣幾闕時值久旱城鄉集眾洵禱雨城隍遂纒某神祠中不得出君聞單騎馳往解之且爲眾言時方銀貴錢賤縣官爲民輸納所以不已而議增錢之故事乃平於是人知君之得民若此深也粵盜旣熾君乃翻然厲精鉤距所至以嚴毅稱太平境盜尤

眾咸切齒君道光二十九年復莅龍州時州城做陋巨盜陳三突以二千餘人薄城君與士民誓守時巡撫某公蓋孫謹案此諱盜堅有告盜者輒變色起君與某公雅故於官中事一循故事公牘申聞舉實而已龍事亟君力盡知不可得援乃衣冠出坐堂皇城破盜入而厲訶之盜眾始擁君出弗敢傷君一子從將及郊盜益眾君訶益厲盜乃戕君一臂及舌君猶嚙血面歎盜死盜沈之江一子殉及盜去三日矣龍民始出君尸身首皆裂獨面色如生云嗚呼君以文學而為吏然乃所謂安靜吏也使世吏皆如君則亂可不作即亂作而可不如是亟以君平時温温如彼而及難烈烈如此此其風果何如者哉君死一年粵盜日猖陳三等雖滅而逆全之禍大作有龍門司巡檢日馮元者當逆全擾象州亦衣冠坐堂皇與其二子皆死事與君殊相類而粵之繼君以城殉者惟署永安州吳江署全州曹燮培賊於是踰嶺出勢滔天矣君之難前署巡撫周公天爵奏焉弗詳得如例卹子四某某其某某實從難四光頌以軍功由巡檢擢知縣仍候補粵西錫拯蓋君壬辰同考所薦士也受君雅知光頌請為揭墓之文曷敢辭時在咸豐某年月日

新田縣知縣王君傳略

謝世元

邑侯王公諱鼎銘字新之彝軒其號也山東嶧縣人由廩貢官中書除
新田縣知縣道光九年八月莅任自桂陽州微行至邑投城隍廟宿默
禱神匡所不逮入署常坐堂後吏非召莫入民有屈則籲而進設帷坐
榻上日夜披牘憊則伏案雖盛寒暑不少輟判決限以旬日有疑輒潛
訪之得其情乃已勘驗簡廉從饗餼自具市物悉依民價十年夏旱公
周行田野無倦日禱於城隍不雨又禱於火神不雨乃自械跪暴烈日
中自辰至午祝且泣是夕雲起東南竟西北雨徧人心大愜書院舊設
文昌位於講堂公以師座未安別構講堂兩縣試公而明士咸服朔望
讀法慮民難盡曉恭刊

聖諭及易犯條律竝諸格言徧布市村墟兩載餘邑人士頌其德政將
梓以行公曰毋君等曷指陳邑中利弊使我不至失誤若聲聞過情余
滋愧矣十二年正月公在省垣聞江華逆猺趙金龍之亂慮煽邑猺二
月初歸卽冒雪步歷猺棚諄諄譬諭賞賜其老幼回署復召猺長曉以
國法賜酒食給身符以安其心是時邑千總李英帶兵赴江華金龍犯
藍山甯遠逼邑境公與教諭羅廷贊訓導陳詩率紳士日練鄉勇以守
突聞提督海凌阿副將馬韜被害池塘墟公慮城庫且塌不可徒守語

陳與羅曰君等守我督眾禦諸境二十一日分領鄉勇百餘堵十字墟時賊勢愈張甯遠禾亭墟及邑之南境橋下洞諸處連遭焚掠眾惶惑公曰爾怯乎可退我將往以大義曉之居民泣阻乃還二十三日晡或報曰賊至矣城中驚竄不知所往公朝服北面拜坐堂皇以待書於几曰爾果仇我新田當殺我切勿傷我百姓是時隨公者鄭忠李政二僕爾典史丁禧至公指三尺練曰城亡吾亡於此矣羣吏至公曰爾亦不與死耶俄而百姓哭拜於堂下公哭僕亦哭典史羣吏皆哭公口不能言麾以手而已正訣絕聞外委莫亮策騎至曰賊駐查林鋪距城尙十五里前報者見其來未知其止也公乃定二十四日邑士民及甯遠桂陽境感公之誠心愛民如子也不謀而合者以萬計請勦賊公喜而義之乃徧告於神曰惟神有靈在天茲猺有罪將帥我師是殲是滅若獲勝神之力也不勝銘死奚恤將若蒼生何惟神鑒之卽督眾行眾咸踊躍直抵窩塘距查林鋪里許於是邑東鄉勇由東路進邑南鄉勇由南路進邑西甯東鄉勇由西路進邑北桂南鄉勇由北路進賊聞大驚乃前扛大礮後列鳥槍分隊出眾有難色退守百餘步或登高呼曰此空礮也亟奪之賊舍礮持槍刃併力齊赴眾奮擊之殺賊無算生禽十九

人邑北鄉勇胡文輝正與賊拒忽放槍輝仆賊刺輝輝隨起刃之身中
賊傷其弟文榮甫斃賊回顧輝負而逃是役也眾與賊相持至暮陣亡
者百有奇武生鄭奇光與焉二十五日邑之人合甯之人及桂之臨泰
大富諸鄉人眾約二萬公欲以身先百姓泣阻曰公自愛毋以身試險
公曰我不先則士心不一焉能制勝遂策馬率邑北桂南鄉勇出城南
經花涼亭至牯牛岡北距查林四里諸勇鱗次疊會時賊數十在窩塘
之野見眾至作奔竄狀眾遂追之賊復突出槍礮聲如雷死者無算先
是賊密約土獠供送藥丸邑之獠未肯負公也備而未送先一夜賊入
峒脇取之故槍礮復烈眾遂潰眾欲擁公逸去公曰爾等先走我殿後
可無虞眾躊躇河南王白者邑流人也有膽力大呼曰不可走眾護公
賊追至大肆擊殺公回顧勸曰賊奴殺我百姓曷殺我遂中礮落馬猶
罵不絕口李政掖之白負走賊擊白傷腦遂舍公賊憤公剜兩目斷其
項備極慘毒焉二十七日城陷賊據之縱火焚廬舍火無燄每夕聞兵
馬聲達旦賊驚懼三十日黎明遂遁鄉民得公首於查林得公尸於牯
牛岡之桐子坳昇歸城隍廟焚香拜哭其門下士邑人王尙賓以禮斂
焉公莅邑三年未攜眷屬其出禦寇也先授鄭忠印告之行曰若我生

還則爾返不則持以投上官且歸告先靈諭我子來收我尸邑距學田千餘里往還百餘日外未閉棺待公子來也公甥張繼載在河南聞先公子來迎柩九十二日矣啟視之面目如生公子澤溥孫映庚映軫事聞

贈卹如例

廣西署隆安知縣死節高君筠坡家傳

宗稷辰

君諱延祉字受民別號筠坡宋扈蹕南渡忠節太傅公世則之後多爲越人而君家著籍蕭山自曾祖考贈編修諱錦堂祖考諱西賡父蘅晚封君諱蘭三世爲名諸生封君五子君其伯氏也弱歲遭母喪哀毀逾常人道光庚子與弟延祐同登順天

恩科鄉舉明年同取官學教習會海上有事從軍幄領義旅頗有勞旣奏敘以撫議成撤罷仍教習

景山官學滿三載引

見以知縣注選遊皖江久之庚戌復試取國子監學正補次緩仍就縣令咸豐元年二月廣西寇擾州縣多缺請揀員願選人率逡巡君獨慷慨赴揀

命往無難色與都下戚友別曰家有老親何敢鹵莽從事然已受百里之寄卽當以身奉

國萬一力竭有委馬革耳初至桂林勞辛階巖仙舫二公賞其才氣卽檄權隆安縣縣巖險城敝君至請兵任勦守募死士三百親爲教戰於是繕垣堞勤團練計獲賊首陸鵬理誅之並戮其黨蔡亞全等七十餘人焚巢夷墓境內以肅是秋股首凌亞東擾思恩之感墟勞公方辦南路勦務檄君與右江四邑會勦乃偕土知州黃爲錦毅然入袍墟捕斬六賊十月初三日將至感墟密箐中伏寇起君麾義勇殺賊二百餘賊浸眾或勸退避君叱之曰是何以對天下士乎挺刃督戰不少卻腹中賊矛以十月四日與黃爲錦同死於陣尸久不得迄十二月孤子彥冲尋得父屍於白山之貫村張目裂眦貌如生亡何官兵搜捕空谷中聞呼凌亞東名者乃尋聲偵獲之勞公命剖心祭君皆謂君之靈爽能殺賊云事聞奉

詔優卹給祭葬予世職尋又許本籍建專祠惟贈諡尙有待也君在隆安七十餘日無日不枕戈衽甲居廡數日耳而民感其保衛之誠勇爭購其孤孤立辭曰敢以此違先子之志民遂以其資祠君以從死之僕

隸壯勇耐焉嗚乎蘅晚君有子克忠君有子克孝皆足爲忠節光矣君弟延祐以狀屬其叔父之同年生宗稷辰因次其事爲傳且作論曰越故多志節之士嘗考我

朝死

王事者亦將百人道光中海上之變武職死者葛壯節一人文員死者上海楊尉慶恩一人粵西亂蹂躪州邑以數十計高君甫入仕能死綏以盡臣節視前之逃死後之罹法者不覺然猶寒松之與腐草哉余力成壯節祠而君之祠尙不遑及有餘愧已

武昌知府富察公傳

徐宗亮

公諱明善字韞田世爲富察氏隸滿洲鑲藍旗父昌宜泰知河南開封府以濬賈魯河有功於民祀名宦祠公明決有吏材而以明倫爲寶學嘗作明倫說自勵勵人起家筆帖式歷步軍統領司務擢郎中出知湖北荊州府公之始爲郎也軍校多假鉤緝橫索公一裁以法人稱廉明其治荊州也多善政而修萬城隍續尤偉自道光戊戌後十年閒江水數汎溢沿江郡縣患潦者幾千餘里公獨輸金修隄爲民倡歲戊申水患益鉅萬城隍屹然荊州民始賴以安公尋以循能薦

詔加道銜又二年調武昌當是時粵賊入湖南境甚猖獗武昌大府倚岳州險要不爲城守備公雖郡守然事權不專屬所設施多不見用及賊至倉卒登陴勢不支城遂陷公率眾巷戰死壬子冬十一月也事聞贈中議大夫公卒後有妾葉氏聞訃自經死而荊州諸生林天直者復以起義兵殺賊不克陣亡故嘗奉公明倫說者也世益謂公不苟死云公子慶純官郎中先卒孫恩寶以公廕爲騎都尉

徐宗亮曰予聞富察公名久俗傳王子武昌殉節錄布政使梁公十數人外無微詞者蓋鮮而公則尤著惜所錄文近陋焉今讀公家傳別爲綴次之夫傳記史職而忠義之事足維世者文家容得而假焉蓋今史館列傳率節錄奏牘而已如公之型於家式於國者烏容以弗傳邪

沈大令傳

方宗誠

君諱衍慶字子符號槐卿池州石埭人祖颺賡父作舟俱縣學生重行檢君生而曠祖父埒耳授之書卽成誦年二十中道光乙未進士丙申補行

殿試用知縣分發江西銳意有爲尤善折獄每以小几對簿準情度理眾心洽然代理金谿四十二日卽有故讐灌興國有簫姓爭繼已控大

府提訊矣君初下車進而語之曰吾欲爲一決何如兩造皆稽首君判以孤子無生父之命禮不爲人後又別無應繼之人因援無子耐食例以田租之半永存爲祭產則不繼而祀自不絕以其半分給周親於是

一邑服其明數月閒清積牘三百餘歉歲土匪藉禁米出境據河行暴客貨至抽釐違者覆其舟君廉得其情督役捕治俗以人命爲奇貨旋控旋賄和君痛懲之欺詐寢息丁外艱服闋署安義補泰和尤以除暴安良興學善俗爲務民初以抗糧成習及君治之皆踊躍輸將上官嘉其能移任時民號呼泣留者不絕其在興國安義也亦然以敘加同知銜調鄱陽鄱陽江西繁要地君旣泣任拓芝陽書院廣育嬰堂養濟院施藥餌棉衣棺木置義冢凡興利除害事無不備鄱陽素稱盜藪君親訊漁戶編名冊置巡船梭巡其中獲盜則嚴治如法舟行肅然邑兩遇水災君先設棚山阜以移民居捐廉作餅與粥食之常敝衣雜諸句中

以察厚薄多寡之數弊蠹一清振帑下按戶造冊無濫無漏數月中衣不澣食不飽衝波冒險無稍停全活民以數十萬計上官命緝私鹽君以大荒民窮藉負販爲生持不可屢受詰責不顧麥秋至君乃微行要隘遇販者告以實民感之皆復業

文宗顯皇帝登極下

詔宥求人才巡撫費公開綬學使張公芾薦君治行第一咸豐元年入
覲回鄱陽萬民夾道以迎當是時粵逆竄據永安沿江大吏多世沓以
爲去賊數千里也君獨憂其必下竄慨然曰上不能爲

國分憂下不能爲民保命

朝廷何賴此臣子乎棗鄉守備要編十家牌傾囊爲倡製器械造戰船
練丁壯十日一大閱賞罰必信翻勇遂爲章江最二年賊果東竄三年
正月十五日大雪訛言賊至民震山君短衣佩印挾弓矢縱馬出城見
有掠市肆者發二矢斃一人生禽四人疾呼曰良民歸舟不用命者殺
無赦眾鳥獸散君訊知爲糧艘水手播謠言惑民欲乘機劫掠也治之
如律民心以安是年春金陵失守提督何榮下攻君解糧二萬石濟之
五月賊復上寇南昌巡撫張公芾調君救援君星夜率勇往見密訂破
賊計六月二十四日大破之又料賊必乘虛襲鄱陽也迂道回時樂平
令李君仁元兼理鄱陽不肯去君曰吾土也豈可累子李君亦曰君不
負我我可負君遂共籌守備甫一日而賊至值久雨秋潮大至浸饒城
數尺坍塌處可通舟向之木椿塞河者已茫無津涯賊帆乘風蠡擁上君

親帥勇然礮擊沈之復大雨火器無所施水益闊賊船由上游逼入東門君涉水迎殺梟黃衣賊首標之竿賊退轉由北門梟水入李君截鬪君馳助未及而李君遇害君益怒奮力殺賊賊來益眾君負重傷鏖戰死之七月十四日也賊退家人尋君尸面如生裹衣徧鈐鄱陽縣印蓋自賊東竄時已備之矣年四十一事聞

贈道銜

子尊祠君爲人孝友信義好尊禮賢士自幼慷慨立名節在官慕陸清獻公之爲人常讀其書方賊之未回竄也君料其不忘江楚與人書曰郡中無城可守然裹糧坐甲惟敵是求斷無因噎廢食之理每懷鄉先生金正希吳次尾之遺風不禁拔劍欲起也救援省城自撰楹聯益以取義成仁擔荷綱常自勵卒能不負所言平生論事有深識不爲苟且一時之計道光二十二年英夷議和君上書大府力陳制夷之策而決和議之不可恃侃侃數千言不十餘年而其言皆驗其文藏集中所著有槐卿遺稿六卷槐卿政蹟六卷子二人芝修棠修論曰余曩聞君治行之詳竊歎循吏者弭亂之原也以君之才使得大用於粵西賊未起之地則所以銷患於無形而止患於方來者其必有

道何至斯民之不幸若是邪及讀君論和議書又歎歷官之政績皆不足爲君道矣孔子論臧文仲曰知柳下惠之賢而不與立吾於君亦云

劉令君傳

願壽墳

劉令君同纓者三吳之循良者也字清溪江西石城人以拔貢生令於吳辛亥來上元陸建瀛之潰於楚跳而免臥漁艇腹一日夜駛九百里還叩江甯江甯大搖戰守無可恃而劉令君於是以城守死先是壬子歲十二月

天子以武昌旣陷

詔陸建瀛建大將旗鼓防九江以利便擊賊江上下皆設戍賊狐疑莫敢東嚮而陸建瀛乃始以歲盡過安慶當此之時將軍祥厚都統霍隆武莅駐防旗兵祁宿藻爲方伯而蘇撫楊文定來助守陳鼎者士人也與吳謙吳春奎共建策十三堵禦之策五扼要察奸哨探嚴紀律招技勇守備之策八安民積糧團丁教戰據險守城備器械約號令謁劉令君以告方伯趣亟行之令君獨號召健兒得五百人於是潰警聞矣楊文定亟遁去令君出獄中盜數輩進諸廷曰嗟乎誠壯士賜之食食已則曰汝固無所得生也雖然跳盪汝職也今粵賊且至汝誠能善所死

者則莫如教健兒以戰戰而不死必有功汝則奚願皆對曰願效死卽
盡破其械使日督五百人練陸建瀛之旣奔也倉卒撤戍守自衛沿江
空無兵賊尾而東無留邑陸建瀛旣返之旬日賊麋至薄江甯南郭南
郭故多壯夫業運米所謂符袋行者也聚千人與賊搏且勝請繼陸
建瀛堅弗許曰若然則請毋以巨礮擬我後曰諾眾鋒復合陸建瀛懼
甚越然礮祁方伯亟止之曰投鼠忌器卽奈何令符袋行人與俱死弗
聽礮出祁拊膺大慟曰殺吾多少赤子矣因嘔血翌日而卒眾亟請以
劉令君攝藩政俾專董統陸建瀛又弗許眾瓦解當時向榮追賊急而
琦善陳金綬亦且至賊晝夜治攻具期必破陷令君率其五百人南北
充蔽宵旦暴露飲食不以時又素苦羸疾面目灰槁殆亡人色存謀於
門曰向軍門使者也大軍踵至速啟門納我徵其符則合陸建瀛且進
之令君曰不可惡有賊勢厚若此而客兵之使能完其符信至者哉且
向公號知兵乃不角賊城外而亟入城盡察之果賊所使賺門者也以
是得不敗金陵城版築舊矣賊穴地儀鳳門外幾及城或聞鑿土聲以
告陸建瀛笑曰妄耳顧實備恐計無所出時陰霖浹旬賊晝則攻掠
夜繫燈馬尾往來馳突又撤高座寺阿羅漢像設布南門橋上各置一

鎧守者大驚亟擊以礮阿羅漢設皆金所爲亡能傷明夕復然礮日夜
不得休城堞陟剝危若敗堵將軍曰城不固矣無爲復撼之莫之聽又
昇五千斤巨礮立城上藥作城崩數丈許賊蠶涌入入者二百人矣劉
令君帥所蓄健兒突鬪橫截其尾賊不得出入擊斬殆盡城復完時癸
丑二月初九日也是夜將旦腥霧塞空際人咫尺不相顧賊梯而登奮
幟大呼副將程三光沈鼎戰死城上眾遂潰令君乃以五百人巷鬪賊
至益眾殺聲殷街衢巷陌盡火所部傷潰略盡令君知不可支亟馳歸
冠帶坐堂皇朱書於紙曰示來賊毋害我百姓願以身代榜諸門則急
趨龍王廟前塘水死明日駐防城亦破將軍祥厚都統霍隆武皆戰死
而陸建瀛方攻急時猶乘肩輿過駐防城下人皆見之或曰蓋死於小
營

論曰方令君內諭羣盜外延挹庶士攬涕忼慨有吞寇攘敵之心意其
挈全城以報

天子也遭蔽賢之時與城俱糜終不得一逞將非天耶顧其所成就已
卓於藩翰已士之懷抱知勇居下位不獲濟蓋可勝道耶然當承平累
熙陸建瀛之名滿天下又惡識令君之盡忱烈烈若此哉

又上元知縣死難劉君事略

宗稷辰

癸丑春寇陷金陵聞上元知縣劉君死最烈冒寇而寇賢其官至不忍害其迹不得詳也迨秋八月上虞金友從句容來言爲劉上元甥述上元被難事稍詳苦少文不能敘始末亡何余戚王檠者父子嘗佐上元幕手上元殉節狀投余請爲敘之是固余所亟求而願言者也按狀君名同纓字清溪江西石城人以道光丁酉年選拔貢成均廷試一等除江蘇縣令二十二年權江甯縣時番舶犯順連陷寶山上海駛入大江西上江督牛公出省防緊省城人心震恐爭欲出避君白司道諭民無輕徒見滿城梁礮自衛堞口向漢城請督部牛公開諭駐防軍民撤礮人心稍安復隨牛公禽斬盜魁十數搜捕姦細斷絕內應城中始鎮定泊番舶偪城下知有備未卽進攻當時不致內潰君勞實多三十年權吳縣政益嚴肅善治盜捕一時草竊幾盡未幾移上元吳中例無久任君蒞縣兩年治行最大吏將昇以通州君讓之同寮勤事不爲利動深得士民心咸豐二年冬聞武昌警上防江策於總督不能用及九江師潰金陵戒嚴時總督奔命氣沮布政祁公憂急疾篤君羅掘得金五千兩穀五千石以爲民倡遂儲粟運石修火械登陣力捍三年正月至二

月守十晝夜不少懈初九日地雷潛發忽陷突入賊數百人君揮眾戮之
之城復完乃城中滿漢兵不及一萬賊緣梯而上如蟻集守者驚散君
還署殺二妾朝服坐堂上賊望見顏色凜然皆歎曰若好官吾儕勿相
害也君即躍入署後潭中越日里正得其屍藁葬縣倉之側沒後潭旁
每夜半神燈照爍旗旒紛蕤恍惚書上元縣字銀鐺聲不絕其英爽為
賊中所怖戒勿犯遺殖云君生於口年口月齒口十有口子某侍其親
在石城君死難後江甯守魏君亨達仗戈躍馬迎敵死於馬上前督陸
公死於輿中滿營自將軍祥厚公以下禍極慘然民稱之賊亦稱之者
皆莫如劉君余雖不及見君聞之吾友仙舫嚴子稱其温温若書生智
深勇沈有不可撓之節如見其人儼然猶想見之爰記其略以志餘慕
焉

鎮江太守覺羅豫公傳

戴燮元

昔燮元十五歲始應童子試吾郡太守覺羅豫公一見燮元詩文輒賞
識不置拔諸童子軍明年再應郡試公復拔置前列乃兩為提學使所
黜公勉以讀書勿以小挫自貶損燮元謹受教時咸豐元二年也三年
春粵寇陷金陵大帥駐師江上先期退去而鎮江遂不守自是以後公

久無聲聞而燮元奔走南北十數年每得一名進一官輒念公知己之感不能去諸懷及同治初年始從邸鈔中知公殉節於杭州又越數年讀浙江忠義錄乃悉公死難之大略謹據以爲傳公姓覺羅氏諱豫立字粒民滿洲鑲藍旗人由吏部筆帖式歷升員外郎道光二十九年京察一等授江蘇遺缺知府補鎮江府咸豐三年以失守府城落職留辦軍需支應七年鎮江克復敘勞復原官仍以知府候補十年浙江巡撫王有齡檄調之浙總理糧臺十一年九月賊攻省城王公日坐鳳山門上督諸軍司道官分守各城公偕府縣官往來梭巡晝夜不懈城垂陷猶督親軍開城決戰刃及其膚屹立不動悍賊以礮擊之中額死閩浙總督左宗棠奏請

優卹浙江忠義錄爲公立傳其所述如此公之知吾郡也寬惠有恩尤以甄拔人才爲己任每遇府試及書院試公日坐堂皇手自甲乙至夜不輟一時所取多知名士如鄒增翰李慎傳丁立中皆公所特拔其後或以軍功顯或以科目貢論者謂公有知人之明當粵寇東下時東南之人苦不知兵而督師者皆聞風先遁將士又無戰守志公坐是落職士論惜之及王壯愍撫浙東南大局已潰敗兵單餉絀岌岌不可終日

公夙夜焦勞孤力措拄迨杭城圍急公督親軍出城擊賊奮臂一呼士卒用命及賊刃加膚公猶不懼避遂死於礮嗟乎古之所謂殺身成仁舍身取義者公其可以無愧也夫公精於書尤善行草嘗集顏真卿多寶塔字作詩數十首泐石筆法遒勁逼真真卿公又工於詩惜兵燹後鮮有存者變元辱公知最深猶憶府試日交卷公命之侍坐循循誘掖且告以

殿廷考試詩字之法至漏四下始命變元出乃變元學殖荒落雖倖獲乙科曾不能上金馬步玉堂以副公之期許又不能執干戈衛社稷以刃公之仇讐噫嘻悲哉

書上海縣署縣事袁君死事本末

蔣敦復

咸豐三年秋八月丁丑上海縣逆匪內訶城陷署縣事袁君死之君諱祖憲字又村浙江錢塘人祖枚世所稱簡齋先生詩文名海內官江甯縣因家焉晚歲未有息以弟之子通爲嗣官河內升郡司馬卽君父也君早慧善讀書顧入貲爲丞丞寶山不半歲民懷之需次海上備兵使者知其才遇盤錯輒委君嘗攝巡檢秩卑君弗辭是年春前邑令姚君以漕事註誤去當是時楚氛日熾羽檄交衝上海當江海衝華夷互市

民物富庶曩官斯土者慮無不豢肥鶴飛去茲轉視爲畏途當事者固才君於是以君代姚辦漕辦後五閱月而難作先是兵備舉團練多招閩廣亡賴本地游民跳刀拍張漫無紀律寶山諸生蔣敦復上書諫累千百言大旨以立威爲先一切請仿明威繼光練兵遺意且言有目前甚便而後日或大不便者危詞動之竟弗聽閒以語君亦扼腕度無如何粵匪南下文武逃潰民輕其上及據江省人心益搖夏五六月道路藉藉言小刀會將起事期在秋小刀會者卽游民亡賴東南數省所在皆有君聞之告兵備兵備亦微聞之告營將相視聘貽退而咄咄計無所出以至於敗浙閩廣之黨凡七黨有魁詰之則合辭團練索經費時練局將撤兵備故粵產專倚粵人卒以僨事平時官出輿導騎從戈戟森嚴壯若擁衛日給厚廩皆賊耳目是月朔例邑廟行香有阻者兵備怒然不爲備嘉定以戕官據城報又弗省前數日城外夜聞甲馬聲洶洶月黑鬼車啼氣象陰慘初五日黎明賊蟻擁入縣署是日也有事於上丁君方起肅衣冠坐聽事聞者及從僕皆逃乃命家人掖母夫人踰垣避之出厲聲曰我

朝廷命官若何敢一賊號小禁子者君嘗置之法輒首犯君賊磨至刃

交於胸被十餘創罵不絕口良久仆於聽事賊趨道署兵備亦衣冠坐
堂皇賊露刃前扶而去之或曰與賊敵血盟易服走西門匿夷館海防
同知某聞變先遁衙署擄一空營將亦先遁守備李大均躍馬呼殺賊
手無械之兵舍雉經死同日毀關劫庫縱獄囚城中鼎沸君骸骨在地
無敢收者前上書兵備之蔣敦復與君有舊及君攝縣未通謁至是始
往哭之哀作書貽邑人徐渭仁以大義曉賊目明日往奠之具棺殮如
禮君無子老母弱婦煢煢孤旅賻君之喪卹君之家其事於
朝表君之忠在位有力者責也嗚呼以死勤事君無媿矣草土之人所
太息痛恨者豈獨爲君也哉濡筆紀實俾世有徵云君死事之後二日
江東男子蔣敦復狀

金太守傳

方宗誠

公名雲門字吉子號菊軒徽州休甯人少好學宗朱子以其講說行於
家中道光癸巳進士氣象端凝接人以誠歷仕知縣有惠政嘗爲浙江
雲和縣俗多溺女公閱之申嚴法禁分俸錢以倡募商民日出錢三四
或一錢積公所遇貧不能育女者給錢其母戒期察驗瘦則減其錢民
感焉薄俗始變下艱服滿選湖北知縣洊擢至安陸府知府咸豐三年

署武昌黃州二府時遭粵賊殘破後埋屍數千有腰牌姓名者誌其冢撫卹民隱甚至尤以百餘年來學之不講釀此大患慨然以礪臣節振士氣為己任七月賊之擾河南者復竄入黃州境先是二年冬賊至黃州署知府劉某棄城走至是都司某欲逃示意公公答曰吾生為黃州守死為黃州守耳九月賊攻江西不克復上竄既破田家鎮黃州庫無餉城無兵公念戰守無可恃徒令賊屠吾民無益乃慷慨矢以一身報國衛民謂其友桐城方士超曰天位乎上地位乎下惟忠孝節義之氣足以支柱於其間四字滅天地反覆人道同於禽獸矣予忝守土不能殺賊衛

國又不能干城救民死且有餘罪敢復愛死以玷臣節遂從容作書數十賦絕命詩二章促幕賓曰無官守可速去也十六日賊將入公冠服拜闕辭祖手刃儀門外井側端坐父老環跪請去公曰吾不能保全父老反使父老憐余速去無相累父老知公終不出議負之而趨公急躍入井中賊至出其尸將割截父老號曰此吾清官也吾等求之去卒不肯盡忠死何罪賊乃相詫曰是好官邪為覆席置井側始公以朱子學教

家家人多化之武昌陷時公防守通城妻黃恭人及二女居武昌者皆死節公弟瑾畬正衣冠坐尸側賊至索金帛脅使降叱曰吾兄金某清官也安得金吾恨不能殺爾安有降爾理公嘗知崇陽以捕巨盜活脅從者數百人民感之一賊崇陽人忽驚曰是吾前縣官金公弟邪爲其儕述公崇陽惠政相率去公殉節時年六十子早卒二孫長曰述祖次曰邁祖皆幼瑾畬困武昌時所百計保全者也瑾畬名人銘陷武昌一月不去冠服賊亦不殺至今人咸稱之公死事聞後

賜諡果毅

詩曰自宋程朱大儒倡明正學宋明之世傳其學者高可以窮理盡性開物成務其次亦多不失爲君子之徒歷變亂而不渝其節當時君德昏庸政刑乖錯用小人執權勢而君子之道不行以致失國世之論者乃以爲講學之過令書院不得聚徒講學而卒之化行一家取義成仁如公者依然講學何負於國哉

贈道銜湖北升用知府荆門直隸州知州李剛介公殉難碑記

張裕釗

自洪楊之亂起賊先後轆入湖北者五而省城凡三陷文武官吏死者不可勝紀若宣城李剛介公則其尤可爲悼惜者歟公諱棟字紫藩幼

從侍厥考松江府君官舍久之遂明習吏事又益考求往古成敗得失與當世之務無所不究以國子生試順天屢躋入貲爲縣令道光二十六年選授湖北公安縣知縣咸豐元年調孝感感明年調鍾祥其冬粵賊自長沙轡岳州犯武昌所在奸民相嘯競起鍾祥馬騾子諸匪黨及襄陽之郭大安天門之蓋天王皆巨盜劇魁黨眾大者萬餘小乃數千公親教練壯士千餘人捕馬騾子等數十人斬之偵知郭大安謀以眾數千奔粵賊設伏閒道禽之以歸乘大霧掩擊蓋天王悉俘其眾當是時武昌漢陽相繼陷楚中大震卒上游諸郡帖然無恐者皆公討平諸盜之力也明年賊大掠東走省城復大府以公事入奏擢荆門直隸州調署江夏縣鍾祥數萬人守安陸府署及公署請留公出諭眾泣公亦泣是歲裕釗以新甯江忠烈公聘至鄂城忠烈及鄂中大吏交口一聲稱湖北八州六十縣無李令比者會粵賊林鳳祥等自豫入楚陷黃安趨麻城公以兵馳往擊賊黃岡之鵝公頸江口地大破之窮追至安慶與安慶兵夾擊盡殪諸賊還值宿松警復破賊下倉埠

詔以知府升用

賞戴藍翎踰月賊復自江西大至寇廣濟之田家鎮湖北糧道徐君豐

王漢黃德道張君汝瀛檄公往連戰皆捷最後戰他將畏懦不進公卽率所部渡江擊賊賊敗走孤軍追之賊還戰又敗益追至富池口賊知公軍無繼者分舟中賊登岸襲其後公引就水軍水軍走左陷淖中賊乘之與所部八百人皆鬪死咸豐三年九月十日也越日而田家鎮不守賊遂長驅西上復陷武昌鄂中所在糜沸矣事聞

詔贈道銜褒卹有加公安孝感鍾祥之民家祭巷哭如喪其親贖金錢爲營佛事奉木主祠廟中始公爲縣所至於其地遠近夷險豐耗民俗醇訛奸蠹根株人所疾苦盡知之所爲治行之出於至誠人樂爲用雖至頑族皆感涕願效死力故於公之殉難以死哀思之無不至者裕釗以往歲至鍾祥距公死難之歲十有四年矣鍾祥人人爲言公治鍾祥事皆曰吾鍾祥人

本朝踰二百年縣官數李公獨第一惜也殉難死去吾鍾祥數月耳語次淚熒於眦裕釗因益歎公德入於人之心久而不忘至於如此同治三年湖北大吏復奏公死事甚烈在官政績尤卓著請令宣城及死事所建專祠祀之

詔可予諡剛介五年其孤鹽提舉銜湖北候補通判龔雲騎尉雯走書

裕釗請爲公殉難之碑將勒之於富池口富池口在興國州東北六十

里水經注所謂江之右岸富水注之者也爲序而銘之曰
皋皋訛訛有百其偶皆壽而康乘車曳組傑出有公萬目環之翦紆迪
蒙迺父迺師天平何爲民之無賜殲我賢良自今疇恃人之賢公曰善
爲吏吁公之有百始一試克究厥施維國之芘富水之濱潯陽之瀆豐
碑玠璘大江法法流公之名千祀有聲

又李太守傳

方宗誠

君名概字紫藩安徽宣城人父宜範山西孟縣驛丞以循良幹濟存擢
至松江知府君少有文學習知吏事父卒入貲爲縣令道光二十七年
選湖北公安邑故濱江多水患適連歲江漲他守令例請以工代振而
老弱俱無所得食君獨以振務爲先水始至卽貸數千緡載餅餌蘆席
徧給之親稽戶口於四鄉設振局收養棄孩千數百人次年春夏歸其
親黨嚴治攘奪閭里肅然士民懷之而隄工亦次第築修咸豐元年調
孝感二年調鍾祥時大水壞隄君方勘工謀振而粵寇自湖南竄武昌
全省震驚土寇四起君擇邑之壯丁千餘人部伍而訓練之率以徇有
不逞者立禽治之境內無敢爲匪者君復率以治鄰邑之盜屢獲其魁

襄陽巨匪郭大安聚眾數千道府剿捕不利撫之不服挾眾南奔將投
粵寇君聞之設伏於道出不意戮其渠而解散其黨天門巨盜自偪蓋
天王爲暴尤甚君乘大霧率所部禽之以歸羣賊無一得逸者三年春
粵賊大掠東行湖廣總督張公亮基聞君賢擢知荊門州其夏粵寇林
鳳祥等北犯其黨敗回自汜水掠而南陷湖北之黃安趨麻城張公檄
君將兵千人會合漢陽同知張曜孫都司董玉麟迎擊之敗賊鵝公頸
馬鞍山辛家冲賊大潰君獨追至羅田僅餘三百人由英山竄安慶君
復追之聞賊殲始反過宿松適縣有警君爲擊賊於下倉埠敗之其不
分畛域如此八月君回鄂未至適江西賊上竄蘄州之田家鎮田家鎮
者全楚之門戶也時張公已以君前擊賊功奏請以知府升用矣至是
復檄君防守田家鎮後路鎮將督糧道徐公豐玉漢黃德道張公汝瀛
調君救援君念後路緩而鎮急也疾赴之九月賊至君四戰賊皆敗走
又念第防禦終無以制勝也初十日提兵出擊副將張金甲當先水師
繼其後及戰金甲逡巡君獨率所部迎剿賊敗君追之金甲仍不前賊
反鬪君奮勇搏戰斬殺數十人賊復敗君益追至富池口距後軍遠賊
分襲君後君傍江以就水師水師懼轉權而去君陷泥淖中所部二百

人皆鬪死君手刃數賊罵不絕口賊支解之越三日田家鎮陷賊上竄
事聞奉

旨優卹贈道銜公安孝感鍾祥之民間之皆痛哭如喪所親君內行純
篤爲政主於清勤常以平旦坐廳事闢署門聲訴者就而治之中夜乃
歸寢赴鄉懷餅爲食不事行廚恆坐村廟中或大樹下決事鄉民環觀
親之如父母其在孝感也清積牘三百餘在鍾祥巡行四鄉未反署大
府調君署江夏民間數萬環府乞留及君反謁見攀留者日數十百人
又伺於城門肩輿出必驗視唯恐君之去也有幕賓出貌似君羣譁然
以爲君行矣傾城老幼擁之不得前君出而慰解之乃散後君沒孝感
士民請祀之於名宦祠閱七年子雯奉君母來楚公安孝感民爭迎奉
之其得民心如此殉節時年四十一後蒙

特旨賜諡剛介祀專祠子四人長雯襲雲騎尉世職

論曰余始聞友人方魯生於黃州見君偁君忠勇有古烈丈夫風及遊
楚北益得君治行之詳嗟乎亂賊之興也由吏之不職使然使得君輩
數千百人徧布天下守令之中則民將敬愛之不暇而忍作賊乎未究
其用徒以力戰捐軀烏呼惜哉

廣濟知縣陳君傳

方宗誠

君名肖儀字勤泉江西弋陽人年十九筮仕湖北由縣丞擢知縣咸豐三年九月二十七日殉節廣濟年已六十矣先是粵賊入江西署兩湖總督張公亮基疏請以督糧道徐公豐王漢黃德道張公汝瀛統兵扼守田家鎮及田家鎮破徐張二公死節賊撲省城餘賊登岸肆掠濱江州縣多被害廣濟去鎮七十里故無城垣召募鄉兵多望風走君知事不濟持刀端坐見賊擁入數其罪大罵之目皆盡裂抽刀自剄未殊賊縛君曳於市子恩藻奮臂擊賊賊立殺之君罵聲不絕賊鑿其齒血淋漓猶噴血叫讓賊復刳其頰膚盡見骨凌虐三日而激昂慷慨之氣終不衰賊遂解其體爲五遠近聞者悲憤賊去競斂焉始賊舟往來江上姦民覬覦官庫訛言時起九月三日有小隸夜搥門倉皇報曰土匪入矣官役盡走小人備肩輿請急避君厲聲叱曰吾守土官也何所避疾呼賓友曰諸君無死義可急去冠服坐堂上不動恩藻侍側時擔囊盈門外者千百人見君不去大失望天明逡巡遁田家鎮破後按察使唐公樹義在廣濟一夜兵譁亂合署駭散君復端坐如前日自賊起粵西蔓延數省所陷州縣以百計守土者賊來先遁賊起去覩然握符篆治

民事大吏飾辭爲解脫

國家仁厚不忍嚴加之罪官吏遂奉善逃爲上策君常慨曰身爲朝廷官力不能禦醜類甯不能舍一死以答君父教其子曰吾不願以功名富貴傳家但欲汝世守忠孝足矣君爲人剛直闊達政有便於民必白諸上官不從則詳陳是非利害侃侃辨論必從乃已故歷任有政績先是君遭母喪扶襯歸舟泊塘角會夜火發江中舟焚四面皆烈焰君以身伏柩上隨江流下得不死柩亦無恙一時傳奇孝云君之殉節也桐城縣學生趙又良親見之爲余述其事又良耿介君子也論曰吾家桐城城堅民殷富明季流賊數圍困卒保以全民至今頌前令楊公爾銘張公利民之德不衰今粵賊蔓延桐更調縣令數人每聞有警皆挈篋棄城走故民無守志致爲賊所據而如君之效死不去者又無城可依憑天之位置人何若是乖舛哉

書樂城唐公祠

許福成

咸豐三年粵賊北犯畿輔以九月乙巳攻陷樂城知縣唐盛死之先一日有公車兩舉子南還道出樂城聞警避入城以知縣有循聲且同鄉也偕往謁之知縣謂此非避寇地宜速去詰旦親送出城行未及三十

里回望煙塵大起居民扶老攜幼踉蹌踵至皆曰城破矣知縣降賊矣乃引車走避村中數日賊退始詢城破顛末知縣之送行還署也有一監生邀於道者曰賊已至矣請入敝廬一飯然後登陴守具既入室則以微服進之曰好官不可徒死言未畢而賊至監生衣縣令衣出罵賊賊刃之死知縣出曰我縣令也何傷彼爲賊欲降之乃與約曰依我一事請止殺勿傷一民賊許之又謂賊曰止殺所以救民也今閉城無食民且饑死請開門令出謀食賊又許之知縣自出呼於道使伏匿者盡出城中虛無人知縣乃服朝服坐堂皇大罵不屈賊殺之而去樂城之民相與建唐公祠以監生配於戲知縣能使監生願以身代則其平日居官賢可知蕞爾孤城無兵無餉巨寇猝至不能責之以必守但可責之以必死唐公不忍闔城之民同死於賊設計以盡出之然後朝服一罵尤足信其前此之非畏死矣雖以中庸之道繩之其僞降若不可訓世之好議者亦疑焉然唐公可謂智仁勇三者兼之矣

記周蔭芝司馬死事

方宗誠

周憲曾字蔭芝浙江仁和人爲直隸臨洺關同知咸豐三年夏粵賊由揚州北竄圍懷慶

天子命直隸總督訥爾經額總統防剿事宜七月賊解懷慶圍竄山西八月總督奉

命回直隸防守因關二十六日駐臨洛次日賊猝至時士卒俱先分遣追賊總督無兵自隨急調守關吉林兵七百人與賊戰敗潰總督走廣平賊遂入擾畿輔先是憲曾衙參聞賊至石牌村潸然淚下眾哂之曰何怯也憲曾曰非怯也吾死志久定特愚賊入關畿輔未知何如耳賊至眾走憲曾公服坐餉鞘上罵賊死妻蒯氏妾郭氏幕友何戴筐皆殉難賊旋破沙河知縣王衡身中七刃妻妾亦同死破欒城知縣唐盛罵賊不屈賊縛之柱上死尤烈典史陳虎臣死於城上皆後憲曾數日事也銅梁黃啟愚時從戎幕後為余言之

安徽池州府知府陳君源充傳

周壽昌

陳君源充字岱雲湖南茶陵州人幼孤從母夫人受書長益惇學有文名年十九補弟子員道光丁酉以拔貢生舉於鄉戊戌成進士改庶吉士散館授編修八年乙巳冬

召對稱

旨

特簡江西吉安府知府先是君妻易恭人事姑孝從君官京師恭儉勤慎能使君勉於職而忘其貧君邁疾幾殆恭人籲天願以身代刲臂肉和藥飲君君疾以愈恭人終不自言逾年恭人病卒君視殮見臂創叩小婢始知之同鄉公舉孝婦請旌於

朝君

召對時適奏入

宣廟垂問及之故用是擢君至吉安三月調任廣信府有循聲丁母憂歸服闋授安徽池州知府江忠烈撫安徽檄君至廬州助城守君旁午況瘁時時以兵單援絕爲戚一日偕其妻弟知縣易光蕙謁孔子廟徘徊庭樹下指謂光蕙曰異日吾且死於此以無負先師殺身成仁之訓言已各泣然咸豐三年冬月某日城陷君遂死五年官兵復廬州光蕙入城求其屍不獲或告之曰城破之日有四品冠服倉皇道中逢人輒問往文廟宜何從有示之處者遂走不見光蕙思君前語符急往廟中蹤跡則君當日果縊死樹下諸生某就其地具棺瘞之光蕙啟視之悉合遣人護其柩南歸

又評陳太守

徐子苓

余旣志撫軍江公戰守之略益泣然於陳太守之死因技淚而書之公諱源充字岱雲湖南茶陵人由翰林出守吉安服闋補池州旣解任撫軍察其廉檄來廬州分守時雍門城破自經死公居官清靜不苛太守多喜養尊望不接民公勤於聽斷暇則學隸草爲歌詩古文余過江樂池州山水又以太守遂客焉其檄至廬州也余久避地心邑鬱念諸故人存沒永訣公來有日矣亟走問旣至城閉相與對飲達旦翼日公坐戍樓上遣一卒邀余飯是時賊新集鋒銳事冗無停時食時恆迫每晚飯罷余恆呼酒獨酌醉則從老兵相倚而臥公踉蹌攜一僕跨瘦馬遠城句校諸軍事旣上於莫府始歸歸則促余起夜半霜月澄霽每南望公嘗背余而泣閒一出其橐中所攜李王溪韓冬郎詩卷徘徊低誦而余亦兀坐不自聊時時徑醉酒肆中或隔日不相聞問蓋公久壓於長官感撫軍意益自奮固拉余陰爲助而余郡人先人邱墓所託顧事極壞且又不可以誦言嘗撫諸尤不便者藉公以白於撫軍公旣憂思涕泣幾廢明余亦坐是獲重詬一日酒次縱論古今成敗公曰嘻子好言兵迺恆飲何憚一見撫軍樹尺寸功取富貴不愈於槁死蓬蒿中乎且孤城援隔兵單財絀誠於此時一出奇畫椎牛舉事盡殲諸賊頭推兵

而前亦大丈夫所以自見於天下者然也蓋是時客有以鄉兵助援之說要撫軍其大指括羣富人田以助賞出尺書盡赦諸犯法亡命之徒使自效余嘗策其說之不警公故以是相激欲余冒圍出趣籍兵余固謝而客重相促既又敦以撫軍之命遂去羣富人果大譁人各持兩端城破諸賊徒咸以余爲市相持急余走匿山中又一年始得公死事之實然公雖死無有力者爲之關請又無親戚子弟爲左證故有言久而格不以聞有蔡君吉甫者爲余言城破屍塞衢巷賊給人鼻屍數日不得休因以識撫軍於水西門識公於縣學之明倫堂上撫軍脇洞僵積水中公頸繩舌出先是有萬君爲言十七日夜公騎一馬相遇時雍門下揚鞭問明倫堂何處倉皇未及一答語徑相失吉甫陷賊久總七月始逸歸余以吉甫言益信萬君之語不妄蓋二君皆郡人嘗同佐守城故於公之形狀尤詳公在圍中嘗與余追數西臺笑語時事以爲奇識西臺者池州郡署西北隅高可以眺眾峰者也其下草樹蒼蒼神祠幽絕公季立凡嘗與余嘯歌臺上兩公子相從嬉戲挽竹弓放黃泥彈彈子錚錚中老柳上公來拾彈草閒仰天祝禱衣挾弓連發不中擲弓而笑廡外一村婦汲而微哂余與立凡皆大笑旣賊由長沙窺洞庭江

上警日甚立凡時時從余飲酒嘗攜一壺對酌神前悲歌灑泣兩公子
覓棗栗更番進公來余倚醉拉坐草薦上強以酒曰姑飲此他時余輩
欲復團坐薦上悲歌飲酒恐都難得其季立凡益大泣公顧笑曰奈何
乎兩君而酒悲若此嗟乎公死矣去西臺笑語時曾幾何哉乃其遺箚
棄骼暴露星日既久而余不能安其藏其濱行嘉言矻矻論著就湮而
余不能顯於眾其季子然遠在數千里之外顧瞻夢想公死而余不能
一告唁公有子余不能誨其孤公有室余不能周其孥蓋公之視余誠
厚顧後死者即余亦茫不自知夫死所則又以幸公之早能自遂於死
也

候補知府謝君繼超傳 周壽昌

謝君繼超四川人嘗慕班超之為人故名繼超字定侯也辯有口好奇
計善搏自誇兩臂力三百斤實百斤耳初遊京師主子家或有召客者
君與會客醉與或迂語侵其私或怒閉門且擊客君顧旁食案掌筭之
中斷或色然駭問故君曰客誠有罪顧同為客君家不能令客獨辱也
有不釋者視此案或謝君客得解去君旋去予主刑部桂君家桂故伊
相國公子君昔從相國禦英夷江南在軍久習兵事益好談兵居京師

數年不得志迺出游直隸趙薊深冀各州邯鄲井陘盧龍覓古用兵地
出居庸還走山海關望海觀山川阨塞客甚困仍還京值廣西寇起欲
南從軍子資之裝並貽書廣西勞撫軍薦其材於其行也誠之曰子好
以智勇困人終將以此敗慎之既去久不相聞咸豐二年閏邸報則君
以縣丞擢知縣時賊圍桂林君夜率壯士三百人縋城出焚郭外室廬
幾盡斫賊營殺賊數百人而還故有是擢第不知初何功得起家縣丞
也已聞積功至知府

賞花翎大帥賽相國命率潮勇數百援湖南潮勇素驕悍必廣東人率
之否則多不奉約束勇鬪怯戰淫掠視賊倍君恐僨事固辭竟以是被
劾奪官遣戍欽差大臣向公榮借君才奏起謫籍從勦賊上海上海亂
始民變與廣西賊異君欲計降之獨身入城諭賊賊留之君不屈罵賊
賊眾脅君罵愈烈賊斃之事聞復君知府

賜卹蔭如例

史臣曰昔王安石有言辨足以移萬物而窮於用說之時謀足以奪三
軍而辱於右武之國如君者豈但若此哉向使君誦其智勇瑟伏牖下
未必不死卽死視今日何如然世之全軀保妻子者臨事避蕙高位厚

緣以終其生乃更竊竊然能笑君也

祁門令唐君傳 戴鈞衡

唐君名治字魯泉江蘇句容縣人也以舉人大挑知縣來安徽先令桐城值歲已酉大水救災恤民半載內鬚髮盡白移任祁門循聲倍起蓋君德優於才務躬行實踐之學能以仁心布惠政而治煩理劇非所長也當賊犯湖北桐人議守城求賢令尹不得羣思君回桐將請於上官以祁門士民堅留不可得安慶失守君以祁門為徽郡六邑門戶乃倡議合六邑通籌防堵議不果行君遂獨任其事行之一年聲聞於浙浙撫某公寄書獎之咸豐四年正月二十二日賊自擗根嶺犯祁門守嶺者逃君聞警作家書付僕呼同城文武議守城多以迎擊請者君曰諸公為逃計乎乃不敢言越日賊大至君自率勇登西門以當賊衝發礮斃數賊賊以大隊南趨守南門把總李某逃賊遂登城君聞之拔佩刀自刎隨侍力士奪之去強擁君下城過文廟投丹池不死力士者數人復強扛出城行數里望賊至啟民家厝室納之君大呼曰我祁門知縣唐某也眾賊昇入城強易溼衣灌以湯勸降不答日夜以數人守君有黃某者時對君私泣君訝問故曰吾湖北黃州某官子被擄來逃不得

對先生思吾父也越日某隨賊入黟縣去數日復來視君君問黟事曰
官已逃陰勸民納貢矣君大罵曰爲

國家臣子乃如此乎爲我告賊首速殺我毋久困老夫也二月五日賊
將去祁門乃殺君投尸於河後數日網得首又數日乃得其身

論曰力士不知大義欲以不死爲愛君非君死志堅幾爲天下笑矣桐
人知君深聞祁門陷決君必死後聞有出城棲厝室事心竊疑之及見
君家書乃知死志早決且戒墓碣勿書祁門知縣以示不能保城之罪
嗚呼君之志日月爭光矣桐城有任生者城破日始知君署出爲言先
死不得之由其被執後事則賊黃某過桐城與僞職某言者也乃合書
之以爲君傳

君以力士強扛出城賊退後太守某至祁門疑君未死而幕友諱言
其事乃以登城被執報聞太守愈疑之後於河中網得君首又君從
子出示家書太守乃知其殉難而其被執以後事則莫有知者黃某
之過桐若天使之以顯君者人特患無實行耳實則未有終湮者也
初予於桐城陷後檢各友書信無足存者悉焚之至君書則置之湯
雨生將軍呂鶴田侍郎一例心竊計曰賊若至祁門此君必死節也

越數日而果然又聞何子貞編修自湖南入都由湖北江西安徽諸州縣歷數所見僅取三人一吾鄉徐觀察豐玉一鄱陽令沈衍慶一則君謂此三人患難足恃厥後三人皆先後殉難何公可謂知人矣而益以見君之非倉卒遇害者也因作君傳附記之

又祁門知縣唐君傳

方宗誠

君名治字魯泉江甯句容人也中道光乙酉江南鄉試舉人以大挑知縣分發安徽君爲令不才先人然清廉篤實無聲色服食之好所至勤政愛民嘗權知桐城縣歲大水君先時請帑勸分誓於神不沾一錢亦不假手吏胥延邑中公正士按口振施民得實惠而君髮鬚一月盡白次年大水君益拮据振濟當是時江南北被水州縣以百計而惟桐城少餓莩之民君尊禮賢士邑有名儒方先生植之窮老家居前令疾其直嘗以事誣之欲致之獄不得則多方毀於大吏以窘之君至白其冤後以師禮事焉調任祁門益以興利除害爲務勸義倉積穀數千石以備水旱修復東山書院而以禮延方先生爲諸生師嚴緝盜賊獄訟希少君淡於宦情常欲退休然念時方多難不忍也言及國事則泫然曰與其死於家曷若死於

國以報

君父咸豐三年二月粵賊據江甯安徽改省治廬州巡撫棄安慶不守賊船上下無所顧忌君上書陳利害不用祁門無兵依山爲城甚卑陋而徽州以富名賊久覬覦之欲犯徽必道祁君屢言於太守請以兵守險太守不能行其謀而祁之姦民前苦君嚴緝者遂爲賊嚮道四年正月二十四日攻祁門君先作書寄家人言城存與存城亡有死無二身率鄉兵冒矢石嚴守半日礮轟擊數十人城陷後被執勸之降不可陵虐數日亦不屈乃以禮遇之終不食飲賊告以黟縣令率民進金事發怒戟手大罵遂與大洪司巡檢鍾君先後遇害尸沈於河鍾君名普塘紹興人賊欲說降之笑曰吾年逾六十矣卽不知羞恥事而降爾能再活六十餘年邪祁門人傳其罵賊尤烈云

論曰賊躡安徽守土吏殉節死者惟蒙城縣知縣宋君維屏全家以忠烈聞其餘鮮不聞風棄城走或預託防堵出城賊去復覩顏位民上竊國家之祿甚者如廬州知府胡元偉六安知州宋培之銅陵知縣孫潤舒城知縣鈕復疇屈身降賊受辱如奴隸而不忍一死嗟乎死固若斯之難也君生時同僚多戲之以爲愚及今觀之其殆孔子所稱愚不可

及者夫

書臨清知州張君事

謝應芝

咸豐四年春三月十有六日賊陷臨清知州張積功死之往歲賊渠楊秀清陷江甯遣其黨渡河而北抵山東君誓必死而欲令宜人公子避居他所宜人不可曰君死忠妾死節分也公子泣曰父母死忠節子不當死孝耶至是賊攻臨清君守禦十四晝夜外援不至城陷果闔門死難君儀徵人名積功字紀勤嘉慶戊寅

恩科舉人道光庚寅挑發山東知縣歷州縣吏垂二十年悉心民瘼決獄如神明初署臨淄以前政不善撫馭民多流為盜賊君曰是皆吾赤子也以誠招徠之暮年皆歸故業良民獲安而卽墨飢民滋擾大吏檄君往理遂克無事胡城民變檄君撫之民曰是故撫臨淄張爺耶爭叩首轅門請死君諭以理懲以法皆歡呼去曰張爺活我君白面豐頤少慕功名志節殺身成仁之所為晚遇異人俾熟究魏伯陽參同契暇輒靜坐荃系謹案君弟積中師江西周太谷以傳教謀逆誅耳陽湖劉傅禹門嘗過君留飲酒半慨然曰古來忠義之士大都奮死不顧而關壯繆岳忠武之名獨顯其積累非一世之故也又曰他日遇我於天台雁宕

閒一衲之外無餘衣一鉢之外無餘食欲如今日之飯不能矣嗚呼君
既已做屣功名悠然世外而卒慷慨赴義時實爲之謂之何哉然固君
之素志也初賊過冠縣知縣傅士珍自經死典史瞿濬字菊坪常州武
進人也帥鄉勇出敵遇賊於城闕奮馬大呼殺賊賊發鳥槍中額猶揮
眾馳至槍洞其脅墮馬負重傷欲退保於司獄賊驟追及刃刺其胸怒
目掀髯罵不絕口賊剖腹而後殺之孺人呂氏倉猝遺幼子鐸出奔又
令寡媳邵及二女易服毀容匿鄰婦舍中鄰婦毀其垣以迎孺人送女
婦踰垣而賊至持刀問曰孰爲典史妻孺人曰我是也速殺我無害民
家婦女賊以刀指官舍曰走孺人罵不顧賊寸磔之抉腸而去時三月
朔也冠暨臨清接壤兩君皆夫婦同日死難而賊自臨清還冠縣瞿君
之弟翰章年少負膂力在鄰郡聞變馳歸帥鄉勇迎敵死之瞿君長子
鐸早卒余錢氏女甥字君之幼子鐸余妹之壻開業官濰縣典史招鐸
往依焉聞之瞿君少時父母歿於蜀以貧不能歸柩嘗悲憤自經不死
云

宿遷臧公傳

方宗誠

公姓臧氏名紆青字牧庵江蘇宿遷人中道光辛卯舉人自少儻好

談兵所結交多不羈之士當英夷入寇時公見武備廢弛久人不知兵寇至多受殘害因立法團練鄉兵凡萬人備守禦靖逆將軍聞君名聘入幕府公主戰將軍主和奏公名議敘同知銜公曰無功而受賞不可且以和受功不亦恥乎卒辭去自是海內咸知有臧牧庵者咸豐三年逆賊陷安慶據江甯淮南北捻匪乘釁爲亂聚黨多者至數千人與逆賊互作聲勢侍郎周公天爵奉

命治之周公夙重公因疏請公練勇剿匪且言公才可大任聽自成一隊公素有威名捻匪畏之如虎傅之曰老虎兵所至撲滅解散多願歸附效死者周公薨副都御史袁公甲三繼其任亦深倚重之積勦匪功奏

賞四品銜四年冬遂疏請

命公統兵勇來桐城先是桐以三年十月城陷士民先後乞救於舒廬兩營者幾一年不可得袁公時駐兵臨淮念桐人請救之殷也又欲取安慶以截江路遂以人心向化機不可失奏請進剿

天子以臨淮南北扼要不允於是乃復疏請公行當是時曾侍郎國藩已克復武昌破田家鎮順流東下使提督塔齊布羅觀察澤南由陸路

進攻廣濟黃梅

上既先允袁公請復以曾公故

命公速進兵接應潛太時提督和春統兵圍廬州提督秦定三統兵圍

舒城皆久無功

上切責之令速破賊以圖會剿公既奉

命至六安又得曾公書相期會於是遂疾馳至桐兩敗賊於大關呂亭驛追至城下十一月六日也公以兵少不能安營又以舒廬圍師率離城十餘里不斷賊出入餉道以故久無功遂自率兵勇一千圍南門參將劉玉豹同知李安中各統兵勇五百圍東門南門賊衝故已獨當之公治兵有紀律愛之如子其勇精悍敢戰而不妄取民間一錢一粟初賊以土匪目官兵煽惑民聽及見公之兵而民皆大說簞食牛酒日接踵至公宣示固辭以爲吾來未爲民除害而先擾民可乎民益喜多懷義欲助之攻城者時攻城之具未備城堅不可猝下賊既敗於湖北又懼公破城後與湘兵成夾攻之勢也悉力來援十二日公迎擊於天林莊大敗之十四日又迎擊於挂車河七戰賊七北追至陶冲驛凡至桐殺賊甚多獲軍裝器械無數而我兵無一死傷者然當是時公以孤軍

深入舒廬大帥頗忌公不爲接應又不急攻城以壯聲威賊益得專力於桐劉參將李安中皆怯懦無能常賊者方公之追賊陶冲驛也參將同行屢請班師公曰寇未窮也而遽班師賊反撲我師有遺類乎李安中亦屢催公回營防守越日公歸悄然曰此老賊也不乘勝直追雖敗而不散諸君不能戰不能攻又不能守事事須吾一人吾其敗矣安中與公有隙公性剛直亦不能俯仰以和眾也十七日清晨賊援猝至公性過於鎮靜先時有報賊來者公不聽及是急出戰劉李遁走城中賊突出焚營公與邑諸生張勳督勇殊死戰殺賊三四百人以無接應兵賊伏起遂俱戰死是日劉李退走百餘里次日又走二百里賊益肆凡桐人助餉團練之家皆受禍公死後舒廬大帥益持重不敢進賊又得悉力拒會於九江不得下兩湖總督楊需守北岸亦退走賊遂乘釁攻湖北武昌復陷公死時年五十九桐人雖重受賊禍然念公之來秋毫無犯身先士卒無不感泣思公者袁公會公尤悼歎如失左右手事聞上閔卹甚至

賞加三品銜

論曰公至桐余與友人方士超往見之鎮靜從容以其所著易學相質

宛然儒將也忠義奮發急欲削平大難竟以孤立不能成功惜哉公死後余與友人犯難尋其尸見胸面閒被二十餘創可悲也已烏乎自賊陷安徽將吏習爲退避能守者惟撫軍江公能戰者惟公而皆死而致二公於死者皆居然峩冠博帶以生而反歸咎於死者以自解免其不忠之罪焉悲夫悲夫

又宿遷賊公救桐殉難事實

戴鈞衡

桐城以咸豐三年十月陷於賊其次年邑士民先後乞救於舒城廬州兩營不可得都察院左副都御史袁公時奉

命駐兵臨淮念桐人請救之殷也又欲取安慶以堵賊上游巢穴慨然奏請進攻

天子以臨淮南北扼要之區不允於是籌兵選將久之乃得宿遷臧公十一月四日公率兵至桐入小關賊以數百人來禦公匹馬當先分兵三路進斬賊數人賊遂走追過白沙嶺回宿大關次日軍裝至又次日公告同行二將曰聞賊大隊住呂亭今前往決戰勝則移營敗則回宿比至而呂亭之賊奔回城公於馬上計曰今不乘勝追之城外民房明日盡焦土我軍無住足地矣遂率兵直進住二將於東關自率兵住南

門桐城凡六門當是時賊封築其四僅留東南門出入而南門通安慶賊之來援必先犯公念舒廬諸帥率離城數里立營不斷賊出入久而無功故直逼城根以困賊而衝險之地已當之不以誘人也十二日出戰天林莊殺賊百餘人輜重奪回數十輛十四日出戰陶冲驛殺賊偽丞相某斃賊數百人翌日公回營告同人曰昨來戰者老賊也敗而不亂予自挂車河轉戰三十里凡七交鋒幾挫者屢矣而卒以倖勝五戰及陶冲隨行諸君有逃歸者有涕泣請收隊者生事將某亦以請予正色曰公乃懼乎寇未窮也我軍稍卻賊反撲無噍類矣不得已公請堵此我奮馬前也如是者再戰而退向謂賊不足畏今而知不易敵也先是公至桐戴生鈞衡卽勸公擇地立營公以兵少爲辭又勸速破城以清內患同事者激之甚反不肯行十七日晨賊自西南數路來攻城中賊突出火民房兵勇驚潰公倉卒上馬麾下有請公緩出者公曰我不先誰敢先者馳馬過竹林遙見賊旗自遠來而竹林內伏賊出公遂力戰死當道光中年暎夷煽亂海濱公家居團練鄉勇凡萬人日以殺賊爲志及隨靖逆將軍往浙公主戰而將軍主和和議成將軍奏公名議敘四品公曰無功而冒賞予不受也自是海內知公名上年春東阿周

公奉

命來安徽招公入營先後殺擒匪數千袁公繼周公爲欽使亦雅重公及是率兵進剿時曾侍郎方統兵西下九江期與公會公亦欣然以滅賊爲己任乃一敗不救而袁會二公嗟悼如失左右手矣豈非天哉公名紆青字牧庵道光二十三年舉人陣亡後奉

旨以三品銜議卹

論曰臧公之敗也東關二將退走百餘里而後止次日且二百里矣賊探桐境無官軍於是四出焚掠而居民受害不可言桐人感公忠勇莫之或怨獨其執性之偏發機之緩不能爲諱而同事諸將乃欲以桐民受害委罪於公舒廬營中且有聞公死以爲幸者罪無可避遂欲加之不言之人已則無能惟恐人之功蓋乎己自古庸臣鄙夫謝罪妒功以一念之私而壞天下國家大事者可勝歎哉

三忠傳

方宗誠

世焜字顯侯滿洲正白旗人未詳其姓氏所出曾任江蘇常州知府以愛民偁咸豐四年知揚州時當粵逆蹂躪後市井蕭條公至辟草萊招流亡還定安集之民氣少蘇城中無官廨公借居蔣氏園園有桂甚茂

公顏其廳事曰三十六桂軒而跋其後曰百物凋殘此桂獨盛吾願揚民之復生欣欣向榮亦如此也其時賊踞城南四十里瓜洲鎮官軍壁壘林立以扼其北向之道五年春鎮江江甯之賊渡江至瓜洲官軍同時潰散公知城不能守毅然不肯去率鄉兵二百人登城城破巷戰一賊自屋內用火鎗擊公馬仆公墜地被執勸之降公給賊曰釋吾民之被掠者然後吾可降賊以爲信然公俟民去遠卽自刎死三月一日也公無子一妾一女當賊入城時有老婦引入旁舍夾壁中日饋食飲賊破城十三日而退老婦送至大營官酬以金不受曰吾以報吾賢仁太守之德也公殉節之地名梗砣子街頭云

德克登額號靜庵滿洲人亦不詳其姓氏通滿漢文始在家訓蒙爲生繼以筆帖式改武粵賊起從將軍都興阿公都統舒保公至湖北先後立戰功洵擢以副都統記名咸豐七年從攻廣濟公守營壘不得眠者七晝夜牙盡脫爲人善涵養沈靜寡言無事則下帷靜坐坐必直身不稍倚雖溽暑不去長衣待友朋最誠信然諾不輕舒公性峻直公遇事必委曲言之期於有成心極恬淡無嗜好嘗言賊平卽回家授徒暇則垂釣於黑龍江上又常語同人曰吾世受

國家豢養之恩得一日授命疆場則吾事畢矣同治元年秋粵賊由豫入鄂公隨舒公援孝感與邑令韓體震守城被害是爲閏八月二十六日也公有母無子僅一女舒公同治二年亦陣亡

韓體震字省齋河南夏邑人以貲任山東德州州判改湖北知縣歷任光化江夏以清勤得民心咸豐九年冬丁艱去官不名一錢冬僅一裘其妻猶衣棉也同治元年服闋權知孝感僅四月粵逆合豫捻犯楚疆孝感自經屢次殘破後城缺不完君謀修葺之招鄉勇二百人爲城守計君故與都統舒公善因請入援駐城中舒公僅馬軍五十人始解鞍而賊覘兵少由城缺入舒公急上馬堵擊追出十里外君與副都統德公復守城賊後隊至君率勇巷戰手刃數賊賊愈多一勇牽君退君叱之從子某泣挽之君又叱之去身受十傷刀矛鎗子無不備猶大呼殺賊而斃先是賊警至城中居民盡室以行君不令妻女出城城破女被獲舒公救出之君殉難後舒公復入城擊賊城旋復孝感民言及君殉難事與平日愛民之政無不泣下者是秋賊所陷城曰隨州應山應城孝感惟君偪守土職云

論曰余遊楚與蔣公文若太守交太守刺荆門以書告余十年來死事

諸人深知而雖見者惟世公韓君其死最烈而居官亦毫無訾議武人
中尤欽德公之爲人述其事命余作傳以爲是扶正氣之一端也余文
不足行遠感太守樂道人善因綴三忠事論次之

續碑傳集卷六十二

江陰繆荃孫纂錄

忠節九

湖北試用知縣陸君墓表

趙樹吉

咸豐四年粵西賊再陷鄂楚試用知縣陸君維澣罵賊死事聞得旨照知府例賜卹竝建坊立祠以祀

給予雲騎尉世職同治九年余備兵迤西駐楚雄其子樹桀從余遊乞表其墓於是君歸葬十六年矣初君試爲湖北令旣至月餘會城戒嚴君巡歷城防詰奸運饑屢著勞勩大府以爲能久之賊麇至巡撫各官棄城走湘楚賊得入君率其僕吳增手一劍由賓陽門巡城至中和門遇賊厲罵賊斫之增以身翼君被重傷增仆君遂遇害時甲寅六月二日也是夜增復蘇潛起負君屍匿舊館僻處已則裹創出乞食賊中遙爲邏守數月卒不去以此屍得完先是是年春君郵書樹桀曰賊勢猖獗城岌岌恐不守吾讀書三十六年所學何事豈苟圖存活者勉事爾母教爾弟不墜門業爲幸毋以我爲念自後家問遂絕蓋是時君已有必死之志矣君旣死五月而湘鄉相國及塔忠武公率師來復會城增

乃與館人陸世漳具呈君死事狀洎出君屍則面目如生事得白旋
優卹有加而巡撫某公亦卒置於法嗚呼患難死生之際爭於一念若
君者其視某公賢不肖何如邪君原諱遠字鴻猷後乃改今諱字瀛舫
楚雄人由縣學廩生中雲南道光庚子科舉人咸豐癸丑科大挑一等
分發湖北試用知縣年四十有二曾祖某祖某考永鎮縣學生君少孤
貧溺苦於學母失明凡扶持出入飲食下至衣履瑣事必躬必當不假
他手教授昆明館穀所入悉令孺人備甘旨奉母毋餘私天性篤摯蓋
如此嘗手鈔三經折中及他著述庚申家破皆燬於火配某氏子二長
樹渠縣學生龔雲騎尉次某乙卯某月某日葬城西陸家灣先塋陸世
漳者籍江夏君舊館人也以同姓故齒爲伯仲行旣歿君復出貲與僕
吳增扶櫬走數千里卒達楚雄臨窆視封樹泣拜而去可謂義士竝書
之以見君忠貞大節其感人如此俾樹渠鐫而揭諸墓上

追贈道銜貴州候補知州彭君傳

楊彝珍

君諱汝璋字貢甫湖北江夏人父崧毓任雲南迤西道以君才識通敏
習吏事將廉俸納之公得敘君布政司庫大使分發貴州值黃平苗變
益陽胡文忠公時守黎平主軍事才君檄君往苗寨之最險者曰崖門

討之君至以計誘禽其酋次徇諸寨皆下事平晉秩州刺史尋丁母憂服闋再赴貴州署鎮遠縣事初履任舞文吏以君少易之有頃見其摘發奸伏如老獄吏乃大驚皆相率斂跡時粵寇方陷常德妖言流聞君搏集流亡之壯驍者棲之附郭以爲備又捕殺二三土弁之將爲變者人心始安旋受代去署古州同知未受事而黃平之苗復煽格夷仍欲據崖門以叛大府再檄君往平之苗銜前事亟欲甘心君招集羣苗無慮三數萬環之數重君以羸卒三百率城中居民咸登陴日擲瓦礫擊賊先後走十七檄請益兵大府見君能從容草數千言必非危在旦夕者置之坐不救相持九晝夜賊內應起城陷君手刃殺數賊死其僕從死者四人賊怒居民爲君致死悉屠之時咸豐五年六月初三日也事聞

追贈道銜世襲雲騎尉及賊退其弟汝琮求君骨不得以衣冠招魂東歸過鎮遠其民哭之如私親嗚呼可以想其賢矣君死時年三十有二子二念宸念宇

論曰苗窟黔山中負其幽阻叛服靡常今昔一轍屬方內事孔棘遂癘疥置之若崖門彈丸耳部師往定其亂孰以必死責之者君嬰城固守

痛哭請師漢不爲應黔事可知矣然君之死亦烈矣哉

又書彭氏赴狀後

莫友芝

咸豐五年春臺拱廳苗變圍城署古州同知彭汝璋龍里知縣彭毓書等奉檄馳救至勝秉禽數十人因撫降苗遂解臺宗圍而清平縣凱棠凱少苗復起焚三寨五月十一日汝璋毓書馳救次黃平州之崖門司十五日苗攻司城擊退去二十九日復大至城僅數百戶無宿糧又乏水汝璋等所將兵練半撥回勝秉援鎮遠戰守皆不足恃四乞師於鎮遠總兵所遣三百人亦移之勝秉十五告急於省會尙未應漢民范入者與苗通汝璋等雖知其叵測姑羈縻以待援六月三日食盡援不至急馳入衛千總署索范八則已偕千總邢連科之子舉人士義逸去城遂陷連科闔門自裁汝璋毓書皆遇害汝璋毓書當道光末曾從鎮遠知府胡林翼黃平知州徐豐玉勦鎮遠革夷爲羣夷所畏惡至是皆醜之士義亦自殺八月汝璋之弟湖南候補知府汝琮自黔爲其兄以衣冠招魂斂爲其猶子具哀狀徧訃同官時貴撫未實奏苗亂但謂漢夷爭鬪汝璋等往治不得下落此狀出撫軍不自安署貴筑知縣及麻哈知州某某等亟詣汝琮責收歸所赴狀會城士庶以將收彭氏狀爲異

聞爭求彭氏狀一二日傳觀徧窮巷狀益不可收其後彭氏舉喪貴撫
藩臬糧道貴陽守及貴筑麻哈皆不至嗚呼多事之時以英偉才人膏
血原野而當道者處之如此故知黔亂之未艾也

詔建定興鹿壯節祠碑

王閻運

有定興名族曰鹿氏其先以直節忠孝六代相繼祀為鄉賢世載其美
絃冕所興

皇運二百篤生壯節君諱不宗字簡堂即鹽運使君荃之季子文安教
諭君泰吉之孫也風儀頎偉禮孝自童減產萬金以宦昆從年卅有五
始以拔貢生教習八旗官學生又十二年議敘知縣發貴州四年補施
秉知縣前後歷開州修文龍泉桐梓郎岱廳平越州以異績特薦升直
隸知州仍補平越黃綬委佗超翔州郡署安順府黔西州臺拱廳遷知
都勻府再送引見聲聞於天以覲

宣宗克屢

帝心還省未上權守大定明年泣本官五載底績道光卅年廣西寇興
界連都勻羣情波駭奸民朱何洵謀伺變乃設謀悉禽其黨同官貪功
君依實上幾獲讒謗以直得申威略始章院司賴焉奉滿加升銜兼護

貴東兵備道禦獨山之寇解麻哈之圍六載靡甯嬰疾辭任巡撫謂君以忠節之後宜侈力於艱難有感壯心效之以死咸豐五年臺拱苗叛時新平遵義省兵猶盛督撫憚發姑務解網君諫以示弱宜移勝兵長算不從羣苗鳴義遂殺招安二官連奪州縣龍貴凶徒相合來攻食盡援窮吏民疾疫帥厲壯義固一棋躬犯礮丸若鬪雷霆寇伏其勇咨且退舍會督撫來援疑君虛張罷遣救兵奪其郡符七城皇駭三叛踊躍潛師夜旋內宄闕門六年八月朔夜半府城不守自茲浹旬九城淪痛僉以爲貴州之亂失機於此君當斥退之會無官守之譏天開其生於義可全乃闔門積薪與繼妻恭人福山蕭氏舉火自燔奴婢感義六人赴燄於是提督孝順巡撫蔣霽遠感欽遺烈乃懷忠智奏復君官吏部給襲禮部祭葬兵部賜卹國史立傳悉依三品官例有

詔聽許入祀京師保定都勻昭忠祠明年鴻臚寺少卿王兆松以鄉里公義追稱碩德與畿輔人士各合詞論賢請於縣城公建專祠有

詔聽許以蕭氏附祀同治七年貴州巡撫張亮基以黔中士人追述吏政孤城扞寇功烈昭睹請加

恩予謚所任十二各聽民祠同死奴婢併請附祀有

詔聽許謚曰壯節惟君粟沈深之智流慈廉之化敖荆苗疆敷政優優
讞疑禽盜風行若神吏不出門茲歌洋洋循良之惠允合祀典繁豈哀
死而官祠民祭與國黨相望夙承高躅式瞻老成祇奉
詔書遠惟樂公立社之誼近依太常專祠之典棟宇顯啟閔主徘徊咸
告嗣子周咨羣彥謂宜述徽迹表之後來是用伐石西山鐫詞麗牲銘
曰

咨忠節輔高陽屈訐謨竭忠貞祠巍巍明德昌傳六葉繩其良起道長
顯令望牧都勻奠蠻荒苗盜兵侮五常臧弗庸坐受殃矜其憾志勇強
生虎視士慨恍黔茶炭始念功拜三疏名顯章列崇薨昭馨香眷舊里
靈來翔慶陰陰降在旁嗟我士跂其行求良迪作典刑

書黃平州楊刺史死節事

鮑源深

咸豐甲寅冬余奉視學黔省之

命乙卯三月入黔境苗氛方肆過鎮遠吳鼎臣太守語以賊屢攻城堅
守無援恐日久不支相與嗟歎過黃平刺史楊杏農爲言苗初起焚村
堡撲城垣請兵於大府大府不省惟以毋得張皇激事爲諭迨後賊勢
益張守陴力憊乞援書屢上亦惟諭以力守嚴守加勁守等語數月迄

無一兵至今城危岌岌矣星輅過此目擊情形如得一言大府遣兵來
援合城數萬生靈再生之慶也黃平距省垣計程七日乃秉燭作書星
夜馳上當事是夕住行館城上巡守者鐙炬光與鉦柝聲徹且次晨出
城覓城門外懸賊首纍纍道旁男婦數千執香跪乞命聲相續也抵省
晤當事者言鎮遠黃平危急狀當事者曰未得君書吾已檄委員前往
撫苗矣余愕然知言不入姑置之嗣二郡守吏迭次馳羽書來學使署
校官學生員亦馳稟函來僉言苗愈撫愈猖獗城危不可支乞轉達大
府速發兵赴援據言與稟急移之當事不應並聞向僚屬言曰地方官
欲以戰事邀功校官欲以守城表績士民欲殄滅苗以享其土田學使
初至受諸人誑耳吾撫局已成何得因羣言敗之會余以由驛馳奏黔
中苗亂狀奉
旨申飭學臣不得擅言軍務又聞當事者如是言遂絕口苗事自是官
與士民亦共相諒無以乞援來籲者而下游苗患日蔓延以城垣失陷
報者紛紛當事者雖悔之亦無能爲計矣是冬十二月鎮遠府陷吳太
守死之丙辰四月黃平州陷楊刺史死之賊之陷黃平也怨官民守城
日久賊攻城死傷者眾殺城中人幾盡刺史倉卒赴池水未絕賊鉤起

支解之宜人王氏娠數月賊猝入室不及死大罵賊賊亦支解之並刳其胎懷抱中一幼子亦被殺長子十四齡乳媪挈之逃衣以敝服詭言己子至門遇賊疑不類嚴詰之子知不免極口罵賊賊怒殺尤慘刺史治黃平得民心民皆爲死守城屢瀕於危民咸請刺史移眷口入省垣刺史曰我之家室可避爾等家室將安避乎卒不去以故城破合室捐生與合城之男婦同殉嗚呼烈矣聞鎮遠陷吳公死事亦烈惜未悉其情狀故第詳書楊刺史云楊公諱承照江南揚州人丁酉舉人吳公諱登甲陝西某縣人辛卯舉人當事以死節入

奏皆邀

卹典

論曰地方官有守土之責城亡與亡義也無可辭也然嬰城守以待外援旬日期月之閒援兵不至城陷死之死者固無憾也赴援不及者亦無愧也若夫危城告急至於期年之久竟無一兵之援令力竭而就死地死者旣以身殉城九原之下諒祇痛其城之不完必不怨其身之就死特不知坐視其死者將何以爲心也嗚呼睢陽乞師賀蘭無意進兵以致城亡雙忠並殉千載下猶有餘痛焉雖然彼固乞鄰而不應也若

吳楊二公之死後之論者又將何如耶

江蘇卽補知縣于府君墓碑銘

徐子苓

君姓于諱松其先自登州航海之遼東從

龍入關以勳勞隸內務府孟黃旗漢軍佐領曾大父父皆以材武顯君
早承門蔭旣供職授藍翎侍衛性通敏愛奇尙氣喜讀書慕古名將帥
戰陣之略京朝官事簡奉薄君家貧匄衛所旋補松江白糧廳是時

國家財力鼎盛江淮漕賦甲天下而丁媮役蠹費且弛君鈎勒部署又
廉平於法事多辦咸豐元年春南漕改從海運大吏祕不發屆期羣水
手麤而謀變且起守尉令相顧莫敢誰何大吏久才君自松江檄赴蘇
州俾資遣之一夕定水手者運艘之緯夫也多犯法亡命無著籍其輩
或數百人數百十人各舉一魁長號曰綱司綱司生殺重於大府方議
資遣時君上計曰資遣與振卹殊科振卹因歲災穰則民歸業矣資遣
者下脅而上賄也且河運難復明歲脫再來資遣又可嘗試乎因條列
便宜數事大吏不能用已而果然復檄君君固辭弗獲則單騎入眾中
曉以大義變復定其明年春君策資遣之無己也乞差宜興冀自全比
屆期大吏飛檄君而是時粵賊方踞江甯推鋒出羣水手環而嘯呼者

其勢倍前時君至亟請於大吏曰三吳產殖民肥粵賊外窺羣不逞者
內鬩計因此時以資遣之費籍其精壯而訓練之內患弭而外戎有備
是一舉而兩得之也於是大吏悉從其言不旬日得勁卒二千人卽以
其綱司分領而肄焉而是時向軍門躡賊之師築圍江甯賊稍斂蘇州
遂安其明年官軍潰於上海夜漏未盡制軍甫駐節而軍報至則檄君
以所籍卒閉門拒守君進曰兵無常勝窮而來歸猶饑犬然豢之帖耳
就拊迫卽反噬請假半月餉俾餼受於官士歸於伍滬軍其將終振馬
矣乎議定則從數騎要於路俾弁領駛舟河干明布令君威信久著諸
潰軍之長以君故悉如今胥盤之間樵蘇晏然無一人敢譁於途者君
性明決勇於任事上海之役撫軍旣被譴代者廉訪吉兩山公公宿知
君君亦陰自結比復上海君遂以所籍卒從勦鎮江旣成營搏賊銀山
之下戰屢捷鎮江賊仰息江甯旣屢創閉壘潛略高資君以千人馳赴
賊其明日再戰遂渡夾江蹴賊營拔之其勦鎮江也君計斷賊糧比攻
城請先登撫軍以君臂創未合慰止之君固請旣受令以眾夜薄城下
眾梯垣縱火潮勇噪而驚賊賊起燃巨礮登者相繼墜君督前鉛子中
君額仆於牙旗之下昇歸旋卒得年五十有四年咸豐六年丙辰二月

十二日夜也潮勇者粵東剽椎名盜其人儻死嗜利居嘗媾賊賊恆陷之金俾閒軍司軍命者惜焉弗察也以故臨陣輒譁佯進忽潰事幾坐誤蓋往往然而鎮江之役君旣勇於自進一時同列者名位相疑或材能各不相下疆寇在門操戈在室蓋自軍興以來士之蘊負奇倣奮志於功名而躍馬請纓效死倉卒如君者夫亦可悲也歟君死其麾下士千餘人同日哭晝夜無停聲君內行淳厚喜急人之危其在吳中南漕廢矣有同官某者泛常交君嘗周之其人者公私通疾有二女其母前死計鬻以償所負二女泣且走將自沈於河其乳老嫗譬解之曰聞此間有松公者鉅人長者試走籲或見援不則死未晚於是二女偕嫗走且泣夜叩君所長跪泥首白狀君愕然曰何至是雖然吾與若父寮也又同里以分若視我猶父也顧吾獨居若年長若父誠窘吾亟貸以歸若父於是二女復叩頭泣誓畢死不願歸蓋其父某饕餮聽費恆無度方南漕全盛時紈褲子賈而官泥沙其金抵死不變鬻女固所弗卹也於是君假別室迓其友之寡姊篤老者俾同居而時貸某某感愧謝去又二年嫁其女資贈如己出君死二女搶地哭蘇而復絕者再君文士戰輒當敵撫軍旣宿知君格於資未嘗特將也比死騰章入告得

旨以同知陣亡例

賜葬祭蔭一子君事繼母崔太夫人孝配宋宜人前卒子一名贊鏞世職從戎嘗勸君志行未章以某年某月葬君於祖塋之側乞爲文因次其功系而銘之銘曰

佩之垂兮玉石雜而不章駕之騁兮驚驥並而焉行君服則儒行則烈兮厥施未盡鬱英魄兮譏行貞石識潛德兮後有作者載史牒兮

銘東屏太守

吳昆田

銘岳字東屏漢軍旗人甲午同年生有餘齋師受業弟子也家極貧博學多才好爲詩歌以談諧行其諷勸善彈琴嗜金石精篆刻尤喜樵金石殘字畫印章嘗集毛詩句成印章列於屏幅日下祝壽者爭得之以爲榮一時爲之紙貴教讀於英煦齋相國第錫祉子受翰林其弟子也性落拓不羈好飲酒與余深相契每至其家登堂拜母必需醉極歡乙未會試成進士以知縣分發江西之官過余家作十日留縱談天下事一日爲余言曰小人傾陷君子大都遺餘力天道好還理無不報而報常緩若乘人於危而取其財則其報常速余昔教讀英相國家相國以萬年吉地事下獄公子奎耀侍郎奎照京卿皆從之惟錫祉在家相

國論錫龍曰勢必抄家家中絲粟皆

國恩毋許隱匿則請於

朝殺汝錫祉悉出所有於廳事部署未定而

命下提督耆英至門怒厲中有喜色問有先生否其家以余及常州二
客告二客者常州孝廉以知縣謁選主講於相國第者也則命其從者
曰三先生住屋不許動揭於戶蓋律例查抄之家館師不與耆英於是
親行搜檢至廳事見金碧輝煌色有羊脂玉搬指十極精攪而納諸懷
從人遂肆取無所忌常州二客亦從焉余之僕趨而前銘岳呵止之閉
諸室中不令出日夕喧囂定僕出反曰彼二先生皆官也而所得甚夥
主人貧徹骨而絲豪不取豈有說乎余告以得此財必獲天譴僕且笑
且恨而去常州二客不及一年死矣銘岳潦倒至今而幸得一官似天
報不爽然如耆英陽諂事相國而陰構成其禍又利其所有今尙隆隆
炎炎豈報施之道或爽乎抑時未至也昆田應之曰此殆其所憑者厚
天或厚其毒而俟其自斃恐久而敗敗愈酷也若君之此舉則有先焉
者矣友人毛嶽生生甫之先人毛公事見洪北江文集中乾隆間權相
和珅黨人國泰巡撫山東賊私狼籍毛公佐其幕極相得毛公他出適

劉文清公奉

嚴旨查抄得寶國泰下獄毛公走數千里問國泰獄中國泰曰吾遭此禍所蓄金悉以分贈幕中賓朋獨吾兩人至交望君不來幸留一珠以表意出而視之萬金值也毛公曰吾何須此吾且爲公圖以此珠貽中貴人或冀得生也急出候伺而

命下賜自盡毛公私語國泰家人中衣襟有大珠急取之勿失及既斃入搜之亡有矣毛公踉蹌走嗣仕山東刺某州嘉慶林清之變毛公殉節生甫得難贖以此其諸得國泰金者率多死君之言夫豈無徵哉東屏後至江西宰鉛山刺甯都州署廣信府所至有政聲而好古器商彝周鼎秦尊漢玉收集最多爲琴几上方嵌甌而空其下置水畜魚苻藻交橫鼓琴其上以爲游魚之聽也粵寇竄金陵以知府籌饟濟江南軍輾轉至浙江同治閒杭州陷及於難余聞其死歎其義烈何酷似毛公也耆英者後爲宰相以夷事敗抄家賜自盡云

李載文傳

順天府志

李載文字潞帆右文弟少力學亦時時好馳馬擊劍道光二十四年舉人二試禮部不第適粵亂且劇選人畏之載文慨然出謁選

李壯烈表發公墓表

往廣西以知縣用

列傳

廉直自矢能耐勞不解曲事大吏大吏亦才

之多昇以難事

表墓時

粵逆洪秀全犯桂林馬平逆賊李志信聚眾為應

載文躬率兵勇殲之三年巡撫勞崇光上其功得

旨俟補缺後以同知用尋調署平南縣知縣

列傳

平南郭濱江為梧

州門戶毗連潯藤柳慶艇會各匪更番出沒若大鯉魚大頭羊立名字

者不可勝數

表墓

五年艇匪由梧州上竄攻陷潯州郡城分擾平南載文

禦之渡口旋礮轟沈其船匪眾多死餘船退泊三角觜乘勢蹙之殲斃

無數匪復由磐石平田分撲南北兩岸我兵抄襲環攻卻之敘功得

旨免補本班以同知直隸州儘先補用並

賞戴花翎六年五月至七月匪復麇集水陸環攻城堞無一完者礮臺

十有二悉毀載文膺城固守

列傳

困重圍七十餘日告急文數十上

乞援乞餉大吏但空言相慰藉後竟置不問

僕從間道以縣印檄送桂林省城獨激厲兵勇與賊相持千總方源開

城私遁賊乘隙竄入載文率勇巷戰

列傳

手搏賊右股傷忍痛力戰

復斃百餘人力竭自剄不殊被執賊謂公好官將生之載文大罵不已

賊割其舌猶含血噀賊面乃死士卒爭赴賊死者七十餘人縣民皆巷

哭表事聞奉

旨視知府陣亡例從優議卹尋

追贈太僕寺卿銜

子諡壯烈

賜祭一壇入祀粵西京師昭忠祠原籍建立專祠地方官春秋致祭

賞雲騎尉世職

國史列傳

林君殉難碑記

會國藩

嗚呼自余倡率楚師轉戰荆揚二州之域其閒相從死事者不可勝道或貞白無他誓不相背棄而慷慨一瞑志不得少伸名不祿於當世愛之而莫能救焉者尤可悲焉林君源恩字秀三四川達州人道光丁酉科拔貢生癸卯順天鄉試舉人咸豐元年選湖南平江縣知縣二年粵賊洪楊之屬圍長沙其冬瀏陽匪徒為亂明年春通城匪徒為亂三縣者皆與平江壤接君詰姦守隘如防禦水截然不得蝥溢江忠烈公才君之為既為保奏加知州銜又以書播告士友道林君堪軍旅也會國藩治舟師檄君募平江勇五百人以從四年三月賊自鄂中南犯君禦之平江九嶺果大捷同官有忌君者功不得敘又別撫他事中之君也

愜內不能堪而口獨重滯嘗發憤欲一廷辨宿戒設辭甚具至則爲眾所噤害卒不得發或反引咎自責是歲十月隨國藩於九江軍次造次欲有所申理亦不竟白也明年春檄君治湘軍糧臺歸自廣信又治塔軍門忠武公糧臺又佐理鄱湖水師營務十一月又攝理陸軍於廬山之麓姑塘之南而江西巡撫文公聞君賢飛檄調至南昌付以所新募之平江營者君在廬山與一二武人爲儔折節內交武人益不孫嫚辭侵侮或稱書生跬步矍矍焉知戰事君旣痛其獷又口重滯卒無以折之獨夜歎曰丈夫壹死強寇耳終不返顧矣及至南昌領新軍乃稍自喜是時劇賊石達開犯江西連陷八府五十餘州縣六年丙辰三月李元度次青率師自湖口南來君與鄧輔綸彌之自南昌而東兩軍會於撫州疊戰皆捷人心始定賊亦糾合列郡醜類更番搦戰我軍輒卻之又至又大創之疲極不得休息秋九月分軍出攻崇仁宜黃會援賊大至君竟以十七日戰敗死之始君嘗誡其下曰好相保吾與若共命於茲者也至是眾知君不屈相從死者三百餘人君歿二歲咸豐八年四月官軍克復撫州又明年國藩師次於此弔君殉難之所尋逝者之白骨邈然不可復識矣於是立石以表遺跡綴以銘詩以告於不知紀極

之世之一二君子以達予之耿耿銘曰

胡古胡今強吞弱伏佞者力堪訥者魚肉文吏賊深武夫悍激訥者避之負牆屏息忽入戰場萬馬辟易士固難料理固難推災祥顯晦孰執其機昔聞人述言出君口我不知戰但知無走平生久要臨難不苟大信不盟堅可鍤金澆俗所侮鬼神所欽精魂遠矣北斗帝鄉遺骨莫辨蔓草茫茫有欲求之環此石旁

又贈道員湖南補用同知直隸州知州林君別傳

李元度

君諱源恩字秀三四川安縣人道光丁酉拔貢舉癸卯順天鄉試謁選得平江縣知縣咸豐二年秋粵賊犯長沙解圍後瀏陽匪渠周國虞復煽亂距平江界二十餘里江忠烈討平之君以保竟功擢同知直隸州忠烈數譽之以是爲同僚所忌齟齬備至明年侍郎曾公起督師君遂請練兵殺賊侍郎命募平江勇五百人隨征甲寅春賊自岳州上犯君至長沙矣有他賊自崇陽通城犯平江檄君回援壁北鄉之上塔市三月四日賊大至環君壘君逆戰大捷追奔數十里旣而塔忠武公今鄂撫胡公師克通城平江解嚴師別勦則賊仍虜至君屢戰卻之以兵少增募川勇數百忌者謂君賊退益軍爲虛糜君憤甚詣大府自陳而謇

於辭卒莫能自達遂從會侍郎九江軍命治羅忠節糧臺乙卯春從克廣信

賞花翎又治塔忠武糧臺旋任水師營務均邑邑不獲行其志會江軍六百人缺將以君代之又與共事武夫不相能君憤彌甚明年石達開犯江西官軍失利樟樹鎮余奉檄自湖口移攻撫州江西大吏募平江勇三千曰江軍以君及鄧君輔綸爲統將率師來會攻方兩軍之趨撫也江軍克進賢楚軍克東鄉鋒銳甚三月癸酉破文昌橋堅壘五赭其巢旣薄城君壁南門余壁西南隅相去四里賊嬰城拒守堅不可卒拔當是時江楚道梗瑞臨袁吉四郡無一官軍援賊不時至至則合城賊來犯我軍迎擊三十里外輒重創之破賊壘者九大小戰五十有六皆告捷然我軍血戰久盛暑無一日休裏創者十之三病者十四五會鄧君中蜚語去在事者多告退君勢益孤餉日絀宜黃崇仁兩令來乞師謂克宜崇則能拊撫賊之背且勸士民輸餉可得十數萬余猶豫不能決君曰無疑也譬居室者食指繁則必使分任工賈就食他鄉閉門坐斃何益哉遂分江楚軍共五千徇西路九月三日克宜黃九日克崇仁俘斬各數百忽皖賊數千自景德鎮來援急撤宜崇軍官民苦留不遣

將士亦以久飢甫得一飽不能行余告急江西檄江軍曰彪勇者扼東鄉軍心稍定旣而彪軍不果來賊直趨撫州十六日扼河而戰水涸賊驟馬飛渡追而敗諸城下君喜甚顧余曰我軍分出大半決戰尙用命援賊當不足虞也先是君所部之右護軍遣赴崇仁留三百人守壘賊訶知之詰旦出犯先陷右軍遂圍君壁君慷慨諭將士曰好男子努力殺賊無走也眾皆應曰惟公命都司唐君德陞馳入壁掖君上馬君曰此吾死所也子受事日淺其行乎唐君曰君能死吾獨不能死耶從容解金條脫畀其從子某曰若馳去吾與林公死此矣壘破君手劒縱賊力竭死之唐君素驍健格殺十餘賊始被害從死者三百餘人所殺賊相當余正與賊搏戰聞江軍急自率中營救之未至君營火起潰卒爭趨余壁余返壁賊已合圍余痛哭問君狀親卒謬應曰已得脫策馬南嚮去矣余遂潰圍出刃及馬腹者三行十里遇唐君從子某始得君及唐君死事狀悲夫君卒年四十

追贈道員

賜卹如例子蔭光甫七歲越二年撫建克復又明年會侍郎督師駐撫爲立碑紀其事唐君字彥遠甯遠人舊隸副將周鳳山部下以十五日

奉檄來江軍十七日及難

贈遊擊

論曰江楚軍之圍撫州也人數九千有奇耳其時列郡淪陷援賊趾錯於道僅孤軍堵拄其間三月不下眾謂是軍不可用雖君與余亦若無地可自容者迨後官軍拔瑞臨及九江吉安水陸皆二萬人又別以軍禦援賊經年廬乃克之然後知撫州之役君與余所遭蓋獨苦矣烏虜安得起君於九原而與之搯一痛哭哉

江西吉安府知府殉難陳君行狀

沈日富

曾祖毓泰附貢生曾祖母傅氏

祖兆鯨蘇州府學生 贈承德郎累晉朝議大夫祖母周氏 贈

贈安人累晉恭人繼祖母周氏 贈封安人累晉恭人

本生祖兆星國子監生 贈奉直大夫晉朝議大夫本生祖母林

氏 贈宜人晉恭人

父興雨 封承德郎累晉朝議大夫母范氏 封安人累晉恭人

本貫江蘇省蘇州府吳江縣民籍

君諱宗元字保之一字柳平姓陳氏系出後漢太邱長文範先生世家

潁川宋建炎中有甯三者隨高宗南徙僑居於揚州傳若干世至文英
當元季避兵始卜居吳江之同里鎮數傳曰王道登明世宗嘉靖四十
四年進士第由南京御史出守福建邵武府有循聲載吳江縣志名臣
傳王道三傳爲舉人紹文紹文生歲貢生鏗鏗生沂震

國朝康熙庚辰進士官至刑科給事中載縣志文學傳世稱狷亭先生
君之五世祖也狷亭二子長諱士任雍正癸卯舉人是爲君之高祖生
附貢生諱毓泰毓泰生二子長爲郡學生諱兆鯨次爲太學生諱兆星
郡學無子太學惟一子爲封朝議大夫諱興雨遂兼祧焉是爲君之考
朝議生六子分凡序屬奇者爲長房後凡序屬耦者爲次房後故君與
第三弟宗蕃第五弟宗恕皆奉郡學祀而君居長爲冢孫云君以嘉慶
十一年十一月二十一日生於邑之謝天港生而厚重智不外耀年十
七入邑庠旋試高等補廩膳道光十一年膺本省

恩科鄉薦十三年登進士第

廷試得二甲以主事用分吏部派文選司行走尋兼驗封司二十一年
遭父喪歸明年又遭大母周太恭人喪葬畢值英夷構衅故揚威將軍
宗室奕經公奉

命督師江浙以舊屬奏調赴軍前監印及撫議成揚威就逮君送之渡黃易進士卓梅方宰宿遷邀主鍾吾書院二十四年秋服闋尋補驗封司主事擢考功司員外郎咸豐元年擢文選司郎中掌司印三年春京察列一等記名以道府用六月截取期滿奉

旨以繁缺知府用八月

簡放江西吉安府知府冬出京順道乞假歸省四年春由家赴吉安五月抵任以勸捐軍餉出力加道銜明年冬賊犯吉安城守凡三閱月六年正月二十五日城陷死之年五十一君之初至吉安也時所屬泰和縣土賊甫經剿滅瘡痍未復伏莽猶多且自粵匪倡亂禍連數省豫章以西歷郡戒嚴吉安地鄰南楚尤當賊人往來之衝先嘗被寇收復未久君至撫居民揆匿賊行團練籌軍餉凡應行事宜罔弗殫力竭慮上官倚以爲重五年九月突有湖南逆賊竄入府境連陷永新安福二縣漸逼城下君督率鄉勇隨方堵剿賊不得逞未幾臬使周公玉衡率兵來會遂同克復二縣賊分竄袁州臨江二府地吉安危而復安甫兩閱月十一月十四日值冬至節君方集文武僚佐於府署行朝賀禮畢將飲節酒而外報賊已至境君投杯卽起探得賊分兩路一

由袁臨二府地折回一由泰和縣關人號稱五六萬勢甚浩大時城中素練之勇並周公所率以來遂留駐者僅及千人不足以應敵中外洵懼君督飭屬員各據要害守禦二十日賊眾直犯府城君連開大礮斃賊無算賊眾少卻卽遣疾足申報上官乞師賊見數日不動知無外援輒於城外周築長圍日夜攻撲君語周公及諸僚佐曰事急矣非戰無以爲守乃乘風雨之夜出賊不意開城奮擊焚毀賊營數座殺賊數千人奪其旗幟器械賊爲氣沮旋知謀出自君甚恨之期必破城以爲快屢用梯衝地道諸法君皆按法應之與賊相持者半月城中糧且盡軍士饑疲老弱號哭君周巡徧勞勉以大義聲淚俱下由是感動雖婦女童豎皆更番登城君每出戰必先士卒十二月八日與賊接仗身被數創血至足吃不爲動城有缺口君急揮填堞行少疾失足由城上顛蹶至地折其左股然仍蹙蹙而登若無所苦枹鼓少息則治文書遣使閒道赴省告急前後凡十八次并繪援兵繞道地圖且寓書在省同僚乞代敦請周公見勢益迫至齧指血作書糧道鄧公仁堃在省見書涕泣請救上官集諸僚計議咸以賊勢盛省城地重恐倉猝兵餉不能兼顧爲慮不得已檄候補知府某君募勇來援至泰和道梗不進六年正月

二十二日城中忽獲一賊訊得賊渠石達開遣之送書君發視之有廿三日從東門攻進官民可西門逃出城上勿開槍礮之語君對眾焚之斬其人既而曰惜不就其計以用之有頃復獲一賊云是索覆書者君卽屏左右面與約諾縱之逸二十三日賊果從東門薄城而陣君命兵勇但放空槍無傷一賊賊見計已行大眾蟻附城下爭求先登城上鼓角齊鳴槍礮矢石並下賊不及退死者四五千人於是恨君益深必欲甘心於君二十五日賊四面急攻君與周公及僚佐分門而守君在東門揮眾抵禦而賊已於西門暗埋地雷轟然一聲城裂數丈賊眾如潮湧入周公既被戕君猶與其長子世濟族父鈺揮刀巷戰力盡不支同罹於難妻兄周以衡幕友李鴻鈞朱芬朱華楊福鬯葉廷樑蔣志澐家丁王杞王慶隨勇是升等四十餘人俱殉死惟君配周恭人挈兩女及少子世樑先時出城得免聞關回籍有鄉勇劉六者逃至南昌府府中人執而訊之則云親見賊割君父子之首懸諸東門城樓上其屍身不知所在秋或有自江西省城來云居民之陷賊者感君居官之善賂賊渠得其首合於體并幕友家丁之屍俱藁葬城中矣此則得之傳聞未可據爲實也蓋君殉難之始未如此君爲外官雖末久而涖政勤敏若

夙任方面者在吉安一年百廢具舉官事之暇兼及文教修葺書院增諸上膏火郡試九邑之士去取悉當合境翕然稱之其在吏部也事無巨細未嘗推委凡遇帶員引

見及進遞擢子事隔宿衣不解帶曉起一餐至夜方再食考核文卷稽察事件必守朝議公所訓速慎二字又每事務持大體不以苛細見能在部二十年自堂官以至各司下及胥吏罔弗親而敬之同鄉之宦京師者咸樂交君君胸懷坦直和而不流其爲人謀苟力所能及必爲之盡江震會館在武宣門外鄉先達陸中丞耀所經始歲久而圯道光十九年君偕周司馬憲曾楊大令炳春出貲共葺之兩邑之適京者賴焉君之用財頗不吝然取與極有分辨掌選司印時值選人有欲得廬州缺者託人示意君不省及選適得是缺其人具千金爲壽君堅卻之曰我雖不能清操自厲此等事不敢爲也君殉難後上官據事入奏奉旨交部議卹自軍興以來凡死綏者無弗仰邀

恩典君以孤城四面受敵糧盡援絕堅守六十五日前後殺賊以萬計以視倉卒授命者其事尤艱而其志尤苦一時其難之人皆力戰捐軀義不污賊由君忠義之忱有以帥先而感動之嗚呼可謂難矣世濟字

既甫國子監生有至性爲大母范太恭人所鍾愛然質稍鈍君恆不喜之不謂其臨大節能明決如此城陷之前數日君遣之赴省城屬曰此間且晚不能保汝得我問卽奉母挈弟妹急謀歸以慰大母望俱死於此無益也世濟泣受命出城既具舟載其母與弟妹復返於城城已閉不得入繞城號哭城上縋而登之自此寸步不離君側卒年二十一鉦字春江議敘八品銜狷亭先生弟諱沂迴後與朝議公爲四從弟弟以衡字丹峰明吏部尙書諡恭肅諱用之十二世孫忠毅公宗建之族九世孫君婦翁郡學生鎔之長子也嘗從朝議公習刑名家言屢佐人幕有聲素有弱疾事亟君勸之歸辭曰病體如此雖去亦不達且萬一賊退署中可空無人乎及賊入署以衡官服罵賊死鴻鈞字春舫舉人芬字某華字某皆諸生福鬯字某廷樑字樸園志灃字子安其鄉貫及行事俱未詳旣與君同殉例得附書於君狀君子男二人世濟已死今惟世樑在年甫十一女子四人

上高縣知縣死事傳君墓碑

徐時棟

咸豐六年九月壬申上高縣知縣傅君帥師復縣城不克死之其年十月大吏以其事

聞明年二月甲申有

旨贈知府銜

賜卹銀

命其子孫世襲雲騎尉恩騎尉罔替又三年孤子毓珊始介其舅氏童君可念以狀來求表君墓嗚呼其可無言按狀君諱自銘字新之又字心芝自號小輪其先居河南宋高宗時有扈蹕南來者占籍明州遂世為浙江鄞縣人遞傳至

皇朝康熙閒曰良宰設藥肆京師進天花粉治宮中痘疹有效

賞太醫院八品吏目是為君曾大父大父肇禮國子監生父作霖縣學生奎文閣典籍大母邵氏母水氏始吏目以藥肆起家子孫世其業恆往來南北君少時奎文客於外大母母親教之稍長隨奎文入都中受舉業於鄉先生之宦遊者用客籍應試為宛平縣學生年三十一中道光十二年順天舉人館延慶州主講媯川書院以館穀養其親二十四年大挑一等引

見以知縣用分發江西是年冬赴省明年三月檄往崇仁催科數月而辦大吏錄其功十一月署南昌府水利同知明年署彭澤縣二十八年

六月署南康

今上元年四月署弋陽五年四月始題補樂平縣或謀而奪之十月改題君上高是時粵賊亂江西已三年旁近州郡多殘破而上高與其府瑞州方告危急君至簡其兵孱弱不及額問其巨室皆挈輜重避鄉村驚曰此空城也且爲奈何知府王君嘉麟使君往鄉村勸大家出貲力君奉檄行聞府城之變急歸賊已自新昌破上高北門城陷君忿投王君營乞師王君不可曰兵微糧寡而往與之戰此無異牽羊餒虎也徐之俟楚軍來吾與君同滅此耳明年六月楚軍至募勇亦漸集己酉攻上高破其巢十餘斬首二百餘級奪器仗無算而我師餉盡賊黨由新喻分宜南來援上高師退君急走省中請餉八月回營丙午平明以千總王吉昌軍八百高祥霖軍千潛師破上高北門復其城斬馘甚眾餘賊皆亡命奔竄始修城堞招流亡不三日賊大至城復陷乃至袁州府募壯勇得五百人將之以千總魏大紳九月丙寅復攻上高不克明日至新昌請濟師於知縣沈君曦會湖南同知凌君煌壽引平江勇二千往撫州討賊道經新昌君與沈君共邀留之凌君許諾君慨然願同事曰

國家以上高付我甫二十日而賊據之我與賊不兩立諸君勉旃在此行矣於是付縣印於其僕陳元而以大紳五百人同凌君帥師北進吉昌祥霖各以其軍自南來相會壬申軍傅於城下賊自西門出拒戰且力我以兩軍夾擊之歷三時賊大敗奔潰盡棄其馬匹兵甲我軍乘勝追入城將及北門賊之據臨江袁州二府城者掩至其眾盈萬兇猛不可當而先日方兩凌君乘馬忽陷泥淖中平江勇急救之以去眾相呼散走君猶率其僕指揮五百人大噪前進一賊自後刺君肩君以手格之遂斷君手君大怒揮刃殺數賊力竭而死實九月十八日也年五十有五袁州壯勇從死者百數十人僕之從征者曰錢景曰熊貴景歿於陣貴見君死奪門出以告陳元乃繳印布政司而四出覓君尸久之不獲營弁王中孚者一夜夢君佩劍坐營中語中孚以恢復機宜明日召陳元而告之俄一人前叩頭乞免死元詰之曰上高人況賤偽賣粉絲賊謀也昨繫諸營晨起縛解將殺之耳賤哀曰夜三鼓有官人微白鬚者來爲我解之我將逃官人戒我曰勿爾逃則死元心動曰此豈非吾主人乎謂況賤曰夜來救若者縣官之靈也若上高人而在賊中必知縣官尸所賤狡而思逸謾曰隨我至二十里外尸可得也元白中孚令

兵勇與俱往中途賤忽昏仆聞藝語曰不言當死既蘇元詰之始覈釐而告曰前月十九日日下晡見數人輿公尸出城聞置之城北煤洞中迹之至城北三里任家山老煤洞果得之但失其左手又得二尸其一錢景其一壯勇皆腐獨君面如生日不瞑於是君之卒二十有一日矣將斂賊復至陳元負君尸至新昌城隍廟十月乙未始斂越四日戊戌扶柩入王君營既而至省城門外發喪告哀僚屬故舊暨薦紳門下士爲位於艷神廟而哭相率投賻贈按察鄧公仁塋主其喪君卒後三十七日訃聞於家始君在軍中先後遺妻子歸里其子不忍去則曰歸家好讀書在此無益徒亂我方寸耳及是道梗不得前明年六月始達撫州九月戊子奉喪以歸十一月戊寅朔至於鄞十二月辛酉葬縣西南光同鄉芝山李家漕之原初聘施氏監生景高女未娶卒娶周氏監生昌賢女而通政司副使童公槐之義女也子一毓珊女二長嫁甯波府學生張善倫次未行君在江西十餘年更歷五任清儉自守家無餘蓄惠愛兄弟以旁及戚友而其政績則自遭兵燹盡失其文移著作孤子又年少不能悉也狀中亦略紀催科治暴教養士子願吾謂在君非難能者故書君死節獨詳嗚呼軍興以來

九重宵旰憂勞命將遣師付之以重寄徵兵集餉之檄交徧郡縣竭天下之財力以聽其驅策而揮霍之而相持至十年狼奔豕突披猖蔓延日益盛區區一縣令力不能勝匹雛獨自以被

命宰茲土奮不顧身哀號奔走衝冒矢石冀不負一日之付託幾幾足以成事而餉盡而援絕卒至敗壞不可救而以身殉之嗚呼死節如君其不謂之忠貞也乎嗚呼其亦重可哀也已

安徽補用同知直隸州署六安州事卹贈雲騎尉世職元和金君墓碑

銘
馮桂芬

咸豐七年春二月賊陷六安署知州事元和金君死之

詔贈雲騎尉世職

賜卹如例將葬孤肇元等治碑請銘余與君同里同鄉舉肇元爲余女夫不能辭君諱寶樹字仲珊號吟香系出宋將仕郎璫二十有一傳爲君曾祖嘉禮議敘州同祖景祥吳庠生從父勉之無子承兩祧始遷郡城花谿占籍元和著有文選音義二卷春暉堂文集四卷君始刊行之以君官

馳贈奉政大夫考守樸監生

贈奉政大夫妣王宜人無子妣汪太宜人生子三君其仲也年十六游庠道光十二年舉於鄉十八年成進士得湖北卽用知縣十九年署興國州事君以仁愛爲治待士如生徒儀門舊石累爲樓以形家言不利於官毀之願十餘年不發榜君復其舊卒無他而春闈有捷者二十一年補利川逾年調通山邑在萬山中民藝麻植茶爲業茶以充貢老幼負筐篋簇擁南榮亦相望如市集歲時張鐙滿城鼓吹達旦君以舊俗聽之戒官人無擾民益喜男婦熙熙有上古氣象日判牘一炊頃衙散門庭如水吟詠外無事廨故卽山爲亭閒率家人輩奉太宜人板輿升眺鞠脰上壽蓋君於是時爲最樂俄以捐米議敘加知州銜二十四年調署蘄水其明年調署蘄州無何丁太宜人憂歸里以振饑勞加同知銜尋由順天捐輸得知州咸豐三年揀發安徽是秋署和州堅守年餘屢卻賊無何聞賊大至乃請援於是總兵吳君全美率水師廬鳳道張君光第總兵劉君玉豹劉君鶴翔率陸師先後至州君合練勇三萬人會剿分六班番上敗賊駐馬河復敗賊張家集軍香泉賊不敢犯者數月會水師西援賊犯香泉迎戰偏敗二劉沒於陣君與張君全師退賊見有備乃去君在和三年首免賦稅以是得民心官紳民勇如一家人

君衣食有缺爭獻之比去鑪香繞道不絕六年移六安州役蘇明等潛
納捻首王守沅入城爲反期事覺掩斬之獲鎗礮無算論功以同知直
隸州留安徽補用

命下而君已及於難是歲大旱蝗人相食七年春皖撫奏撥豫糧六千
石送桐城營舟及潁上捻首李招壽將自鳳臺闕曠集截之舟退而桐
城營糧盡兵潰秦提督定三收殘卒退次六安君趣治廬帳五百具他
軍裝稱是迎謁境上曰賊旦夕來某書生方憇無以辦賊將軍至天生
我六安民也願駐軍十五里鋪遏賊衝資糧屏履惟某之責俄聞舒城
賊且至秦一昔拔營去二月庚寅賊至君與參將喜君瀛懷甯縣長楓
巡檢駱君秉彥等率五百人出城迎勦甫交兵聞城陷乃還次三十里
鋪招合馬頭木廠鋪各鄉練勇畢集得萬數千人聲容甚壯丙申平旦
進師二十里鋪賊迎戰敗之捻斬數百人轉戰而前至十五里鋪日昃
止炊忽有萬餘賊自河西斷我後城中又出千騎衝我中權遂不支君
親兵百人死者半賊望冠服所聚鎗矛全集君落馬遂與喜君駱君同
遇害隨丁張林逸距麥田數稜猶聞君厲聲呼殺賊云州人崔際唐等
潛瘞君尸時肇元聞耗奔赴賊踞城不得前慟哭返其明年某月官兵

收六安後刺史茅君念劬易棺斂之面色如生又明年正月肇元等乃克奉君喪歸丹旄及於淮而六安復陷既還吳以某月某甲子葬某縣某都圖某地之原君天性孝友弱冠失恃兄弟相繼逝泊奉太宜人之官盡室偕行一庭怡怡早歲以詩文名志趣高簡不樂外職既居之不爲習移政暇跌宕文史翛然風塵之表己亥庚子癸卯甲辰四分校鄉試中額必倍他房嘗曰十年州縣此事差強人意涖皖而後毅然以身

許

國在軍磨盾賦詩義形於詞文榜肇元兩省君於和側室陳率文梁至六安數月君皆趣之歸家故中人產以宦游減之既遂以身殉嗚呼君可謂無負矣君之死距城陷六日耳已劾矣既死乃復官君生於嘉慶五年五月甲申年五十有八著有曼陀羅室文集二十二卷花溪草堂詩集二十四卷先難作一月文梁齋其副歸故得完配駱宜人署安徽懷甯縣丞昶女秉彥其姪也生子文榜吳庠附貢生爲伯兄某後肇元府庠附貢生襲世職文楣女一適直隸升用知州張際康側室陳生子文楫殤文梁遺腹希良女一銘曰

經術吏事端厥始累縮銅符楚江茨種棠成陰藹百里一朝儒巾易鞮

弭談笑險巖等平砥三年危難烏江水移席淠沙更痕痾錦纏紅帕而
四鄙因之滿山倏哺聖碣父悲吟佩玉紫油囊大槩者誰子長驅貔貅
去如駛南八當筵空斷指愜愜窮城翳翳壘一呼瘡痍奮臂起枋腹殺
賊賊披靡無何萬賊聚蜂蟻兵單援闊勢不抵孤臣力竭辦一死
至尊震悼錫

溫旨疏爵紀庸表續似祠之春秋載之史丹心大節懍千祀賜瑩堂斧

光有煒刻文貞珉華嶽峙

印江縣知縣鄧君別傳 李元度

君諱玲筠字沼薌原名凌雲甯鄉人父光廷邑諸生早世母吳撫之成
立以節孝

旌門君生七歲而孤踰冠舉道光二十三年鄉試五上春官不第咸豐
六年以知縣發貴州七年四月權知印江縣時黔中倣擾苗教匪充斥
匪酋以邪教蠱亂民有黃號白號等目團練多叛應之列郡無完土君
下車壹意以約己便民爲務求先達下情每芒屨布韞周巡村落間與
田更畚叟握手詢利病凡道里阨塞士紳賢否及豪右莠民姓字皆手
疏小冊藏夾袋中戴星出天民莫知爲官也而樵埋博塞諸白徒輒不

意見執訟者至既察其情僞復徵諸冊片言摘發民驚以爲神先是恩南賊熾地連印江君亟行保甲法慮以具文視也乃單騎詣各鄉手自敦率戶給門牌如式署紙尾十則曰忤逆曰習邪教曰私結盟黨曰劫掠曰藏匪類曰竊盜曰容留娼妓曰賭博曰鬪毆生事曰唆訟各擇士紳董之犯者同甲勿與齒改悔者許具狀保於各條下加小印曰自新其頑抗及無人敢具保者治之且計月以驗紳董之能否加勸懲焉甫數月訟獄衰息夜不閉戶臥乃加意課士割俸助書院餐錢與講求經世學並及軍政士皆畏愛之勸民修水利築陂塘揭示教以法纖悉備具有以浚塘聞者親履勘指示至再三不倦終不以勺水擾民慮邪教之蠱民也爲文告抉摘其所以然雖老嫗能解簡牘丁數百親教以擊刺法民間所輸餉皆筦以士紳一錢不以自污是年十二月賊陷思南太守福君投水死賊長驅犯印江印故無城君出營於雲泮以禦之賊耳君名以書來假道請終君任不復犯印君焚書斬其人賊分黨綴君別遣大隊從間道襲城君方巡隘賊大至君袖銅椎出擊曰吾試觀賊能否乃揮椎斃賊三餘賊環攻君掣銅鑄格鬪莫敢近賊忽大呼曰印江已破矣君見四山火起力戰突圍出馳抵銅仁乞師於太守周某某命

練總王士秀領五百人隨君回擊一日夜行二百里居民見君至皆奮躍得壯士千餘仍從至雲泮是日大霧人馬對立不相見噪而進賊駭曰官兵至矣則皆走自相蹴蹋墮崖死者數百君復縣城追賊百餘里至大寺頂鄉民赴義者約二萬人各誡其子弟曰爾不能從鄧公力戰無面目歸見父兄也當是時君冒矢石四十餘日戰中壩戰螺生溪戰袁家灣皆告捷八年正月勦撫家壩及潮底河以東大定亡何而越境勦賊之檄至大堡者思南府境也奸民胡黑二倡亂太守周某討之數失利聞賊最畏君乃立鄧字旗懾賊而嚴檄君赴勦日三至士民以地非印境苦留之君慨然曰郡守檄縣令曷可違且殺賊固無畛域也眾請以二千人偕往君慮餉無所出以千三百人俱師次分水壩居民爭餽糧賊僞爲運糧者昧爽入營門變作團眾驚潰君親搏戰飛石中其首手格殺一賊足被創遂及於難喪其元年四十有一後軍聞前軍失事憤極殊死鬪殺聲與哭聲併卒奪君屍還乃樹忠憤軍幟誓復仇賊懼夜退屯八十里時三月八日也喪歸士民大慟婦孺皆失聲無遠邇爭致賻贈有負販傭挈錢四緡將運鹽悉以充賻或曰如爾家何傭哭曰公死吾屬無葬所矣何以家爲其感人若此事聞得

旨賜卹世襲雲騎尉印人釀重金歸其櫬母夫人猶在堂拊君屍哭曰爾能死

王事吾家世世有光靈有知勿以我爲念印人聞言心稍安而益悲君之不能兩盡也君少負才名讀書兼習拳技令印時微行遇鬪者咆哮莫敢攖君躍入叢人中手擲其人丈許叱曰去有識君者趨進欲與言而君去遠矣賊嘗遣刺客僞稱銅仁投牒者袖匕首將刺君君拉其脅曰吾不殺爾爾歸告賊酋速降當令復田宅毋死不悟也居常與客語袖中時時以手作擊刺勢故能躬履諸險阨戰必身先士民懷其德立祠春秋祀之並刻君遺集曰鉅業堂稿又八年乃籲請建專祠並入祀名宦皆得

旨允行

贊曰君與余同舉於鄉屢見君恂恂儒者不知其兼資文武所成就及此也君學行皆本母教觀其言滂母曷加焉同治丙寅余治軍援黔印人土語及君皆泣下治團練至今守其法於是君死事八年矣父老口之如新各屯堡皆爲位以祀戊辰四月余帥師破大堡禽胡黑二及其一兄二弟暨僞軍師王茂蘭等乃設位告捷於君縛黑二等剖心致祭

印人觀者數千皆大哭已復大快爭拊掌曰我公今可以瞑目矣烏虜君蓋死猶生也哉

前署浙江開化縣知縣湯君墓志銘

謝應芝

君以咸豐七年冬十月署浙江開化縣時粵賊擾江西而開化與相鄰接委署者莫肯往君獨毅然而行識者知君死

國之心已於是決矣八年春賊犯玉山圍廣豐大吏檄兵駐常山防禦開化兵二千有奇皆與往三月賊陷江山我兵潰保衢州賊遂陷常山而開化孤懸莫救君數請兵不應賊長驅陷開化先是開化鄉民以寇亂故逋賦累歲君為治得大體民心悅服親至鄉勸諭皆踴躍以輸君喜甚嘗為詩以誌之及是城陷急詣鄉號召義勇圖收復是時賊勢猖獗土匪亦乘機而起連陷十一州縣既而大兵四集夏六月六日君帥鄉勇三千餘人抵開化賊棄城去越二日大兵始至浙中漸平

朝命失守者皆革職秋七月賊復犯玉山趨開化劉君福林者以江蘇候補縣帥鄉勇五百人在浙中勦賊方檄赴甯國過開化君請於大吏留劉君防禦而以城守事屬縣丞某自帥鄉勇偕劉君禦賊於華埠兩戰皆勝二十六日參將某帥兵二千至華埠遂為前隊以君及劉君為

後隊休息之賊至益眾前軍潰君及劉君以後軍迎戰勢不能敵均受重傷歿於陣鄉勇徐仁成豐元以兩君殉難事聞越三日賊退邑紳徐啟瑞帥眾覓君屍得於華埠之毛竹園身受傷十餘處衣有開化縣印朱色爛然暨劉君屍皆棺殮成禮君方拒敵時預遣親信家人卞榮齋印繳於大吏懼其在側或臨難阻撓也嗚呼蓋有以見君之志矣劉君數立戰功竟與君俱死然賊未深入而去未必非兩君之力也鄉人將爲立祠以比唐睢陽張許所謂雙廟云君姓湯氏諱世詮字彥聲武進人曾祖康業山東甯海州知州祖詒憲候選州同知父建中山東運河同知母趙氏

封恭人君以道光丙午科順天舉人分發浙江爲人寬博貌長者胸中絕去機械讀書展卷一過卽止人謂其未讀及詢之輒能說大旨喜蕭閒往往兀坐終日殉難時年四十有二娶於母氏之黨子緒清後君二月殤以從子柱清爲嗣冬十月家人以君柩歸葬某鄉某原銘曰嗚呼與君比鄰而未洽也君兩過余而未答也聞君之死而爲嗚咽也不肖之謔而賢者法也

湖北候補同知直隸州何君別傳

李元度

君諱忠駿字龍臣平江人曾祖銘祖暹隆皆縣學生父噉增廣生以治
團練功加翰林待詔銜子五君其長也君生有異稟五歲大父口授詩
書易皆成誦十四入邑庠道光二十一年崇陽亂民鍾人杰犯平界君
治鄉兵卻之敘六品銜充已酉優貢咸豐二年舉順天鄉試時廣西賊
洪秀全等構亂踰嶺涉湘圍長沙不克掠舟洞庭覆武漢徇長江而下
遂踞江甯君以三年六月歸自京師則益治鄉兵爲扞禦計侍郎曾公
督師長沙檄君與李原濟擴湖赴軍前擴湖余從兄故與君莫逆者也
君以桑梓有急辭四年正月余從曾侍郎東征賊踞岳州冀自平江襲
省會侍郎檄平江知縣林君源恩練兵守北界以君及擴湖參軍事旋
檄故提督塔忠武公今湖北巡撫胡公濟師援平連破賊通城平界得
完胡公尤器君待以國士黔勇與楚勇鬪死者數人君力排其閒礮彈
人左礮創甚得不死旣而塔胡皆別勦遂以君等任防務戰屢捷進克
通城論功擢知縣加五品銜明年武昌復陷崇通爲賊藪九月羅忠節
公自江西援鄂君及擴湖各將千人再克通城僞翼王石達開由鄂入
江敗羅軍於蒲圻通城之師亦潰擴湖死之君退守北界賊不敢逼六
年十月楚師克武漢崇通以次削平平江解嚴於是堅守已三載矣七

年君入胡公幕擢同知直隸州加知府銜八年四月安慶賊上犯陷麻
城君率平江勇千人救之未至黃安繼陷被劾既力戰復麻黃得還冠
服君亦厭戎事遂散遣所部歸會李忠武公進攻廬州辟君掌機宜文
字君固辭胡公趨之行當是時李公再克武漢拔九江威略震天下九
月克潛山太湖桐城舒城進壁三河鎮鎮故舒廬適中地賊築偽城抗
我軍者也官軍破城外九壘城旦夕下援賊數十萬自江甯來我軍止
五千前後受敵賊掘隄斷歸路召援師則皆潰退李公顧諸從事苟得
出無爲俱死君曰公不負
國某等肯負公耶時親卒數人侍以銀數餅畀之且曰若歸告吾父母
知吾死此足矣卒脫歸者二人夜三鼓君驟馬隨李公出衝賊陣死之
同殉者同知曾君國華知府何君裕運同丁君銳義道員孫君守信知
州王君揆一訓導萬君斛源暨將領士卒殲焉時十月十日也事聞
天子贈君太僕寺卿子世廕李公遺骸尋收獲以識君狀者少遂不克
返葬君年四十八大母年九十有七父及母年七十餘皆健在嗣子一
年未十歲胡公卹以千金爲經紀其家君豐頤廣穎敦孝友自負經世
才與余及擴湖交最篤讀書嶽麓城南及偕計北上三人者率相依寓

京邸至傭書自給酣嬉淋漓無幾微不自適擴湖性剛決不少假借君則旁皇周浹遇人得其歡心而所持屹不可奪兩君意趣不同然皆後先死

王事君則寸骨無歸視擴湖尤慘烈云君初與同學丁君步賢試拔萃科名相次試未竟丁君遭外艱赴至君誠勿使知丁遂中選君副之人以爲難學使者知其事大賞異之卒以優行貢太學君所著詩文集八卷鍼砭錄八卷讀經蠡測四卷邑城特建忠義祠祀君及擴湖而以死事諸人祔

論曰君死綏前二日郵書抵曾侍郎以謂官軍連克四城鋒銳甚然常勝之家難與料敵慮無以持其後味其辭若有不自得者君在行閒久爲當事所倚蘊蓄宜稍稍抒矣願猶不能盡行其志何歟然事前既慮之事至則毅然以死報何其偉也侍郎屢辟君以鄉井之難不克赴既紓矣又欲赴不可得卒死皖中非命也歟哉余旣痛君之死而壯之而尤憾其勳名之不終其志故次其傳

續碑傳集卷六十二

續碑傳集卷六十三

江陰繆荃孫纂錄

忠節十

江西候補知府羅君別傳

李元度

羅君諱萱字伯宜湘潭人父汝懷道光丁酉拔貢芷江學訓導候選內閣中書以學行聞於時君生有夙慧工詩文書法能傳其父學為諸生屢列優等賀督部長齡鄧廣文顯鶴沈大令道寬咸器異之咸豐四年曾文正帥水師東下辟君掌機宜文字從克武漢田家鎮抵九江十二角水師失利君與同舟四三人僅以身免明年文正入南昌重整水師進屯南康視陸軍於湖口弔塔忠武於潯陽君皆策騎相從文正每口占書疏君輒操筆寫或寇警驟逼勢危甚君甘心同命又時時調護諸將俾各當其意以去六年偽翼王石達開入江西陷瑞臨袁吉撫建諸郡會城孤懸君從文正赴南昌達開稍引去文正檄君領江軍三千人攻建昌垂克矣忽援賊大至都司黃虎臣戰死城弗下文正檄君會攻撫州甫至會曾愍烈國華劉武烈騰鴻等自鄂援江攻瑞州文正乃檄君自撫州赴瑞合攻既至賊屢搦戰屢敗之又擊走靖安奉新守隘賊

當是時城賊數萬九江賊復率萬眾來援軍心未固君與劉武烈諸公
堅築壘嚴陣待之八戰皆捷會文正視師瑞州君以久役乞假歸湘中
未幾巡撫駱文忠檄君治湘潭團練劉總戎培元招君至衡州與謀軍
事君稍規大計皆不肯久留亦自以文士不欲竟棄科舉屢應行省試
卒不遇同治元年省文正於安慶又省其從兄記名提督逢元於當塗
亦不欲久居歸益肆力於學二年郭公嵩勳撫廣東招君至粵屬以創
立水師君又謝歸尋偕劉太守德謙領威信軍防郴會霆軍叛勇大掠
茶攸閒君及劉君敗賊於興甯渡頭司叛勇潰入粵君遂進屯樂昌當
事才君命增募威震軍居頃之賊平凱撤歸自是君亦倦遊不復措意
兵事矣七年冬縣人黃忠壯潤昌奉檄援黔邀君共事君爲總文案兼
理營務處每晝出領隊夜歸則削牘黃公性邁往不避險艱殘臘入清
溪八年正月焚逆苗數十寨遂克鎮遠府衛二城三月十七日進克施
秉蓮戰數日再進甕谷礮將達黃平以道隘箐深爲伏賊所截君與文
武將領十八人者皆死之時二十二日也初降苗薙髮來歸遮道言賊
已設伏毋深入時軍氣銳甚不能止及伏起路斷君揮鞭大呼齊隊眾
潰亂親卒陳祿八中創哭曰奈何君曰死此耳忽鎗彈傷君左腹墜馬

舊卒曹某掖之行君揮令逃生遂死之年四十有三君貌溫雅文翰流
美而性極恬退從軍十數年不趨便營利亦不圖仕進初從小師東征
敘訓導入江西遷知縣加知州銜在安徽彙保同知留江西補用樂昌
解嚴加知府銜克鎮遠晉知府既死事
優旨眠按察使陣亡例議卹

賜祭葬

贈太常寺卿

賞騎都尉世職附祀黃忠壯祠所著儀鄭堂文箋注二卷粵遊日記一
卷蓼花齋詩詞四卷

贊曰君與余共事戎幄余嘗弟畜之九江之役曾文正誓身殉余與君
等共掖文正上小舟達南岸入羅忠節營時火光夜爍數十里人聲與
江湖聲相亂也同治元年余遭吏議君省余江山其後數相見長沙又
數年君竟死黔難悲夫曾文正誌君墓以謂君不得一伸其志乃當世
有陶鑄人才之責者之咎故引爲內疚而尤惜之烏虜君何以得此於
文正哉卽其賢可知已

湖南三節令傳

李元度

三節令者咸豐十一年並以知縣死職湖南者也東安縣知縣趙君諱榮祺字雲伯大興籍紹興人道光辛卯舉順天鄉試咸豐初揀發湖南權知慈利沅江縣事有惠政君羸面疏髭煦煦如老嫗眾呼趙母先是九年秋賊陷東安知縣李君闔門殉公廨盡燬市爲墟越數月君單騎之任時楚南數被兵州縣正賦悉索以償各軍逋餉縣庫常不名一錢十月十五日賊復至白幟蔽野君急嬰城守時羸卒不滿千餉無出請援不至相持一晝夜賊肉薄登城守卒潰君急返署伏劍未殊遂被執君大罵曰死賊吾恨不生噉爾遂遇害長子燕堂亡匿他所聞君死奔而出枕屍股哭罵與幕客胡玉林並死之玉林字琅笙亦紹興人城步縣知縣諱安和字治亭佚其姓滿洲正白旗人也長不滿六尺鬚黃目短視道光辛巳舉人咸豐二年以知縣發湖南署辰州府通判治浦市性介潔飭粥常不繼妻窮居京師力不能迎致某大吏過浦市入君署良久君始出大吏恚甚後察知君禮服付質庫故不能遽出轉益賢之君脫略好飲苦不得酒某寺有老僧年八十矣君數就之飲極醉忘歸其真率類此未幾補城步地瘠苦爲楚南冠又界粵西風鶴時警君抵任卽周覽阨塞爲戰守計會陰雨浹旬郊外多產人面豆司更隸

夜見白衣叟長丈餘蒙袂巡牆行若啜泣狀公廨後古樹怪藤並數百年物有異鳥集其顛蒼身黑首晝夜悲鳴聲嗚嗚君歎曰吾其殉此乎不數月粵賊陷綏甯突犯城步君曰困於城不若禦諸境遂帥鄉兵數百迎擊諸要隘斬數級賊稍卻已復大至眾潰君太息曰死於野不若死於城城吾死所也駮馬馳歸署正衣冠北向拜投纆而絕賊至括其室惟苦醞半甕敝衣數襲而已賊亦歎息去

綏甯縣知縣吳君諱熊初名鳳毛字樸菴烏程人道光庚子舉人由教習揀發湖南初令麻陽俗獷悍多盜有盜劫客舟金君捕盜追金付客訖立坑盜六人以徇縣人讐伏尋補通地道苦窳而民樸樵吏耕於野墜戶草生君治以廉靜卓薦調綏甯綏甯故巖邑與粵西接壤君下車卽銳意治團練作爲詩歌期以戶曉庚申九月廣西白巾賊以突騎數千一晝夜馳二百里直薄城下營弁哈某迎戰敗績君登陴守禦以寡眾不敵陷君及其三子鑲並死之初君爲諸生嘗祈夢于忠肅廟夢入小屋壁上作書云散絲絡女爪黃金冠獼猴莫恃合著口終防白了頭不解所謂旣殉難解者曰女上爪散絲絡之綏字也庚爲金申爲猴庚申年也合口哈某也白頭賊皆白巾也烏虜數果有前定者邪

贊曰三令君同時死職事聞並

贈卹如制死固重於泰山哉海甯俞大令鳳翰嘗各爲之傳蓋得諸目擊而吳君又同年生也俞字石年道光庚子領解額嘗權平江篆能詩古文及書畫所作三君傳特工今下世又十年矣貧無子遺書並散佚余憇其漸湮滅也爰合傳以存其略云

李剛烈王武愍二公別傳

李元度

同治十年十一月二十二日有

旨下內閣故廣東從化縣知縣李福培揀發湖北知縣王恩綬於咸豐四五年間先後守城殉難業經奉

旨優卹並准建祠該故員等死事甚烈著加恩准其子諡尋得

旨福培子諡剛烈恩綬子諡武愍二公皆江蘇無錫人本中表戚同學相友善申以婚姻同以舉人充左翼宗學教習用知縣死事相距五閱月壽皆五十有二同膺

卹典

賜祭葬同

贈知府銜同

賞雲騎尉世職及恩騎尉世襲罔替又同以言官疏請

敕建專祠事蹟同付史館列傳至是同荷

易名之典其與李公同殉者有弟議敘從九品性培及僕周鏞勇丁蘇兆英等九人與王公同殉者有仲子議敘從九品變及僕丁貴吳福壽二人皆附祀二公祠迹其生平出處大節無弗同者爰次其行實爲合

傳

李公字仲謙一字心奮先世自松江遷無錫公事親孝母得風疾久臥不起公扶侍抑搔無一昔違左右母卒將葬大雨雪以風公哀號徹旦天忽霽得葬如禮道光二年年甫冠入縣學卽以是年舉於鄉試春官十三次不第充教習期滿以知縣用歸主錦峯書院十年咸豐元年謁選知廣東從化縣地荒瘠頻年旱潦公至力請上官爲緩征明年充廣東鄉試同考官始公未蒞任時縣境有匪徒戕汎弁至是總督檄將弁來會剿獲匪百餘人寘諸法三年夏賊嘯聚縣境烏石墟公督勇擊之躬冒矢石受三創力戰不爲止斬匪目呂亞林等百五十人餘黨潰四年春捕斬匪目謝亞青等五人而鄰縣賊黨起犯廣州擾佛山鎮從化介萬山中毘連七縣皆盜藪出沒無常公燁總督請撥兵二千分屯花

縣之石角及縣境平場爲會城屋瓦且斷賊糧不報乃自募壯丁數百人與典史趙應端及其從弟性培將之七月賊數千突至公迎戰賊分黨入北門公潰圍出會縣人以鄉兵來援潰卒稍集公帥以戰賊敗走遂復城自是連戰凡七捷斬八百餘級賊將遁矣而奸人慧之賊黨益麋集勢以不支九月二十五日賊大至公急解縣印授其子鎮衡使齎送省會請援兵而誓以死守越一日賊用礮轟城東門陷公與趙典史及弟性培馳登縣學尊經閣北嚮拜曰臣力竭矣惟一死報國耳賊相戒勿犯好官冀脅公降公嚼血大罵桀石以投賊傷數人賊怒積薪燔閣公與趙君及弟性培並死之僕周鏞及練勇蘇兆英曾念聖關萬福李聲著李維諾邱仰壽龍用張巨鵬等皆從死事聞賜卹如典例尋

許建專祠又允科臣之請得

子諡皆異數也公就義處有血影漬地如人形濯之愈顯後任建石欄護之榜曰忠蹟昭然人以比侍中血云公子四長鎮衡襲雲騎尉官知州女子二季女適同縣王庭楨武愍公第三子也

武愍公字樂山一字佩綸無錫王氏其先來自金壇公幼慧未冠爲諸

生廩於官肄業紫陽書院爲撫部林文忠則徐所賞識招入節署讀書稱爲篤實君子屢試不遇道光二十九年以恩貢生舉順天鄉試充宗學教習勤其職時惠郎奉

命稽察宗學語人曰不視此職爲具文孜孜不倦者王教習一人耳咸豐初粵逆犯天津都城纂嚴所親勸移寓外城公正色拒之年例滿引見以知縣用當是時湖北再陷再克復置吏以副員請揀發選人視爲畏途多巧避或勸公勿謁選公曰時事多艱正人臣效忠之日何避爲肅衣冠而往遂入選有

詔發湖北六年二月經南昌行抵長沙時賊從北岸上犯武昌岌岌或勸暫住公不可十六日抵武昌城陽不得入時胡文忠林翼方爲布政使帥勇駐沌口留公於營已命支行帳矣公曰爲楚吏義當入楚城遂率仲子燮及僕丁貴吳福壽繼而入當是時餉盡援絕自巡撫以下皆束手待盡屬吏爭借符檄出城人無固志公入謁巡撫陶文節恩培及武昌守恭節公多山皆嘖嘖驚詫曰此旦夕死地人患不得出君獨患不得入此何時乃有此義烈男子耶卽好語慰遣之曰君無守土責尙可出就胡營留此身以待用公涕泣持不可乃奉檄登陴守禦公與其

事者五人約以死守翼曰城陷有勸公去頂帽者公叱之聞陶文節殉節於黃鶴樓下單騎走哭之賊大至公與多公手短兵巷戰同時被害仲子變及丁吳二僕皆死之明年冬武昌克復當事上公父子死事狀疏稱其履險蹈危毫無趨避父忠子孝足振頽風請加等優卹得

旨贈銜

賜葬祭如例其後御史汪朝榮請於本籍建專祠疏稱公無守土之責視死如歸不特與草閒偷活者判若天淵卽較之城亡與亡者亦分難易且忠孝一門僕從皆知赴義尤足扶植綱常巡撫郭柏蔭請於湖北建專祠疏稱公入城之日隔城陷止一夕其從容就義實爲蹈道不踰皆得

旨允行公好宋儒書尤好讀名臣傳曰吾他日當以此自律赴楚時與李剛烈公書曰大丈夫當此時勢與其老死牖下曷若埋骨沙場及聞剛烈公殉節深避之因而躍躍欲仕逾數月抵武昌遂完大節蓋其素志定矣公七子變行二字理齋寄籍順天爲諸生以臚錄議敘從九品卒年二十八

卹贈主簿銜祀公祠並祀昭忠祠

賞雲騎尉世職次庭楨由副貢官江夏縣知縣擢候補道加三品銜襲

雲騎尉

贊曰錫山爲理學節義之邦高忠憲顧端文之遺風遠矣李王二公生
同里死同志較然不欺平生之言甚哉道相高兩人又以心相許也夫
以百里之邑同時得兩忠臣又有孝子弟弟義僕爲之輔梁溪東林之
正氣固日出而未有艾哉二公事在

國史無藉私家紀述余爲合傳蓋動於懿好之不容已云

又書從化縣知縣李君殉難事

張星鑑

廣東從化縣處萬山中界連七邑紅巾賊出入其間地瘠民頑變端不
測咸豐初無錫李君福培宰是邑噢咻疾苦濟之以猛民大悅服四年
二月賊攻佛山鎮逼廣州縣去城北百三十里而太平場又爲從化增
城花縣三邑屏蔽君請大府選兵二千轄其地扼賊鋒久之不報賊益
逞七月賊攻縣城君登陴固守率兵民力戰賊稍卻九月賊大至昇礮
攻城城裂數丈蜂擁而入君退至學宮登尊經閣賊至礮石殪賊賊積
薪閣下脅君君罵不絕口賊縱火君與從弟性培俱死於火家人壯勇
同死者十有一人事聞

賜卹如例入祀昭忠祠君字仲謙又字心奮道光壬午舉人君之退尊經閣也意欲自盡忽有叩戶踰入者典史趙君也君曰爾微官亦欲死耶趙厲聲曰同官同死耳趙亦焚於火趙君名應瑞惜未詳其里居容訪其事蹟別爲文以記之辛未中秋日漢川道上得讀君之哲嗣鎮衡所輯碧血錄因撮其大略書此

又贈知府銜雲騎尉世職湖北揀發知縣王君墓志銘

馮桂芬

有纍然服喪踵吾門者視其謁則故人無錫王君之子庭楨也延以入手狀拜稽顙泣而言曰先大夫死難某自京師匍匐三千里入楚覓遺骸不得就殉難地招魂具衣冠奉之歸將以某月日葬於某原以先仲兄變耐於昭惟念知先大夫能爲文肖先大夫生平者無逾先生敢請銘且語且泣余亦泣曰余尙忍銘君哉余始識君林文忠師節署越十餘年而余奉先恭人諱南歸命變從余游閒爲余言先人期望綦切時乖運蹇連擯十一試年且老度無以慰先人地下輒嗚咽無何余服闋君願偕行赴北闕余方爲子擇師年時一輩經師人師莫君若欣然許諾於是與君共晨夕者兩年余尋丁內艱去君先已舉京兆教習宗學留都又三年而君之官湖北道出吳門相見且曰余之得寸進者君力

也未幾而君赴至追憶前語殆難爲懷余尙忍銘君哉雖然於義不宜辭按狀君諱恩綬字樂山號佩綸先世自金壇遷無錫給事中虛舟先生澍其族祖也會祖家錦祖濬父鼎汾候選從九品祖父皆

贈朝議大夫母趙恭人君幼慧年十有一隸試籍道光元年王縣令履寵拔第一游庠尋食餼肄業吾吳紫陽書院見賞於林文忠師招人署讀書公嘗謂余曰樂山古君子也二十五年充恩貢二十九年舉順天鄉試考取教習補左翼宗學襍被學中三年訓諸生如家塾時惠邸奉命稽查歎曰此職人皆視爲具文實做教習二字者王某一人而已咸豐四年秋奉

旨以知縣用頃之湖北請揀發時選人以被兵之省爲畏途多謁假不往吏部爲之限假不得逾再君固新至得謁假吏以爲言君笑拒之竟入選至武昌方被圍不得入益陽胡文忠公以藩司督兵城外留君營中君不可率公子變及家丁丁貴吳福壽縋城入巡撫陶文節公歎曰今世乃有此人復令君就胡公營君又不可遂與武昌守多山君等五人誓死守明日而城陷晨烹聞文節縊於黃鶴樓君率公子變兩家人往賊大至與巷戰皆死之時五年春二月十七日也君生於嘉慶九年

青華亭

秋九月二十六日年五十有二次年冬官軍復武昌督撫上其狀

詔與公子變俱優卹

子祭葬雲騎尉世職祀昭忠祠

贈君知府銜變主簿銜娶楊恭人國學生綬章女子七夏翔繼兄後變

原名變和字理齋號理堂寄籍宛平入學

實錄館謄錄議敘候選從九品隨侍之楚君之總城也誠勿從變涕泣不可遂及於難性孝友家事一身任之不可累父兄諸弟族黨服其才而廉謹則本於家教云庭楨乙卯科副榜世襲雲騎尉賡陸既庸立坊光洽孫二鏡熙鏡煜世襲雲騎尉孫女三君喜讀宋儒書以躬行實踐爲本一言笑不苟不取非義財性好施家中落猶節嗇以拯人急工書畫詩文多散佚殘稿藏於家秋捷之日館余寓竟夕泣有聲曰痛先人不及見也在宗學拜歲時衣米之

賜輒感激涕零慙無報稱人或哂之而君實出於至誠讀書文忠署某令牧相與論山陽泰興兩闕之肥瘠吾吳故有三陽泰興二肆君誤會爲二肆言文忠爲之撫掌有舟人兄弟三人壯不娶君曰有三子而令絕祀大變也捐修羊助之君之軼事多此類君之死也胡文忠聞跣足

曰吾不能留此好官吾過也與督部官文公請卹會疏有履險蹈危毫無趨避父忠子孝足振頹風之語庭楨奔喪至奇賞之曰王君有子矣奏留楚營待之甚厚君夙以忠義自矢賊之犯天津也京師戒嚴君方居宗學鄉人招移城外不從嘗與人書曰大丈夫遇此時勢與其老死牖下不如埋骨沙場赴楚伯兄送之從容言有警勿徒死君曰誠然必手刃數賊而死人以為讖然則君之志在必死久矣或者謂傳曰大夫死眾又曰謀人之軍師敗則死之又曰城存與存城亡與亡於君皆不合君之死得無在可以死可以無死之列耶余曰不然孟子蓋謂臨難時擇於二者如曾子居武城晏子入崔氏之類與君所遇異其後城之既陷無所謂可以不死其先城之未陷逆料其陷而不入趨避孰大於是君不為也時當謁撫部則謁時當入城則入城陷賊至又時當死則死曷嘗於死不死有絲毫計較審顧之心耶軍興以來死節之臣萬數或倉猝死窮蹙死或輾轉遲迴死其死同卽其忠同其有當死而死不待再計決者君子尤重之而君更出乎其上嗚呼至矣銘曰
 父死國子死父人畏途君樂土叱馭去餘勇賈衣冠墓九神隴忠魂招何處所黃鶴樓屹千古

又贈朝議大夫知府銜揀發湖北知縣子諡武愍王公衣冠墓表成

粵寇之難文臣以死事

贈諡者餘五十人同縣王公以揀發知縣死湖北破格褒顯海內榮之縣令未受事禦寇得諡者自公始公少劬問學氣果行方授徒鄉里數十年稱述必宗宋儒嘗以文受知前巡撫林文忠公招入衙齋讀書久益歎爲古君子試於鄉連擯不遇晚乃舉道光二十九年順天鄉試教習宗學敘勞得知縣謁選吏部適湖北行省奏闕人請以選人揀發當時粵寇久踞金陵縱悍黨西驚力劄上游形勝地湖北已再陷再復而賊復麋至選人皆畏沮不欲行循例赴部謁假公曰若仕必擇地則夷難堵危仗節之士不復見於今世寇何由平肅冠帶往聽

旨果發湖北或言寇已深入道且梗盍徐行公挈一子二僕從閒道疾驅至則賊圍武昌巡撫陶文節公方嬰城守兵弱勢不支官吏祈大府檄出請援兵稍稍引去公欲入城益陽胡文忠公以布政使駐軍城外惜公才留贊戎幄事公不可縋城入陶公連稱義烈男子且曰吾死於此職也子無守土責盍速出公又不可乃登陴助守明日城陷陶公殉黃鶴樓公馳往哭死之仲子燮及二僕皆從死時咸豐五年二月庚戌

也春秋五十有二六年冬胡公克武昌以公父子死事狀聞

詔優卹

賜祭葬

贈知府銜

國史立傳祀昭忠祠子燮從祀

贈主簿銜均授雲騎尉世職旣而言官奏請建祠無錫疆臣奏請建祠

武昌皆

報可最後給事中謝增等以諡請得

旨賜諡武愍烏乎公未嘗一日爲守土吏卽令聞難不亟赴赴不遽入
城於誼未有以訾公也奮袂勃起父子蹈義若渴一瞑不視以激當世
避危選事之風然後知公所以憂天下者爲無窮而所蓄未易測也公
賢遠矣公廉於財好振人緩急家屢空事親必得歡心其後每念祿養
不逮未嘗不流涕也在宗學時人率歲六七至公獨留宿三年教諸生
不劬與外兄李剛烈公福培少同學以行誼相砥鏃嘗同居京邸夜深
論時事慷慨罵諸將吏跳奔者皆面發赤戟手搏案謹聲震鄰舍僮僕
爲之驚起其後並以知縣死節又同時得諡當世驚其不負所志云公

諱恩綬字樂山祖濬本生祖浩父鼎汾皆

贈朝議大夫配楊恭人子男七亶翔繼兄後燮字理齋候選從九品沈敏多幹略公繼城時戒勿入涕泣請從卒以孝死庭楨由副貢生龔雲騎尉今任湖北江夏縣知縣賡陞候選巡檢紀庸早卒立坊候選巡檢忠愍候選主事女一適訓導糜其相孫五人庭楨以咸豐七年十二月自湖北招魂歸葬公衣冠惠山馬鞍鴨之新阡以理齋耐於昭楊恭人後公數年卒以同治某年月日耐葬越數年庭楨由江夏謁假旋里建祠來請曰願有述也福成乃論次公大節與飾終之禮之始末俾揭於墓之原

李右文傳

子傑 順天府志

李右文榜名佩文字伯蘭通州人父如瑗以孝友稱右文道光十一年舉人咸豐三年選湖南永州府東安縣知縣適髮逆犯天津奉

旨留辦本籍團練日以大義諭里人四年冬撤防以功加知州銜五年赴官以弟秀偉官浙江迂道往視抵浙聞湘南道梗其仲弟翰文自天津差次馳書勸止季亦挽留皆不聽毅然之任至楚檄署新甯其邑已兩次被寇戶口多流亡右文招集安定加以撫循凋敝以振七年以最

調祁陽時從弟載文守粵西已殉難仲弟又勸歸慨然曰死生命也脫使捐項踵報

國是得死所也何慮爲行復回東安任遂行八年春湖南境賊退右文謂眾曰賊敗他竄耳不可恃訓練民團置倉穀數千石備不虞政聲日起九年春逆首石達開由江西竄湖南所過皆望風遁不數日抵永州界逼近東安新甯士庶數百人來迎請避賊於新甯右文曰某去誰爲守此土者及賊至復請護家口出境又曰是爲民望也卻其請並遣之眾皆誓死不忍去三月初六日賊麤至城卑四面皆山賊環瞰之勢岌岌右文集文武與百姓登陴固守新甯紳眾亦隨之揮淚誓師眾皆哭矢死敵右文親冒矢石七晝夜日未交睫轟斃城下賊甚夥至十三日東門陷右文與賊巷戰於署東身被重創猶手刃數賊力竭被害長子傑妻郝氏子婦王氏男女僕夫皆從死新甯士庶數百人亦先後戰死賊銜轟殺警燔右文屍僅得脊骨歸葬卒年五十三事聞奉旨視道員例賜卹令本籍建祠春秋予祭隨殉親丁紳勇並附祀子傑原名慶諱字小蘭幼好弄廢學及長有幹略侍父湖南襄督練勇能任艱鉅父倚其力爲納粟就縣丞以其勇敢改名傑八年春湘境肅

清議獎因傑團防出力請以知縣候選九年石達開由江西回竄逼近東安境右文知不免作書與兩弟訣命傑齋往蓋欲生之也傑不忍去又不敢逆父命潛避於署之左右以觀賊變及賊至率練勇登城守南門素與眾共甘苦至此皆效死賊環攻七晝夜至三十日陷東門傑聞警馳父所未至先遇害屍同被焚卒年三十有一依同知例

賜卹附祀右文祠

權知直隸清豐縣事王君傳略

蔣日豫

咸豐十有一年六月十八日權知清豐縣事王君懷清禦賊死初廣西賊起沿江徧亂十餘年未已大河南北羣不逞之徒漸亦煽動假私號爲約束以齒敘者曰捻以術授者曰教捻居河之南教居河之北遞及山東東昌臨清其在曹濮閒者別於南捻曰東捻擁眾數萬或數十萬攻標郡縣殺人顛貨縣屬道涂清豐直邊邑地斗入賊中前後令長率謝事去君奉檄攝縣月餘值賊犯境連戰敗之賊遂大至捻教眾各萬餘縣久被兵丁壯憊不任用君激勸慰厲感動復前兵旣交積兩時許君受創已深賊又固持之盛氣搏戰旣而賊前隊稍稍卻君率眾追及瓦屋頭又戰火槍發於林洞君脇墮地賊將生縛瞋目大呼曰我清豐

縣知縣王懷清爾敢復攢矛刺之君躍起拔佩刀猛格力竭復踣
練長謝羣相謝三模馳救不及同遇害最後盧慶齡等浴血陷陣奪君
尸歸歸視尸傷凡中要害三十有七是役也賊被擊殺亦數百人由是
不敢妄窺清豐

蔣曰豫曰自寇亂以來殘破半天下士君子慨焉康濟策求治平之要
甯獨區區赴義自完哉顧有甚恥於心不敢每生爲幸至如君之知險
不避用義深遠亦可風矣君字鏡泉四川定遠人護縣事典史胡元旣
殮君喪郵狀乞文余爲綜錄如右

署紹興府知府廖君別傳

陸心源

廖宗元字梓臣湖南甯鄉縣人也道光閒進士以知縣需次浙江屢宰
巨邑有能聲權宰歸安之明年賊自廣德趨長興民心洶洶吏不知所
爲君曰賊易與耳湖城據形勝可戰可守甯坐而待斃乎會趙觀察景
賢自蘇州馳至遂定議固守君有機謀家居時練習兵事故布置井井
賊至屢卻城賴以全四月賊再至圍城三面君夜率精卒百人亂流而
渡直擣賊營賊自夢中驚起僂體四竄生禽四十六斬級百是役也賊
連營數十里眾號十萬以昏夜不辨吾兵多少驚擾達旦自是不敢近

城遂解圍去當是時巡撫王公多歸功趙觀察景賢而湖城百姓則惟君是頌於是有所蜚語上聞者君解任聽勸學使張少司寇力白之巡撫亦微察其枉會浙東事急以君能任勞怨檄權紹興府事君至一欲以治湖者治紹而事已不可為矣紹民故不樂城守奸民又造作謠言以君為偽毆君幾殆越明日賊至有開門者城陷君死之時十一年九月廿八日也明年巡撫左公為之請於

賜卹如例

論曰君故霸才作事無瞻顧然頗能以禮法自守非恣肆險詐者比也君有大造於湖湖之民能言之攻湖之賊能言之天下莫或知焉此旁觀所代為不平者無惑乎君之不能默然也余下第回南患病簡出君以余同顧桑梓之急大有違言及君被構余為之言於星白侍郎白其枉君大愧服嗚呼使得如君者十餘人寄以牧守之任浙事何遽至此乎

二忠傳 陸心源

湖州府知府瑞公者諱瑞春字慰農姓鄂濟氏蒙古正藍旗人由筆帖

式洊升埜藩院郎中軍機章京擢湖州府知府歷權金華温州府事治湖數年慈祥愷悌政尚寬平民甚安之有瑞佛之稱咸豐十年賊由甯國陷長興湖城危甚公與副將鄂爾霍巴郡紳趙景賢激勵軍民嬰城固守賊趨杭州城賴以延大吏上公守城狀奉

旨以道員用時趙忠節主湖郡鄉兵多專擅公無所忤嘗曰趙公睢陽之儔我其爲許遠乎聞者大服同治元年五月城陷公望西門火起歎曰鄂公死矣朝服升堂賊至脅之降公大罵不屈遂遇害母章佳氏妻宗室氏妾方氏子候補縣丞富俊子婦富察氏幼子富麟皆死於難江蘇巡撫李公以聞奉

旨照道員例賜卹於死事地方建立專祠

鄂公諱鄂爾霍巴字斐堂姓口口口氏滿洲正白旗人起家侍衛出爲湖州協副將湖州初次解圍趙忠節上公守城功公以屬邑失守上書自劾時論偉之時浙中徧地賊氛餉精久匱湖州捐輸釐稅皆主於趙忠節公困甚以衣物質錢以自給忠節有所餽卻不受每圍急身出巡城而閉妻子後堂外環火藥戒家人曰有不測卽舉火無污賊如是者屢矣及城陷公在北城督戰策馬回署則賊已入廳事矣公手然火繩

藥發闔門轟焉賊亦斃十餘人巡撫左公以聞得

旨照總兵例賜卹於死事地方建立專祠

論曰二公居官能盡其職其困守孤城也推賢讓能鞠躬盡瘁無爭心
城陷之日闔門盡節視死如歸絕不為脫妻子計視彼巧全家屬身辱
賊廷者相去不亦遠乎余嘗謂如二公者乃不愧真忠臣聖人復起當
有取於余言惜無子弟族人為之文飾鋪張遂使天下知有趙忠節而
不知有二公也悲夫

書許知縣事 施補華

許君諱承嶽字柱山湖南甯鄉縣人廖君為縣浙江常在幕中為掌會
計句稽出入條舉件繫既無妄費亦無私積廖君甚倚之納捐典史保
升縣丞復由縣丞納捐知縣分發浙江咸豐十一年來署烏程為政一
視廖君而寬厚過之當賊之陷杭州也環錢江以北咸為賊有獨湖州
一城相與支柱於是賊悉力來攻眾數十萬山谷皆滿城中兵萬人百
姓十餘萬為堅守之計以待外援予時走告諸當事於賊未至之地就
地徵漕分運入城以足兵食絕盜糧君以為然言於趙公而行之然賊
已大至民皆四走得米僅四五千石明年三月城中糧盡兵一日兩粥

千總熊得勝下搜米之令家至戶到及斗升衣服錢財雞鳴犬豕其無
有者膊而戮之君調護曲至涕泣見得勝言百姓無米是後搜米稍緩
五月初三日得勝開東門降賊城陷君在西門望見卽騎馬入署就縊
一妾從死君實心爲民見於容貌辭氣而才微不逮故民不甚知正月
之初君謂予曰吾元日夢水漫堂階其赤如血庭中兩柱無故自折城
其不守吾其遂死於是乎已而果然

繆太僕家傳

譚廷獻

繆府君樹本字翰仙世居常熟明殉闕禍諭德文貞公九世孫家世忠
篤爲吳右族府君官陝西臨潼知縣從團練大臣前副都御史張文毅
公入賊巢諭降叛回任老五同時死難秦中漢回構釁伏戎且久回人
多死黨曉夜謀亂訶羣吏短長同治初元粵賊自蜀北竄全秦戒嚴臨
潼居其衝府君禦卻之賊乃紆道藍田犯渭南遂巡出關於是渭河回
眾蠡起冒團練名漢民亦集眾自衛也修夙怨且日鬪則有馬百齡者
以解散之策干張公百齡固回人列衣冠張公久在軍中習於豫皖羣
帥撫諸捻以成功又易視回眾乃挾百齡入油坊街回巢會大府厭兵
府君舊有戰守能威望著民間文毅旣行有司不能不從漢團旣散回

眾益橫遂擁張公與府君至倉頭露刃害之府君行時嚴守具而出謂張淑人曰吾許國之身犯難不避粵逆在郊誓與城存亡今患生肘掖吾出以諸子累若矣淑人曰君殉

國我不當殉君乎行矣勿念妻子府君既陷賊指示禍福譬曉百端洪興者素德府君至是謀脫府君不果賊渠慮眾心且搖官軍又未集乃決計戕之當是時二華高陵皆不守臨潼孤立以備禦完得不陷而張淑人已絕食七日死矣府君通刑名學少客游名動燕豫咸豐四年初官河南縣丞五年改陝西知縣大吏如曾公望顏家端恪公皆憤於折獄奇賞府君理西安讞局因機立斷民以不冤厯宰咸陽武功盩厔皆有異政臨潼民抗糧結聚乃移治之力疾莅官獲亂民楊某械繫之其兄楊生花謀劫獄府君已先期檻送省城單騎禦眾投戈歸農獨禽生花置之法撫部奏保

予戴花翎以直隸州知州在任候補府君死事年四十六張淑人年四十三府君

卹贈太僕寺卿銜世襲雲騎尉子鍾汴承蔭改知縣發安徽鍾洛陝西府同知鍾渭鍾高

論曰府君之死可謂從容矣身糜於豺虎而所施設卒完危城豈輕於一擲哉閭門之賢與蠶臣比烈懿已鍾汴世其家善折疑獄亦有聲讞局也與予善

貴州卽補道署平越直隸州兼署開州知州 贈太常寺卿世襲騎都

尉戴君墓表 俞樾

道光十七年余始應鄉試廁名副榜榜末爲戴君商山越二年而君舉於鄉又五年而成進士諸同年生咸詫曰吾榜成進士者尠君列榜末不數年擢高第以去豈非吾榜之高才生歟乃始藉藉稱戴商山戴商山然而余固未之識也同治五年余寓吳下有戴氏子曰儒者投刺於吾門稱年家子而求見進而問焉則君之嗣子也手一編曰是君之家傳嗚呼君死矣余踰伏久於時事罕聞見不知君死狀受而讀之乃歎曰若君者豈獨吾榜之高材生歟乃當代之魁士名人也按家傳君諱鹿芝商山其自號也浙江蘭溪人道光二十四年進士二十七年補應朝考以知縣發貴州試用補印江縣知縣升朗岱同知歷署修文縣知縣定番州開州永甯州平越州知州代理安順府知府同治二年秋九月開州賊何二攻陷州城君時攝開州牧冠服死於堂皇君才識明練

勇於任事不畏疆圉不避艱阻其攝修文令也修文民屠福生謀叛前
令上變大府卽命君往代之君疾馳至修文屠氏訶者日數輩三日夜
無動靜意稍懈君忽單騎率數役馳入屠所居寨屠父子五人皆大驚
厥角於地稱死罪君笑曰無恐從我歸耳皆裸然從行君釋其罪而用
之後賊至屠父子殊死戰城竟以全焉其攝永甯州牧也州故苗疆頑
民結寨自固者相望劇盜伍王臣踞石頭寨地尤險大軍攻之未卽下
以武功爵羈縻之益偃蹇君偶有事於小箐距其寨甚近有僮何鴉片
而過者趾數千接於道問之皆賊黨也命奪而燒之一夫鑱頭突鬢六
品冠服騁而前疾呼曰勿勿君誰何之曰吾石頭寨伍王臣也君大怒
手摔之踏地欲殺之無刀顧曰刀來刀來倉卒無應者乃反接之以入
城城中皆大驚或勸勿殺君怒曰賊來在我終不令爾曹獨死遲明出
伍王臣辜磔之竿其首縣之石頭寨明日仍有事於小箐則伍王臣妻
子兄弟皆囚服道旁叩頭血漉漉求免死君揮以肱曰去去勉爲良民
無犯吾法矣於是威望益振大吏倚之爲重所至羣盜皆屏氣莫敢枝
梧然竟死何二之難先是開人獲穿窬二官桎梏之斃一人一踰數日
不死憐而釋之卽何二也咸豐九年何二踞尙大坪以叛君時方攝平

越州牧未至大府千里飛檄委君兼攝開州事君知開事急遂改道赴
開賊知君有備不敢窺州城然踞巢穴如故君以兵禍不解民且廢耕
思如屠福生事勸之降十年閏三月單騎馳賊營父老遮道留甚苦君
曰吾計之熟矣彼脅從者皆吾民未必卽受害得遷延十許日雖殺我
耕事畢矣聞者皆泣下旣至何二箕踞坐上其手曰官來吾英雄官亦
英雄君吐曰否汝言何也吾汝父母若曹吾子耳父母不忍其子死來
活汝汝言何也何二意稍沮君百端陳說利害卒不聽居尙大坪賊巢
者七月惟取所攜周易諸書讀之見賊輒怒罵然賊終不忍害竟送之
回城羅拜而去曰公在吾曹敢闕城闔一步乎明年君坐事去官代者
未至賊不知謂君行矣率眾攻城城無兵無餉無以守君檄調修文舊
部至而修文距開數百里賊斷餉道士皆枵腹城遂陷君偕妻姚淑人
坐堂上賊至淑人縊君手劒擊賊賊還擊之中額顱血湧出遂仆賊相
戒勿殺君君復蘇顧其弟鹿榛曰吾此時心愈定亦愈清平日讀書之
效至此驗矣吾生無愧作死且爲神言已大笑遂卒嗚呼雖古所稱結
纓銜須者何以過哉事聞

贈太常寺卿予騎都尉世職蓋君雖以州牧死事然前已有

旨以道員用又加按察使銜故從三品例

賜卹且

詔原籍及死事之地皆建專祠以時致祭君雖死不朽矣君舊所部民聞君死莫不流涕雖賊何二亦稱君爲貴州第一好官蓋其忠誠所感發如此然則吾儕當日藉藉稱戴商山戴商山其知君殊淺也君於國史官有傳其同鄉先達唐耕石銀臺又詳述其行事爲之家傳應敏齋觀察取以銘其墓雜之幽宮凡君歷官先後生卒年月及先世名諱具矣而嗣子儒又乞余一言余故舉其犖犖大者表於其阡俾後世過墓而式者有可考焉

署祥河同知竹林王君傳

并耕雲

王君名仁福號竹林明大學士文恪公整十一世孫世居吳縣東洞庭山初君大父宰中牟有隱德君生而穎異嬉戲必具衣冠見者卜爲王氏之宗必大矣君持躬廉謹臨財絲豪不苟取慷慨好施以吳中宗族繁衍貧者無資以爲生將流爲不肖卽請於君尊人出五千金買田爲義莊條約一如范文正公之式鰥寡孤獨有所養昏嫁以時區其子弟之材者廩以膏火而磨厲之以學君尊人幕游江淮君奉曾大母大母

家居承顏導意克致孝養侍母病衣帶不解者數月妻歿終身不復娶亦不置妾媵門內之行有足多焉幼嗜讀書講求經史大義不屑屑以帖括爲事旣長隨任襄理煩劇遂不能卒業入資爲布政司經歷後改官通判筮仕東河以防汎功加同知銜又捐輸經費得以同知留工壬子冬粵逆犯順擾湖南豫以去寇遠無備省垣久不修濠淤塞如平地君建議疏濬大府檄君董其役工歲而賊大至圍城數重以濠深解去在事升賞有差而君不與待缺二十餘年同治五年冬高要蘇公持節視兩河乃檄權祥河同知事自黃河北徙中原多故國家歲入悉以輸兵猶不給河工之帑驟減會不常時十之一二隄埽殘缺朽壞竹槌之儲蕩焉盡矣而祥適當水衝夏秋盛漲奇險百出君奉符之日旁觀皆咋舌而君夷然畚揭躬親盡心修守河工歲餉向貯道庫錙銖必得請而後發六年八月水驟長洶湧澎湃激注埽前掣埽去如削木梯隄岌岌震動天久陰雨君築隄泥渾中七晝夜搶攘屏營無所赴愬二十一日勢愈危居民老弱蟻附於隄君對眾流涕曰我爲河官而擠汝於厄我之罪也請身之眾方揮淚勸而君已躍立埽顛風益猛水山立埽以君走入大溜河聲如吼水斗落風止浪亦平殘隄屹立萬民羅拜號泣

善泗者急下覓君尸而終不可得矣其家人乃以衣冠斂蘇公具疏以聞

朝廷軫悼

賜祭葬

子雲騎尉世職

敕建專祠君死事之日年四十有九蘇公既爲詩以弔之又屬余爲之傳余哀君之忠而重蘇公言故綜厥生平而著之於篇以俟夫

國史之采擇焉

論曰吾聞諸故城賈公曰嘗識君於稠人中而覺其與眾異顧君恂恂然貌如中人一旦臨大害倉卒不驚衽席深淵奪數百萬生靈於蛟龍之腹而甦之何其勇也戊午君以大父柩歸葬道徐州夜半聞警居民竄匿君徒步率廝役出入烽火肩輿疾行四十里乃免然則君之審處於生死之際非一口矣

年辰園墓表

傅桐

君諱順行字辰園懷遠人道光辛巳舉人官五河教諭優賢旌淑風振師儒善爲詩宗法在上元寶應間而於文房爲近軀幹修偉須眉颯爽

杯酒淋漓譚諧閒作辭氣蹈厲如縱橫遊士逸邁不羣又似多所凌傲者而樂道人善出於天性嘗見余詩寓書夏嫌虛庠師稱爲沈雄高抗淵雅醇厚抱負經綸手筆是大不凡今雖偃蹇老矣每憶知己之言感不去心繼賊起聞君死於其鄉甚烈而苦無徵亂後流寓袁浦邂逅君子長運以墓表見屬久之得君狀乃論次之案狀咸豐三年春粵匪陷江甯捻逆四起君與其弟糾族中精壯得一千三百餘人用白保衛器仗資糧皆自備於是南至肥河北至澮水東至固鎮西至褚家集百里內咸附之九月會於楊家集眾二萬餘人火器尤利他州盜賊徧野惟君號令所及帖然如平時鄉人咸賴焉是月賊犯懷遠龍岡率團往賊遂遁欽使袁甲三嘉君兄弟四年袁往蒙城勦賊命君弟統五千人爲五營皆選鋒且奏聞五年袁駐臨淮賊稍遠饒細於是當事者遽裁五營君弟遂入都鄉試君主團練事於斯時也議受賊酋張落刑降君曰聞此人寡言笑是有陰謀至秋果復逞毒蒙城尤酷十一月賊聲言從者安業違者殺鄉人恐懼多思附之至是外姓已解體惟君族保聚然無自固地矣先是君族凡八房出重貲募礮手二百人戰頗得利賊甚憚之六年正月初三賊至晝夜相持餉饋偵巡一無甯晷及初七日勞

瘁已極賊忽告曰假我礮即退又告曰將撲固鎮可假路君皆不許頃
之又曰不犯年家團矣眾稍懈初八黎明賊數萬驟至團練未及集君
家兵礮手迎賊戰合礮裂又寡眾不敵君力竭陣亡其第五弟隨同戰
死初十賊退得君尸葬於肥水之南嗚呼君以冷官解組歸來思捍鄉
里家毀眾潰奉身而退無所爲職守也奚不可者聞君死難前夕其子
以暫避請君曰我家一方之望先去則人搖動其子又曰觀眾情洶洶
必難固守君曰人負我可也如君者可不謂見危授命今之成人也哉
自寇橫蠶起承倚任置寄之臣憑崇墉湯池之險供儲川注堅利山積
宜若可收尺寸效者卒至聞賊先遁勇不能一戰忠不能一死棄雄城
而走者比比也彼何人哉聞君之風可以少媿矣爰系招魂之辭以酹
君其辭曰

狒狼狂走紛郊都烽火塞天荆棘俱連雲大邑蕪城蕪淮右千里冤血
汗方雅巨族趨路隅子弟無有完肌膚道殣相望悲可吁廣文先生家
兵駟厲拳勇兮奮遏徂拔劍起舞兮奠爾有居競揚惠聲兮安粉榆天
未厭亂兮猘猱張其牙須臂折當轍兮徇以軀草木同腐孰別區偉彼
鬼雄古丈夫巫陽下招兮雲車可呼毅魄浩氣兮永丹青之不渝

候選訓導胡君傳

方宗誠

君名澤順字梅坪涇縣附貢生捐職訓導少聰穎好學無所不窺年四十後益就平實讀書以隨在自反爲歸不馳逐聲譽重義輕財尤喜振孤窮之急咸豐三年安慶陷於賊宿國涇縣議團防君奉父命前後輸金幾三千不邀議敘所居涇東鄉又毀家財助鄉人講求捍禦之法甚具嘗謂時事孔棘惟有固守忠義二字衛鄉里報國家爲分內事以是任諸己亦以是教諸家助其宗族里黨以故人心感激屢蹶屢振賴以安堵者數年而君生計日窮嘗以麥粥療飢然處之泰然人不覺其貧也十年正月二十八日涇防失守諸子請避賊君自以受職爲儒官卽力不能磔賊亦不願與之竝生於是恭讀聖諭廣訓危坐廳事以待賊入門擄其子凝然自若賊以刃逼之乃執巨挺鬪賊受五傷賊始舍之去次日人見之頭面及衣皆血一赤人也三月十日賊復至諸子泣請行君曰行將焉往吾已受國恩死耳一定之理可違乎十六日賊至家君與鬪受重傷賊退家人環跪欲負傷而逃昏迷中猶張目視諸子責以不遵吾訓乃爲姑息之愛將致我不能得正而斃也十九日見賊復大罵遂遇害年五十一是

日長子婦朱氏投水死焉先是賊掠其二子五子貞吉亦以不屈死君所著有四書一得錄周易觀翫錄已稟行同治元年節相曾公以君殉節事聞得

旨予專祠

論曰孔子云危邦不入亂邦不居君以儒官在籍無守土之分去之於義無傷也乃自君視之若大不義然使其當官任職豈肯委而去之以偷生邪烏呼是誠可謂篤信守死者矣

同知銜武陵學訓導儲石友先生死寇行狀

劉基定

曾祖諱某字聲之例監生

祖諱某字南坡廩膳生

父諱某字碧山優廩生

烏濤世有以倜儻非常之勇略遭披猖莫制之狂寇仗義從軍心勤王室其忠憤激烈毅然自矢迨至寇深城陷猶提戈巷戰殺賊數百人終以眾寡不侔厥功未就捐軀殉難要皆天實爲之非其志之不振也故吾於儲石友先生有深慟焉先生諱玫躬字石友號暉如先籍淮南十五代祖諱某明永樂時官廣西右布政使右參政解職適楚舟過偏沅

樂其山水濼洄風俗淳古遂占籍湖南世爲靖州人父祖兩世皆諸生
有聲黌序碧山公讀書務實學篤於內行州俗多溺女公獨捐資育嬰
勸立堂宇收養甚眾至今不替先生爲碧山公冢嗣自其少時誦諸經
畢落落有大志負奇氣工制舉文字尤喜讀泝泝百金方及戚大將軍
練兵實紀等書講求營陣攻擊之法嘉慶庚辰歲試補諸生明年值於
廩道光丙申學使順德蔡公以副拔貢生選額乃十八省闈三登薦卷
皆不得錄己酉夏有無賴子某傳習左道揭竿倡亂聲勢頗張州中人
人惴恐先生與其弟廷昌出家財召募奇零之街卒田夫身領其眾禽
獲首惡頭目十餘人械赴省垣戮於市事遂寢越庚戌新甯李沅發戕
害官弁先生慮賊眾充斥蔓延郡邑先事防禦督率鄉民從間道出
踰山谷以兩晝夜行數百里馳至通道縣城堵截關隘不費軍餉明年
新甯蕩平敘功以訓導選用旋丁父艱廬墓守制暇日與州人士議建
社倉儲穀麥以備凶歉首捐穀五百石爲之倡刊布條約期於久遠咸
豐壬子二月部選武陵訓導未赴任值粵逆洪秀全犯長衡
欽命丁憂在籍禮部侍郎曾公監督軍紀知先生夙抱偉略調入軍營
兼辦火藥及軍裝器械功未竣委桂東一路勦辦土匪督兵窮追七八

百里歷江西省界回至洋泉白水洞殺賊數十人復解藍山圍斬首百餘級搶獲騾馬軍裝無算繼賊至道州四廣橋亦殄滅百餘州城解嚴眾皆竄逸臘底回衡州營錄功入奏奉

旨加五品同知銜往江南京口軍門效用甫趨裝謀知甯鄉失守曾公命以所部五百人從夜半赴援卽同姪甥諸生楊華英身先士卒冒雨衝鋒由甯鄉南門直逕北城外殺賊四百餘人擊沈賊船七十餘隻時尙未朝食復轉至南城外玉潭橋遇賊伏橋右又以溪岸險偪四路夾攻身被數十劍猶手刃數賊罵不絕口遂與楊華英同時殉難隨身哨卒陣亡十九人時甲寅二月十三也諜報至省明日曾公遣材官四人料理棺槨檢護屍首絞衾殮殮昇櫬進城嗚呼慟哉當先生殺賊時不惜軀命以身殉寇甘之如飴無少怨悔其精靈昭著實與茲土有眷顧之念或謂生不能殄寇以安民死必爲禦災而捍患方今

聖天子拯念水火視民如傷剋日盡殄妖氛蕩平餘孽而賊猶伺隙蹶張使軍中將吏有負清貞強幹之才不能究其施用卒至血刃疆場身膏原野可深痛哭今邑中人士謀爲先生專祠立主以展禮祀以弔國殤屬余狀其事嵌於祠壁並貽孤子先培先基爲他日史館張本當世

不乏文章博雅之士別爲志墓立傳以慰忠魂儻更如理靈坡
易名賜卹詔議褒錄余雖老猶能執筆以俟甯鄉八十禿翁劉基定

謹狀

又儲玟躬傳

王閻運

儲玟躬者靖州人也父某爲諸生有名於時玟躬少時以能文繼其父
名補州廩生居山城窮僻獨有遠略喜聞當世事方天下全盛而民困
益亟湖南邊苗蠻界五嶺間民氣震動以無費得弭息之

宣宗皇帝二十有九年春大水自湘陰下瀕洞庭郡縣圩岸盡決流民
滿塗靖州山田瘠苦米貴無食民遂爲盜玟躬首倡捕治悉解之其明

年

今皇帝卽位新甯奸民以數百人奉傭奴爲魁陷邑據之大臣亟治師
遷延不敢犯賊賊故得出奔廣西復還走黨頗散失遂禽其魁所謂李
沅發者也李沅發旣號爲巨寇方亂時玟躬集鄉人守境上已又從大
軍來往馳驅勞最甚身最苦旣定論功功或至異等矣玟躬乃得訓導
心猶以爲慚以爲不武也其年遭父喪在鄉譬喻州人積穀設義倉以
待非常除服出天下事已盡變廣西寇益張已由湖南出陷武昌據江

甯破揚州矣

天子詔在籍官辦各直省鄉防湘鄉曾國藩以侍郎主湖南團練事盡
招鄉人相助治兵餉造器械開捐輸大斂民財興水陸師鄉人士盡出
爲用聞玟躬勤廉使監造火器火器先有官主造玟躬至事盡委之日
夜省視數百工役不敢偷惰及領價足辦而已主官欲多之玟躬不可
人十萬玟躬五之事稍聞或問之輒謝曰無有是曾國藩益奇愛之改
檄使督勇討桂東山賊兩日夜追奔三百里事平討洋泉白水洞窮捕
積賊亦平復援藍山以三百人往斬俘六百復會它營攻賊道州賊負
險距先屯兵莫肯開壁玟躬卽轉鬪逐散禽虜千計皆平自玟躬爲
偏將三年兵不滿五百別將亦率領五百人成一營討土寇時勝時敗
廣西寇眾輒數萬諸將未嘗一當也雖玟躬號敢戰未出境無緣與大
寇遇戰故所將止五百馳逐衡永彬桂間而已咸豐四年春二月洪秀
全黨再陷岳州從湘陰轉甯鄉將繞長沙西上營兵向不任戰募兵有
四五營玟躬居其一獨奉檄救甯鄉未至偵者言寇數千已破縣縱掠
勢甚盛未可敵也玟躬業出在道而別將一營後或言待之於是玟躬
曰夫吾與彼共千人卽合兵勢未厚也而寇益固休養恣肆附脅益眾

吾今往賊出不測猶可以勝且甯鄉民受塗炭引領嗚嗚望官軍拔之
吾雖不材顧挾兵逍遙不急趣與同患難豈吾心哉則約所部卽夜發
身先馳之徑入城西南賊大駭奔走轉至北門盡披靡無肯距戰玟躬
獨騎仗矛要劔五百人步亂斫賊雨雪道凍多倒地枕籍血涇積雪屍
橫填街中散逐賊出南門兵恃勝不復成伍或在城中或在城外方亂
時兵賊皆不識巷戰方法勝敗雜走爭趣南門洶洶數百人反闕玟躬
玟躬出時財將十數人自隨謂賊已出不意相遇從者恐懼知不能戰
苟有小巷則指謂玟躬曰彼可逃也玟躬曰今吾以勝兵擊賊賊若此
不戰吾士卒聞風潰走賊反得意糾聚追我全營死傷吾已先免是倡
敗也遇急倉皇將士不相顧是弃法也常是時人或挾之去玟躬怒擊
之前抵寇寇叢集刺傷墮地不知其主將委之去玟躬身旁猶有兩三
人造報羣哨皆開出歸營得免於敗死者塵十八人而玟躬臥地傷重
不能負走俄頃竟死城中餘賊見兵復退議据城守然先已大挫又恐
玟躬計退皆驚疑卽夜引去不敢再上自軍興至今聞賊入城皆絕意
赴救遷延觀望及玟躬以五百人與賊同人搏戰所殺傷過當身雖死
賊終散敗退走湘潭衡州危而復安交口稱玟躬及長沙吏民戍兵將

士大夫皆曰儲石友死功也玟躬甥楊華英以救玟躬受重創與之同

死
王闓運曰今世多言人短長觀其成敗視其官位而定其等以余觀之豈非命哉自道光末載湖南日月多故鄉人士亦多防衛閭里因遂許國而江忠源以平雷再浩功幸得官累戰積功幸至高位身死廬州其名動天下玟躬亦以李沅發功得官亦累戰亦死於寇不幸不顯人不能尊之比江公也吾嘗以兩公皆鄉之豪傑至於訓導與巡撫勢位誠隔生而畏之可也及其既死雖苦崇之何益湖南首功自玟躬省城祠六忠固不肯以訓導儕於諸大官明矣

候選教諭王君傳

方宗誠

王君名汝貴字金門合肥人世有文行父朝選君少嗜學篤行過人嘉慶戊寅副貢生道光壬午就職教諭以親老不赴選授徒養親弟子成名者百餘人晚年篤志宋儒之學咸豐三年春正月賊陷安慶巡撫李嘉端駐節廬州檄君辦團練先是安慶陷皖北千里震動君既受命乃招流民練壯丁編保甲儲米粟人心爲之一固嘗謂人曰國家養士二百年獲效正在今日吾人讀書數十年致用亦在今日勿

諉爲異人任也或曰賊若入境畜髮全軀若何君怒叱曰難髮而生戴髮而死何以見先人於地下十月賊陷桐舒廬州大震時巡撫以罪去十一月十日巡撫江忠烈公忠源至方巖飭守禦越二日清晨賊已蟄集城下江公文武才智勇絕人應變達機殺賊甚眾人心始定君奉諭守大東門督民夫塞水關一夜而工竣遣練勇李榮升等隨江君親兵踰城擊賊榮升有膽力每遇賊奮勇當先連燒賊營獲渠魁竟以深入被鐵江公惜之然以是知君之能用人也賊穴地道攻城江公傳令取棺盛土塞之里人匿空棺君曉之曰事亟矣不從公令城且破無死所矣何棺爲眾皆諾先是江公至危城中兵不滿千餉需告匱君振臂呼曰江公善守江西有明效此長城可恃也由是荷戈者雲集富商巨室爭毀家輸軍餼壺相屬於路公疏言廬郡紳民萬眾一心爲君及一時倡義諸人發也堅守月餘城陷復完者再而賊以數萬環攻旌旗蔽日金鼓聲震天黃霧陰霾連日不解是時陝甘總督舒興阿奉命援廬州駐軍六十里外不進城中鉛藥垂盡勢不支十二月十六日五鼓西門城忽有聲如雷有頃北城火起江公命各抽練勇禦之君方巡守東門率勇奔赴至演武場南何氏宅旁遇賊勇丁許之坦范國祥

等三十人皆戰死君被執訶之跪君罵曰我在籍候選教官也我豈爲賊屈乎賊怒脅以刀罵益厲遂被害有鄰人蔡九者逃入何氏竹箔下竊窺之次日又見賊舁眾屍擲大窖中獨君屍挺臥地下力舁不動賊舍去旣而逃出告君子往斂之君爲人沈博淵靜平居退然如不勝衣及臨大節則義形於色所著有經篋集古今體詩文悉燬於火里人感君義討祀岐王墩江呂二公祠後巡撫福濟爲請卹於

朝君殉難時年六十歲子三人

定海縣典史全君狀

黃安濤

全福甘肅武威人由英吉沙爾典史議敘選授浙江定海縣典史單身之官軀幹偉岸嗜酒任氣有膂力道光二十年六月八日英吉利以粵東飭禁鴉片煙土絕其貿易遣頭目伯麥布耳利等聯艘三十餘來窺測洋定海孤懸海外夷船直抵舟山進泊道頭勢甚披猖總兵張朝發捍禦失利邑令姚懷祥閉城守兵民潰散福見事不可爲作書敘出身履歷及城破必死狀以一紙寘諸懷時隸役盡去僅一廝僕侍顧謂安所得酒乎僕覓巨罌之半以進福具朝衣冠佩刀詣獄所令挈酒以從坐園扉外諭獄囚我生爾曹亦生死亦死毋妄動若有越出者血我刃

少頃聞礮聲囚徒則紛紛穴牆踰屋而跳勢莫可止歎曰失城我當死
況失囚耶死將安逃遂詣縣路值難民素識者出懷中紙授之屬事平
赴郡投此庶知我死也民泣受去至縣則莫知同官及令所在遂坐堂
皇以杓斟酒而罵若曹獨不受

朝廷參養恩不死賊甘死

國法乎詬厲霑顏裂背僕勸引避則訶之退未幾城陷夷眾突入
縣門見福坐堂皇狀逡巡錯愕福拔刀拍案曰我

大清國典史也誓殺賊何有汝等小醜耶夷狼顧稍稍進福下堂大呼
斫賊殺黑夷一人被賊叢攢遂死年三十八死後數日城居有未逃者
爲其棺斂聞受狀者亦爲之赴官如所屬焉姚令並同日投水死此段
聞諸我邑宰劉君秩劉君聞諸全之僕卽臨死所訶退者劉與全居同
縣且共事新疆知其人素審語當不誣於戲我
國家懷柔荒遠震疊聲靈服法畏威互古莫比英夷嗜利干禁自取擯
棄乃敢逞厥機巧窺伺邊陲定海島嶼孤懸卒被蹂躪福以未僚於蒼
黃中能守官就義其從容也如彼其勇決也如此豈猶尋常刀筆吏所
及乎福旣死疆吏以不屈被害奏

聞得

旨與姚懷祥俱加等賜卹所以厲臣節而慰忠魂者與至渥矣昭忠列傳自有操管者在不才敢據所聞竊附張中丞段太尉死事狀例或他時甄錄加詳云

周大勳傳

周壽昌

自道光癸巳至丁未十數年間吾宗以京卿翰林御史同官於

朝者凡五人族人大勳獨爲禮部吏顧其人寡兀自異無猥譎習稍稍禮接之常以語戇得罪於部郎某一日某欲借他故笞大勳大勳倔強不服其曹勸之曰笞耳何害職事大勳曰吾世家子不肖不自振拔辱爲吏乃更受笞且笞卽何罪吾甯不爲吏矣遂棄去入賞得從九分發廣西時賊事亟其母與妻阻之大勳曰予幾殺賊立功一湔曩辱耳卽死賊不愈於牖下死乎奮然往數從戰有功擢縣丞賊竄永安前軍戰失利大勳護軍重後行遇賊軍皆潰大勳獨前搏戰殺賊數人賊怒以長矛叢刺之旣死猶手握佩刀倚壁僵不仆事聞

賜卹如例是役族兄湘漢亦從戰死無官例不得卹大勳號秋皋

章芳傳

戴楫

兩淮候補鹽知事章芳山陰人也咸豐三年二月粵賊破揚州芳闔門縱火舉家皆焚死芳死無家屬十一月賊退無人爲舉報未得贖卹也上憲某乃以爲不知處所而劾之其鄰人有謝生者怨芳訴之芳同官章憲文曰賊人給某許以到揚州不害百姓一過徑去賊初到揚州時不閉城嗣後十數日大兵至賊聞大兵至乃閉城擄人去居其館芳於是時縱火自焚芳家與子家接連火延燒予家俱盡生以此怨芳憲文素與謝生相識旣得生言具問其他與芳鄰近之人與謝生無異辭也憲文於是具以芳死事告予憲文曰芳居處在揚州小東門牛柔巷也戴楫曰昔韓退之爲馬少監墓銘以爲未四十年哭其祖父子孫於人世何如今不幸生亂世有頃刻間舉家亡滅姓名湮沒如芳者其於人世如何也然芳義不受賊汚原其意亦不爲賊汚斯已耳雖其身滅死而無聞芳固無恨憲文憐芳死事不傳乞予爲表章之予因爲之傳俾著聞於世焉

叔祖西山公家傳

戴燮元

漢制縣令皆有丞尉秩四百石至二百石元於丞簿尉外置典史明不置尉置典史一員爲令屬我

朝因之凡州縣皆有獄典史爲管獄官故典史之職雖卑而責甚重爲典史者固不可以苟且爲也若吾族叔祖尤溪公其可以無愧矣公諱崧字西山曾祖士雄國學生考授州同知祖綸乾隆壬申武舉人任安徽池州衛領運千總父銑國學生議敘典史生丈夫子四長巖邑庠生次岑嘉慶辛酉舉人官江甯府學教授次吧嘉慶戊辰進士官至山東膠州知州公其季也公少讀書有大志旣棄舉子業援例爲縣典史歷官福建建安典史甯化縣石牛司泉州府劉五店巡檢馬家巷照磨閩縣南臺主簿莆田平海縣丞以獲洋盜敘功補尤溪典史咸豐三年金錢會匪作亂薄尤溪城時公年已七十且病甚聞賊警偕在城文武力疾守禦當是時福建全省騷動會匪每掠一州邑輒縱獄囚以益黨與延建等屬十數州縣同日陷尤溪亦陷公曰吾老矣官雖卑受國恩一也其忍偷生須臾耶回署服公服從容仰藥死公子垂勳亟斂公尸斂甫畢有賊酋數人突入署見公柩號哭伏於地曰是戴公耶吾輩皆受戴公恩人也相與叩首而去以是公柩得無恙而公之家屬亦免於難事聞奉

旨優卹

贈鑾儀衛經歷銜

予雲騎尉世職入祀昭忠祠戶工部各遵頒卹葬銀如例嗟乎觀賊酋
之言則公平日之有恩於獄囚可知推公所至之地有惠於其民亦可
知公誠不負此官也夫配董宜人繼配楊宜人子三長苜蒘次勉次垂
勳承襲雲騎尉

樂清典史趙君傳

吳嘉賓

趙映南南豐人任浙江樂清縣典史咸豐四年十二月樂清民懼振漢
等謀亂映南死之先數日聞賊將起樂清令康某在城副將姚某均忽
不為備以縣役營兵皆通賊故也是月十八日天未曙賊至令與副將
易服遁副將為營兵通賊者得賊賄執以予賊賊殺之教諭丁某降賊
訓導李國樑自縊不死卒與義民共復書映南聞變將禦賊妻夏孺人
止之遂絕袖而出遇賊死僕劉桂列焉夏孺人藏其官鈴記匿民間賊
索得之誓死不為動卒遣人閒道歸之有司又以君尸殮合城官獨君
先憂賊又以忠死樂清士民皆為之歌其歌君曰微官不愧生捐軀全
身乃或嗤公愚歌孺人曰夫成忠妻用智胸藏章鈴身負骸賊脅以刃
不肯避印能全還長吏骸能全妾心遂皆紀實也其歌令曰縣官赤腳

越牆走毛髮森立齒落口有民不暇問有城不暇守歌副將曰紅巾不
來將軍驕紅巾忽來將軍逃百金易賣將軍頭萬金難贖將軍羞歌教
諭曰有一人兮甘俯首吉冠峩峩毀恐後老而不死悲此叟嗚呼人之
言其可畏也哉君一子從豫邑庠生以廕得雲騎尉改縣丞分發福建
咸豐八年南豐賊退孺人始以君喪歸里邑人吳嘉賓爲之傳

安慶二典史傳

方宗誠

張寶華字子秋江甯人也爲望江縣典史縣境濱江咸豐二年冬粵賊
陷武昌寶華謂其妻曰賊勢必下竄予職卑任輕縱殺賊無能爲役獨
不可以罵賊死乎爾何以爲計其妻曰君死職守余則殉君耳時官吏
逃遁成習視爲固然僕婢驟聞其語皆笑之初武昌未破時

上命爵帥徐廣縉馳赴湖北爵帥琦善馳赴湖北河南交界之地兩江
總督陸建瀛馳赴九江上游江西巡撫張芾馳赴九江協力會剿及武
昌破賊竄九江陸建瀛退回江甯賊遂陷九江犯安慶矣餘賊入望江
知縣衛君選殉節寶華聞賊至急與妻冠服望

北闕拜以謝又望東南拜辭其祖妻自縊寶華繫印於身守獄門罵賊
死僚友王泗華陽鎮巡檢亦以罵賊死焉咸豐三年正月某日也寶華

妻死後有賊欲脫其服飾尸忽以足亂擊之賊大驚走立死聞者異之
余聞之望江倪豹岑主事云

平源者直隸大興人也咸豐三年正月署懷甯縣典史先是安慶大吏
以粵賊故備兵防堵然皆粉飾虛文實無城守志陸建瀛之退自九江
也至安慶使人謂巡撫蔣公曰賊至矣公等速為計於是一城皆遷徙
十七日賊至布政使李本仁署按察使張印塘總兵王鵬飛參將賡音
泰知府傅繼勳知縣許垣總理軍需局務同知劉丙知縣周葆元皆去
巡撫出巡城遇賊轅門外死之源聞警歎曰一城盡走如君臣之義何
乎職雖卑然不欲與諸公同生也冠服坐堂皇賊至大罵死之或曰死
於獄門

論曰賊之圍桂林也桂林固守焉其圍長沙也長沙亦固守焉及攻武
昌一月城雖破然大吏尙多有與城俱亡者獨至安慶城棄不守文武
吏多莫知所之六屬之中二典史一巡檢以死節聞悲夫

又望江典史張君傳戴鈞衡

粵賊破武昌將乘勢下江南兩江總督陸建瀛奉

天子命統兵扼九江會剿賊至乘小艇遁賊隨之襲安慶破江甯分

鎮江揚州沿江郡縣大小吏率望風逃逃不得乃死而其間乃有望江
典史張君死節事張君名寶華字子秋江甯人也當賊破武昌君告其
夫人曰賊若至我兩人其死夫人曰諾自是日以為常言胥吏聞而笑
之及賊至君與夫人朝服北向拜曰辭吾

君復東向拜曰辭吾祖宗邱壟起飲夫人醵酒坐之內室君自出見賊
曰我望江典史張某也殺我殺我先是華陽鎮巡檢王泗來君署君請
曰他日斂吾骨王君曰君乃以我為偷生耶及是同日罵賊死咸豐三
年正月十四日也

論曰

國家養士二百年自廣西軍興以來可為痛哭而流涕也賊初起數十
人耳有司養癰貽患迨其後在事諸臣觀望退走賊勢乃盛攻則破守
則堅竄則莫禦彼豈有奇策異能哉能不畏死而已嗚呼數千里之地
望賊而奔者皆是也而荒江之濱孤陋之邑乃有二小吏慷慨捐生豈
不巍然兩丈夫哉雖然二小吏之死烈矣而其聞於

朝廷顧亦與逃死不得者無異千古名實之閒上君子所為慨然三歎
也

鍾巡檢傳 戴鈞衡

賊陷祁門知縣唐治被執不屈死同時有鍾巡檢者亦被執賊勸之降巡檢笑曰予年七十矣爾賊謂我年能再七十耶則將降汝否則有死而已臨刑罵賊不住口賊怒斬首懸橋柱上剖其心投尸於河巡檢名晉塘字某浙江紹興人也

論曰自賊竄安徽被陷者二十餘州縣小吏精忠嘖嘖人口者望江張典史王巡檢舒城金訓導外更有鍾君知縣則唐君外僅一蒙城令宋君而已而甘心降賊者則有廬州知府胡元煒六安知州宋培之銅陵知縣孫潤降而復出者則舒城知縣鈕福疇其他望風逃者皆是也大吏務爲姑息逃者既曲全之而降賊諸員

皇上方嚴詔詰問而大吏諱言以不知所在入告嗚呼刑罰如此氣節安得而不墮人心安得而不喪也

毛英勃傳

湘陰圖志

毛英勃字子良少孤事母以孝聞年二十以經義授徒鄉里與儕輩談天下事輒奮衣起舞咄咄不自休佐新市巡檢賴史直捕平江亂民手刃之逾年史直官東安知縣英勃從襄辦東安團練會廣西全州被賊

英勃率團勇往援賊敗去全州解嚴敘功保從九

賞戴藍翎五年巡撫駱秉章檄英勃率永清營與劉騰鴻軍同駐巴陵毛田防通城賊賊分擾莊泉花涼臺距毛田三十里英勃攻花涼臺斬馘數十騰鴻亦敗賊莊泉賊由是不敢近毛田是年冬道員劉長佑往援吉安英勃以所部屬至醴陵時大軍未集而袁州被圍急請援英勃獨率所部進軍萍鄉至蘆溪遇伏戰歿時年二十有九照縣丞例賜卹子聘賢襲雲騎尉世職從弟英俊字泛槎從英勃軍亦遇伏戰死竝從祀昭忠祠

又毛軍戰事

湘軍圖志

袁州寇輕騎略萍鄉醴陵屯將毛英勃躬率所部三百人約田興恕軍四百人往爭城興恕後英勃赴急先往遇寇城下直奔之寇退遂入城助守寇屯蘆谿不進英勃計曰我兵少待其至而合圍勢必不利不如先攻之破其前鋒則寇不敢輕來待大軍至而進彼氣奪矣萍鄉民見援軍三百人敢前攻皆以爲神兵寇散民村蠶出禦之英勃搏戰猛銳當者輒靡然見其軍少又輕進相與笑之乃設伏山坡英勃三百人分四隊以百二十人結陳居後左右各六十人抄窺山自率六十人前將

踰坡其弟英俊諫曰前數百里皆寇屯也吾深入勝無所往宜收兵且退英勃怒曰誤軍事者此等言也夫勝敗在一決以數十人敗萬眾者多矣若敗賊因收撫難民土地人眾皆吾有何爲而無所往今以持重爲名實怯懦豈兵法乎遂進英俊馳從之果遇伏四鄉圍前鋒列山寇皆乘高壓之左右後軍因退走英勃身搏寇被二十八創英俊被三十創所將六十人者死二十六人英勃兄弟既力戰死觀者皆感激曰彼援軍忠勇如此吾等何爲不自謀而任賊至此且鄉者之戰使後有繼未渠敗也前笑英勃者更敬服英勃至今道旁民猶喜言毛軍戰事

續碑傳集卷六十四

江陰繆荃孫纂錄

忠節十一

音都統傳 姚瑩

葉爾羌辦事大臣副都統音公登額字健齋滿洲鑲黃旗人初以侍衛討八卦教賊收復滑縣有功爲宣化總兵

賜黃馬桂花翎嘉慶二十五年調鎮臺灣舊制臺灣鎮道得奏事臺鎮爲挂印總兵

王命在焉每決囚皆道至鎮署會鞫行刑奏事列銜道居鎮後決囚坐次如之上元葉公爲臺道以爭坐次不洽又奏事由道主稿他鎮武人不諳律例悉聽之公則兼嫻吏事在宣化日奏稿皆自爲之至是閱道中稿時有商改遂爲葉所銜道光元年葉公方大用

陸見奏公有微詞

上猶念公功第改鎮天津而已四年以副都統爲葉爾羌辦事大臣時西域承平久喀什噶爾參贊大臣斌靜虐回部回民怨之潛奉故和卓木之孫張格爾謀作亂

上聞回疆不靖使宗室永公爲參贊偵獲張格爾不得切責之永芹憂死更以伊犁將軍慶公往領隊大臣巴彥帶出卡遂張格爾不遇圍別部回二百餘人殲之回人大恐張格爾遂自敖罕擁眾至安集延助之諸城響應和闐烏什二城同時陷喀什噶爾被圍葉爾羌守兵止五百人懸絕無援賊至公督兵出戰歿於軍喀什噶爾亦陷慶公被難道光五年十一月也明年正月奏至

上震怒以大學士伊犁將軍長公爲揚威將軍陝甘總督楊公遇春山東巡撫武公隆阿爲參贊提督楊公芳爲前鋒率大兵討之三戰皆捷遂復四城張格爾遁走

上方詰責諸將而張格爾復收餘燼伯克誘之詐以內應除夜潛至卡倫有備不克入將遁楊芳與總兵胡超追獲之西域平大臣以公及慶公死事上聞

贈公都統

賜卹廕襲如制公二子長海洪阿爲古城營游擊次哈當阿尙幼隨公在軍城陷走失逾年乃至大軍

上聞而憐之命伊犁將軍德英阿護之以歸

關忠節公家傳

魯一同

公名天培字仲因一字滋圃姓關氏山陽人也起家行伍歷淮安城守營守備揚州中營守備獲私鑄王國英等十八人署溧陽營都司獲逆嚴加烈等二十五人移兩江督標左營守備歷中軍都司外海水師奇營守備奇營游擊道光二年外洋獲盜最三年署吳淞營參將旋卽真後二年東南方議海運海運自明以來輟數百年議者紛錯大府舉公任其事六年二月督米船千百四十五艘米百二十四萬一千餘石自吳淞抵天津先期功最署太湖營副將明年署蘇淞鎮總兵官旋即真十三年入朝

上御便殿召見五軍機記名明年夷事萌芽先是西南諸夷暹羅眞臘安南之屬皆龔順受職貢惟英吉利最遠強黠嘉慶間一人貢嚴衛出海至是夷目律勞卑來不如約兵船駛至黃埔兩廣總督盧坤水師提督李增階坐疏防落職而以公爲廣東水師提督公至則親歷重洋觀阨塞建臺守排鐵索軍務肅然東南倚以爲重公容貌如常人峻峻畏謹而洞識機要口占應對悉中暇則習弓馬技擊技絕精在廣著籌海集識者比之戚少保云公居虎門六年而禁煙事起當是時洋煙流毒

徧天下前侍郎黃爵滋發其事

上命內外大臣雜議議定著爲令而英吉利躉船適至躉船者販煙船也公旣習於海而前欽差大臣林公則徐威略素著與公尤協力至則拘夷目錮其船船不得發獲煙土二萬二百餘箱焚之奏聞

上大悅敘功有差夷計不得逞明年四月驟師入浙江據定海分船溯大洋上天津詭投書乞和而前直隸總督琦善馳傳赴廣東林公以罪去於是和議興海防撤矣廣東邊海門戶曰香山虎門香山奧衍易盤踞去省少紆遠虎門險狹海道曲折去省近虎門外列十臺最外大角砂角二臺屹爲東南屏蔽是年十二月夷攻大角砂角壞師船而大帥日以文書與夷往來冀得少遼緩夷不報命而急戰戰方交則投書議和書報復戰晝夜攻掠不已時諸軍集廣府者駐防滿兵督標撫標兵兵不下萬人又調集客兵團練鄉勇民兵數萬而大帥所遣助守臺者撫標二百人駐東莞提標兵二百人備策應由是二臺日益孤危相繼陷沒二十一年春正月夷進攻威遠靖遠諸臺守者羸兵數百公遣將慟哭請師無應者初公之以海運入都也時從故人飲酒肆中醉而言曰日者謂吾祿命生當揚威死當血食今吾年四十餘安有是哉已而

歎曰丈夫受

國恩有急死耳終不爲妻子計公老母年八十餘長子奎龍吳淞參將前卒幼子先遣歸及是乃緘一匣寄家人堅不可開公死後啟視則墮齒數枚舊衣數襲而已公旣白度眾寡不敵而援絕乃決自爲計住靖遠臺晝夜督戰已而夷大艘奄至公率游擊麥廷章奮勇登臺大呼督厲士卒士卒呼聲撼山海水沸揚杳冥晝晦自卯至未所殺傷過當而身亦受數十創血淋漓衣甲盡溼事急呼其僕孫長慶使去長慶哭曰奴隨主數十年矣今有急義不使主死而已獨全手持公衣不可開公怒拔刀築之曰吾上負

皇上下負老母死猶晚汝不去今斬汝矣投之印長慶號而走比及山半迴顧公隕絕於地時二月六日也長慶旣去懸尸自縊下下負水多蘆根刺體如蝟卒負重創送印大府所而身復至臺求公尸夷人嚴兵守臺則乞通事吳某情以告吳某者嘗爲漢奸公得之宥弗殺給事左右恆思所以報公至是爲長慶說夷誠懇反復夷人義許之入求尸鏹交於胥長慶膝行前徧索不得卒詣公所立處舉他尸數十乃得之半體焦焉事聞

天子震悼予騎都尉世職諡忠節

賜葬如禮喪至之日士大夫數百人縞衣迎送道旁觀者或痛哭失聲而長慶得公尸後復求得麥廷章之半體與公尸皆徒負以歸水陸七千里公葬後恆鬱鬱不樂言及公必泣下未幾卒

論曰甚矣虎門之敗也悲夫可為流涕者矣方公之經營十臺累戰皆捷奏上公卿相賀

主上為之前席嘉歎至於再三然而釁發於定海詐成於天津夷不為無謀要豈夷人能死公哉詩曰誰生厲階至今為梗厲有階矣長慶義士誠感犬羊吳某奸耳知感恩為一日之報異哉

振威將軍安徽壽春鎮總兵加提督銜銳勇巴圖魯甯河剛節王公神

道碑文

陳慶鏞

道光二十一年秋八月戊戌安徽壽春鎮總兵王公帥師討西夷英吉利於定海死之事聞

上震悼

命浙江巡撫治其喪給葬費照提督例賜卹

賜御碑

賜諡剛節建祠定海甯河兩縣承襲騎都尉兼雲騎尉世職

賜二子承泗承瀚皆爲舉人一體會試

恩禮篤異動天下越明年四月公之喪至甯河葬於蘆臺之西董家莊之原其孤遣价來京師乞銘於晉江陳慶鏞以神道之左且將託是以獻史館謹案公狀而次之公諱錫朋字樵楠順天甯河縣人曾祖秀生祖斌父者佐三世

贈封皆如公官公於兄弟序二幼倜儻不羣好騎射稍長涉韜鈴慨然有當世志以武生舉嘉慶十三年鄉試十九年應兵部試報罷揀選二等充差官期滿銓營守備嗣遵例捐升游擊

今上卽位之元年補陝西固原城守營六年權慶陽營參將是冬逆回張格爾亂作警人陝甘總督楊遇春調公分勦師次大河拐遇賊擊之潰進洋阿巴特誘賊萬餘殲之俘二千殪頭目邁鼻底阿渾等五人賊屯沙布都爾號十餘萬我兵從三路擣之公率眾追及西北禽獲無算箭斃大頭目色提巴爾第及其從素皮木克等八人揚威將軍長齡以擊賊功最入奏

賜花翎遂進兵阿瓦巴特翦阿瓦子邁瑪底頭目其餘斬獲如前師乘

勝至渾河沿賊之屯是地也紮寨二十里壹道築土岡排列鎗礮勢劇張我兵從閒道渡河抵喀城夜破之於東門擊斃賊姪託里和卓獲安集延大頭目推立汗薩木汗回子阿布都拉並賊妻某氏賊姪阿里雅汗是役也斬首六萬級殪禽七千人俘器械火礮萬計然賊魁猶未獲也公於是隨參贊略英吉沙爾葉爾羌和闐諸城執玉努斯於故瑪戮之遂出塞追逆於圖舒克塔什及達爾瓦斯地險且無援止存孤軍四百名於冰山雪嶺幾潰卒竭力克之師還

詔擢湖南臨武營參將八年涖篆踰五年逆獠趙金隴難作總督盧坤調赴新田桂陽一帶偵探賊踪公入羊山五崗夤夜冒雨抓山攀箐而上抵石灰坪距賊寨洋泉八里道與賊戰於溫家園山梁自辰至酉賊乃遁遂燔之於洋泉道口斷其出沒接戰五晝夜燬賊房無數賊稍蹙奔住街詐降公覺復進兵滅逆首趙金隴獲其黨趙金旺趙文鳳是役也斬首二千餘級殪禽三千人俘器械火礮亦萬計自是逃楊家園持不出公逐之於高山坪大挫之餘匪悉殲捷報

詔加銳勇巴圖魯名號旋題升寶慶協以部覈補放有人未上公之平獠也洋泉業已肅清而粵匪趙仔青復竄藍山九嶷爲害大吏檄公追

撲星夜至背江口適賊出猺山劫掠邀於濠江南至銀匠冲襲之賊上山吹號公率眾奮力上攻手長矛扎斃紅旗頭目一人磔偽旗號趙文興仍扼之菖騰冲再踣之麻岡冲及陽南於是趙仔青暨其妻孥皆受俘

上聞嘉公功擢副將既仍補寶慶弗及行赴廣東連州撲猺火燒排蛇兒嶺又撲猺大掌馬箭里八崗又撲猺馬鞍山礮臺嶺南由蓮花汛冷水冲鼓而西破之金竹根桃花冲大搜之紅沉田等十九冲又擊而東趾之陽公岐大古坳嗣是諸猺不復熾功竣之寶慶得

旨加總兵銜十三年補福建汀州鎮越年涖任尋奉諱回籍十八年起安徽壽春鎮總兵二十年英夷寇定海公赴江蘇吳淞防堵遂赴浙江至鎮海夷人歸我侵地弗克戰而還二十一年浙復告警總督裕謙廉公才調充翼長八月夷船闖入浙之外洋公察知大船三十小船八九十計不下二萬人而我兵止五千先從大營乞濟師弗應乃與葛公雲飛鄭公國鴻二鎮申軍約激重賞夾水而陳葛軍於曉峰嶺鄭軍於竹山門公軍於九安門二鎮連營公爲總援賊至擁上五開山船礮臺分寇葛鄭二師公率眾赴曉峰嶺遣奔赴竹山門兩路策應轟擊六晝夜

無雌雄公乃振臂一呼鎗礮齊發賊驚潰幾散俄賊假漢奸萬餘爲前
隊復於後隊暗放冷箭火鎗礮下如雨圍急公被脅猶手執劍且擊且
罵抵死不變色殞時月之十七日午刻也嗣浙義士張光瑞見面貌如
生耳際有創痕詫異知是公權殮之與杭州巡撫劉韻珂辨確爲改棺
易衾殯如禮公天性知兵嚴號令明賞罰能與士卒同甘苦故士樂爲
用身大小數百戰所向風靡定海之師以援絕故潰一時敵愾同仇葛
鄭而外唯公之師爲最銳亦唯公之禍爲最烈誠使將帥協心海氛不
戢將自焚乃隊整復裂君子讀詩至清人河上未嘗不掩卷而歎也公
將兵在外凡二十年三覲

天顏五膺

召對卒之日

上追悼之天下人相與追悼之昔晉平吳策告羊祜廟唐掃蕩河洛原
功張許繪形凌煙然則公雖死猶生也公何憾哉距生於乾隆五十一
年九月十五日丑時春秋五十有六配顧夫人子二承泗監生承瀚文
生皆世職銘曰

趙趙避公如貔如虎西靖回疆南戢荆楚蠡爾嘆夷跳梁跋扈齒我天

戈簸濤鯤戶

皇赫斯怒爰整避步翦此鯤鯨執此醜虜鷄鷄趨樓船我戕血奸於
海以靖逆波逆波猶揚妖魔復僵擊而反辭為公神傷公復何傷銘書
太常勇則兼義死登明堂公靈赫赫誓斬妖魄公目怒張雷砰霆激蒼
兕蒼兕毋傲毋傲為公復仇師鼓鼗謀

又王剛節公家傳

梅曾亮

噴夷擾海疆廣東福建死事者數人惟浙江定海王剛節公與兩總兵
皆力戰殺賊過當以無救遂敗人咸惜之公諱錫朋字樵慵順天府甯
河縣人少雄武有俠氣以武舉補兵部差官援例得固原城守營游擊
遷慶陽營參將道光六年從大軍征張格爾自大河拐至回莊戰疾力
矢殫其酋

賞戴花翎進戰至阿瓦巴特陷堅賊阻渾河沿從大軍開道渡河入喀
什噶爾城進收英吉沙葉爾羌和闐皆有功別將獲賊目玉努斯十二
年苗民趙金龍亂湖南殘常甯新田公以臨武參將從提督羅思舉破
賊羊泉街首逆誅別將逐賊高家坪大捷回就大軍楊家園圍賊殲之
賞銳勇巴圖魯名號擢寶慶協副將時廣東獠亦煽動趙仔青進擾湖

南兩廣總督檄以兵控兩省中地殺賊背江口至濠江口又破賊銀匠
沖獲其酋旗仔青反走追獲之及其孥湖南平赴廣東大軍戰連州大
洪橋乘勝入火燒排之蛇兒嶺奪馬鞍山遂平五排猺又從定蓮花汛
冷水沖金竹根桃花沖紅泥田各猺及排後猺亦就禽服遷福建汀州
鎮總兵服閱改壽春鎮總兵公自游擊從楊忠武公定回疆知名及平
猺功居最嘗戒諭士卒曰戰利呼人共之獲倍多卽人不利趨救之可
兩全故戰比有功而定海事竟以無救敗先是暎夷陷定海去之公以
壽春兵鎮其地二十一年八月夷再至出守九安門鄭國鴻駐竹山門
葛雲飛駐曉峰嶺相去十餘里賊先犯九安門不利退攻竹山曉峰公
馳往兩營已先敗賊爭鬪公眾且盡所親卒及身自盪殺數十百人賊
至益多揮短兵陷陣死是役也賊可三萬我兵計五千公檄請益兵大
府不應戰且五六日勢足以待救亦坐不救曰吾守鎮海者也鎮海急
則又走人家賊至門守室者不出鬪於庭門焉者亦不知但走告主人
賊至某所過某所自擁大軍爲偵候而已三總兵皆坐是敗死公殺賊
獨多死尤烈事聞

天子震悼以提督禮

賜諡卹建專祠子承泗襲騎都尉

梅曾亮曰余讀公家書及祭所親文詞旨溫雅不知其為武人鄉人言待兄弟交友皆有至性歸省親更衣結鞵履身盡子職可謂儒者風矣夫逃兵多悍卒不知義也知義雖懦者立焉況公之武勇者哉

浙江定海鎮總兵壯節葛公行狀

宗稷辰

曾祖志紹太學生未仕 皇贈武略佐騎尉累晉武翼都尉武顯

將軍

祖仁齡太學生未仕 皇封武略佐騎尉贈武翼都尉晉武顯將

軍

父承陞乾隆己酉科武舉人 皇任江南長淮衛幫領運千總封

武翼都尉晉贈武顯將軍

本貫浙江紹興府山陰縣天樂鄉山頭步葛公雲飛年五十三狀

公字鵬起一字凌臺浙江山陰人也先世有義聲父承陞舉武科官長

淮衛千總乾隆五十四年八月壬戌有大雲如纛垂庭際而公生因以

命名幼時趨塾疾嬉戲惡文繡同學憚之十一歲遇

純皇帝國卹既逾月童子許蚤鬻公不可遭祖母喪力請於父用朱子

家禮少長孝弟力田汎覽經史暇則肄射挽強發必中務爲有用之學
不屑屑章句一日讀馬援傳歎曰事君致身奚計裹屍耶嘗遊錢塘湖
上拜岳王墓歛歔嚮慕志素定矣補武學生舉嘉慶二十四年己卯武
科成道光三年癸未武進士授守備就水師署黃巖鎮中營守備巡外
洋夜遇盜艇令所部滅鐙藏刃作呼棹聲盜以爲估也遽薄舟公與力
鬪禽巨寇九人賊中爲之謠曰莫遇葛必不活境內肅然補温州鎮中
營遇憂例不得去病甚強起捕盜旋署提標游擊兒童有遮馬頭呼好
官人者明年改署定海中營升黃巖鎮右營歷兼中右眞授游擊未赴
卽署乍浦參將疊禽劇盜洪金等於澣山洋程興龍等於大羊山公在
大洋不設旗鼓日乘小舟微服若估客以是屢獲盜自此盜畏估不敢
輕犯會福建烽火門參將缺大府舉公才奏調之尋改署浙江瑞安協
副將公自將溫州奉檄周浙洋島嶼澹洞然於胸至是察海外南麂
山爲遁逃藪值歲暮議驅其僑人鑿所種豆麥禁民勿再往或慮生變
屬緩之公毅然力任宿患竟去又內洋口岸多采捕爲業潛相劫掠公
患之擇其豪長者子弟使人伍爲耳目備知海上聲息甫一月督提卽
會請升署十六年冬謁

闕廷乞假省親明年春總督楊公鍾祥保公可總兵八月

召見

勤政殿

上詢以海上形勢及操防緝捕奏對稱

旨內記名又明年戊戌署定海鎮卽巡南北洋勘南田禁山有總巡全
洋之役時有紅毛艇入浙境來去飄忽公訝其不測請沿海爲備三月
擢定海鎮總兵以父憂去瀕行猶以籌海八十七條告大府云公廬居
未一年而海上事起二十年六月朔英吉利夷估伯麥挾兵船十數至
定海外洋射書城中索紅毛衛頭爲市鎮帥拒弗許遂登岸攻城城陷
巡撫烏爾恭額公馳往與祝提督廷彪計守禦知公謀略可任專書走
廬次勸公墨經從軍事公從陌上趨歸白母張太夫人太夫人曰金革
無避汝受

國恩厚雖未奉

命以王事佐幕府分也行矣勿復疑汝父曾訓君之忠臣卽父之孝子
願毋忘斯言毋以母老爲念詰且遂行三日抵鎮海烏公問計對以今
日所急當先守後戰乃以勁卒扼招寶金雞兩山間列巨礮關內江岸

築土城江心及隘巷樹木椿簰筏以遏衝突凡三日而守具備人心始
定密上十二策多見施行時公未易衰督撫提交章奏請起公當東南
一面卽以權定海鎮請得

旨允行會節相伊里布公奉

命使浙公首請招失伍舊兵而貸其罪伍卒皆還教練旬日散旅遽大
振賊僞軍師安突得者能圖山川要害最狡黠番舶恃爲心腹八月遣
壯士包祖才禽之定海所踞夷目懼求舍去公請乘機水陸並進或以
奇兵往攻烏公不能用僅繫其俘許歸城池釋還當寇來祈請諸大府
見之帳中公獨避弗見仗劍立帳後將伺其惡聲誅之賊驚遁去於是
有求款天津之事而浙中屯兵惟事防戍公持令巡察有犯紀律者雖
節使材官不少假借諸軍戰栗天寒戍卒露立請於伊公爲人給棉袴
家人寄裘至曰士卒冒冰霜忍獨暖乎衣麻袍如故聞者感服歲除之
夕防掩襲率驍騎行海岸徹曙弗休伊公聞而歎曰得如此盡心力者
數公天下尙有事耶明年辛丑正月廣東使臣已議以香港與貿易釋
俘歸地各如約伊公愀然謀諸公公以所部兵先行兩鎮爲之聲援二
月初四日抵定海令先退城池後釋所獲少延卽戮以徇夷懼退還其

俘而去收復後禽斬應寇姦民楊阿三民恨稍平時粵東款局中變江督裕謙公代伊公來統兵公請發輒石修定海殘城並多備礮藥皆見許尋審地形議於衛頭築土城自竹山門至摘箬山徧列大礮使不得上縣治後曉峰嶺築礮臺以杜偷越小竹山下塞其江路對土城之五奎山與吉祥大渠毛港虎頭各置防守使逆舟不得近必如此則定海可固裕公以費繁不許公請借三年俸廉興築裕公怒曰是挾我也堅不許又以營船盡燬請派撥各營同棧等艇備水剿亦不許公鬱鬱爲廢寢食裕公雖齟齬及親詣定海見公青布帕首短衣草履走烈日中與士卒同甘苦察其飲食僅脫粟乾蔬心重之有讒者誘故校稱枉以陷公校曰葛公奪我職實我不肖何敢誣正人讒乃不行服闋有旨眞補出洋獲陳螺等於長塗又獲曾奪等於半塘禽邱親等於花鳥洋一賊傷公右臂仍奪賊刀斬之裕公初疑公書生至是始信其勇聞廈門又警疾回營請益礮四十於土城八千觔巨礮二於曉峰裕公猶未許而議禁水戰令定海營船押過鎮海公苦掣肘徒守必取敗遂誓竭力殺賊以身殉

國與壽春鎮王公錫朋

處州鎮鄭公國鴻分任要地而自以主將宜臨

衝當賊晝夜居土城八月十二日汛報逆船抵橫水洋距定海三十里未刻已闖入小竹山公自然大礮擊斷其先進大夷船頭桅鉛子重四十餘觔從船舵出擊死數十人賊眾懼逸又命游擊張紹庭擊之東港賊少卻捷聞有

旨嘉獎加提督銜迨賊夜闖小竹山逼土城力戰殺夷四百有奇又退云時謀知賊數二萬我兵三鎮僅四千小勝不足恃飛書請濟師大營疑其張大奇語但死守勿望援公祕其書慰官軍曰大帥以定海能以寡擊眾汝等當益自勵十四日賊舢板船駛至竹山屢上屢擊自巳至戌殺三百餘人碎其舟二十五日賊閒道薄五奎山欲對攻土城公乘未集燬其營帳又碎其火輪船殺賊五十仰見山頂一紅衣執旗者知爲賊魁親擊之立斃遂復退十六日拒之於天隔山十七日大霧賊悉舟偪土城公倚睥睨聞風颯聲急轟擊中其火藥船船燬斃數百人賊軍盡竄去時天久雨公著雨鞋往來泥淖中溼衣一絞水至數斗倦則於草簾下置胡床暫息聞警卽起戰六晝夜不暇食日僅啖餅八枚戰士亦苦糧臺斲給不能飽耆老有煎葠以進者公曰將士忍飢殺賊我忍獨飲乎投諸水與眾共飲之各軍皆感奮泣下是日巳刻賊分三路

進攻曉峰嶺無礮臺擡鎗不能及遠土寇等導賊由後山上遂由嶺下
攻縣城城中兵三百不能支竹山門亦以無礮失土城更危午刻公在
半塘聞礮甚緊知己登岸遙見賊勢彌漫知事不可爲北面再拜曰臣
力竭矣崎嶇海外七閱月不能爲

國滅賊死不足塞責取

救印遣校繳大營並請發兵速剿謂所親曰八旬老母聞兒死必痛甚
望百計慰之兒輩當勉繼未竟之志以報

國恩語頃賊已至猶手轉四千劔礮向逆擊死數百繼持短刀大呼殺
賊於綠旗下見賊渠安突得直前斬之刀折拔佩刀入賊陳所向莫敵
有以長矛鉤公衣者回首斷其矛仍揮刀進賊以飛丸中公刀出火有
聲刀觸處殺賊無算咸驚呼曰虎虎方欲上竹山山上賊以長刀劈公
首去其半尙以半面上山追賊背又中礮子穿從胸出穴大如盃前後
中四十餘創乃僵立竹山門厓石而卒兩手握刀不釋髮髭戟張一左
目閃閃如生羣賊驚歎忠勇麾下親兵二百人多從死遺令以密藏行
營火藥二巨桶暗插火香朱書其上爲兵餉賊至爭取之火起死者數
百戕公之賊與焉是夜二鼓定海義民徐保至竹山脚雨霽月出照見

公面負不能動拜之曰盍歸見太夫人乎乃動且輕甚走五十里席藁
裹之浮小舟內渡賊追之以火輪不及也公屍至大營裕公哭之曰壯
哉安得復有如公者既殮一目未瞑撫之曰以賊未滅耶不日天兵出
關矣乃瞑大吏護公喪回里張太夫人一慟而止曰我有子矣先後奏
至京

上批諭揮淚覽之者再

賜銀治喪

賜其子以簡文舉人以敦武舉人與騎都尉並雲騎尉世職於定海建
專祠祀之又祀諸郡昭忠祠

子諡壯節比三年甲辰部臣以殉難諸臣子孫引

見卽授以簡直隸州知州以敦守備今官湖北德安營守備配金氏

封夫人生子二卽以簡以敦孫人所著書如名將錄製械要言製藥

要言水師緝捕管見全浙沿海險要圖說及詩詞若干卷藏於家稷辰

與公同里相交十年知公孝弟任恤聞於鄉黨其朝京師攜一老僕乘

蹇車未嘗役使軍士布衣蔬食淡泊自甘出於天性聞其在官一鱸魚

之餽亦不受稷辰嘗書武穆兩言不愛不怕文成一訣卽知卽行十六

字贈之公以爲心契恆懸素壁焉當烏公聞變時曾致書言得此人定
海不足復詎知事變百出旋復旋危守不得盡用其籌戰不得少援其
力猝使城亡與亡三鎮之烈其稱千古嗚呼豈非天哉吾鄉二百年以
來死綏死守以百計求純忠至勇如公者實未多見凶問至京稷辰與
里人設位戴堂爲文祭之頃以定海未歸俎豆尚闕卽都下葺稽山忠
義祠祔公粟主於正氣閣以簡以敦以公年譜泣請爲狀上史館誼不
獲辭也爰敘次其生平大節如右謹狀

又振威將軍提督銜浙江定海鎮總兵諡壯節葛公墓志銘

王孫

公諱雲飛姓葛氏浙江山陰縣人父承陞江南長淮衛千總授武略都
尉公幼讀書成童赴試郡中聞母疾棄歸武略公嘗率家人十數騎獵
顧謂公曰弧矢男子事也汝能之乎公援弓矢六發皆中武略喜曰我
弓六石而能挽中當棄儒爲將其可成父志乎公跪受命年三十中嘉
慶己卯科武舉人道光癸未科成進士官營守備五擢至定海鎮總兵
丁父憂去官一年浙江巡撫烏爾恭額復奏公署定海鎮總兵公方以
憂去大府問海上事宜手疏言廣東禁鴉片煙令方急夷陰狡恐爲變
波浙洋宜先事定謀及英吉利兵船突據定海城巡撫烏公先見馳書

要公詣鎮海計防禦公督畊隴上得書白母太夫人遂行時道光二十
年七月也公至鎮海請盡出勁兵扼金雞招寶兩山間集定海濱兵大
閱海上會夷軍師安突得被執夷情大驚擾公遂請出兵復定海城格
不行夷書投天津詭訴浙粵事直隸總督以聞得
旨會議廣東明年予通市夷請釋俘安突得等而歸定海公與壽春鎮
總兵王錫朋處州鎮總兵鄭國鴻偕往復定海城城三面踞山北筱峰
嶺東竹山門其西山嶺尤叢沓門曰九安惟南衛頭土城數里臨海無
屏蔽公議城三面列巨礮塞竹山門深港可容舟者增築衛頭土城對
之五奎山毛港吉祥門諸島爲犄角當事以費鉅不允行七月夷襲廈
門公聞之立牒告大府土城守單筱峰背負海有閒道宜增礮及以營
船備水勦又執不與八月癸巳夷果復犯定海攻竹山門敗走明日窺
東港浦皆擊卻之先是守兵皆駐城中惟公自駐土城及是王公錫朋
出守筱峰嶺鄭公國鴻守竹山門夷船二十九賊眾至二萬餘我兵合
三鎮僅四千飛書大營請濟師大營疑其張大戒死守勿望援而時糧
臺餉又單日給軍人僅飯三器不得飽天雨浹旬公青布帕首麻袍著
鐵齒鞞日偕士卒往來霖潦中士心殊奮夷屢戰且卻殺傷甚眾持數

日不能下戊戌天大霧夷始全隊逼土城公倚睥睨聞風颿海水聲微
 辨賊艦將近城礮擊沈之夷分道攻後峰竹山後峰無礮夷眾奪開道
 下攻破竹山門背薄土城公手撥四千勦礮迴擊之血流成渠賊殊死
 進公率所部二百餘卒持刀械步鬪夷酋安突得執大綠旗麾兵進遇
 公罵曰逆賊終污吾刀斬之刀折復拔所佩刀二衝賊隊中至竹山門
 方仰登賊刀劈公面去其半血淋漓徑登賊賊迸聞而有礮背擊公洞
 胸穴如盃前後鎗銃雨集中傷數十遂卒方賊將逼土城公行營藥桶
 二密納火綫其中而朱書其上曰軍餉城陷賊踏公營爭往取之火發
 焚數百人或曰戕公之賊在焉徐保者定海義勇夜跡公尸走竹山門
 雨霽月微明見公半面宛然立厓石下兩手握刀不釋左一目猶睽睽
 如生欲負之行不能起拜而祝曰盍歸見太夫人乎起乘夜浮舟內渡
 及明抵鎮海大吏護公喪還山陰張太夫人一慟而止曰吾有子矣奏

上悼甚以提督例加卹遣官致祭諡曰壯節於戲公以良將材當去國
 數萬里窮鬪之寇使早從公言嚴守禦或城守不再陷卽戰從公言使
 兵力完且援者繼進或將卒不俱殲乃戰守一不得如意徒以身血戰

黃輿集卷六十一

死人皆壯其烈奇其勇余獨悲其謀不克施於國家大事爲可惜也公性簡樸服食如寒儒而治軍嚴嘗有卒取民家一芋鞭之流血所部肅然好讀書旁涉子史閒爲詩詞慷慨言志官裨將時嘗僞爲商舟以誘賊屢獲巨盜賊中懼之爲之謠曰莫遇葛必不活及任定海督帥檄公總視浙洋水師益大振是時夷船已來窺海上輒逸去明年憂去夷船復至定海遂失公卒年五十三子以簡以公卹文舉人以敦武舉人撫夷事定引

見殉難諸臣子孫復授以簡直隸州知州以敦守備兼龔騎都尉雲騎尉世職錫拯先籍山陰於公同里宗御史曰宜爲之銘銘曰嗚呼公也天不畀成厥功遂其忠也小夷犬羊孰縱繼以無常而使肆其兇也戰守繼其謀其忠遂而志則恫也我瞻稽山鬱鬱乎有浩然凌虛而上者公之宮也

又葛壯節公墓表 邵懿辰

公姓葛氏諱雲飛生時大雲如纛立庭中故名自英吉利豨突東南海上數破陷城邑濱海將吏覩巨舶利轍輒懼縮所至潰靡坐失律逮治者數十人獨陳忠愍吳淞之戰及定海三鎮苦戰六晝夜殺傷過當稱

效死用命而忠愍及三鎮死事爲尤烈云三鎮者壽春總兵王公錫朋
 處州總兵鄭公國鴻及公以本鎮將皆守定海先是公嘗以副將攝定
 海總兵矣尋憂歸歸不逾年而定海破大府稔公材以書招公方督僮
 奴治田山陰令持書見公隴上公慨然白母立馳之鎮海畫守禦具甚
 悉服除補定海總兵受事於鎮海樹旗集散亡旬月教練一軍復振會
 節相伊里布視浙事議以前夷艘膠餘姚海塗民所捕獲虜中貴女子
 及他酋數人易定海旣成說命公率所部渡海收復其地而以二鎮師
 從時道光二十一年正月也旣而江督裕謙代伊公一反前議議戰守
 其秋夷酋樸鼎查遂以兵船二十九再犯定海定海故海嶼三面皆山
 其陰日曉峰嶺陡絕臨海有閒道俯瞰縣城其左山叢疊去海遠右曰
 竹山門濱海其南曰衙頭尤曠無蔽爲海步往來所由公曰二鎮容將
 也俾王公守曉峰嶺鄭公守竹山門而已駐所築衙頭土城中當敵衝
 八月癸巳夷艘鷲入窺土城公自然發大礮擊斷其頭桅賊懼而退翼
 日自丑至午擊之退又翼日自巳至戌復擊之退衙頭南小島曰五奎
 山丙申賊營其巔將舉礮遙擊我以礮仰擊殪其紅衣酋一人翼日賊
 匿五奎山後以礮仰天隔山而擊我我兵亦隔山擊之當是時天大霧

雨連旬將士往來泥淖中衣甲霑溼日暮絞戾常出水數斗我兵合三
鎮僅四千賊每艘五六百可二萬人分番迭進我兵乘厓踞守晝夜不
得息主客勞逸適相反餉給不時益飢疲而曉峰嶺竹山門皆無礮臺
所恃火鎗擡礮不利遠擊戊戌晨大霧賊肉薄登曉峰嶺遂失王公死
之下攻縣城立破攻竹山門竹山門亦破鄭公死之乃萃於衙頭公顧
視賊眾瀰漫南下命移礮內向礮陷淤泥不可轉公力拔四千觔礮向
賊纔一發而賊羣蠶至公出懷中敕印付小校手刀大呼跳盪入賊中
轉鬪二里許格殺無算浸及竹山麓一酋自高阜以長刀斫去公首之
半公牛面血淋漓躍追之酋愕避去賊以火鎗攢擊被四十餘創一酋
以擡礮逆擊鉛丸洞公背自胸出穴巨如盃公遂立竹山門崖石而卒
尸植不仆手擎刀作殺狀左目炯如生久之賊乃敢諦視歎詫時公衣
上下黑色青巾鐵齒鞞召土人辨之哭且拜乃我定海總兵葛大人也
大白板者定海民徐保慣市竊趨捷如飛是夜四鼓至竹山拜負公尸
祝曰不念太夫人乎乃輕可負並求得王公尸疾趨內渡而鄭公尸不
可得公先以自然礮擊夷奏入加提督銜

卹典視提督世廕騎都尉兼一雲騎尉

賜長子以簡舉人次子以敦武舉既又授以簡直隸州牧以敦營子備並即用而

子公諡壯節祔昭忠祠且立專祠祀焉公字鵬起世浙江山陰人父諱承陞武舉官衛千總母張太夫人公中嘉慶二十四年武舉道光三年成進士授營守備府改就水師四轉而至總兵皆在浙海先後捕海盜甚眾賊中語曰莫逢葛必不活所撰名將錄製械製藥要言水師緝捕管見浙海險要圖說及詩文凡數十卷授命時年五十三娶金氏子二人某年月日以簡等葬公某鄉某原始公攝定海鎮時命工製佩刀二為寶刀歌以見志且銘其鐔一曰昭勇一曰成忠即臨陣所佩及猶握不釋者也甲辰十有一月仁和邵懿辰表

處州鎮總兵鄭公傳 李元度

鄭國鴻字雪堂湖南鳳凰廳人父朝柱貴州上江協副將素與激浦嚴如煜善國鴻少穎異師事如煜講求經世學嘉慶初伯父廷松以鎮守千總征苗陣亡無子以國鴻為嗣承襲雲騎尉時鳳凰廳同知傅翥督兵防邊引國鴻參籌畫積功擢承綏屯守備累升竹山協副將以事鐫級旋起湖州協副將調任湖南總督裕泰識其才力薦之道光二十年

由寶慶協副將遷處州鎮總兵時海寇起閩浙總督林則徐統諸軍進
剿國鴻充翼長方收復定海而則徐被譴解官去後總督某至則舉所
部署盡更易之令壽春鎮總兵王錫朋守曉峰嶺定海鎮總兵葛雲飛
防半塘土城而國鴻獨壁竹山門俱當敵衝所謂同時三鎮者也二十
一年八月賊攻竹山水陸並進日久營中矢礮皆竭勢岌岌或勸退保
曉峰與葛軍合力國鴻不從曰竹山不守曉峰烏能自存武臣致命疆
場分也越十餘日營陷國鴻身被重創猶揮刀力戰手刃悍賊數人而
死年六十五中軍游擊托克布與士卒千二百人殉定海曉峰胥陷葛
雲飛王錫朋相繼死事聞

上震悼照提督例議卹

賜祭葬建立專祠事蹟宣付史館

子諡忠節子鐸鈺均

恩賞舉人七品小京官分部學習孫鼎臣歲貢軍功花翎運同銜候補
批驗所大使曾孫肇百襲騎都尉世職

江南提督陳忠愍公殉節略

袁翼

道光壬寅五月初八日英夷陷寶山江南提督

賜諡忠愍同安陳公死之公束髮投營由偏裨從李壯烈伯屢織海盜

游升至金門鎮道光十八年

授廈門提督庚子夏英夷擾粵東

天子神幾密勿知賊必窺伺浙洋浙吳接壤而三吳重地非威望素著者不能任

簡公移節江南年七十餘矣閩浙總督鄧公素倚重公

奏請回廈門

上弗許任事五日而浙警至公帶兵馳赴吳淞口駐帳操臺基節相伊公駐寶山城相度形勢沿塘築二十六土堡公枕戈海上二年自備薪水肩輿出入不用儀從嘗大雪壓帳竟夕失寐晨起徧閱部下單寒者製絛衣給之庚子秋節相伊公奉

命赴浙督辦軍務江蘇巡撫裕公兼署總督駐節寶山初聞公狀猶未信之深也是夜颶風大作暴雨傾注潮溢塘面部將請公移帳公曰大帳一移三軍驚擾且我就高燥而士卒湫隘於心何安巖不動而潮亦退裕公度必移帳使人驟馬覘之公凝坐帳中聞蹄聲出視使曰大人以風雨非常使某問候公笑謝焉裕公移駐上海聞公劇痢遣醫來公

卻之日櫛風沐雨軍營常事其以老憊偶疾何獨張皇不服藥而病愈
辛丑夏節相伊公被逮入都

上以裕公爲欽差大臣駐杭州調狼山鎮謝爲前鋒

特命徐州鎮王率師助公聽公節制公令守塘北小沙背不從居城中
書院小沙背者由崇明入淞口門戶也徐兵獷悍滋事公廉得其情召
徐鎮治不法者鞭貫十餘人徐鎮由是銜公

上命河南巡撫牛公總督江南奏請督師於吳淞知公忠勇聞食粗糲
疑其囊澀飭軍需局每十日餽白金二百五十兩堅辭不受公生日客

營某弁製金字旗以壽立命裂之闕安協周外貌樸訥公信爲誠奏升

蘇松鎮留攝吳淞營參將事守西礮臺時鎔廢鐵鑄礮子周鎮監工鐵

汁精純實勝新鐵匠人抽鐵胚中填以碎磚見者譁然周爲掩飾試礮

礮裂箠以鐵皮公皆不知也是年秋賊再犯鎮定旋陷甯波裕公死難

壽狼二鎮死尤烈公潛然出涕謂諸將曰武臣衛

國死於疆場幸也爾等勉之當英夷犯乍浦時有漢姦導攻上海而吳

淞扼其咽喉將致死力焉駛船匯頭以千里鏡瞭公帳見晝夜有備未

敢輕入壬寅三月賊遣一頭陀乞食於東礮臺逗遛一月實隱詢徐鎮

情四月二十三日晝霧漫空暴風動地賊船齊泊口外五月初一日有
火輪船三隻列木人兩舫繞小沙背直向西礮臺欲試吾軍礮力耳公
知之不發船忽颺去初五日船集益多礮聲震天擊往來商船初六日
賊插影旗於陣項以水牌浮戰書來告周鎮得之請公緩師期公弗許
擲書塘外出口號誠戰備初七日午公至帳以賊鋒難犯議迎犒緩師
徐圖後舉公撫膺曰某經歷行陣四十餘年今見賊異議是畏敵也且
某奉

命勦賊有進無退大人勿怖牛公不答去初八日賊艦銜尾南進兩兩
相輔空一艦於西以防西礮若預知東臺之不足慮者揚帆出小沙背
前徐鎮按兵不動公出帳揮旗發礮賊飛礮對擊所注摧陷牛公聞礮
聲雷動飛輿至校場鳴鼓助陣賊架礮桅頂擊燬演武廳弁兵擁牛公
奔至胡巷鎮遣守備姚雁字以令箭檄徐鎮急援人馬中礮死公燃礮
燬賊頭陣一船西船賊稍卻東臺參將崔等徒壁上觀礮不發東船賊
併力擊西臺我軍礮子多磚心比至賊船而灰礮門且裂全塘震動部
將韋印福錢金玉許攀桂徐大華等皆死尸積公前公麾旗痛哭有飛
礮拂旗角而墜陷地一尺許公見事急亦以令箭召徐鎮并駐海神廟

之王游擊等皆已潛遁周鎮上塘勸公退公叱之曰曩謂爾誠薦拔至是今爾負我以致負

國時藥無布袋礮無米囊燃必躍子心空礮耳折架窳不可再用公掬藥納子礮震傷手血流至脛旋有巨礮冲陷土牛擊公仆地細子中股紛如雨黠賊見公手執紅旗不偃藥子已竭礮熱炙手迴帆欲退而桅上賊見塘下弁兵潰散遂麾大隊登塘吳淞把總龔增齡迎戰刃數夷羣夷圍而禽之入船脅降不屈釘手足於板擲諸海公部堂官許林率帳下巷戰洋鎗四山林死而公拔佩刀接仗鎗亦洞腹時在塘僅有三人公呼投效武進士劉國標曰我不能復生汝急免我首擲體溝中一慟而絕劉亦創甚負尸掩叢蘆中脫公涼鞋一隻懷之以蘆葉對纈爲識出葦而逃初公中鎗時賊頭陣船冲入土門有衣周塘礮兵王某出賊不意迎船燃礮轟擊艦面如掃塘上賊驚竄公尸得匿是役也碎賊八船殺賊五百餘口惟衣周塘礮斃黑白夷匪百餘口皆其健卒越八日寶邑士民尋蘆中所識公尸負之以出殮諸嘉定殺太牢以祭公祭畢分食其肉賊遂入寶山城酌酒於鎮海樓頭陀與焉復得北門譙樓礮子五百石運歸船中繼而掠上海陷鎮江犯江甯卽以我之礮子攻

我郡縣嗚呼是誰之罪與初八日申時公方力戰牛公退屯嘉定越日退屯崑山猶以手書促公暫避豈知公已血濺征衣騎箕尾而去耶公諱化成號蓮峰福建泉州府同安縣人

賜諡忠愍

詔於死事之地立祠廕其子一等輕車都尉世襲罔替

遂懷氏曰公駐軍海上百姓安堵有陳老佛之稱英夷窺伺二年不敢遽發又有陳老虎之稱易曰師出以律孔子曰見危授命公其有焉政權不屬軍令旁撓卒以償事惜哉

又陳忠愍小傳

姚瑩

嘉慶道光間名將最盛者稱楊忠武羅壯勇皆蜀人水師則李忠毅王果毅皆閩人也忠武壯勇忠毅三公余未及見惟交果毅二十年其義勇能軍洵有過人者其後則爲陳忠愍公名化成福建金門人少從忠毅果毅歷戰功洵至臺灣水師副將馭軍有紀律約已尤嚴時稱廉將及鎮金門益勵其麾下余聞久矣道光十八年余過廈門公方提督水師亦素重余延飲劇談公時已近七十言軍事慷慨激發逾於壯夫及至臺臺人皆頌公巡閱臺灣時文武俱應饋遺一無所受隨行將卒雖

衆所過如未嘗有兵者其約已律下之嚴如此故賞罰無閒言焉臺灣
歲運軍穀十萬給水師諸營自蔡逆不靖商艘日少穀常絀運每至三
四年則奏委文武雇運費鉅而時有風濤之失道光四年余謂臺府上
議請積穀改給折色以疏新設隨文恪下其議衆皆便之而水師提督
某有所覬沮之及十六年公巡臺衆舉以請公曰此兵商兩便之計也
令如議行一無所私二十年粵中夷警游奕閩洋公自出擊之足受礮
傷猶鼓勇督師進夷舟遁旋調江南江南水師素怯非閩比也公選閩
中親軍往教練之始皆奮厲海防嚴密夷聞而畏之二十二年甯波失
守夷破乍浦數窺吳淞不敢入潛購姦民焚公火藥公怒禽斬之而夷
舟數進公數拒卻之夷徬徨海上將退總督聞公卻夷喜自出督戰與
公分守海口甫登山夷舟突進飛礮及山總督失色退走諸軍皆潰夷
乘勢大進公親軍不及百人手自燃礮擊賊猶破一舟賊連飛大礮公
中傷而歿事聞

上震悼焉贈恤如典諡忠愍

論曰公始爲偏裨素有戰功而獨以廉著蓋武人所尤難也觀其馭軍
紀律森然庶幾臨淮之風矣老猶勇邁雖跋扈之夷亦憚焉乃卒敗於

懦帥致以身殉惜哉

又陳忠愍公畫像記

彭昱堯

道光二十年英夷以禁鴉片構釁

上稔同安陳公有將略由廈門提督移任江南時閩浙戒嚴總督鄧公

廷楨以公熟習廈門為請

上不許蓋鑒其勇毅忠篤故始破回避本鄉之例擢之廈門復以防堵

戰守之資委之江南故公感憤激昂以死自誓吳淞以東西礮臺為倚

角西礮臺者在海口之北距寶山六里三面環水要險也東礮臺在海

口之南險與西稱時夷寇擾浙而公憂江南守備懈弛不足倚乃疾馳

吳淞口度西礮臺之右扼要以守凡三易寒暑大臣裕公嘗以犬風雨

夕偵公見公危坐帳中鈴柝聲璆璆然也明年秋八月舟山失守三總

兵同日戰死鎮海繼陷大臣裕公自殉又明年夏四月夷寇陷乍浦有

船二十餘艘震逼吳淞公率參將周世榮守西礮臺周參將者公嘗保

升總兵以為誠樸者也參將崔吉瑞守東礮臺游擊黃永清等輔之英

夷自數萬里外跨海入寇官軍驚縮披靡故夷氛寢驕狼豕犇突民大

駭時牛制軍在寶山懼商於公公曰此身瀕死烽火中數十年膽氣粗

壯火攻恃鎗礮可以決勝公第坐鎮慎毋輕出入恐怖也五月初八日
昧爽賊先鋒火輪船駛浪而入公登臺執紅旗揮戰蒸礮千餘門自卯
及巳轟壞夷船六七艘殲夷匪數百名賊沮欲退我軍叱咤驩呼士氣
奮甚牛制軍聞師利趨出及三里賊從檣上覘其幟駕礮狙擊之制軍
跳而免我師遂潰東路之師棄礮走賊攻西礮臺愈急周世榮請公奔
公拔劍叱之曰庸奴誤識汝周逸賊水陸夾攻公忍創殊死督戰鉛彈
中胸伏而噴血薨春秋六十有七事聞
溫詔優卹立專祠謚忠愍世襲輕車都尉公諱化成號蓮峰福建同安
人將戰前一夕謂周世榮曰吾與汝非薄福相周愕然公曰詰朝戰而
勝則蒙上賞若死則名不朽非福而何吳淞之破也夷酋入城犒師飲
鎮海樓酒酣或作華言曰此行誠危險使有兩陳公安能至此哉劉國
標者公所識武進士也公既死難國標以蘆葦掩匿之越十日嘉定知
縣練廷璜懸重金求公屍殮於武廟百姓罷市哭奠繪像二一留城中
一貽其子公薨後三年英夷受約就撫昱堯游京師獲睹公像士大夫
之能文辭者詳哉贊詠之矣顧念雄傑駿偉竦動心魄故記之詩曰
帝澤汪濊涵育洪纖妖鯨恣睢鋸牙磨銛揚鬣來斯涸乞濡沫縱之洪

濤乃恣跳跋

帝命我公提師南邦彼螫其毒吳突撞塘大帥柔忍以肉餵狼公曰匪測翦其披猖乍浦之涘吳淞之濬鬣驅駛煙火馳其輪不雲而雷霹靂陡竄紅旗電揮疾埽蠕蠢壯士喑呼競屠長鯨飲血渴灑蛟龍避腥戰鼓不死陣雲倏崩誰其掣之俾壞我城觥觥我公爲臣之紀建旆而逃其顛有泚懋哉

旌忠竭矣致命利鈍違校蹈道也正我瞻公像不飭而敬剛氣奕奕高冠戔戔騎龍入海弭濤偃波長劍陸離揮盪么膺

聖人懷柔罔割內外環瀛織鱗會極涵蓋遺烈銘鼎新廟薦爾彼棄城者含恥忍拜野人作謠用寄遐喟

陳將軍義馬贊

王拯

余游粵東時從人問關將軍天培陳將軍聯升死事狀弗得詳最後張南山郡丞出示義馬圖詩冊載陳將軍事差悉粵人言兩將軍者於陳無間言於關則數數有微詞焉蓋

朝廷始禁鴉片煙之令嚴海夷互市諸國皆已納燬煙土且爲約後有賈舶以禁物來者貨沒官而人置法英吉利獨逡巡泥久弗承久之

沒貨矣或慮持久將及變諷當事者稍寬約關將軍獨張其兵力弗允
遷議當事者操益堅或謂夷變實由是作而水師兵又實皆鶩弱及臨
敵多返走故將軍終及難虎門今祠祀焉陳將軍死時在道光二十年
十二月夷酋義律來攻砂角礮臺將軍自以三江兵駐臺東而惠州兵
駐臺西夷偵三江兵嚴整弗敢攻獨閒道從山後曰川鼻灣者登山襲
惠州兵大亂夷偏臺門挾敗卒使詐言陳將軍至游擊張青麟啟關被
殺守兵拒敗多死將軍聞變以兵反擊夷轉據臺門伏礮中之將軍子
仲提數十卒守臺南海岸忿而仰攻殲夷頗眾夷據山全勢壓之亦力
盡死先是十月夷嘗以火輪船遊奕窺臺左右將軍擊之敗走乃以是
時戰撫議方未決當事者責挑釁故夷船復至他兵皆弗援關將軍時
屯兵靖遠聞砂角急亦不及救或且言陳故嘗請增兵守川鼻灣而關
弗應之者夫不通天地果不足為將至握重兵聞他軍急而弗能救尤
為罪之甚者若徒始自張其兵力以堅禁煙之約則不為將軍過人皆
從事後而追咎於事前之所以成敗焉耳夷性犬羊就令當時不堅所
約彼必安然順令矣乎承平百年武備盡弛何獨為將軍罪且將軍死
而有如將軍者以繼之又烏必其兵之不果復振也耶壯夫一蹶黠者

戒之而懦者憇焉而反齟齬於竭忠盡瘁者之不善其謀淺夫觀事節膠而隅執此足以敗天下大事非細故也且如或論如將軍者亦君子之過大易所謂知進而不知退豈不可謂勇哉陳將軍父子死尤烈絀其所謀而死卒以是尤可悲者有馬黃驢將軍所乘夷人獲之飼之弗食銜轡之則蹄齧不已夷怒而憐其駿乃獨棄之海濱荒島中好事者贖以歸繪圖徵詠而張其事烏乎斯馬之不爲從容立仗之徒之議其馳驅之不力者幾何哉乃爲之贊并系兩將軍死事之略如此贊曰馬耶龍耶忠烈之所馴耶精靈之所鍾耶伯夷之清箕子之貞獨不得成功於汗血而義以爲名

武壯公烏蘭泰傳

陳繼聰

烏蘭泰公字遠芳滿洲正紅旗人由香山健銳營行伍從征回逆張格爾立功累官廣州副都統值洪秀全倡亂嶺右燄日熾咸豐元年二月文宗遣大學士賽公往粵督師命公幫辦軍務時江忠烈公忠源以縣令在軍前差遣公一見深相引重每事必諮之江公亦盡心贊畫復用田學韜全玉貴爲部將二人皆勇而善戰故公軍較諸營爲強會賊方竄擾武宣貴縣平南諸處提督

向忠武公不能禦公銳意往剿五月敗賊於象州之中坪六月賊聚於桂平新墟公欲合軍圍之因諸將各懷意見竟有官村之敗七月公又同總兵秦定三經文岱敗賊於雙髻山風門坳旋由鵬化山追之公軍阻於山內而向忠武戰復挫洪秀全遂於閏八月陷踞永安州遣賊屯莫家邨以截官軍進攻之路旋爲公克其壘是冬賽公督師圍永安永安城小而固賊黨多廣東潮嘉各郡劇盜素習械鬪及守村莊法然人數不及萬官軍數倍過之賽公以公與向忠武爲翼長分統諸軍公任南路屯州城外獨松嶺堵賊目秦日綱水竇村接應之眾向忠武任北路扼賊北竄惟東路祇有壽春一營遙爲聲勢公乃言於賽公謂賊悍猛堅忍不宜與戰請用鎖圍法深溝高壘以困之賊食盡援絕必死矣且言東路空虚宜益兵爲之備而向忠武力主兵法圍師必闕之說請開一隅以縱其出策遂弗用公由是與向公不協二年元日公率所部從南路破數壘往見賽公適向公在座督師坐故與之並而令公旁坐公意不能堪出語江公忠源必奏向提督誤事江公爲言廉藺事解之公終鬱鬱不樂江公旋以疾作辭公歸里二月十七日夜四鼓洪秀全果從缺處犯壽春營突圍東竄所過又無防兵追公追至古東冲洪逆

已與秦日綱移屯仙迴嶺公商之向忠武整軍再戰然二公不能相會
天大雨軍皆饑疲或勸公以屯營休息探視地形相機而進而公銳志
滅賊於十九日五更率諸將進至仙迴嶺之大崗徑狹途滑伏起官兵
驚潰總兵長瑞等戰歿公收軍退賊遂長驅而北由牛角嶺出馬嶺
六塘高田直犯桂林公以會城重地兼程赴援是日割臂血入酒中與
下共飲痛哭誓師感泣願從者七百人遇賊於五里橋鏖戰逾時公爲
飛礮所中右脇及腰均受重傷眾奮勇護出越旬日卒事聞
子諡武壯卹典甚優公性勤儉愛錄武備各書凡所舉動悉書於冊在
營按日操練治軍實至宵分不輟得餉盡以賞兵紀律整嚴所過無犯
麾下文武推心委任咸盡其能尤恤士羸軍行遇雨見眾兵露處不自
張蓋每戰勝輒椎牛燕饗以相勞苦臨陣必躬自督隊指授諸將方略
不避矢石在羣帥中最稱忠勇云

論曰江忠烈公近代之偉人也其言都統烏公往征粵西賊初起眾皆
倚公爲長城謂邊圉烽燧可旦夕定無何公中礮歿後來踵事無復有
如公者賊遂罕所顧忌猖獗日甚其稱公如此公之爲將不可知哉而
公卒至功績不成軍敗身死豈劫運之盛耶抑人謀之不臧耶余嘗以

當日幕府不從公嚴圍永安之策未嘗不爲之扼腕而咤叱也

永安雙忠廟碑 侯植

雙忠廟者

皇贈提督銜天津鎮總兵長瑞偕弟涼州鎮總兵長壽追賊龍寮嶺賊

反攻戰死

詔廟永安以褒其忠者也公姓瓜爾佳氏諱長瑞字小泉滿洲正白旗人道光初喀什喀爾辦事大臣死張格爾之難諱喀斯哈者其父也傳

載

國史與弟皆以難廢起家公襲騎都尉

賞大門侍衛出爲四川敘馬營都司累官至維州協副將升授直隸天

津鎮總兵公弟

賞藍翎侍衛補

乾清門侍衛出爲福建提標右營游擊累官至台州協副將再授甘肅

涼州鎮總兵皆以功

賞戴花翎先是道光三十年粵匪洪秀全反擾潯州其僞將楊秀清等

分兵四劫

上命大學士賽尙阿爲欽差大臣經略廣西公

召自天津爲翼長六月至桂林時永安州未陷賊匿紫金山公偕綏靖
鎮總兵李伏守大樟及大軍破雙鬚山攻奪豬子峽賊退守風門坳經
略命提督向榮合北軍進剿北軍者都統烏蘭泰所部也八月攻克風
門坳公率湖北兵由中路入徑駐絕壁上鎗礮轟擊一晝夜不絕賊仰
攻不得上退守新墟而我軍屯平山及賊竄朋化北大軍追之兩潰於
平南之官邨而賊陷永安州矣方是時大軍出仙迴嶺駐大崗兵阻不
得進參贊大臣巴清德選卒千二百人檄公將直下龍察嶺公以嶺紆
峻中峰高絕仄不容趾且豐草盈谷遇伏恐不得出翻山出平樂道徑
因取道至永安城北屯軍古排邨而公弟長壽適以候補總兵至守平
樂時公方病暑幸弟調護乃瘳而總兵李伏卒於軍經略卽以公兄弟
統湖南綏靖兵戰必偕比有功初公以進兵遷延落職至是乃復二年
四月大軍克永安賊東竄龍察嶺經略檄公偕諸將追賊教習知縣華
翼綸隨營掌文案以地險阻弗往公歎曰余嘗從征西域平山匪出入
死地經百戰豈不知地險不可深入寇窮則反鬪然軍令誰敢違者死
耳復何言徒以有老母在欲令希彭無往希彭者公弟也時太夫人在

閩希彭泣曰古人不畏義死不容倖生貪生忘

國不忠非孝也借死耳又何言卒偕行乙亥追賊及之兩大勝賊皆陷山谷中丙子賊至大崗掠食將出仙迴嶺時我軍已二日不食方造飯都統烏蘭泰責戰甚急賊反攻兩大敗湧血波閒嶺石皆赤中峰益險峻希彭墜馬公持矛救之同遇害自癸酉至丁丑連日雨土殊死鬪無生還者公親卒武某隨墜谷中得不死言公兄弟戰死狀甚悉偕華君往收其屍三日得之身被數十鎗皆重傷也既殮作雙忠傳卒致其喪於京師烏乎公剛毅沈塞智勇過人公弟習韜鈐通文翰皆大將才也使賊東竄時大帥移軍桂林柄授公與弟協守全州運謀幾先賊雖死咋不能舍興安而東而

天子無南顧憂乃違地利奔險與賊陷公死繼公死者且數百計蔓延十省勇略之士或僅以一死報

國不得盡其才能其可哀也已事聞

上軫惜

詔送公母回旗立雙忠廟永安祠公兄弟以陣亡將士從祀廕公三子恩祿騎都尉承祿二等侍衛蔭祿藍翎侍衛公弟子光祿騎都尉候補

主事選公文爲

成皇帝長孫鍾貝勒福晉

恩禮有加焉五年春予在京師長壽公子光祿君介華君以廟碑未立

來請乃作銘辭曰

咸豐載始狂寇四獠俶亂天紀迺攻永安兵慘囚謹孤城不完鵝山柳

水蠻童跳舞爲魚爲虎相臣將臣撫彼彗星擁劍南征鞞風門劫將卒

矜驕嶺阻龍寮鋌鹿走險何幾先見榮生奚戀不咸之岡鴨綠之江蛟

螭潛藏迺生異人爲

國蓋臣世篤忠貞有

國無已弟舅繼起殉

國難矣

帝憫雙忠酬德報功廟貌永崇公迺降止靈旗風雨馨香百世

褒忠有碑神爽在茲視余銘辭

忠勇公祥厚傳

陳繼聰

宗室祥厚公字寬甫道光季年爲江甯駐防將軍政尚鎮靜兵民安之

咸豐三年正月粵逆洪秀全由武昌東下總督陸公悉師往禦至老鼠

峽一敗而潰

上命公爲欽差大臣督師剿賊賊已於二月朔日長驅逼金陵總督自九江遁回居署不出城內空無一兵祇有團勇數百公率滿軍三千偕提督福珠洪阿副都統霍隆武督諸將分守各門令佐領炳元選八旗精銳二百五十人駐盧龍山爲策應而江甯城周九十六里垞口萬五千有奇兵寡不足以守賊繞城築壘二十四踞報恩寺俯瞰城中晝夜以巨礮環攻公督將士禦之甚力初十日五鼓靜海寺地雷發陷城數十丈賊蟻附而上炳元持矛直前大呼曰

國家養兵千日用兵一時存亡呼吸間我輩當效死眾奮激願從適佐領輝漢太馳至遂共擊殺前敵逆酋數十人餘皆敗竄炳元逕抵缺口身當其衝凡悍賊冒煙直上者以長矛刺之應手仆相持逾一時天微明有賊暗施火鎗炳元隕於陣子案上江志忠義譚輝漢太字外城陷公急水西門梯登輝漢太亦陣亡子辛事繼母極孝人無間言同霍都統率所部巷戰勢不能敵乃退屯通濟門守內城滿營婦女亦握刀登陴人人存必死心俄而福提督與協領伊伯訥和謙佈在儀鳳門戰死協領色勃星額驍騎校尉善慶在太平門戰死佐領成玉在聚

寶門戰死防禦連奎在神策門戰死案忠義譜善慶字積卿精願柳書

擊之勢不敵賊哭投城下死成玉字琢如賊攻城矢石如雨成玉手藤

皆殉一賊遂聚而攻公公在城上麾眾拒戰相持二日矢盡力竭四面

火起賊洶湧如潮知事已去乃嚮北再拜自刎死霍都統及協領德祥

防禦松亮恆喜前鋒來慶武舉三音額薩勒洪額皆赴鬪歿焉賊入內

城佐領托多洛猶單騎血戰子舒錦從其後於鑲白旗界戰死餘如協

領奎光前副將伍郎阿參領常錫齡亦俱殉難案忠義譜奎光字益之

半山園築輪光別墅戎政之暇賦詩自娛至是借妻巴氏從容死諡敏

節常錫齡字靖之漢軍人父早卒母關氏撫之成立嘗侍母疾屢旬不

解帶兵以獲廖將軍某聞而重之授以驍騎校謂人曰求忠臣必於孝子

之門吾不復歸家內城陷駐防男女死者共四萬餘人事聞公

賜卹各有差

論曰賊自破武昌驅其眾順流而下敗陸制軍之師於九江皖城隨失

其燄如火之熾金陵守兵既單又無外援欲望金墉之固其可得乎然

而祥忠勇公率其部軍慷慨登陴猶能相持十有餘日可謂壯矣城雖

黃真年事六十一

終崩大小將領下逮甲士以及婦嬰咸願死綬而不求生八旗之旅遂
人人無愧乎節義忠貞豈非

國家深仁厚澤之報也哉

湯將軍傳

顧壽楨

湯貽汾字雨生武進人大父曰大奎爲臺灣鳳山令林爽文之難守死
不去於是雨生父荀業從焉曰父死忠子死孝皆門而死母楊氏孀居
有節操世所傳斷釵吟節母者也雨生少以廕積官至樂清副將軍不
得於上官歸寄家江甯故廣文先生周濟悅之而假館焉將軍雖位武
人乎然其爲人彬彬有文君子也其所自意雅歌詩書法皆絕人至於
小詞曲藝靡有不工其所遊必盡與其文學士相結其居金陵士之所
湊尤獨名好客客未嘗不滿座也時則有若侯雲松秦耀曾梅曾亮之
屬皆以能文章負當世名相過從無虛日於時海濱稍稍多事矣江甯
未深創猶殷賑豐澹民摩肩相接張袂相觸百貨闐委百族奔駑燈火
灼爍夜以繼晝富商大賈薦紳達官之所遊遊笙鼓鐃聒謳唱沓赴紛
紛入雲際山樓水榭之勝甲於天下承平積阜乘華炫麗十步相望歌
詠之聲相聞將軍亦以時稍修葺池館水木莊靚蕭瑟人外春秋之朝

以爲虞樂也願獨自深念家世效忠又以羽林孤兒荷

天子厚恩不數年閒致位分闕膺人臣之大榮矣負不世之材獨抑塞不得逞運泰道昌物極則衰逆節萌生風塵隱然又未嘗不涕下沾襟也癸丑之歲大盜薄江澗喟然歎曰吾得死所矣然且爲保衛之計往來城中屏營者久之及城陷聚其家人而告之曰先人有言矣父死忠子死孝奈何乎每生於是皆自殺侯雲松者字青甫上元人嘗官歙訓導城陷自經年八十矣秦耀曾字遠亭故尙書秦承業子壻于畢氏先寇難卒而其妻死節別有傳

論曰旌德譚生爲余言方江甯盛時嘗以挾策試數至將軍園亭與文酒之燕抑何其恂恂也將軍婦若子女無不能文外人異之殆若仙然自生以下第歸數月而江甯破將軍死忠矣乃者有人自寇中來言街衢遷易舉目豺豕人民凋矣諸池臺第宅大率殘燬鞠爲茂草嗚呼彼秦離離胡蜀西周也

又湯將軍行略 蔣敦復

惟湯氏以忠孝世其家乾隆閒福建林爽文之亂知鳳山縣事湯公大奎禦賊死于苟業以衛父故同日并命公之祖若父也公以難廕起家

服官三十年家居二十年既請老不忘事

續後傳卷六十四

三

君之義繾綣從戎卒以身殉弗墜前烈嗚呼非古之忠孝人與敦復前者辱與公游聞變駭歎望風隕涕又樂書故人之大節炳天壤也爰就公族子成烈所爲狀及平生譚燕時所得於公者補綴成篇聊志後死者之痛云公諱貽汾字雨生江蘇武進人襲雲騎尉授揚州三江營守備改補廣東撫標右營升山西大同鎮靈邱路都司撫標左營游擊調中營浙江撫標中營參將樂清協副將病告歸喜金陵山水築室居之名其園曰琴隱若將終身焉癸丑二月粵逆洪秀全等由大下入夾江攻儀鳳門甚急公杜門養疴聞之投袂而起集義勇令身出一丁助戰身率家人爲之殿前驅至鼓樓北菜市賊已大入城遇與格鬥殺傷頗相當公冢孫世佺中六創絕而甦遂相失公猶奮身前家人見憊甚扶入李氏空宅俄聞賊退公乘夜巡城馳書上元令發倉粟收潰散夜二鼓眾洶洶言總督死公斥爲妄送書人返言局署虛無人縣令劉亦死矣問將軍提督安在皆莫對眾散去公仰天太息亦無戚容仍入李宅家人窺公意不測環而泣公好語之曰勿亂人意且休矣卒守弗去質明犬四吠紅巾一片自北而南公急拔佩刀自刎左右起持之環

而泣者聲愈悲莫能仰視公怒叱之曰吾不能爲

國滅賊不孝不忠死有遺憾若曹欲更陷我耶度不可奈何乃聽命請以夜勿兵死公笑曰吾將從靈均之遺則卽稍徘徊何妨夜過半家人

跪送出門趨池旁北面望

闕謝復東向叩首祖塋在常故也扶杖從容赴水而歿實咸豐三年二

月十二日子時也生年七十有七嗚呼成烈狀公之死如此敦復尙忍

傳公乎哉疆場之事武臣宣力不濟繼之以死固也旣已老病羈旅卽

不死其誰責公乃竟一出於此非其中有大不容已者乎且舍生取義

倫理之常彼視息偷存曾犬彘之不若者置不足論獨是爲人臣子當

攘搶之秋始不能弭患未形繼不能速平狂逆上塵

主憂下貽民害天下之禍烈而頽然以死九原之目瞑耶否耶公誠無

所藉手度公之才使尙在位必有所方略不徒死畢乃事也而竟以死

悲夫公長身玉立儀觀偉然論議颯發聲若鉅鐘凡材藝無不能尤長

於詩官揚州日淮南幕府多人材無敢以麤官目公者忠義勃發出於

天性其在粵東海盜張保受撫得官公怒謂終不與降賊爲伍將手刃

之爲粵父老報仇同官多方阻之乃已山右識詩人胡珏於赭徒中任

澗中最久撫帥重其才方倚為大將有齟齬之者遽拂衣歸居恆鬱鬱
謂今承平久將不習兵一旦倉卒有逃耳可奈何於是取昔人所著金
湯十二籌刊行之冀有心人講求要害備

國家緩急之用往歲東南海警敦復上書言事忤當事者意中飛語逃
之方外公聞之曰此天下奇士及吾身願一見甲辰秋初謁公壬子八
月再相見益懽留十數日別慨然曰干將莫邪天生君才必有用吾老
矣不復見子矣嗚呼孰知此別遂千古耶粵匪南下公語總督請固根
本重地弗省迨是山兵潰而公之死志自此決矣公死家人求棺木弗
得遵遺命槨葬竹園內第四女適王歸甯聞公死同口赴死從子婦陳
咯血死幼兒甫三歲暴殤禍亦烈矣嗚呼公忠孝人也公之子孫有官
者既公之志當為

國家立大功以忠孝世其家

又書湯雨生將軍事 楊象濟

雨生將軍嘗乞子題其先人與竹居棄稿後得其復書云已刊木將寄
子不一年金陵陷將軍殉難而余之文稿為家振甫編修攜去無復副
本矣惜哉將軍諱貽汾字若儀號雨生常州武進人祖大奎乾隆時知

福建鳳山縣父荀業隨任值林爽文之亂父子同殉入祀昭忠祠道光
間以邑人公請

敕建父忠子孝祠公以難膺雲騎尉任揚州三江營守備廣東右營守
備山西大同鎮靈邱路都司浙江衢州鎮左營游擊浙江撫標中軍參
將樂清協副將例晉武功將軍乞病歸性好文學善寫山水以冷雋自
喜咸豐三年粵匪入寇二月十一日江甯陷公作絕命詩投城北李氏
園池死橐葬淨界寺旁竹園內年七十有六其詩曰死生輕一瞬忠義
重千秋骨月非甘棄兒孫好自謀故鄉魂可到絕筆淚難收橐葬毋子
慟平生積罪尤詩爲僕攜出得傳子綬名襲職官江南鹽城營守備先
卒楸名廣西全州山角司巡檢祿名兩淮候補鹽運司經歷永名殤次
女適巡檢天津王瀛方歸甯侍父赴水死寇之方張也公上書江督陸
建瀛陳戰守略陸不答未幾金陵陷公留意韜略患近時武備不修刻
金湯十二籌貽世至是人始歎其遠見先是林爽文之亂家兩松中丞
手平之故予知其始末甚詳而爲公題先集追論臺灣事謂當用沈端
恪遠慮論分置八縣之說公甚踴其言云

續碑傳集卷六十四

續碑傳集卷六十五

江陰繆荃孫纂錄

忠節十二

書孝軍門自殺事 鮑源深

咸豐己卯黔中苗患起自合拱廳當事者誤用撫賊勢益熾連陷鎮遠黃平都勻黎平各府州下游二十餘州縣賊徧擾繼雖用勦而檄調者率皆疲茶之兵無能致敵當事束手無策制軍自滇奏令滇省提督孝軍門援勦軍門帥兵二千赴黔至詢初時勦辦情事歎曰蠢爾賊何遽至是撫之實縱之耳與中丞言不合慷慨出省門向人誓曰成敗未可知若臨敵退縮中丞殺我若節敗爲功中丞殺我若勦賊未盡苟且完事中丞殺我我無怨惟軍實糧餉以時給毋掣我肘耳是時省城數十里外皆賊道路不通者數月軍門節節蕩埽直抵都勻城城立復入城安營居之捷書報省垣請中丞速置文武官並給餉復遺書中丞左右曰吾能復城不能守城吾去城雖復仍委於賊官來則吾軍可前進復他城幸毋緩中丞得捷書檄某知府往以病辭改委某仍如前辭不許則故遲其行中丞無如何而餉亦不往軍門書迭至迄無應於時軍

門坐困空城已逾一月欲退不可欲進不能食將盡兵飢欲譁盼官與
餉終不至喟然曰何遽殺我也我死不足惜所惜者功未成纔收復一
城竟畢命於此耳乃作家書遣人間道回滇安其七旬母在城朝夕以
好言慰飢軍軍中皆不知萌死志也詰朝坐帳中命取火吸淡巴菰隨
遣使者出曰我欲少息侍者甫出帳忽聲發急趨視則以小洋鎗自戕
洞胸死矣中丞聞信遣人視殮某守始來檢衣帶中有紙書字數行潦
草不可辨大意鳴其自死之心中丞入奏但言餉未繼至情急自戕
朝廷雖予以卹典疑其輕生而公效命之苦衷無由上達矣靈輓歸旅
婦人孺子皆哭士民設祭者盈道旁蓋軍門忠勇過人眾所夙仰合省
望其功之速成故無不惜其死之速是非固在人心也公而有知亦可
瞑於九原矣公諱孝順字行先滿洲某旗人

論曰昔人有言死或重於泰山或輕於鴻毛公之死重耶輕耶吾無從
遽定也然古今論人必審其時察其勢而進原其心處乎不能不死之
時迫以不得不死之勢毅然以一死謝天下雖其死不免於激而其心
固可以對君親而無愧矣而當事者或以輕生議之嗚呼公既捐其身
以死決不計其死之後議之者何如也而議之者亦曾爲公思之公果

何爲而死也哉

童壯節彭勤勇二公別傳 李元度

童公諱添雲字鎮銘世居平江西鄉之板陂以貧故攜弟必發走長沙
並人撫標充戰兵遂爲長沙人饒膂力能開五石弓射能命中道光二
十二年西夷犯順公從提督果勇侯楊芳出師廣東一日夷撲城有營
將在城外楊侯欲調之入火攻甚熾不能行令曰有能往者賞眾莫對
公獨應曰某願往挺矛絕城出少選兵皆入城楊侯奇公賞六品服咸
豐二年粵賊圍長沙公與弟必發從守城圍解公語人曰吾觀諸將中
惟都司塔公及千總彭公膽勇過人將才也異日必能辦賊時忠武公
塔齊布方以都司發湖南而彭勤勇公三元則以武科進士借補千總
也會塔公練標兵公隸其麾下別募寶勇五百人則以彭公將之公與
彭公深相結期殺賊自效茶陵土寇作塔公帥所部進剿命公解火藥
期三日至公踰宿塔公帥標兵及寶勇道州勇征之公與弟必發從時
年三月賊陷湘潭塔公帥標兵及寶勇道州勇征之公與弟必發從時
賊踞城外民塵塔公好輕騎嘗賊覘虛實公兄弟輒隨行一日塔公策
馬率壯士數人入黃龍巷必發先驅巷狹而長甫入賊數十人突出攢

予刺塔公必發急以背受之中肩以巷狹故塔公得跳而免必發死之
越二日師大捷湘潭平公擢守備或賀之公憤然曰賊戕吾弟吾雖官
至一品弗願也但願生啖賊肉耳何賀爲遂繇湘潭轉戰至岳州公輒
先陷陣斬馘亡算擢都司再戰復武昌

詔以游擊補用

賞換花翎從克興國大治暨黃梅廣濟破賊於田家鎮

詔擢參將公長身面赤色額以下痘癍如錢目炯炯若巖下電每橫矛
陷堅陣礮彈雨下不稍卻賊見其旗輒相語曰童麻子至矣則皆走十
二月塔公進攻九江賊死拒不下乃令諸將番休進攻公帥隊薄城礮
彈穿其袍袴千總某請收隊公叱之曰若怕死耶何必從軍益前進忽
賊礮傷公胸昇歸營創甚塔公屢撫之泣公曰毋然但速攻城越七日
而卒公善撫士卒賞賜無所恡身後發其篋衣服外一無所有同營皆

哭失聲

詔贈副將

予諡壯節

賜祭葬

賞雲騎尉世職祀塔忠武專祠而平江縣城忠義祠亦設主祀公
彭公諱三元字春浦善化人繇武生中鄉舉成進士歸湖南撫標試用
期滿借補千總咸豐二年賊犯長沙前湖非巡撫羅公繞典奉

命幫辦防務檄公募勇丁助剿圍解以守備卽補

賞藍翎三年禮部侍郎曾公國藩奉

命治團防檄寶慶守魁聯募寶勇千人赴行省而以公及寶慶協都司

普承堯分將之會江西泰和土寇竄茶陵安仁公從塔齊布公往勦平

之擢都司公所部遂隸塔公麾下明年從破湘潭

賞換花翎師抵巴陵又破賊於新牆於是寶勇以敢戰聞八月官軍克

武漢公扼截洪山斬馘多晉游擊會塔公與羅公澤南議分兩路進攻

興國大治等屬以羅公湘軍過單命公帥所部輔之九月復興國乘勝

破平壁山賊巢十月四日官軍盡焚南岸賊營明日賊連檣至公扼諸

江岸會塔羅二公至揮軍夾擊追至下游而上游賊數千舍舟登岸將

乘虛襲湘軍老營公馳至擊卻之賊揚帆上駛再登岸公沿江追擊會

羅軍掩至賊大敗溺死亡算論功晉參將十一月大軍渡江攻黃梅公

陣橋西扼賊衝湘軍競進賊卻公遽踰橋從柵門躍入焚其營遂復黃

黃

梅移攻孔隴驛入賊土城禽偽丞相余福勝遂同克廣濟於是大軍復南渡攻九江賊堅守不下塔公百計攻城日與賊戰相持幾一年五月二日武昌復陷八月塔忠武公卒於軍曾公疏請以副將周鳳山接辦潯防而以公及普承堯兩營副羅公回援武昌九月復通城進師崇陽賊夜遁會湖南防兵敗於蒲圻之羊樓崗退保岳州羅公令諸營分扼羊樓崗遏賊上犯而獨與公及湘副中營李杏春駐崇陽時偽總制楊萬年踞梯木山分擾濠頭堡堡人乞援公與杏春帥所部進剿入山焚其巢將回軍偽翼王石達開前隊突至公迎擊斬先鋒悍賊而大隊麇至賊鎗中公耳流血滿襟戰益力次日賊至益眾公前逆戰賊自後火其營公勒馬回救殺賊渠一人並格殺數賊力竭墜馬遂遇害李君杏春亦死之時九月二十五日也羅公復戰而捷卒克武昌成大功而公不及見矣

詔贈公副將

賜祭葬

予諡勤勇

賞世職附祀塔公祠公忠勇識大體一子瑾光從軍濠頭堡之戰訛言

瑋光陣亡左右以告公急止之曰速擊賊毋以吾子沮士氣督戰益急
殉節之日將出隊馬忽踉蹌三上三墜眾以爲不祥止之公不可易馬
而出先是有

旨命曾公舉堪勝總兵之員曾公以公及楊公載福應

詔會公殉難不果擢瑾光以功保藍翎守備中武科舉人旋以疾卒於
家

贊曰軍興已來知兵者首塔忠武公而爲之爪牙腹心者童彭二公其
最也忠武齋志沒兩公先後死綏皆不竟其績天之厄之甚矣哉然自
諸公倡勇敢雖婦孺曉然知賊之可滅其卒成大功皆諸公風聲所起
抑皆其同袍澤者所爲也其與忠武公廟食千載宜矣

書全總戎軼事

黎庶昌

道光咸豐之際粵賊亂起各省皆倚制兵討賊後乃稍稍召募方楚軍
之未興也戰武宣桂林戰湖南戰金陵黔軍最著而全總戎尤以勇聞
於時總戎名玉貴鎮遠人少落拓不偶初入營伍補名糧無所表見意
頗不自聊及徵兵令下從征粵西乃稍喜每戰輒衣白襦褶以自標異
驍果軼羣都統烏蘭泰公一見大奇之使募健兒三百人別爲一營而

是時湖北人田學韜者亦以勇名與玉貴埒烏公擢爲左右翼凡戰皆此兩人先登爲賊所指目及烏公戰歿桂林學韜亦前死玉貴從他軍至道州賊酋楊秀清擁眾奄至大將某棄營走營內金韜山積玉貴不忍棄謀督護而計未有出賊已迫近卽挺身單騎橫矛立橋上厲聲謾罵且曰吾一人耳汝敢來鬪否秀清初起持重又未知大將已去愴視良久謂其下曰此白袍將吾聞名舊矣今觀其氣盛言壯必有伏不可墜其術中竟退玉貴飛報主者徐引還閭營無恙軍中莫不服其勇也總督徐廣縉爲繪圖呈奏錄首功白袍將以此名聞天下時以比唐薛仁貴云後隨向忠武攻金陵提督和春前在廣西湖南親見玉貴戰狀及是赴援廬州絕欲得玉貴自助咨向調往遂以副將署壽春鎮總兵王貴旣至相度廬州城外有平地可以立營而前後皆賊屯玉貴念非出奇不能取勝引兵直入其間置壘令日以半軍築以半軍護士皆注鎗持滿賊錯愕來爭且戰且築壘立成晝夜疾擊剗平十餘壘賊幾盡列食城爲礮子所傷數月不愈卒廬人惜之私立祠以祀或曰賊酋陳玉成疾玉貴甚使人於當道掘阬與戰祥北以誘之王貴墜阬死余至江南欲問其事而竟無知者

記陳節愍公殉節三河事 方宗誠

廬江吳小軒爲言咸豐六年三河賊營之破也實陳鎮軍智泉之功先是賊於三年破廬州四年入廬江就三河市鎮砌石城而外築數營以據要害五年冬廬州民內應官兵復廬州六年提督和春統兵攻三河久不下公曰賊之不得破也以我立營避其衝使賊糧餽救援往來不絕是自困也遂單騎周視營基次日親執大旆率兵勇千人於賊壘之間立一營以塞其隘賊懼發大礮對旆轟擊公伏馬上手執大旆不動兵士見公旆植立人伏馬上以爲避礮也且戰且築不息須臾營成始知公中礮死矣旆猶在手握甚固賊糧道斷救援不通數日大敗潰事

賜卹諡節愍人皆知公忠而不知公之功也公某邑人卒年未三十雄勇有智略初逆賊楊秀清之作亂也公與張家祥俱被脅從後皆自拔投官軍積戰功保至湖南岳州城守營參將洵擢至總兵官家祥卽世所推名將張國樑者也公性至孝其父嘗與之書曰汝初陷賊而後從戎皇上不殺汝而用汝不數年而官高如此若不以死報

國非吾子也公執是書以泣故卒殉

國難小軒吾友蘭軒徵君子以徵君起義師殉節世襲雲騎尉有至性

周節愍公別傳

李元度

周公諱雲耀字光庭邵陽人少有膽略充寶慶協馬兵道光十二年從征江華逆猺趙金龍補外委案擢千總二十七年勦新甯賊雷再浩有

功

賞藍翎擢嶺東營守備時承平日久營伍廢弛以游手充尺籍值征調輒相向泣公力挽其敝汰羸弱勤訓練與士卒同休戚踰年新甯賊李沅發倡亂莠民蠡起應之公帥所部兵百五十人團結鄉兵與俱守界賊來犯擊走之咸豐二年逆渠洪秀全下竄陷江華公屯軍牛塘等處與賊戰屢捷三年夏粵寇鍾爾康犯江華公帥二百人迎勦大敗賊慮賊由間道襲嶺東乃冒雨夜馳歸翼日賊果大至出不意敗之禽逆西彭如海當是時侍郎曾公方治團練駐長沙聞捷手書批牘云此次用兵若神鷹盤空飛疾而力勁不愧西南鎖鑰也四年擢江華營游擊地接粵西賊黨出沒無虛日公以兵法部勒鄉人使家自爲戰會粵寇劉紅貴犯濤墟公率所部往勦之賊敗遁別賊羅亞會犯嶺東界擊走之

道及粵境赭其巢賊竄永明之桃川方擬躡忽別賊來自灌陽圍攻道州甚棘公聞王公鑫帥湘勇來援急率兵會勦圍立解賊偵知公遠出策江華必虛將襲城公卽夕循間道歸遲明果與賊遇奮擊敗之遂進攻桃川賊聞風遁追及粵境之栗平街殲賊殆盡公自與王公合軍兩人深相得士氣百倍官民倚此兩人爲固婦孺皆知其名粵賊甚畏之未幾援甯遠援錦田往輒有功十一月賊犯零陵公迎擊於青口板橋追至梅崗賊敗遁巡撫駱公上其績

詔賞孔雀翎擢參將五年春勦賊於錦田於富川於永明灌陽均大捷夏四月粵酋朱洪英陷東安公會諸軍圍勦克之敘功晉副將尋追賊道州大破之賊回竄圍廣西之全州公力疾馳援全州圍解又破賊於輿安時軍威震甚賊當之輒靡恨公次骨然公所部裁七百人又數出境援勦馳驅勞乏賊滋欲困公遂繇灌陽山竄永明矣永明屢被賊城中死徙一空至是告急公兼程回援中途糧盡貸米於民家民間公軍至輟已炊而餉之以十一月朔夜三鼓抵城下犂旦賊大至倉猝戴草冠韡刀出城擊賊所殺傷相當旋以眾寡不敵斂兵固守賊訶知城中糧少兵乏悉眾仰攻期必拔公以忠義激厲兵民身受數創仍晝夜登

陣督戰賊攻益急而王公方勦他賊遠不及來援城中勢益孤十二月

初四日城陷公北向叩首曰臣以死報國矣手刃三賊乃自刎同死者守備銜千總朱耀永明汛把總周佑外

委官獻爵事聞照副將陣亡例

賜卹如例
子諡節愍
敕祀昭忠祠耀佑獻爵等皆

論曰軍興以來楚勇湘勇淮勇名天下營兵不與焉湖南綠旗營將能戰者塔忠武外惟公耳有公及塔公爲之將則兵率以敢戰聞夫豈不以其人哉然則謂兵必不如勇者皆目論也然公旣以將略顯而所部纔數百人卒被困以死用公者曷嘗盡其才也噫

蕭節愍周貞愍公別傳

李元度

蕭公諱捷三字敏南武陵人武生舉道光丁酉鄉試官湘陰汛千總咸豐二年以守省城功遷守備四年賊陷湘陰坐免曾文正奇其才檄領水師以功復職

賞藍翎補永綏營守備進攻武昌時水師分兩隊公率戰艦爲前部冒
礮雨進先駛至鸚鵡洲擲火球焚沿江賊柵後隊繼之賊不支揚帆下
遁又急駛出賊前燔其輜重城賊喪膽八月二十二日渡江攻漢陽朝
宗門外土城楊公載福時方爲游擊公隨之血戰見賊舟輒焚漢口以
內船皆盡會陸軍破花園賊壘賊啟北門走武昌復晉都司
賞換花翎時餘賊尙據襄河水師扼新灘口二十四日賊駕戎扁浮襄
河下大小千餘艘水師迎擊敗之游流追及上游有悍賊數舟用火彈
撲營火灼公頭面手足幾死公裹創力戰追剿二十餘里尋敗賊蘄州
釣魚臺骨簾磯等處遂大破田家鎮過九江直趨湖口初江西吳城戰
艦數百淪於賊賊竄砂石沈諸湖口截江路僅留隘口通舟阻以竹纜
而於對岸梅家洲築僞城環列巨礮數百以拒官軍值水涸弗利仰攻
十二月八日公駕火舟徑衝賊柵礮轟發如雷當者輒碎燔賊舟百數
遂乘勝駛入內湖泊大孤塘十二日游擊孫昌國黃翼升等簡輕舠二
十精卒二千自大孤塘至平峰出賊不意焚內湖逆舟二百有奇賊遂
囊土塞湖口水益涸師弗克歸二十五夜賊用小艇雜外江巨艦中潛
縱火水師驚潰輜重皆被燬曾文正大營泊九江北岸亦被焚襲於是

公等阻鄱湖內外隔絕水師故有船供食宿自陷入湖內眾皆露處風
雨中公等激以忠義軍心彌固五年曾文正入江西益治水軍公晉游
擊四月乘霧襲賊雞公湖敗之遂復都昌五月賊由大孤塘上犯勢勁
甚公逆擊之於青山決死戰賊大敗人舟俱燬遂奪回前臘所失帥船
及賊魁滕鱗巨艦七月十四日復敗賊青山當是時文正屯南康檄平
江營陸軍渡湖約水師夾攻湖口二十三日平江軍攻克湖口城賊退
保石鐘山堅壘時北風勁浪立如山公率十七舟猛進遙見陸軍圍石
鐘氣益奮手自揮旗已衝越賊艘將上下夾擊而下鐘山及梅家洲賊
壘林立礮齊發公中飛礮死之諸將憤極併力攻盡焚下鐘山逆舟追
三十里始還事聞

贈副將

賜祭葬

予諡節愍

賞世職入祀京師昭忠祠咸豐七年九月官軍克湖口九年曾文正再
出視師彭公玉麟建水師昭忠祠於石鐘山曾公疏請列祀典首祀公
及周貞愍公

貞愍諱清元字玉泉湘陰人也世業農兒時與羣兒角戲於牧場立表數十步外飛石命中掘溝尋丈跳越之能往復十次羣兒皆出其下同里左明志者以拳勇鳴於鄉招致門下傳以技嘗言天下幸無事有事則周清元暨吾子光培皆驍將也咸豐二年冬賊自益陽竄臨資口公混迹市人中默識其軍卒舟艦糧械之數聞提督向公榮尾追至八字哨相距三十里公遮道見向公曰廣西能戰賊不過三千餘人餘皆裹脅耳臨資口四面阻水湘包其東南資繞其西北數十里平原渺無障蔽賊所擄民船笨重不易行一炬可盡也請以兵扼要路使不得偷渡賊糧盡旬日當餓死何怯而不爲向不省公固以請向叱之退繞道樟樹港至湘陰賊從容駛去矣及東南糜爛公太息曰賊自走絕地向公縱之去能辭厥咎耶三年曾文正募水軍公謂光培曰時至矣丈夫當努力殺賊報國毋徒死牖下爲也遂同應募隸千總楊公載福戲下楊公嘗爲湘陰汛外委夙才公而蕭節愍官湘陰千總時亦知公驍勇及戰必與俱四年賊踞湘潭楊公及彭公玉麟等帥水師進剿時賊掠民船數千旗幟蔽兩岸我水軍本新募又經岳州新控望之多奪氣公言於介眾曰民

船不能戰一炬可盡也何懼焉遂隨楊公猛擊逼賊巨艦賊倉卒以資
盤來擲公手接而回擲之中賊渠楊公躍登賊舟公隨聳身入用火球
分擲左右舟時風烈火大熾賊爭赴水死從軍見火起急槳爭進分途
縱火燔賊船皆盡公以功拔充哨官隨攻克岳州嘉魚各郡縣八月二
十三日攻克武漢受重創力疾進剿戰斬黃田家鎮皆有功五年武昌
再陷公隨彭公回援駐金口扼上游每戰必身先不受創不止六年胡
文忠督攻武昌經歲不下議先斷糧路困賊乃檄水師清江面賊船公
時典水師副後營率先下駛越武漢二城直駐沙口賊數來犯皆敗之
駐沙口八閱月賊糧斷城賊乃困十一月二十二日公繇沙口帥師上
擊先破賊浮橋斷其鐵練大戰黃鶴樓下公被礮傷力戰不退各營繼
之遂克武昌十二月六日以創重卒於軍年二十有六公繇藍翎外委
海保參將加副將銜

賞驍勇巴圖魯名號並換花翎泊死事

詔旤副將例議卹

予謚貞愍

賜祭葬

賞世襲騎都尉祀京師昭忠祠公勇而廉所得月俸半以充犒賞既卒
不名一錢所部贖金送之還葬而左君光培戰績與公埒後官至總兵
贊曰當節愍攻湖口時典平江軍者元度也既拔城進擣石鐘山壘登
高望水師礮聲雷震煙蔽空日暮始罷戰不知公已死綏也公與周貞
愍齊名昭忠祠祀死事將卒三千餘人二公爲之冠烏虜壯哉余嘗往
來金陵泊石鐘絕壁下夜半風怒號萬竅齊鳴與所謂鏜鞳噌吰聲相
響答豈諸公忠魂爲之耶拜其祠益歛歔不忍去云

王剛介公傳

陳繼聰

王公國才字錦堂雲南人以材武入戎籍官至普洱營游擊咸豐三年
冬與署龍陵營參將佟攀梅奉兩湖總督吳文節公檄調征湖北公帶
土練三百自隨行次荊州將軍官文恭公一見偉之奏留軍前差遣明
年四月賊陷安陸進犯荊州官將軍使公督兵一千二百人並江陵練
勇五百人爲先驅守城北龍會橋賊萬餘猝至我軍望之有畏色公拔
劍奮曰今賊如潮湧不進何處求生活親熬火鎗殪其執旗賊目一人
卽挺矛入賊陣大呼兵勇曰退一步者斬於是佐領玉貴揮眾直前醜
徒披靡皆擁擠墜河死餘賊在樂壤橋浩子口者亦爲副都統貴陞與

終攀梅所敗荆州獲安官將軍奏公功第一擢授副將是時監利石首
宜昌諸邑尙爲賊踞五月公赴宜昌勦之賊遁往洞庭湖他邑亦爲別
將收復會武昌失守官將軍遣軍往勦六月克沔陽七月克天門八月
荆州軍會長沙軍攻克武昌漢陽公皆預其役旋隨總督楊需下勦黃
州九江五年正月總督兵敗於荆竹鋪漢陽再失三月進陷武昌其日
公自潯陽赴援三更方抵鄂城尙不知城之已陷也呼門而入賊亦不
知爲官兵直至蛇山之前賊始驚疑殺聲互起天將明矣賊聚益眾公
因孤軍深入不敢戀戰乃由南門整隊而出結營城外旣而由沌口出
新灘同水師參將鮑超王明山分隊會勦焚賊船百餘艘我兵進屯大
軍山公尋從湖北巡撫胡文忠公攻漢陽率軍力戰盡毀白沙洲百步
街賊寨六年冬克其城以功升安義鎮總兵仍赴九江勦賊明年二月
將軍都興阿從黃梅知縣覃瀚元之計以空城誘賊入使公駐桂家畝
爲後拒賊果自二郎河廬至遂與副都統多隆阿合力殲之進攻小池
口破段窳楓樹礮諸壘五月安慶賊以九江事急遣黨竄湖北犯蘄黃
公偕提督楊岳斌率師往援賊悉銳踞童司牌六月二十四日公移營
屯濯巷是夜賊潛來犯公方督兵禦之適賊礮中我營火藥燄四起公

恐軍心紛亂屹立不動而火勢愈烈公亡於陣候補湖北縣丞張兆麟
候補湖南訓導吳炳從九銜吳灼亦受傷死公自滇南來楚勦賊數年
臨敵身先士卒大小數百戰所向有功平日廉明愛士甚得兵心所部
至五千人赫然負將帥之望而卒殉
王事以死胡文忠深歎惜之疏聞於

朝
詔照提督例賜卹

子諡剛介

論曰賊犯荊州也其鋒甚銳非公力戰荆襄危而中原震動寇禍益難
收拾矣故龍會之役公之功不止保全楚疆也至夜入武昌城以孤軍
入虎穴奇勇亦屬罕有宜其威名赫然爲一時所豔稱哉

畢君殉難碑記 曾國藩

自楚軍之興忠武公塔齊布實始以勇名天下楚人剽悍者率低首塔
公亦豔稱雲南畢君塔公每臨敵負鎗挾弓矢又令二卒樹長矛執曳
馬繩竿以從其爲器也四畢君每臨敵負鎗腰五十矢又令卒手蛇矛
持八尺刀以從其爲器也亦四塔公躍馬飀馳嗔人追從從輒返鞭之

畢君怒馬直穿賊陣戒後者無得妄從我人亦自不敢從也畢君名金
科字應侯雲南臨沅人以征開化苗匪功敘藍翎外委署臨沅鎮標外
委咸豐四年隨副將王國才赴湖北軍營破賊於天門丁司橋累敘至
花翎都司十一月國藩檄令隨塔公攻圍九江明年正月賊犯武昌王
國才回軍援鄂畢君遂爲塔公所留其後塔公物故畢以驍勇冠潯軍
逆酋石達開之寇江西也連陷瑞州臨江等七府數十州縣畢君所至
常陷陣克捷旋爲他部牽率失利終不得獨錄其功自九江奉檄而南
以五年十二月破賊於樟樹鎮明年二月軍敗失之自南昌而東以六
年五月破賊於饒州之章田渡六月郡城陷失之畢君自痛爲他部所
累益發憤募死士再入饒州誓眾曰今日上岸破賊不捷吾不復歸舟
矣一鼓克復府城饒之耆黎婦孺見聞者與不見聞者皆曰畢君功也
由是

賞加呼爾察巴圖魯名號補臨沅鎮都司升用游擊名譽大振而忌君
者日以次骨飛謀薦謗迭相汙染君提千餘人當四戰之地索餉不至
又惡忌者出己上中夜鬱鬱不自得嘗思立奇功以自旌異會徽池之
賊大至歲暮士有飢色有司者責君能破景德鎮軍食可圖也君以正

月二日出師初四日驟攻景德鎮入市乃無一賊別擊十人搜勦後街賊蜂起從卒亡七人傷三人君縱橫擊刺踐血而出最後賊以噴筒環攻君於王家洲隕焉年二十五歲耳聞十有八日前從傷卒三人者收得遺尸又三載咸豐九年子弟國荃破賊景德鎮憑弔畢君殉難之所而壯士則既死矣功名之際有天有人在己者獨足恃乎哉於是伐石以表遺蹟聲之銘語俾行路歌之以永饒人之思銘曰
橫目蚩蚩同出一治眾雌無雄誰是健者塔公首出次乃畢君軀幹雖小陳安之偷匹馬斫陣萬夫莫當人心之賊一矢或傷內畏媚嫉外逼強寇進退靡依忍尤叢訴鬱極思伸矯首舐天徒飛無翼或墜於淵淵則有底憤則無已萬代千齡哀此壯士

又畢剛毅公傳

陳繼聰

畢公金科字應侯雲南臨沅人少入戎伍材武絕人以征開化苗匪功敘藍翎外委咸豐四年從普洱營游擊王國才調赴湖北四月賊窺荆州將軍官文恭公使王國才拒賊於龍會橋大戰勝之公亦燒斃橋北伏賊甚多復破之於天門丁司橋累敘至花翎都司十一月奉侍郎曾公檄隨提督塔忠武公攻圍九江五年正月賊犯武昌王國才回軍援

鄂公爲塔公所留七月塔公卒公仍在潯營時逆酋石達開陷江西
郡邑勢張甚公每出戰常陷陣驍勇冠潯軍然往往爲別將牽率失利
終不得獨錄其功十二月自九江奉檄而南破賊於樟樹鎮六年二月
軍敗失之五月復自南昌而東破賊於饒州之章田渡六月饒城陷又
失之公痛他部之累已益發憤出已貲募死士十一月奉曾公檄再至
饒州謂都司林保曰吾以一千人防饒聞賊從建德東流來者五六千
人又探報李邱二賊目自率三四路悍賊與之合統計近萬人此豈可
力敵者非出奇不能制勝乃使營官龔廷貴領兵五百潛伏陶溪渡爲
疑兵誡曰如官軍追賊至則出擊之復分翼迎敵以岳炳榮將右出其
前朱洪章將左繞其後部署既定公慷慨誓眾曰今日上岸破賊不捷
吾不歸舟矣旣而前隊遇賊佯爲少卻賊追之後隊橫出截爲兩公督
壯士居中縱馬衝突當者披靡麤戰至渡伏兵起賊猝遇之驚遙望林
中又旗幟徧滿以爲官兵大至相率逃竄公乘勢圍殺遂克復饒城
天子嘉之賞加呼爾察巴圖魯名號補臨沅鎮都司以游擊升用而軍
中忌公者以公名譽大振愈銜之次骨蜚語騰謗索餉輒不至公憤鬱
不自聊思更立奇功以報

國會徽甯之賊麇集歲且暮士有飢色有司責以能破景德鎮軍食可圖也公遂以七年正月元日率千人進攻越二日抵鎮阻水而軍黎明挈健卒十人濟入市乃無一賊至後街賊蠶起從卒亡七人傷三人公奮鬪踐血而出最後賊以噴筒環攻於王家洲公死焉年二十有五前從傷卒三人者收其尸殮之事聞

賜卹如例始公之赴饒也自以孤軍不足當一面跪請於曾公願留麾下弗遣曾公慰之許不久調回既而不果調竟戰死曾公深為痛惜勒碑以紀其事及同治三年曾公克江甯逆渠盡殲復為公請卹典於朝得加贈總兵銜

贈祭葬諡剛毅並立祠景德鎮

論曰曾文正公撰畢剛毅公殉難碑極稱其勇謂與塔忠武公相埒夫曾公麾下猛將如雲而獨追悼剛毅公不置剛毅之為人益可知已惜乎忌之者眾又值軍事方棘曾公終不得保護之而公遂至牽制而死嚮使以公之材而位其上者能盡如曾公其人俾展厥長他日勳業所成豈在楊鮑諸帥下哉曾公云功名之際有天有人信矣夫

豐五年十一月賊通南昌曾侍郎調副將周鳳山統九江全軍往剿十二月三日遇賊於樟樹鎮周謂其部下曰賊惟懸牌于稱悍我軍鈞連

鎗足制之努力前進
號鏡五六百人鐵西
正鎮而撫州建安予
二月之勝余反覆思
碑明言十二月自九
將同行而紀略所謂
擢爲己功而文飾其
則此書多憑耶報未
書副將敗於樟樹鎮
先守子奪概可見矣
周兆熊傳戴輯
先正事略皆載之不
詳惟粵匪紀略敘述
明香故采以書之
國朝

周兆熊字輔臣四川成都縣人也咸豐六年由參將升某協鎮在丹徒
破岡子殉節先是咸豐三年粵賊破丹徒湖南提督余萬青統領鎮江
水陸軍務立營於城東門外之京峴山去丹徒鎮七里嗣後幫辦軍務
江蘇巡撫吉爾杭阿來丹徒督師在城西門外九華山紮營六年二月
閒賊從江甯竄出復破揚州繼又退出揚州復竄往江甯高資鎮爲賊
出入經由之路大帥於高資設立六營令總兵虎嵩林統領而去九華
山四里有破岡子戶設立三營兆熊與某某三人分領之賊圍高資鎮
吉爾杭阿往援困圍中不得出自殺高資營潰九華山營因吉爾杭阿
死亦潰而高資賊與城內之賊合圍破岡子營於是某託言出外求救

兵去某亦冒賊圍出獨兆熊爲死守計大開營門放空鎗警賊賊意我
營火藥且盡爭出兆熊乃安置鎗礮度賊兵將近突然施放殺賊甚眾
無何賊漸逼兆熊謂其士卒曰若等去我乎抑從我乎士卒皆哭曰願
從大人兆熊於是令營內四面皆置火藥徧滿冠服俟無何賊眾前來
禽兆熊兆熊撲案罵而營內火已作兆熊及士卒等俱焚燒死兆熊守
破岡子爲四月某日閱數日而死於難嗚乎其可悲也歟當是時高資
暨九華山大營相繼失陷賊遂竄丹徒鎮因兆熊與相持得遲數日至
丹徒提督張國樑援兵至賊敗退去而丹徒鎮獲全識者以爲兆熊守
破岡子功焉

鄧忠武瞿威壯公別傳

李元度

鄧公諱紹良字臣若乾州廳人父士儼以歲貢官平江訓導有學行公
幼入伍補新場堡屯把總道光末從征崇陽以功擢屯千總晉守備尋
從征廣東

賞藍翎李沅發反新甯公帥五百人敗之窮追至黔粵斬獲甚眾明年
沅發就禽公擢提標都司

賞揚勇巴圖魯換戴花翎咸豐元年從提督向公榮勦粵賊於慶遠敗

諸索潭及陶鄧墟賊竄潯州踞大黃江公麾軍渡方對壘別賊自牛排
嶺來犯公引精騎五百橫衝其陣張左右翼繼之兩路賊皆敗又敗賊
於象州乘勝抵永安戰皆捷遷游擊二年賊犯桂林公空壁躡之一日
夜走三百里屯西城圍解授楚雄協副將賊竄湖南公奉檄守甯遠旋
守衡州賊繇閒道走長沙公帥師馳援與永綏協副將瞿威壯騰龍壁
南城外焚賊踞民廛敗賊阿彌嶺會賊鑿隧道隱隱聞鋤鑿聲巡撫張
公亮基檄公及瞿公帥勁卒八百人入城備緩急九月二十九日魁星
樓側地雷發城裂十數丈賊蜂擁上公帥敢死士躍而前礮彈洞右臂
血淋漓不少卻鏖鬪移時殲先登悍賊百餘督兵紮土城復完未幾賊
解圍竄岳州直趨武昌公卷甲尾追三年擢壽春鎮總兵晉江南提督
攻鎮江會援賊大至我軍不滿千敗潰
詔奪職仍協勦金陵尋以五百人援東壩克之轉戰至太平又遮敗之
於采石移防甯國敗蕪湖賊於黃池追奔二十里斬馘近萬五年春
詔賞三品服及花翎帥師援徽州進攻婺源克之尋赴江甯鎮擣沿江
賊巢賊走石埭負嶠羊棧嶺險絕仰攻多不利公遣將循別徑登嶺
赭其巢賊越山而竄夥石埭以次復會蕪湖賊麇集老鴉山甯國告急

公移師攻之三戰三捷賊望其旗幟輒反走遂復蕪湖沿江賊壘皆平

授陝西提督六年春奉

詔攻揚州冒雨渡江帥精銳薄城環攻六晝夜奮身先登攀堞而墜者

數誓必拔卒引軍上克之

詔調浙江提督幫辦皖南軍務戰三汊河拔其柵適甯國陷倍道進攻

敗賊於雙橋趙村東溪橋等處進次望牛墩大小數十戰皆捷又敗賊

於夏家渡於團山分兵平涇縣各村賊巢援賊至敗之於桃花園麒麟

山遂克甯國伏屍百餘里七年復南陵會蕪湖賊犯灣沚公痛勦之夏

四月金陵賊大至復犯黃池灣沚分黨從紅楊樹內竄公擊走之四次

攻蕪湖皆捷遂進攻繁昌敗賊孤山壩又敗之清水河又敗蕪湖賊於

四合山適青陽賊窺涇縣分兵擊卻之賊復走據南陵當是時公以甯

國爲浙藩籬而涇尤皖南咽喉自提兵過其衝相持至兩年賊死爭不

能入尺才會丁母憂乞解官奔喪

詔改爲權提督仍督辦軍務未幾復南陵時別將攻瓜洲急賊謀解圍

乃犯南陵涇公皆擊敗之尋破三里店賊巢南陵涇皆平八年江甯賊

糾捻匪來犯黃池灣沚連屯四十里公自南陵回援力戰走之賊復犯

南陵勢尤悍公與總兵周天受前後夾擊大破賊進攻桃木段賊巢破之追至孤山壩盡焚其壘繇是石碓施家渡要隘皆奪回尋遣將平太平卓村賊巢遂進攻莪橋適賊復犯黃池乃分兵擊卻之蕪湖賊同時來犯亦爲公所敗然公所部萬六千人多分防各屬要隘灣沚大營勢甚孤而賊眾數倍盡踞河北三里埂和尚橋等處分番出犯而甯防危矣公飛檄請援時軍餉久絀孤山壩各營相繼失守十一月初七日總兵戴文英以金陵援師至賊用大隊襲其後文英戰死援師潰營中食盡賊攻益急公知勢不可支具衣冠北面再拜舉火自焚其營死年五十有八公死而浙遂不能支矣

詔贈太子少保

賜祭葬

子謚忠武

賞騎都尉兼一雲騎尉世職

敕甯國及本籍各建專祠

賞其父士儼白金四百兩時父年八十有七矣同治元年

詔南撫遣官

賜祭一壇

瞿公騰龍字在田先世居陽湖曾祖明誠任永定縣尉僑湖南遂為善化人年十九人提標繇常德協外委洊擢郴州汛千總道光十二年從征逆裔趙金龍以功

賞藍翎再征廣東八牌徭

賞五品服遷鎮守備乾州苗變帥師燔其巢

賞換花翎遷古丈坪都司署鎮守游擊咸豐元年出師廣西屯武宣疊

敗賊於桐木馬鞍山時患瘴力疾決戰上官勸少息公不可曰賊勢如

此某敢愛身耶賊竄永安追剿至古排塘屢斬賊目焚其巢擢參將二

年賊自永安犯桂林公繞道出賊前壁文昌門賊用攜牌呂公車來攻

公力戰禦卻之圍解擢永綏協副將

賜號莽阿巴圖魯亡何賊犯長沙公馳援與鄧忠武同奉檄帥勁卒為

游兵備非常賊用地雷法轟城初為鄧公所禦十月十八夜五鼓魁星

樓側地雷復發城再裂十餘丈公力堵斬悍賊三百有奇城復完明日

圍解

詔加總兵銜公繇岳州追賊至武昌三年擢鄖陽鎮總兵進剿江甯亡

何賊北犯

詔公帥師二千人赴河南山東防禦抵高郵欽差大臣琦善疏留之會
總兵雙來中斃死遂兼統雙營並總理營務充翼長時瓜洲賊悉銳援
揚州公所部皆分防要隘戲下裁五百人公誓眾曰賊十倍我不力戰
勢且盡今當有進無退敢回顧者斬遂下馬持大刀督陣五百人皆奮
勇衝殺呼聲震天五盪五決賊敗潰夜雷雨大作我軍乘電光冒雨衝
擊賊不辨眾寡遂大亂自相砍殺厥明賊退屍骸枕藉計斃賊二千有
奇越數日瓜洲賊由三汊河揚帆至登東岸聲言復仇公帥眾渡河橫
截之賊敗走十一月克揚州並復儀徵四年二月公進勦瓜洲破其伏
賊連敗之初五日公督師深入賊傾巢出拒復分黨襲我軍後公被圍
血戰竟日手刃十數賊力竭死之年六十有四事聞

贈提督

賜祭葬

予諡威壯

賞世職入祀京師昭忠祠子輔廷候選從九品廣善藍翎從九品廷熊
藍翎外委廷豹藍翎把總有

旨並賞守備廣善尋改文職累保布政司經歷加知州銜咸豐八年戰死於乍浦廷豹隸都統德興阿戲下充營官八年賊犯浦口力戰死事並從優

賜卹如例

贊曰自賊起嶺西長驅而東穴有江左獨賴吾湖南選將才下水陸軍輸糧糗用能乘機逐利收故所失地以汙王誅然當前犯長沙時穴火發賊呼譟乘城非得二公奮身各蔽陷處抵擊之城其危矣無湖南是無天下也然則保一隅遂全天下二公之功偉矣哉光緒元年

敕建駱文忠潘忠毅張撫部三公祠於長沙以二公配食諸死事者祀祀蓋旌城守之績云

又鄧忠武公墓表

楊彝珍

公諱紹良字臣若湖南乾州廳人父士儼歲貢生任平江訓導行誼稱一時公自幼以武力智略自許請於父充屯丁補新場堡屯把總道光二十二年從征崇陽以先登功補同全坡屯千總尋署花園守備適李沅發爲亂新甯公帥五百人追賊深冲洞賊率銳逆戰公仗戈直前所部從之賊辟易遁上思村橫據金峰嶺諸險隘公命將士乘晦銜枚登

山噪而馳賊驚潰不知所爲蹂踐死者無算生禽李沅發檻送京師
賞揚勇巴圖魯勇號並

予花翎補提標都司咸豐元年粵賊洪秀全起金田屢敗官軍提督向
公檄公往與爲犄角連敗賊索潭陶鄧墟賊大岬轉竄潯州踞大黃江
公麾兵渡對賊壘而軍別賊數萬自牛排嶺來會公引精騎五百衝其
陣張左右翼繼之兩路賊皆敗咸豐元年夏公躡賊至象州之謝官村
賊巢環左右皆山公選壯騎奮而上搏擊菁谷中奪其隘破走之乘勝
追至永安州又敗之驢頭背論功擢游擊隨遷參將再遷雲南楚雄協
副將二年春賊由大洞竄桂林公空壁追躡一日夜馳三百里屯西城
賊百道攻城不下解圍去遂入楚踞道州諸路賊俱響應勢大振連陷
江華甯遠嘉禾桂陽至郴州入其邦據之公追及與諸軍壁其三門相
持月餘賊乃逸由永興徑犯長沙據城西南隅民舍爲窟穴日鑿隧道
達城下隱隱有聲巡撫張公急檄公入城往來策應九月二十九日魁
星樓側地雷發城圯數丈煙土漲及天賊蜂擁緣陴上公率敢死士躍
而前礮洞右肩血淋漓不少卻與賊搏戰移時殪先登悍賊數人餘奪
氣散走督兵累土城復完賊知城堅不可下率全隊渡湘而西陷岳州

直趨武昌公卷甲疾馳尾賊並討巴陵土賊悉平之三年春奉

旨授江南壽春鎮總兵隨晉江南提督赴鎮江勦賊賊援至公兵不滿千環顧無後應遂奔

詔褫職仍

命助攻金陵公率所部由雨花臺直薄神策門斬獲甚眾尋馳援東壩策單騎直擣敵營暝日大呼賊眾潰亂遂克之嗣駐軍黃池賊引眾自蕪湖奄至公及其未定掩擊之斬馘累萬追奔二十里

詔給三品官服

賞還花翎

命赴徽州援至則先攻休甯賊敗竄石埭之羊棧嶺高而險師仰攻不利公遣卒由捷徑登嶺襲之焚其巢遂復石埭以次復婺源復黟縣復蕪湖

上嘉其功

賞還提督銜六年春

詔援揚州冒雨渡江率精銳薄城環攻六晝夜奮身先登及堞而墜者數四誓必拔卒上克之

詔授浙江提督督辦皖南軍務攻賊三汊河拔其柵會甯國陷於賊卽
倍道往援先部兵駐金珂橋扼賊旁竄大敗之東溪橋進次望牛墩毒
其汲道賊以數千來挑戰公堅壁不出俟近逼外壕乃縱擊之斬悍賊
數百復潛師襲取七里崗遂薄城下毀羊馬牆賊不支棄城走旋分兵
窺妙葛山一帶逸賊斬數千級賊屍徧野公念甯國爲浙藩籬而灣沚
尤爲咽喉遂併力於茲且防且剿以其間分師援蕪湖復南陵攻繁昌
皆捷賊卒不得逞八年春賊糾捻寇數萬復距黃池公亟馳往出賊不
意大破其眾又敗之蒲塘夏村間至十月賊復犯黃池公亟馳往出賊不
道來攻公亦分三道抗之賊大披靡追賊之施家渡會浙事急先後分
兵赴援賊乘虛突襲峩橋石桅不守灣沚背腹受敵援師至自金陵者
一戰而潰賊騎四面陵騰之公具衣冠北面再拜舉火自焚其營死而
浙遂不能支矣公薨時年五十有八

上聞震悼

追贈太子少保

賜祭葬

子諡忠武令建專祠給騎都尉兼一雲騎尉世職敘其子亨先光祿寺

署正同治元年

御賜祭一壇嗚呼自賊起粵西長驅而東穴有江左獨賴吾湖南下水軍輸糧糗舳艫銜於江千里相望不絕用能乘機逐利收奪失土以成王誅克夷大難然當前嬰城時穴火發賊呼噪乘城非公奮身獨蔽陷處抵擊之城其危矣守一隅遂全天下公之功其偉矣哉雖不幸齎志以殞未獲躬成大勳享有茅土比荷社稷之靈諸干城之力削平僭亂邦用清彝公亦可以無憾哉予久欲爲公傳因未得其狀不果爲適楊海琴巡道狀公行事代其子乞表墓乃爲之論次俾揭於其墓之原

虎忠壯公傳

陳繼聰

虎公坤元字子厚四川成都人祖某官副將父嵩林官湖北宜昌鎮總兵公幼而權奇倜儻父命之學輒私於塾中習技戲或以兵法部伍羣兒羣兒憚焉年十三從其父適京師途見惡少輩窘人於市心不平與之鬪惡少傷幾死眾大呼共禽公械送步軍統領有識公者計脫之得免又好博常輸千金立盡父痛懲之而不能止同里總兵馬龍謂其父曰此子不凡奈何以繩墨求之今天下方多事盍姑令較學而入伍籍乎父從之咸豐元年以小校從征粵西隸總兵劉長清軍營長清奇之

以爲功名當出己上數使之戰有功遷至都司三年賊踞金陵從大帥
向忠武公勦賊江南旣而公父奉檄圍上海攻鎮江皆隨行勇冠一軍
父嘗被圍九華山公聞之往救力戰而入竟掖父出重圍未幾又敗蕪
湖賊於灣沚尋同諸將克取蕪湖六年三月賊陷甯國趨廣德浙西震
驚公以五百人遇賊數千於宣城之水林橋再戰再捷賊始斂戢不敢
出浙境以安游升參將六月向忠武公自孝陵衛退屯丹陽賊酋陳玉
成率眾追至勢甚張公同游擊張玉良出戰先攻五里牌賊寨燒之復
渡河至黃莊橋破其礮臺賊乃竄犯金壇張忠武公遣公往援圍立解
加副將銜八月會諸將攻東壩東壩爲蘇常門戶賊以全力拒守官軍
屢勦之不能勝公至輒先登連被數創石碎其冠不少怯遂克其巢進
圍溧水七年五月溧水下復克句容九月大軍會勦鎮江金陵逆遣賊
至下蜀街來援凡四次公由句容馳赴迎擊亦四敗之鎮江賊援絕糧
盡十一月十二日克之公功第一擢授直隸通永鎮總兵官時公父亦
以總兵立功同受

恩賞給巴圖魯勇號軍中榮之公年少名尤著稱者咸以小虎別之云
明年春破湖熟鎮賊壘進攻秣陵關其地離金陵六十里賊據之互相

呼應以爲犄角公率兵四千人與之戰兩月未下因建議云賊守甚堅
浪戰恐損士卒無益不若移營逼近其穴以示不兩立之勢圍旣合可
連出兵攻之察地形賊惟一路可達我軍醜徒雖眾無所用破之甚易
耳不然春水方生溝渠皆滿賊引以自固限隔官軍則攻之難當數倍
議上主者尙未及行而賊驟驅眾出鬪公擊敗之手舉大旗獨追賊十
餘里不止從者祇有游擊劉萬海及一卒萬海疑有伏勸弗窮追公笑
曰汝何今者官高而身重也萬海適新授是職故謂及之萬海不敢復
言乃從之進至石橋伏起公中鎗腦裂而死萬海與卒奪其尸歸張忠
武公撫之慟哭事聞

詔以提督例賜卹

予諡忠壯公面頰而長身短小能平地躍起丈餘善爲左右射常被創
斷其巨指然猶能執筆作徑寸書蒼勁有骨其所書大虎字人爭求之
謂可辟邪自貴顯後深悔少時不肯竟學而性絕穎悟覽史傳通大義
省視文牘數行俱下最嗜馬每曰行文莫如筆用武莫如馬故所蓄之
馬獨雄於諸軍又喜養健兒多以私財給之臨陣鮮衣怒馬自成一隊
衝鋒陷陣所嚮辟易其在軍不甚設警備士樂其寬有功者立賞犯法

必不宥暇輒好爲軍中戲戰則踴躍奮迅而起如小兒之樂嬉遊者又或攜酒食對賊壘飲啖譁呼叫號與賊相詈罵賊懾其氣卒不敢出待人量極寬宏官都司時同鄉某弁以私憾於半夜從帳中刺之不中公知之人皆以爲必復其怨公曰我豈有不足於彼耶何敢仇彼後其人

有戰功公拔之官至游擊移營溧水有貴州軍與所部四川軍素不相能人咸難之公曰天下詎有不可用之兵哉在將兵者御得其道而已久之黔蜀兩營竟安居無猜自從征廣西至江南始終八年大小數百戰身被十數創每臨陣輒語其下曰坤元武夫也父子均荷國恩無可報效惟有戰耳今日戰勝則歸不勝當自擊死必無面目與諸軍相見也其立志如此死時年二十七尙未娶無子持身尤廉除軍器外絕無餘貲同列賻之不足鬻其所蓄之馬以成喪禮柩歸所過之處居民無不焚香塞道及抵丹陽聚觀者皆哀悼泣下時人謂江南軍營名將張忠武外公當首屈一指也

論曰虎忠壯公之爲將也百戰百勝威振江南婦人孺子皆知其名爲人言語質簡貌亦樸厚殺賊而能愛民蓋勇而仁者也其忠義出天性臨戰而不顧身極似明黃靖南一流上元諸生伍承組公之幕客也嘗

次公行事爲之傳余爲刪其繁冗而以他書所載公戰功補其缺漏云

蕭剛勇彭果毅劉忠壯周愍烈彭武烈公別傳

李元度

烏岸當李忠武之師覆三河也員弁死綏多至數百人名將勁旅猝投一燼其中尤敢戰及死事尤烈應諡法者得五人焉此五人皆百戰之餘從克名城以數十計忠武帥所部深入豈輕試虎口哉抑倚諸將能戰守耳不自意爲援賊數十萬所乘天也而諸公廩廩然各以死報國豈不誠烈丈夫哉余覽其事悲之作五公傳

蕭公意文字章甫湘鄉人隸羅忠節戲下以斬級功敘外委咸豐五年從克義甯州擢把總

賞戴藍翎是年冬再錄從征通崇蒲圻功晉千總湘軍攻武昌公數陷陣敘功遷守備武昌克晉都司七年從剿蕪黃賊巢攻拔小池口僞城克湖口縣破走梅家洲賊擢游擊加參將銜八年克九江以參將卽補賞換花翎當是時李忠武奉

詔幫辦軍務進征皖北公帥所部從連克潛山太湖舒城桐城四縣遂進攻三河鎮三河鎮者舒廬適中地賊立僞城待糧糗軍火以濟廬州及江甯賊營者也別築九壘以衛之堅甚忠武銳意取之十月二日各

營分三路進勦公等攻河南街老鼠夾賊壘賊悉眾旅拒公冒礮雨先進各營繼之縱火焚其壘賊大亂公身受礮創殊死戰不退遂奪柵入九壘皆下壘中賊盡殲無脫者我軍傷亡亦千餘人公以創重歸營逾

時卒

詔贈副將既副將例

賜卹

予諡剛勇

彭公友勝字雲臺長沙人初爲長沙協戰兵從征耒陽新甯粵寇起從征廣西以偵探功

賞六品服賊犯長沙隨瞿威壯入城協守尋從江忠烈援江西並有功江西圍解乃歸伍居頃之送戰艦於大營留爲水師營將賊擾漢黃公駐師沌口平賊壘二斬僞丞相一武漢旣克隨官軍攻九江同敗賊於童司簿平其壘時已浣擢游擊換花翎矣八年九江克復晉參將尋帥所部征皖及賊戰於三河鎮力盡死之公饒膽略水陸戰必衝鋒大小數十戰體無創痕軍中服其勇死事前夕忠武命公爲前鋒時九壘雖破援賊復大至眾十餘萬距三河三十里我軍僅五千人又多苦戰受

創公上言宜堅守不可戰忠武笑曰若驍將今乃怯耶公默然詰旦領所部大呼陷陣賊披靡會大霧覲面不相見公已逼賊壘不覺也亡何援賊四合遂遇害

詔贈副將既副將例

賜卹

子諡果毅

劉公神山字佑甫湘鄉人咸豐初隸羅忠節湘右營從克武漢敘藍翎外委五年克義甯晉千總援湖北復通崇蒲圻進攻武昌大小七十戰公皆與遷守備武昌既克轉戰至黃州進都司七年從攻湖口破賊梅家洲擢游擊

賞換花翎八年九江復再回援湖北有功遷參將湘軍征皖連克潛太舒桐公功最

詔以副將補用三河之戰公首陷賊陣斬悍目數人追逼賊壘被抄襲圍之數重公左右馳突不能出手刃數賊而死年二十二

詔贈總兵既總兵例

賜卹

子諡忠壯

周公福高字子祥湘鄉人從羅忠節援剿江鄂案功擢守備

賞戴藍翎李忠武接統湘軍再晉公都司以小池口梅家洲諸戰尤用命

詔以游擊於軍中候補咸豐八年十月戰死三河鎮我軍之抵三河也
援賊麤至諸將不欲戰知戰必敗相覲無人色公憤然曰敗則死耳吾
輩畏死不來矣既至此敢惜死以隳壯志乎力戰而歿

詔贈副將既副將例

賜卹

子諡愍烈

彭公志德字道一湘鄉人隸湘軍以功敘把總咸豐六年軍次洪山攻
武昌各營裹創喋血鏖戰五閱月不解鞍胡文忠遴敢死士數十人彙
奏請獎公與焉遂晉千總

賞藍翎武昌復以守備用七年勦黃州克湖口平小池口堅壘梅家洲
偽城公功皆最擢都司換花翎尋破彭擇宿松太湖諸縣每戰必爲前
驅不肯後人敘功遷游擊又以復麻城黃安功除參將加副將銜三河

之役忠武殉節諸營皆潰公率所部貫賊陣突出死者過半公亦受重創走入中右營與副將李存漢等竭力死守越三日營陷死之

賜卹

子諡武烈以上五人並

賞騎都尉世職

賜祭葬如例祀李忠武專祠

南陽鎮總兵邱公傳

方宗誠

公姓邱氏名聯恩字偉堂泉州人以世襲男爵初爲直隸副將咸豐四年河南捻匪起粵賊復上竄湖北逼豫疆用薦擢公南陽鎮總兵公居心忠純時以殺賊自任臨敵果勇異常賊畏之號爲邱老虎云在南陽五年馳驅戎行日夜無休暇息縣李世林投誠餘黨丁心田聚眾擾烏龍集巡撫英桂令公往禽之湖北游勇倡亂破樊城撲鄧州眾萬餘人勢猖獗南陽告急公先以積勞患嘔血疾駐固始聞之卽旋鎮簡精兵先挫其鋒復聯鄉團以助聲勢民乃安五年正月李士林敗死其下易天幅擁眾逃歸結汝陽巨匪王黨羅苗義息縣匪朱明義林其賢北逼

馬鄉傷官兵南戕烏龍集州判遂破息縣圍光州據光山巡撫調公圍
攻數日嚴守關隘絕其援賊宵遁公窮追大破之諸匪皆授首河北連
莊會姦民滋事巡撫自督勦而以三關防堵事任公駐信陽時公舊疾
發兼中風痺力疾奮勵如平時是冬張落刑龔瞎子等倡亂蒙亳歸陳
震動他將勦撲數月無功

上命巡撫往督師巡撫檄公先由閒道赴歸德六年正月會兵進戰公
常居前敵屢挫之後遂有渦水雉河之捷七年春張龔二逆圍固始都
統勝保擊敗之賊竄擾三河尖方家集分賊擾光息都統駐軍淇河北
專防北竄南路無兵堵禦人情洶洶公率千餘人至光州知州鄭元善
更簡精銳兵勇二千人屬公公進駐詹家營距方家集二十餘里方家
集賊老巢也五月六日公分軍四出自居中直擣賊壘賊傾巢出衝中
軍公督戰良久無不一以當百破之乘勢入賊壘殺賊數千屍浮河而
下者累日二逆由此膽落不敢窺南岸十六日賊遁三河尖都統由河
北追勦公取道淮南進紫橋等集賊遁正陽關公復追至連戰皆捷初
公之破方家集也角子山捻匪乘隙作亂督兵者數失利巡撫檄公西
征都統以賊雖敗竄公去恐復熾光息紳民亦惴惴恐公去乞留至是

正陽關克復東賊遠而西賊愈熾九月公奉檄往勦時都統德楞阿敗賊於確山公乘勝追擊連破之賊西竄入泌陽嵩縣諸山中出入無常公陟險絕幽搜勦數月羣盜平自公去光冬十二月張翼二逆結粵逆數萬圍固始七十餘日巡撫以公勦西匪得力不可中止八年春南陽賊平遂飭公來光時固始圍已解而粵逆又自皖竄楚破麻城公駐軍沙窩坊虎頭關策應光山商城賊遂未敢入豫境十月擒匪孫葵心竄周家口巡撫調公往破之於槐店十二月賊擾三河尖巡撫恆福新莅任命公勦辦公分兵至光防禦得安堵公自平丁心田後凡汝光閒疆邊有警上自士大夫下逮鄉里婦孺莫不嘖嘖望公來卽傳之以爲慶賊聞之弱者遠竄强者戒備益嚴則皆曰邱老虎至矣公面方而黔微有痘斑顧視懷懷有威而內含慈惠身材中人丰采綽然每行軍所至將士如雲人爭識之當是時皖境皆賊豫與皖鄰無高山大川以爲之阻自公至豫賊雖屢擾邊而不能深入爲民害前巡撫英桂深任公故公得盡其才九年春賊自甯陵睢州竄入豫公連破之追至五溝營賊分爲二其東竄者公分兵擊於商水南殲之而自追其西然孤軍獨進無有與公夾擊者公方勦賊不遺餘力而恆福劾公以自謝過公不自

明發憤追賊至舞陽北舞渡薄暮馳百餘里人馬皆未食時黑夜猝與賊遇彼此難辨公督戰急賊少卻追至殺虎橋公聞其名歎曰人謂吾虎也今當死於此矣豈非天乎未幾賊大至圍之如重壁公潰圍出而復入屬從者多受傷勸公退守公殺所乘馬示無退志天色昏暗悲風四起賊死戰公公力盡猶手殺賊十餘人竟戰隕於北舞渡時年四十四有六公卒後繼公督師者多不知兵賊遂徧竄河南郡邑閒數年民大困公治兵嚴紀律尤以愛民爲心不以供張累州縣州縣有以米錢犒士卒者則欣然俵分之兵所駐境上或逾旬經月商賈居民幾於不知有兵者前防堵光州時天冱寒出錢十緡屬一弁爲市舊羊裘弁獻狐裘錦其裘不取值公曰吾非以儉博名念士卒口糧幾何而導之靡勢益不給起而攘奪甚於寇賊而事不可爲矣卒以已錢市羊裘乃安時度支匱軍餉薄且絀公常節縮俸錢以給兵食而未嘗向人言也然士卒或不法輒嚴治之故軍中畏其嚴而樂其恩行軍數年雖無事未嘗解衣臥時時訓練務使緩急可恃其勤奮持身仁義率下公忠體國數年如一日每戰克捷所向有功非偶然也嘗與人談及時事誓不與賊兩立其許

國之誠如此遇難後降將廢卒多泣下汴東南數百里士民道祭罷市而哭越十餘日始得公屍身被重傷而顏色如生然

又南陽總兵邱武烈公行狀

尹耕雲

公諱聯恩字偉堂福建同安人先世有武功父良功起家行伍任浙江提督從征蔡牽

封三等男世襲良功歿襲爵爲

乾清門侍衛道光二十三年授直隸通州協副將調河間協副將咸豐

三年粵賊窺伺武漢全豫震動

天子念南陽屏蔽荆襄控扼汝洛乃進公爲總兵以鎮兵防新野公至

儆守備遠斥堠邊境恃以無恐而光固之賊起焉公馳往擊殺八百餘

人誅賊目丁心田胡金斗等方進兵固始而粵賊上竄斬黃再陷武漢

奉

命守信陽州閒以精兵往來光山息縣攻克其巢斬馘無算光固平六

年毫捻張樂行擾歸德勢甚張豫撫英桂檄公往勦陷陣解亳州圍覆

其雉河集老巢賊由潁州疾走固始三河尖偵公追至太和復回踞雉

河集公乃倍道繞出賊前逆擊之賊大潰復連敗之賊窮蹙不知所爲

而英桂檄公勦襄陽土匪回軍救鄧州公至復內鄉殲賊渠朱中立等襄陽之盜悉平張樂行以公去復振大股掠光固而分據淇河南北相掎角英桂復檄公勦是時勝保爲大帥以勁旅數萬攻北岸賊公以其眾千餘擊南岸賊旬日十餘戰殺賊殆盡公之功名駸出大帥右且光固襄鄧肅清皆公力捷聞廁公名姓於眾將中

天子諡公忠勇詔加圖薩蘭巴圖魯名號先是敘平光固功賞花翎至是復得勇號公益感奮乃以所部追賊而東扼霍邱六安境上是時張樂行龔瞎子皆聚於皖北皖北洿荒守令重虐其民民困而從賊賊分其目爲五旗旗所領各五眾不下數十萬渦淮以東蒙懷靈毫千餘里皆賊屯且耕且戰官兵嬰之輒潰敗惟憚公見旗幟卽遁公亦銳以滅賊自任而泌陽之賊起南陽戒嚴公至賊投戈其不降者驅諸龍洞山而戮之事甫定英桂檄公往內鄉勦西山賊回環數百里與關中南山秦嶺相交錯路陡仄又天寒人馬不易行英桂促公入山過十八盤大雪迷道裹糧皆絕士卒多墜澗死公亦墜攀籐葛乃免搏雪以食越嶺前進賊偵公來大股由山後去餘眾綴巖壑閒出沒以誘我師故功不時就而英桂劾公摘翎頂公躡賊及諸角子山生禽賊目胡

倫脩等百數十人而巨逆張汝成猶率死黨竄峭岬口公夜登火其穴
殲其眾事聞復翎頂八年皖賊陷楚麻城公自汝甯移師光山遏奔竄
賊爲楚軍所逼將突商城公自徐家集銀山畝逆之接戰八晝夜賊乃
遁歸於是公與皖軍約會勦次師息縣而豫撫英桂檄公回駐光州未
幾張樂行之眾入周家口又檄公防鹿邑九年二月賊自歸德西竄攻
西華陷甯陵睢州公馳及之鏖戰於夾河套逍遙集斬殪數千復二城
西華解圍賊趨鄆城分道出五虎營掠上蔡而大股悉至舞陽北舞渡
將道襄城竄汴梁公念省垣重地守備空虛乃逆戰於西北原是時我
軍僅數千而賊眾數萬圍我數重兩時之久我軍潰圍而出及殺虎橋
伏起裹我大風晝晦公身負重傷猶執旗指麾有自後斫公者而公隕
矣咸豐九年二月二十五日也前一日豫撫恆福以睢甯之失劾公褫
職公聞而慨然曰遲速死耳得裹尸以報

朝廷足矣遂致命焉狀

聞復原官照提督陣亡例優卹

予謚武烈公每戰先士卒師所至無秋豪犯民載芻糧以餉師公不受
餉者委諸門外而去及其歿也巷哭數日豫撫英傑上其事詔於南陽

建專祠原籍如之公死閱十日乃於麥田得公尸猶切齒作怒狀士女
羅拜色稍霽耆民趙介坪獻其櫬以斂公喪至南陽南陽請留葬攀臥
數月乃得歸葬於閩公生於嘉慶十有七年距陣亡之日年四十八歲
公室蘇夫人道光二十八年歸甯後道梗不復北來窳室袁氏隨鎮任
統兵六年不一歸視故卒無子以族子炳忠炳義爲嗣女一適內閣中
書黃貽楫以所爲事略畧余故論次之以備史官之采擇焉

續碑傳集卷六十六

江陰繆荃孫纂錄

忠節十三

江南提督張忠武公小傳

馮桂芬

公姓張氏名國樑初名嘉祥廣東高要人年十有五賈廣西貴縣三載
 為土豪所辱怒率眾毀其家官名捕亡命為羣盜盜有道人為之語曰
 濟弱鋤強張嘉祥撫部勞公崇光聞而招之道光二十有九年公隻身
 詣左江鎮受撫檄勦土匪顏品瑤潘七大李樹青等事平還報勞公奇
 賞之令執贄門下為改今名字之曰殿臣示期望意洪秀全反公始屬
 向公榮部下檄率二百人破賊數萬於新甯捷上授守備
 賞戴花翎咸豐二年三月從勦湖南賊於道州蛇皮嶺克永安州追
 賊自湖南至湖北破洪山寺賊壘升都司
 賞給霍羅琦巴圖魯勇號無何賊陷武昌眾數十萬蔽江東下不旬日
 連陷九江安慶太平江甯大軍由陸路追之抵九江賊去城空湖口無
 船不得渡留十有五日始渡比至江甯而城先十日陷矣進攻之軍鍾
 山久之復江浦存升福建漳州鎮總兵六年夏五月蘇撫吉勇烈公敗

於鎮江死之未幾而有向軍鍾山之潰諸將震恐公從容指麾始得全師退次丹陽尋復進向公奏以公總統南北諸軍旋解金壇圍奉旨幫辦軍務乘勝復句容

賞穿黃馬鞋復鎮江

與騎都尉世職擢湖南提督復秣陵關

賞換雙眼花翎調江南提督復揚州儀徵晉三等輕車都尉復九洑洲晉二等公受知向公倚如左右手大營先後奏捷數十皆公功也江南北數百里內有警輒單軍馳援無虛月所至輒大捷迭荷

先帝褒旨賜上方珍異嘗傷於指

賜御用藥散尤異數既向公卒某帥驕愎不肖事又忌公事事齟齬之公度不得行其志誓以身殉抉一齒寄家示無還期公築長圍困賊期年而成攻益力城垂破各路援賊四至某帥方以不破城不發餉激軍軍屢譁不爲動公跪諫繼以泣不聽檄調副帥某回營七往返總督留自衛不遣公尋以追賊至鎮江賊突出犯大營某帥遁軍大潰公聞變馳至丹陽東遇賊大戰傷重下馬向

闕再拜曰臣力竭矣復進望賊營而馳渡河人馬俱沒時十年閏三月

晦也公從軍十年與士卒同甘苦士卒愛而畏之大營餉絀而譁至牙
傷向公臂萬眾洶洶公聞率小隊馳至乃散公令曰罪人吾知之諸營
盡今日縛以來則已不者張某且殲其營日晡得三十餘人殺之卒無
事軍令嚴所過秋毫無害身經數百戰未嘗敗北賊畏之如虎旣薨鎮
江營多公舊部賊至假公旗以出賊披靡陰雨中賊輒望見公旗故賊
猶傳公不死神矣哉公戰陣出新意善察地勢動合古兵法向公以六
合新勇隸公公試之曰若未能戰也雖然宜令若立功將戰公匹馬環
視數十里中得一僻地令營之曰旦日賊零星過若營若出盡殺之已
而果然故勇人人自奮願從公其援六合也相賊船所泊岸數里外令
土人曰若爲我築土牆自某至某內外各一外長二里許內倍之而斷
其中牆成以告吾爲若殲此賊及戰賊大敗奔所泊岸皆循內牆左右
走出牆斷處見外牆則大驚亂追騎及之無一逸者九洑洲之役公作
背水陣四眼狗率眾數十萬迫我軍於江濱公徙舟去岸令曰私渡江
者斬賊連蹠我營數十周提督天培歿於陣眾頗懼公手刃一人以徇
曰今日進則生退則死耳麾眾而前無不一當百賊大敗走遂復九洑
洲其布置多此類又善以少擊眾其復太平也以五百人從至則賊酋

觀劇城外公突至大呼殺賊賊奔入城公麾兵隨之而入城遂復往返
七日耳軍中歌曰張國樑走馬取太平其援鎮江也比至而賊退將歸
金陵吉勇烈饒之九華山酒中報賊至出擊不利公飲啖自如呼其屬
曰賊近以告俄而四山鼓譟鎗礮若雷公起更衣曰請從此別出營門
立而指揮分兵作數隊揚旗出公潛由僻路下山抄賊背急攻之與勇
烈夾擊賊大敗死者無算公遂歸金陵是役也賊數萬公卒僅數百云
公之過丹陽也周走四城召父老謂曰此城無守法若等速東去我留
待若公植立城上賊望見之不敢近盡一日城空乃行往歲蘇州設撫
卹局公書來云貴局多一難民卽敵營少一死賊公在軍殺賊以萬計
而仁心爲質有如此公長身力舉千鈞而狀貌如婦人好女待人以謙
尤重儒士稱於我輩曰晚生公軍出溧水縣令供帳南門公率親軍百
餘人至北門時漏三下叩門求宿無應者得一古寺小憩公以下皆藉
草臥黎明縣令倉皇至謝罪公曰吾愛此寺僻眠甚適不及至南門耳
遂馳去卒無芥蒂其大度又如此軍暇輒作虎字大徑丈中直墨半枯
屹如鐵柱名書家所不及廉俸盡以分士卒不名一錢訃至粵一子蔭
清幼四壁蕭然勞公方督粵厚賻之始成禮可敬也已公薨江南皆賊

地後數月始得公死事狀以聞

先帝震悼與優卹

贈太子太保晉一等輕車都尉祀昭忠立祠蘇粵

賜諡忠武

上卽位

特詔加祭一壇

舊史氏曰癸丑春賊陷金陵長驅南下有席卷江浙之勢矣得遷延至

八年之久以公力也公死逾月而江南數十州縣忽諸

詔有曰東南半壁倚為長城尚冀該提督不死出為國家宣勞又曰若

張國樑尚在蘇常一帶何至糜爛若此然則丹陽河之溺非公一人溺

也江浙億萬生靈胥溺焉天乎不已酷乎

張忠武公事狀 虎總兵坤元附 願雲

張忠武公國樑字殿臣嘉祥其原名也廣東花縣人 或曰高要縣 少無藉季

父賈廣西貴縣走依焉年裁十五六鬱鬱無所見則用豪俠自喜敢為

其難遠近以氣下之土豪富而暴眾嫉之久會又辱其同儕則怒往覆

焉莫誰何者然亦無他侵暴眾愈歸之一時為之語曰強如狼弱如羊

鋤強扶弱張家祥方洪逆之起金田也勢遽張羣不逞往往逐聲響應之或說忠武與台則慨然曰所貴豪傑能拔民耳戕之以逞賊而已矣勞巡撫崇光積前所聞民間語曰是其人勇且知義撫而用之必爲國蓋臣忠武則單騎走謁於左江鎮崇光一見褒異俾執弟子禮時道光二十九年也越咸豐十年死綏丹陽崇光爲位於廣東以哭曰吾門得公良不負一慟幾絕於是所在賊起忠武勦之既有功而洪逆旋以賊數萬走新甯州率驍健二百人破之授守備

賞戴花翎咸豐二年遂率偏師出廣西境既入湖南破賊於道州蛇皮嶺進復永安州又破之於長沙新開鋪賊遁湖北則又破之於湖北洪山寺夷其壘遂以都司

賞霍羅琦巴圖魯勇號仍率偏師從向提督榮循江而東忠武身不踰中人面白皙正方而中隆目秀長寸許而言論溫溫接士大夫以禮問旁近所由阨塞與步騎之宜若野老田夫則作好語問所苦見者忘其爲大將也當是時賊據江甯爲僞都而鎮江揚州相繼陷向榮以欽差大臣督元從諸軍駐江甯都統琦善以欽差大臣督北來新集諸軍駐揚州所稱江南北兩大營者也南軍聲威出北軍上遠甚故北軍自琦

卒托明阿繼之托罷去德興阿繼之德罷去北軍遂兼轄於江南大營不復置帥南軍旣以聲威聞天下尤稱忠武其未投欽差幫辦大臣以前三數年閒江南北所在郡縣告警輒往援援輒立解烽埃相望賊懼其至民又懼其弗至焉用都司積功授漳州鎮總兵移壽春鎮加提督銜而太平之功特奇始軍未至太平數呈舍之獨身往視形勢迤行至城下門者闐然入之慮有伏則衰走女牆閒騰堞上之道一巨宅故賊酋所處闔戶人見酋方擁婦人臥一笑刃之攜兩級出遇賊媼數輩則唬而奔方意何亡備若是俄歌吹作葢賊中方演劇諸所守衛悉弛以觀則亦循聲往往卽躍登其臺手兩級而舞眾皇駭頃賊酋所七賊追至以級抵其二墜手刃三餘二逸然後攬身下大呼殺賊萬眾崩潰軍至遂乘馬是役也實下以一人進攻旁近壘克之忠武每戰足麻屨布帛首若行滕綢縛胸背累數疊遇賊不甚恃火器時賊之轟擊且伏且進益近賊賊轟擊益力則覷破發子過逆濃煙翔入所部從之白刃若雨下其以數百人覆賊萬人若數萬屢矣又稔諸酋伎倆所長短而逆以中之以故所當雖劇賊輒望風潰往往索一戰不可得則舉軍中旗鼓悉易焉而建他將之燾賊誤攖之輒衄則大驚悔六年賊襲破江北

大營揚州再陷江浦浦口等處繼之而賊尤積怒六合以前令溫紹原
遙領江甯府總六合防務屢挫賊賊至是益眾往攻勢危甚於是忠武
絕江援之紹原聞大喜既至視其軍不足千人又以遠涉故散坐廢壘
或席濠墻而臥狀若弗勝兵紹原則大駭俄謀報忠武稱賊至問遠近
曰二十里許曰未也俄又稱賊至問遠近曰十里許曰未也俄又稱賊
至者數四問遠近曰不下五里矣曰可矣而橫刀旁侍者出腰聞角鳴
之臥若坐者皆起視燾所嚮擁之以馳悍然皆驍健也紹原則大惑率
所屬繼焉戰甫交而忠武暨數百人者遽驚入賊中跳身盪決俄而賊
陳亂潰去疾追至藏軍營盤城集再戰再破之連復浦口江浦紹原甚
德之私於所部曰若公何好曰我公於子女玉帛未始以一瞬獨好調
馬雖極虓怒不可羈勒袒而上手夷礮震之聳岡窈澗挾風電俱過不
三數復馴矣紹原則大歎服謁忠武舉嚮所答謀者以問曰此易知也
適始戰地云何曰龍池曰吾歷視所由率狹隘不足戰獨所云龍池者
其地曠衍可任縱橫是以須之至非徒以逸待勞也其夏巡撫吉爾杭
阿戰沒高資而九華山之軍戍自江北大營者又潰而江南大營既以
聲威爲天下望自所轄外先後援上海援廬州援浙若閩近數百里遠

乃二三千里提軍四出累月不歸而壘闕軍單遂爲羣賊所萃最後十
年之役忠武死綏丹陽亦職此也於是向榮奏以忠武總統南北諸軍
退守丹陽用有珥陵之戰珥陵俗曰珥村隸丹陽南朝諸陵在焉當是
時賊豔蘇常諸郡久扼於我軍苦不得逞而吾軍亦以財賦所出半天
下正供之外藉以資軍故力爲捍蔽至是賊乘勢出全力爭之而虎坤
元故統一軍於此坤元者字子厚四川人亦驍將提督嵩林子軍中以
小虎名之別於其父父嘗以故當法坤元號泣帥前請以己官贖父罪
否則代以身言訖拔刃自擬帥惜其材許以功贖於是戰必先登嘗敗
賊十數萬於高資遂克鎮江復父所失溧水坤元每戰好奪纛選所部
惡少年百許千金名馬配之背負紅旗一縱廣各四尺遇賊輒亂陳入
望之如火雲飛翻爲風所掣俄鉅黃旗十數掩映其間則所手舉於賊
者橫舞之而出以故賊望見紅旗一簇輒曰是小虎不可當倒卷其纛
以遁而其戰沒秣陵關亦以獨騎馳萬賊中奪纛既倒之矣遽爲伏賊
所中年裁二十許以贖父故官再至總兵卽眞方其軍珥陵旁近民積
爲他軍所患苦坤元至躬往撫問遂羣歐之旣歸一軍皆甲坤元亟令
閉營門然後喻之曰是吾適也吾往而弗先彼詎吾識語次稷鋤千百

繫藥然至聲言逐之弗去者將禽取生理之坤元亟登營牆慰道弗聽
至有進剗其壘者不獲已取獵者之子內鎗中然火發之傷十數人始
駭而反時謂坤元於是非徒驍將也忠武既殿軍至珥陵與坤元合日
暮張筵召諸將飲酒數巡具冠服拜於階下諸將大驚爭席膝至地忠
武慷慨言曰勞諸君血戰數年良苦今一旦糜爛至此而向帥又病東
南半壁視翼日一戰勝良善不然國樑必死於是今之置酒與諸君別
也坤元遽推案前擁忠武起曰過此半步而死者非夫坤元請騎當前
敵公步繼之計吞此賊必矣忠武笑撫其背曰壯哉雖然前敵吾自當
之君可繼諸將亦各以死誓翼日賊盛至我軍裁當什之一逆前塵戰
礮聲猛烈萬雷一奮崩崖頽谷天地晦冥戰塵騰起數十百丈劇賊排
牆進忠武洞入中堅諸將繼之剽疾震盪血肉橫飛賊前者已盡後者
復進如前我軍始番休既悉一軍覆釜起饑則束其腹渴以吻就賊項
飲之愈戰愈厲歷兩晝夜賊始大潰以奔而他賊圍金壇以抄我丹陽
之後者並進解之遂以提督拜欽差幫辦軍務之命會向榮病歿總督
怡良攝其事亦能任以便宜而句容鎮江暨秣陵關以次復北渡江復
揚州儀徵而九洑洲號當賊衝并復之分軍以守然後南返築長濠江

留積功授廣西提督歷移湖南江南世襲騎都尉既又襲三等輕車都尉尋改二等

賞穿黃馬褂換雙眼花翎加太子少保并以平鍾山賊壘礮斷中指賜御用藥散

恩數頓繁不可殫述而

詔書慰勉有勇猛之中加以謹慎訓辭旃擊藹然家人父子忠武感激圖報故雖怕良保故等夷如提督和春爲欽差大臣來繼向榮無幾微見於色識者多之忠武自少時志拯民困故軍行所至一無侵犯民爭依焉長濠之役凡直墳墓輒令移瘞他所有碣者仍之否亦各加標記識所由來其用心仁厚如此嚮使功與時會江甯遂下決不至若閒者攘剔爬梳俾埽地赤立宜乎所在父老悲思至今長濠旣成而江甯之圍遂合城賊糧盡困甚幾下者數矣而安徽羣賊遽陷浙會城遣軍往復之未歸而濱江要壘暨旁近郡邑攻守乞援輒遣軍往以故軍雖八萬而遠征旣多居守益少而賊之自浙回竄者與安徽江北諸賊十道並進忠武則急檄援浙張玉良會軍城下冀一鼓下江甯然後逆破羣賊總督何桂清持之或尤忤其功餉不時給忠武知事不可爲抉一齒

界家人歸報曰馬革裹尸亦豈易得他日葬此可也會天大霖雨浹月
不絕賊至和春退軍因之潰忠武方出相戰地聞變搏膺大呼墜馬幾
絕既料餘軍爲民殿且戰且卻至丹陽城下受數創探懷中印付所部
令亟走然後下馬北向再拜曰臣力盡矣而民環萬數號哭請勿死曰
留活吾儕忠武曰苟可措柱吾敢以一死謝責乃檄軍者七請餉者三
皆弗應彼欲死吾久矣然死吾可也使吾死兼負

國與民死且目不瞑言訖策馬望城濠馳下民爭前擁之時方盛漲遂
并沒於中流時十年又三月二十有九日也忠武既死綏而蘇常諸郡
號爲財賦之區者悉覆於賊且延及浙閩一身所繫豈其微哉事

聞朝野大震

贈太子太保諡忠武入祀昭忠祠并立功所在各立專祠而所下

詔書尤極哀痛爲軍興來所未有焉

又贈太子太保江南提督張忠武公事狀程曉

公姓張諱國樑字殿臣廣東花縣人也初名嘉祥弱冠擅材武喜任俠
人語曰拯弱鋤強張嘉祥在橫州江次勒派來往估船州牧以謀叛報
收捕公聞信逸去爲盜官兵往捕輒敗營弁被執者厚遇之時粵西洪

逆已叛招公公罵曰草賊敢辱我乎當滅汝以報

國耳藩司勞公崇光因密招之公欣然反正隸總兵德亮時公部精兵
五千人當事疑之乃散其大半時道光二十九年己酉也後德亮失官
駐公營累年年老思歸公執禮弗衰又出重賞以贖乃改隸向忠武初
未知之與賊累戰累捷常以寡擊眾由湘而鄂而吳靡役不先忠武始
異之倚為軍鋒累功至都司咸豐三年癸丑隨忠武進圍江甯首破城
外賊壘擊斷中指

恩賞御用藥散疊

賜御物升補參將先是賊破江甯擬長驅下蘇州至是始斂迹其復太
平也賊人近萬不虞官軍之至於城外開戲場公領千人猝至入其城
度賊盡奔入乃下令閉城殺賊無一脫者旋以大營有警調回往返僅
七日升福建漳州鎮總兵渡江克復浦口江浦往返不及二旬加提督
銜六年丙辰江西賊下竄連營數百里自江甯城外達石埠橋高資下
蜀街思援鎮江瓜洲鎮江主兵者中丞忠烈公吉爾杭阿瓜洲主兵者
將軍托明阿吉銳志滅賊公督兵合拒賊於高資賊不得逞乃渡江犯
六合公知之率兵往援賊未至六合三十里謀來報溫觀察紹原請行

公飲酒談笑自若。謀又至曰：去城二十里矣。公飲如故。已而報曰：十里矣。公乃擲杯脫靴，帽頭纏黑布一疋，下拖被地，跣其足，手雙刀上馬。目突出，光如炬，鋒乍交，温方率勇擬爲後應，而公已被賊。凱唱而回，又追破賊於江浦。復之江浦，令某來謁，畏罪跪伏甚恭。公手起之，慰曰：君書生焉能當此巨寇？過在我輩。當代乞恩，大帥勿怖也。其謙和近人類如此。公之援六合也，江南之賊覘公不在，迸力戕忠烈。公於高資鎮江大營潰旋，渡江犯長圍瓜洲大營，亦潰。公聞信急過江，赴援不及，賊勢益熾。遂合攻向忠武大營。公方在外禦敵，諸將王浚遽議退避，命人入中軍負忠武以走。公始知之力言退軍，易進軍難浚不聽。眾遂大潰。公不得已爲後殿，復回營焚火藥糧草，乃追及忠武於丹陽。向忠武奏請總統諸軍旬日之間，招集流亡，號令旣施，壁壘一新。旌旗變色，賊至連戰皆大捷。丹陽解圍，向忠武旋薨。權之者總督怡良大營之潰也。怡良公駐營常州城外，發銀數萬兵勇逃至者立與銀一兩。回丹陽否則按律定罪。兵勇畏服公之，立刻成軍。怡良公與有力焉。至是謂公曰：我文臣安知軍事，今一以委公。

皇上命我坐鎮，但主草奏耳。故公得盡力而權不分，欽差幫辦江南軍

務進軍句容而實授欽差大臣江甯將軍和春公至時賊勢方盛欲急
攻公諫不聽已而果敗賴公救得免慚且忌軍氣爲沮而公折節下之
旋克復句容溧水進軍江甯剗平城外賊壘掘長濠困之分軍斷其糧
道賊大挫堅守雖劇賊四眼狗亦憚公威不敢戰七年丁巳克復鎮江
賊勢愈弱升授江南提督八年戊午毫潁捻匪大熾與粵寇合粵寇勢
亦熾賊酋陳玉成李秀成蠶食皖北公議分軍守金陵而往誅之不聽
賊遂陷江浦圍六合儀徵天長揚州皆陷秋九月公督軍來援至萬福
橋無舟以濟河水闊甚眾憚之旣而得小舟公自率數人先登岸爲浮
橋以過軍賊聞公至一日夜狂奔二百里盡棄揚州儀徵公自追奔未
至六合十餘里而城已先陷方議進攻會江南賊乘隙犯長圍溧水復
陷調公回禦卽由儀徵渡江而溧水之賊又遁去以功世襲三等輕車
都尉當是時微公來江北遺民幾盡大約公至一處則一處賊遁而民
獲安他將張其旗猶足威敵而自保時王浚爲翼長大帥信之浚因譖
公而公益自下九年己未大戰江南北他將或不得力未收全功十年
庚申克復九洲洲以萬人守之九洲洲者江南北之咽喉也旣爲我據
賊水泄不通江甯人相食且夕可下而皖北諸賊議救巢穴由閒道襲

陷杭州斷公糧道公議已與總兵張玉良分一人往援大帥派玉良往
賊見官軍旗幟知江甯兵勢已分由廣德甯國徑犯高淳溧水句容前
迫大營公議分兵往禦而精銳多往杭州大帥又畏城賊不聽公往乃
檄玉良回救師至常州總督何桂清留之檄五至不遣玉良亦忠勇善
戰願以名出公下不相能兵勇亦苟安救不至議者謂如公往杭州必
能回救大營保全大局時欠勇糧久公請發餉一戰大帥不許軍心益
懈三月十七日風霆雨雪火器不然外賊與城賊夾攻大營眾大潰公
獨爲後殿難民扶老攜幼隨公自拔者十餘萬人公與大帥議分所向
大帥意丹陽有常州援兵乃自任丹陽而以鎮江屬公公至鎮江布置
精密大帥至丹陽常州援竟不至而賊已逼城下不得已仍乞援於公
公聞命卽率輕兵往馬忽自斃王浚以扇馬贈公試之墮傷時閏三月
二十八日也次日公負傷出隊賊兵四合酣戰未決城中火起大帥遁
去軍大亂公知不濟策馬渡河人馬俱沒於水大帥旋死許墅關王浚
亦死何桂清張玉良棄師走江南數十州縣一月之間悉沒於賊而公
麾下守鎮江者佯言公不死以懼賊賊悉眾來犯忽自反走官軍乘之
大勝俘囚日見人馬無數蔽空而下皆張字旗疑公尙在故也公以閏

三月二十九日戰沒年三十八歲

顯廟以遺屍未得初得奏報猶冀未確尙能復出宣勞數月未忍議卹

八月十七日始

追贈太子太保照提督例從優議卹人祀昭忠祠並建立專祠有若張國樞尙在蘇常一帶何至糜爛至此之

諭子一名蔭清兄弟各一公雖貴不與保舉故不著公性廉祿入皆分戰士家無餘貲沒後勞公崇光督兩廣厚恤之喪乃成禮同治三年甲子金陵克復忠逆李秀成謂葬於尹公橋旁之寶塔下始得其實公文弱如書生雅歌投壺暇則讀書與人言必盡誠待僚屬厚有曾居其上者公後貴執屬員禮益恭過軍之處愛民如子農夫荷耜以觀願事多掣肘恆發憤謂賊平當削髮爲僧又以

聖恩重大誓以身殉嘗患齒痛輒落之寄其子收藏蓋捐軀其素志也大勳告成兩奉

上諭追念勞臣加

恩賜祭公皆與焉

論曰議者多謂公攻江甯浚長濠失算不知楚師克復九江安慶江甯

皆未嘗不浚長濠公之敗以有守兵無應兵又事權不一戮力無人耳
過不在長濠也議者又謂當大帥不發餉時公何不強諫以濟而必謙
讓未遑非策也不知人方忌公甚而公乃必行其志以爲口實事雖濟
其異於鼓眾鬪餉者幾何哉公必不爲也況大帥已敗公猶必奉其令
與之進力又肯自取背上之愆乎議者又謂公出身太早惜不居曾李
麾下與鮑劉諸人爭烈而屈於權貴齎志以沒不知曾李麾下材勇輩
出不少一公而公但依附末光論功行賞轉無以獨享大名而士民之
謳歌勿輟亦必不能如今日之甚天之以挫折爲玉成者非淺鮮也夫

張忠武公行略

蔣敦復

咸豐十年春閏月江南大營潰欽差幫辦軍務總統南北諸軍提督軍
門張公國樑力戰死事聞

天子追念盡臣

綸音哀悼

贈恤有加越三年

今上登極改元同治

兩聖聽政大申黜陟羣盜次第就戮海寓指日蕩平而公之行狀及銘

幽表隧之文未有作者草莽臣蔣敦復伏讀

先皇帝聖諭有云東南半壁倚爲長城尙冀該提督不死出爲國家宣勞又云若張國樑尙在蘇常一帶何至糜爛若此等語感激涕零撫膺浩歎爰詢公之舊部曲將校及粵人之能道公遺事者綴拾成行略一篇身非史官不能作傳謹以俟當事者采而上於

朝公姓張氏初名嘉祥廣東高要人生而長身蘊立材武絕人年十五之粵西貴縣從其叔父賈願心弗喜也喜任俠結客鬥雞走狗跳刀拍張與羣少年游輒以氣懾服儕輩咸兄事之會其黨有爲土豪所困者公怒率眾往劫破其質庫土豪訟名捕弗能得而公之義聲已震爲羣盜所推有眾萬人不妄殺掠人爲之語曰拯弱鋤強張嘉祥前廣西巡撫今制府勞公聞而異之遣大將招撫道光二十九年公單騎受撫於左江鎮尋捧檄勦土匪顏品瑤潘七大李樹青等境內肅清入謁幕府撫部深器重之使執贄從弟子列乃改今名曰國樑字殿臣公由是感激思立奇功答知己逆匪洪秀全事起撫部檄公募勇往剿以二百人破賊數萬於新甯州咸豐二年三月調赴湖南破賊於道州蛇皮嶺克永安州追賊至長沙省城南路新開鋪賊竄湖北復追剿至武昌

省城攻破洪山寺賊壘自新甯州之捷入奏奉

旨賞戴花翎補授守備至是升都司

賞給霍羅琦巴圖魯勇號時洪逆已從九江順流下竊據金陵矣公之立功自力保桂林始後逐賊楚南北直抵江甯省城均與提督向公俱相倚如左右手賊聚太平向帥問諸將孰敢往取賊巢無應者公慨然上馬行所部五百人從之賊眾聞公至大驚棄城走公徐按轡入城市不改肆事畢歸報往返僅七日軍中唱凱歌曰張國樑走馬取太平前後奏捷晉階洊升至福建漳州鎮總兵官率師渡江取浦口及江浦縣城往返亦不及二旬晉提督銜六年五月九華山之師潰吉帥死諸將擁兵觀望大勢幾不支於是向帥奏請以公總統南北諸軍旬日間招集流亡立解金壇之圍

朝廷嘉之始拜欽差幫辦軍務之命嗣此乘勝克復句容鎮江進擣秣陵關馳往江北復揚郡儀徵復渡江圍江甯城外賊營築長濠以困之經畫數年破賊形勢已在掌握而九洑洲正當賊衝亦爲我軍所據先是公平鍾山賊壘被礮擊傷中指蒙

恩賞給御用藥散復句容

賞穿黃馬鞋復鎮江升授湖南提督世襲騎都尉復秣陵關

賞換雙眼花翎調補江南提督復揚州儀徵蒙

恩世襲三等輕車都尉復九洲蒙

恩世襲二等輕車都尉中閒

尙方珍玩

恩賜駱驛異數頻頒

溫綸疊至日者

先帝聖訓勇猛之中加以慎重公自念遠方武臣受任非常詭誦感泣
日夜圖報當是時向帥已積勞薨於軍欽差大臣和春不諳軍旅餉不
時給公功名旣盛忌者益多方沮撓先後屢失事機度賊未易滅誓以
身殉扶一齒畀家人歸報示無還期江甯賊受圍久勢憊甚城垂破者
屢矣爲出柙計乃集各路劇賊思并力一決勝負亡何官軍缺餉已五
閱月士卒洶洶脫巾一呼慮在旦夕以公故猶未忍公不得已躬謁和
帥所長跪告急繼之以泣卒弗許退而念此饑軍終不支亟檄召副統
帥某兵翼相與戮力一鼓下省城禽賊首出萬死不顧一身事或濟副
帥將行留守常郡何制府尼之羽書七往返不至賊聞之急攻官軍官

軍謀於營和帥遁師大潰公聞變搏膺而呼墜馬幾絕立馳自鎮江至丹陽城下與賊戰傷重知不免探懷中印授材官某令走報下馬向隅再拜曰臣力盡矣復上馬大呼望賊營而馳亂流渡河人馬俱沒於水時十年閏三月二十九日也嗚呼公在而東南大局支持八載公歿甫逾月常蘇二郡相繼淪失江南數十州縣十陷八九然則公之一身存亡安危所繫豈淺鮮哉

先帝初得奏報以尸骸未獲數月未忍議卹八月十七日奉

上諭著照提督陣亡例從優賜卹晉贈太子太保入祀昭忠祠其死事及原籍地方並立專祠子孫俟服闋後送部引見頃之禮官議諡忠武制曰可洪惟我

國家勸忠之典逾格優加凡在臣子宜如何報如公之忘身徇義

先帝重惜其死彼全軀保妻子者失其本心奚以戴皇天而履后土也

公年十八作盜魁二十八折節從軍爲

國虎臣三十八而致命遂志平生大小數百十戰無不以其身爲士卒先其用兵也善以少擊眾每出己意作進止率與古法暗合自偏裨擢至大帥所得祿俸悉予戰士未嘗名一錢置一產爲子孫計子一蔭清

尚幼及公之喪至粵制府勞公厚賻之始克成禮嗚呼難矣公之走丹陽也男女老穉遮道乞留與俱守丹陽城小而陋無險可扼公策馬圍視太息曰事不可為矣汝曹速去我暫留各泣拜去公植立城上賊望見之不敢進良久度民盡去城空乃下流離顛沛中猶不忍於民若此求之古名將中不數數觀其他軼事多傳聞不具書懼誣也

書江南總統向張二公事

謝應芝

咸豐十年總統向公榮卒於軍遺疏以內事付和春外事付張國樑皇上震悼諡曰忠武而和春代其職張國樑同理軍務粵賊自三年陷江南又陷鎮江揚州向公以總兵官帥大軍馳至禦賊於涇化鎮蔽障履行陣數戰為軍鋒故制以親臣為將軍統大兵而公疏逃武職輒當巨任蓋稔公忠勤武勇也然公之功尤以識拔張國樑為最山陰周素人從軍江甯大營既而駐常州為余言張公常語其將士曰某起向忠武部下受公訓誨每一捷責輒增益才略得以成就至此某於汝等數擿責而無所增益為何先是賊中有驍將善戰向公謀殺之張公出戰佯敗棄兵器而走賊將追及之禽置馬上挾利刀刺賊將洞胸墜馬死

向公親帥大軍策應擊退羣賊以所乘馬乘張公歸營儲蓐湯手執器飲之自免冠戴公首一軍呼歡張公好裸戰一日渡河擊賊賊大至公毀其橋如淮陰之背水陣裸身奮勇當先軍士無不以一當什賊眾披靡公每戰輒勝賊中望見張字旗即退避公親兵數十人同甘苦以弟兄相呼選其貌類己者以張字旗出戰無不勝時或自臨陣故偃其旗殺賊既多賊見公面辟易驟樹張字旗賊眾大奔向公倚如左右手總督吉爾杭阿失事死賊大至賊嘗四出攻掠爭求救於大營向公無不以兵應之營中兵日減為空營以張勢及是不支向公拔刀將自刎張公急止之曰公死事不濟矣勸公移營丹陽扼要隘賊不能南下然向公以是鬱鬱而卒臨歿奮呼殺賊論者比公於宋之宗留守而比張公為岳忠武云或曰張公之勇既如此向公之知張公又如此胡不舉以自代耶是未知向公之心者也向公嘗語人曰某本戰將材當此大任不克輕身出戰奈何公以和春主兵欲盡張公之材俾得奮身殺賊以報

國也明年張公克復鎮江欲圖江甯蘇州有解餉官至營中公慨然謂之曰人咎某老師糜餉然賊眾我寡能備餉募鄉勇益兵方可集事其

人反至常州以言當事泄泄謂江甯指日可破不以公之言爲然也十年賊窺杭州當事檄公往援并檄公至常州公牽於賊不克至銜之迄公事急遂不救故敗公無餘財金帛悉以犒軍嘗以故衣於常州染肆中復染肆人謂余曰觀其衣想見公長身魁梧真大將也軍中餉缺和春有銀數萬公勸之出以餉軍不聽軍遂潰賊乘變大至公急入亂軍中挾和春退至丹陽而自移營鎮江相犄角潰軍掠丹陽父老執香詣公軍門叩頭請撫公以軍事屬前鋒親信部將急詣丹陽軍始定賊抵丹陽將出戰馬奮躍墜公於地傷股賊眾至軍潰公歿於陣和春走死蘇常相繼陷公餘兵保鎮江出戰猶小捷焉余於山東遇吉林兵將北還詢張公蹤跡言親覩公在丹陽南門十里牌赴水死云

記樂提督死事

方宗誠

咸豐十年七月二日英吉利犯大沽直隸古北口提督樂善死之先是八年僧親王奉

命駐兵大沽以堵禦英吉利法郎西諸夷九年五月大敗夷人於海口夷退聲言必報復是時鄭親王端華怡親王載垣戶部尚書肅順俱以戰守非計雖勝而愈恐陽主戰而陰令直隸總督恆福主撫許夷人由

北塘入議和不設備僧親王亦以馬兵足恃有輕夷心使副都統德興阿駐兵新河以待之德興阿者前統兵江南不救六合致溫觀察紹原於死者也總督舉而用之初僧親王銳意欲固守以公勇悍檄調至大沽公至即以關防交僧親王擇其卒願留者聽願去者亦聽於是願留者千餘人入即閉營門誓死不去至是年六月夷船至由北塘登岸二十六日攻新河次日攻唐兒沽德興阿望風走

朝議屢遣大臣文俊恆祺往議和夷益驕許和以誘我而我兵和戰不決益怯七月二日夷人攻大沽時公守石縫礮臺擊敗之相持一日夷益進而我兵無後繼者礮臺及火藥局火起兵多受傷死公知不可守遂自刎投於河從死者副將守備各一人先是公以德興阿兵潰知夷必來犯請僧親王多發馬隊與之僧親王固留大營不可公死夷人氣張甚總督奉

命勸僧親王棄大沽退至通州海口全失夷人遂入天津至通州犯淀園大京師數月取和而去是役也夷去國越海數萬里入我內地守禦大將數十人惟公死守其地夷人敬之斂其尸歸於天津公治軍紀律嚴整初從勝保勦賊河南當咸豐六七年閒屢著戰功嘗由歸德追賊

至六安解固始圍後以勝保剛復多耆欲不欲隸其麾下旋以母喪回旗遂奉僧親王檄至海口而勝保軍遂不振云

論曰吾客保定適見夷人內侵及京師震驚

乘輿得力戰死者樂提軍及其麾下二人而已又聞夷入通州西倉監督貴倫玉潤自經死犯淀園內務府大臣文豐投水死員外郎泰清全家自焚死是皆可謂不辱臣節者因附著之

周天受傳

安徽通志

周天受字百祿四川新都人由把總於咸豐元年從向榮征廣西轉戰湖南湖北江南洊擢都司四年從鄧紹良剿賊太平甯國帶兵赴徽州會合江長貴援剿賊於青石嶺追至青陽城下移營琉璃嶺賊來撲營大敗之尋調防石埭敗賊於崇覺寺五年在琉璃嶺巖鎮等處打仗功列頭等肅清徽州克復婺源休甯石埭等城規紫崇覺寺六年剿賊祁門追至涇縣南陵轉戰數月皆有功江西賊竄徽州休甯黟縣天受由南陵馳援解徽州之圍復休甯黟縣時涇縣復陷天受星夜回剿克復涇城因先登受頭等傷七年正月調回徽防二月賊復犯祁門婺源石埭太平均剿敗之一律肅清仍駐防石埭敗賊於崇覺寺七都一帶

進攻陵陽鎮獲勝復竄黟縣祁門天受會同江長貴援剿均收復八年正月進攻南陵禽斬頗多時天受已累擢至福建漳州鎮總兵加提督銜

命幫辦浙江軍務總統諸軍轉戰浙閩尋因婺源失陷天受統師回剿力拔堅城擢湖南提督九年攻祁門克之援甯國擊退涇縣距賊解南陵圍再復婺源

命督辦甯國軍事十年三月江南大營失利賊匪分竄徽池天受援歙縣戰叢山關等處斃賊頗多賊竄撲甯國府城天受鏖戰數月糧梗援絕八月十二日城陷力戰陣亡

諭照提督例賜卹於甯國府城建立專祠其胞弟周天培上年江北殉節周天孚本年金壇殉節亦係堅守孤城力竭不屈一門忠烈大節凜然著於四川省城及本縣建周天受兄弟三人祠宇尋

賜卹如例

贈太子太保銜世襲騎都尉兼一雲騎尉

伊壯愍公事略

吳棠

咸豐己未冬余權篆彭城下車之日徐宿士民數百呈請伊都護復出

勦賊詞旨危激儼如望歲余思箕畢殊情歡心難洽都護得民迺遽至此卽爲剴切詳請至再至三然事與心違議竟寢嗣是謁君見君狀貌修偉目光炯炯逼人論天下事深中痼弊其大端尤以愛民爲第一義實心折焉因得悉生平君姓何圖哩氏原名伊清阿字松坪吉林正白旗人也少孤家貧饒勇力以打牲爲業年十七補旗甲從征回逆張格爾凱旋補驍騎校有回民馬二橫行鄉里多不法一日馬掠婦人途遇君君素任俠直前呵斥馬憤鬪君掠殺之被議入獄長官廉得其情置不論會選侍衛君入京充羽林從獵射虎

召對諭以原名不合清語改名伊興額旋擢三等侍衛

乾清門行走君暇與燕京賢士大夫游折節爲學兼工書畫道光二十一年英夷逆命君從軍兩浙和議成旋京旣與當道齟齬乞病歸閒居七年咸豐二年粵西盜起武昌金陵不守徵兵吉林君感國家厚恩又憫中原多故慨請從軍時大軍駐維揚賊另股竄江浦琦帥授君偏師討江浦賊君至示弱不戰賊益驕君夜厲兵薄賊斫營入斬殺過當沿江賊壘悉平事聞擢二等侍衛又以功擢頭等侍衛賊圍和州甚急皖軍遠在廬郡莫能救君議赴援或謂無帥命不宜輕舉斥

曰均是王土敢分畛域耶悉軍進擊賊敗圍解君駐江浦三年賊不犯
六年擒匪圍宿州君由江浦率千騎援宿四戰四捷圍解賊奔潁上是
君駐師徐宿之始時潁亳蒙宿捻匪蜂起每股數萬窮肆焚掠民不聊
生君至擇要築營徐宿數百里得安耕穫屢豐年感人是以深也其戰
功最奇者是年冬賊首王廣愛梁振貴聚匪張七家樓眾數萬議北竄
君聞報曰賊眾我寡宜乘初集急擊之時君騎調赴維揚七百祇存二
百餘騎配得步勇二千君選精兵銜枚疾馳掩入賊壘立獲王梁二逆
餘賊來救君率騎持鳥鎗橫突賊陣賊匪遁事聞旋授正紅旗蒙古副
都統七年夏賊酋李月由三河尖北竄李素慄悍善鬪君堅守不與戰
第斷其掠糧之路先是君每敗賊賊中婦女悉不究問故賊避君而眷
屬不避也李黨陳保元事母最孝君稔知陳母居里招至營使諭陳降
陳猶疑懼君卽單騎往受五千人降陳感泣願效死李月勢孤宵遁君
追至大陳集獲之餘賊平計十日而巨寇殲焉事聞
賜額圖渾巴圖魯勇號餘績如破龍山燕家坊等賊圩解潁州蒙城圍
不勝枚舉賊中相戒不與伊都護遇爾時澮北悉定八年賊首劉添祥
等由六安北竄眾數萬君以孤軍無援少挫退屯蕭縣賊不敢逼會豐

邑陷君被議削職賊遂竄入山東蹂躪徐宿殆徧九年春君復起賊竄
豫疆君率騎千三百援豫至商水與賊遇賊數倍我列車陣以拒君分
兵繞賊後賊拒前則後擊拒後則前擊賊殊死鬪鏖戰閉賊忽呼曰伊
都護兵至矣蓋始不知爲君也賊遂潰公謂諸將曰子廢斥半載賊眾
至數十萬披猖極矣如天之福幸戰勝當痛勦以振軍威於是窮追三
晝夜歷沈邱項城至太和縣境殺賊二萬餘諸賊聞風薙髮逃散巨魁
趙湛然等議投誠受降有日矣然君之戰商水也總兵邱聯恩同日在
舞陽戰歿時豫境徧賊而舞陽去商水二百里及君戰勝舞陽賊亦遁
營事以聯恩故劾君又解兵柄距君復起三月耳自此賊益肆擾掠無
間日君以蒿目時艱積勞成疾咸豐十年夏乞休罷歸抵京師適英夷
北犯留京助守和議成偕邱南征奏請君隨

賜六品頂戴旋

賜三品頂戴

敕辦徐宿團練初君充羽林時最嗜孟子每藏卷摩撫折其四角十年
十一月君自濟甯南下道經鄒縣謁孟子廟並呼諸將羅拜曰予平生
服膺彼丈夫也我丈夫也數語朗誦一過便可啟發志氣十二月朔君

抵徐時余任徐州道相見謂予曰今日兵單餉絀賊勢鴟張大非昔比
子滿洲世僕受

恩深重惟有勉竭心力以濟時艱或人定勝天耳君舊部曲或歿或遷
多不隸麾下所將五百騎未經戰陣增募騎勇尙需訓練君意俟僧邸
軍至厚積勁旅且撫且詢賊聞君來亦有議納款者使天假之年以君
威望素著從容籌辦亂詎難戡哉乃賊竄曹單東境近接畿輔北路爲
重十一年二月一日與徐州滕鎮統騎二千裹五日糧北援初七日追
賊至東平我軍雖饑困戰猶迭勝賊另股擾我後軍稍卻滕鎮前督師
馬顯及滕鎮名家勝亦君舊部曲屢立戰功者君聞滕鎮被圍疾揮百
餘騎冲入賊中屢索不得突圍復出從騎潰隨者十餘人耳賊麇聚復
圍君數日君往來衝突斬殺無算矢盡力窮竟戰歿焉徐宿紳民招魂
野祭不期而會者數萬人相向而哭淚血模糊每道及君雖婦孺亦吞
聲君與士卒共甘苦而軍律最嚴有取民閒一芥者斬故民尤感焉
天子篤念勳勤復君原官

敕部議卹

諭允在江東皖豫建立專祠以妥忠魂旋奉

特旨賜諡壯愍。噫君之志未終，君之名萬古矣。盜賊充斥，瘡痍滿目，孰是繼君而起者？歧子望之。

又伊松坪都護事略 宗稷辰

咸豐十一年二月，皖捻分道犯山東，副都統伊公與徐州鎮滕公家勝統兵擊之於汶上，東平連日殺賊甚眾，益猛進。初八日至臥虎山，風霧忽作，急勒兵退至楊柳集，伏起被困，皆力戰以死。僧帥悔趣戰，急喪良將，大慟事聞。

上悼卹，復其官。南自徐宿西至汝濰北至秦沂濟吏士軍庶皆痛惜之。公姓和特努，特氏初名英升額。

宣廟命改名伊興額，字松坪，蒙古正白旗人也。舊居吉林松花江南，狀貌修偉，少日侷儻，好射獵，以能殺虎稱於時。從征回疆，屢拔偏校，以勇

幹選三音哈 譯為好漢子 為

乾清門侍衛，遂隸滿洲道。光中海疆有事，從揚威將軍出征，師中輟而還，鬱鬱不自得。數年以疾辭職歸吉林，仍射生山積，閒將以韜晦終焉。迨咸豐初，粵寇入楚，擾江南，公奮然起，請自備資糧率所部隨剿。朝命壯其請，許往以一族駐江浦，時逆眾連陷巢縣和州，含山踐我營。

壘欲由烏江北犯公率二百騎迎擊於石磯橋大破之尋獲勝於柳樹壩進擢二等侍衛某年破江上九洲功最遷頭等侍衛尋調赴河南軍復留勦宿州捻寇奔馳三省之間數載以濉溪口殺賊功加副都統銜七年偵知捻首李月兒約范宗陵謀北竄迅擊之於張家七樓斬宗陵月兒遁往永城東南王家渦子築圩屯聚十萬公逼攻三晝夜賊幾遁有謀告者督騎間道出賊後禽月兒其旗屬陳保元王有功畏服先後來降解散甚眾

特賞額圖渾巴圖魯授正紅旗蒙古副都統八年正月駐軍臨渙近賊圩夜密捕長髮者予賞賊不敢侵及移營丁辰集小黃旗黠賊謀劫公集北集南屢移不得所在乃出奇兵攻薛家湖賊巢公腰受鉛子傷血流滿鞞忍痛力戰破其圩奏入

賜頭品頂戴未幾因豐縣失守奪職然濉口拒劉家祥單騎救民數萬渡濉水頌聲載途豫境更倚以爲重及商水破五旗大捷

上嘉其忠勇由幫辦三省勦匪事宜並開復原官督辦河南全省軍務方謂旦夕將大用而飛語中傷尋解兵柄公卽謝病回徐城徐宿士民以公去賊熾叩

開請還鎮濰溪

密詔令公強起固以篤疾辭致有革職回旗之

命即日就道抵京聞住僧耶保薦

賞六品頂戴從其軍甫出都徐宿人請公鎮徐者奔愬不已

上聞之加三品頂戴

救辦徐宿民團事務到徐之日父老婦孺喜相告曰我大人真來矣居

亡何奉帥令援勦東境會滕公軍至東平進兵太驟遂及於難嗚呼豈

非天哉

上既予優卹兼

允徐宿永城汶上等處皆爲建祠濟甯州民亦欲祠公有夢公已爲城

隍神者精忠至誠天人咸格而卒莫挽於命數是理之不可解者也公

用兵神速純以心運動合古法紀律明肅不營私利信賞必罰得士卒

心取民間一秉稗束藟卽斬以徇雖烈風驟雨無敢入民居民愛戴之

如父母故所至民悅所去民思其戰伐如在渦河一旬平七圩在桃園

一日破十二營在新修河一夕破流沂幅匪萬計名蹟不勝書性儉樸

無他嗜暇親書史好爲擘窠大字惟過剛忤物恃勇罕退致不免於胥

災生於嘉慶十二年二月二十四日年僅五十有遇昔唐韋顛博采武
臣殺勇忠廉載之別錄稷辰竊取其意聞公勇義冠時未盡其用以衛
民生慘死疆場深為天下惜爰略記其行事志勿誼焉

饒莊勇公別傳

饒公廷選字枚臣閩縣人少涉書史侗儻多大略未冠入伍道光十
一年張丙反臺灣以千總隨將軍瑚松額東渡提督馬濟勝號知兵嘉公
材致之麾下獲賊多

賞戴藍翎十四年遷守備十五年嘉義沈知等煽亂總督鍾祥以公習
臺事檄之往事平

賞換花翎歷權各營游擊所至兵樂而民安之總督吳文節文鎔以曉
暢軍事疏薦二十一年七月海上事起公統精兵七百馳扼海澄二十
四年三月總督劉韻珂檄赴馬巷禽匪徒陳鈕等是時水師提督寶振
彪治水軍有聲公以陸路營將隨之出洋首先擊賊船禽其魁寶公壯
之二十五年擢都司二十八年擢漳州左營游擊咸豐二年調署中營
游擊漳俗勁悍一言不相下則聚族而鬪訟之官必互誣其鄉之最富
者為首官提兵下則焚村以示威必各飽所欲而後息良懦者苦之而

文武兵役及其鄉之莠民則無所不利公嚴戢所部親入鄉召父老反
覆曉以利害使縛獻真犯置諸法株連者前雪之守令感公誠無異議
故漳民之戴公也如慈父母焉三年三月詔安械鬪官治之不服勢張
甚總兵曹三祝以公及龍溪令趙印川得兵民心使往是時潮州小刀
會轉相誘結淫漳境窺公之出也潛伏城市中四月初十日倉卒起
鎮道皆遇害所部卒郭連城護公眷屬出公聞變疾馳歸已而偵知會
匪羽翼徧諸鄉良善者亦爲所脅乃獨攜健卒葉騰蛟等閒道趨郡城
半途賊聞而蹤跡之有大姓某於眾中目公指謂羣賊曰此吾讐也無
與諸君事吾將甘心焉遂翼公至其家再拜賀曰吾知公公再生吾等
亦再生今郡城已陷公獨身歸死何益請爲公號召良民之脅從者脅
從者聞公在必反正城中宜有應者賊不足平矣俄頃集千餘人公帥
以行賊不敢逼始賊之陷漳城也與城中百姓約無相害百姓隱忍安
之以待公至已而訛傳公及趙公爲賊所得驚走相告向賊索二公賊
力自無之眾憤曰是必旣殺之而誑我也詎且鬪洵不可遏賊遂遁
十七日公以鄉團至援賊復大集圍漳城數日公嬰城固守時時出奇
勝之大小數十戰賊乃潰總督王懿德檄公護漳州鎮總兵外勦內撫

期年悉平四年三月擢貴州安義鎮總兵旋護福建陸路提督五年三月粵逆陷廣信浙江危甚王懿德檄公馳扼衢州適甯紹台道羅忠節澤南以楚軍復廣信賊知三衢之有備也從徽州道浙境以安六年逆酋楊輔清圖踞廣信以窺江浙率數萬人繇吉安出永豐倍道行陷廣昌南豐新城瀘溪等縣疾若風雨無敢當之者當是時江西學政廉兆綸督廣饒防務委樂平紳士石景芬統三營駐貴溪聞瀘溪陷景芬提左右二營迎之於金溪賊緣山出耳口寨八月初四日襲貴溪中營郭守謙以數百人誓死血戰沒景芬回援初五日潰於弋陽時廣信守兵數百聞風皆潰署知府沈文肅葆楨從廉兆綸籌餉於河口初六日單騎歸城無居人懸重賞募士無應者惟與厥配林夫人枯坐待盡而已公時在玉山得告急書慨然趣治裝曰賊得廣信則玉山不可守是無江浙也東南大局視此一舉願諸君努力眾曰唯然夫役盡逃礮械鉛藥居後則無以爲戰從水路又舟膠不能下初七日賊謀入廣信城漏二下舉火爲號連蕞累棟光燭數十里達且大雨如注火始滅初九日雨益甚山水驟發河流漲丈餘公額手慶曰天贊我也師遂下前隊頃刻達沙溪去郡城五十里初十日公至方人館忽城中鼎沸公躍馬出

有負裝且呼且走過馬前者立斬之眾然後定城中惟倉有餘米油鹽
薪蔬闕如也卒或至暮不得爲炊無譁者是日賊軍城西四十里之太
平橋十一日厥明互北山賊幟如林前者按隊後者立營部伍整齊望
而知爲劇賊始謀之入廣信也以空城歸報賊喜不以爲慮故避雨於
河口興安凡二日及逼城乃大驚以爲將軍從天下也盡殺前謀之言
空城者而氣已沮矣公所部僅千餘人背城擊賊輒勝鄉民聞郡中有
兵喜爭擔負冒險入犒軍十三日賊大至長圍合接濟斷巨礮環轟子
下城中如雨隨營文員懼脅諸將請於公曰吾屬奉檄守浙境廣信存
亡非吾事也今賊將以地道轟城兵少不能支城且暮破將死之乎且
使廣信幸存賊以全力東趨兩浙瓦解誰職其咎宜潛師夜出退保浙
境避則無及矣公部將守備畢定邦賴高翔怒曰君等怯何如勿來今
我在城中賊不知我虛實以爲我能援廣信後路必有所恃彼舍廣信
趨浙江恐前後受敵必不敢出此若棄城遁我在虜目中一一可數情
見勢屈追殲立盡尙何浙境之可保耶明日當決一死戰諸君於城上
觀我破賊十五日定邦高翔開城出大呼決戰自晨至日昃毀其長圍
軍聲大振是夜守令欲求觴酒豆肉爲公慶中秋不可得並巡城鐙燭

無之時月明如晝星河斂耀倚堞望賊壘悄然無聲公命去刁斗與沈公淪茗清談飄飄然作廣寒宮闕之想不知身在孤城中也十六日我師壓賊營賊不敢出次日賊遁事聞

賜號西林巴圖魯閩浙大吏素不憚於廣饒督防者疊以嚴檄召公歸詬諱備至旁觀咸爲不平公晏然俟接防兵到乃行曰吾不得不爲國家疆土百姓性命屈也七年六月調補衢嚴鎮總兵八月會同徽師復婺源八年逆酋石達開以撫建賊五十餘萬傾巢出公從玉山飭參將胡定國援廣豐而自統所部馳歸衢州公至而賊亦至賊乘驟雨盡毀護城營壁以地道撼城城圯者三卒以堅禦得完凡九十餘晝夜目不交睫浙江巡撫晏端書以公失所屬三縣又未能速解衢圍疏請奪職疏出而圍解江常開三邑亦次第復奉

旨開復原官旋授贛南鎮總兵會閩浙總督王懿德檄公赴汀州病甚未能進遽劾公奪職然

顯皇帝知公忠爲留贛南鎮缺九年正月病痊勦平白沙溪口土匪奉旨仍補贛南鎮兵部侍郎曾文正國藩奏調赴江代沈公葆楨防廣信從民望也已而楊輔清踞景德鎮公率平江等營扼之於浮梁十年逆

丙李秀成陷浙江公繇江援浙四月復淳安奉

旨節制在防各軍五月授浙江提督杭州復後賊又來攻會同將軍忠壯公瑞昌巡撫王壯愍有齡擊卻之並復餘杭十一年九月進剿諸暨王公以省城危急飛咨回援二十九日至杭州時郡邑皆淪於賊數百里內無援師鄉民相率入城填塞閭巷糧爲之竭公舊部僅漳勇數百並江右所接統楚軍二千餘則他帥就地收集金陵潰卒事急以付公者又皆飢不任戰困守七十餘日米粟盡宰牛馬牛馬盡掘草根剝樹皮公惟以忠義涕泣激厲之至飢踏載途無叛者十一月二十八日城陷巷戰手刃數賊死之年五十有八公性不嗜殺有以威克厥愛規公者公曰有罪不敢赦至於非其力之所及故殺之以示威吾不忍也善知人如畢定邦賴高翔皆拔諸儕伍之中並以戰功顯旣而畢賴改隸他軍不竟其用以殞而公亦有思用趙人之歎矣

贈太子少保

子謚莊勇

賜祭葬世襲如例入祀昭忠祠並於廣信府建立專祠以副將畢定邦游擊賴高翔附焉長子塋襲職次子新同治三年舉人三子霖幼四子

欽甫三歲殉公難於杭城

贊曰沈文肅之守廣信也城空援絕誓身殉而已得公投袂赴援江浙並受其福當是時公義聲震天下文肅亦用此發聞於時而閩浙諸大吏爭警警公且下石焉烏虜獨何心哉余嘗晤公建昌握手談天下事甚快公殉浙難屢擬爲公傳不果得文肅所爲公狀急錄而存之而文肅亦不可作矣悲夫

忠壯公瑞昌傳

陳繼聰

瑞昌公字雲閣滿洲鑲黃旗人咸豐四年粵賊北犯公以副都統從僧忠親王率所部戰高唐連鎮間所嚮多捷及逆渠李開方就俘論功上授公杭州將軍七年冬抵任適賊屢出沒徽州甯國浙境戒嚴公益操練士伍不閒寒暑十年二月逆酋李秀成由廣德竄犯杭州巡撫羅壯節斂兵入城賊遂攻圍北門人心洶懼公知賊無後繼斷難持久分旗守駐防子城二十七日賊從清波門地道入文武將吏或死或走惟駐防城如故賊悉力攻之公率副都統來存協領傑純舉礮擊斃賊無算又聞提督張玉良自江南大營來救已在湖州公乃募人突圍出請援兵有杭州人王元者牧馬旗營應募齋書從水竇出直造張提督

營提督閱書云爾滿營數里地恐旦夕不保我將蜀軍無多往亦不濟
元曰賊皆烏合雖多不能戰俟其未定擊之可大克省城復軍門勳名
冠世矣提督領之飲以酒元曰瑞將軍望救如渴我食奚以下咽哉且
奉命來乞師而不得萬一滿營不保元何顏生於人世遂大哭聲徹於
外提督感其誠復偵知駐防城堅守狀於是麾其軍行三月二日前鋒
抵艮山門踰城而入時公因援旅不至與賊約決戰於錢塘門之校場
賊悉精銳列陣以待公命來都統傑協領督騎衝之滿人婦女皆韉執
旗助戰鼓聲震天自辰自午馬隊馳突數次賊陣動又望見外城上插
張字旗疑爲總統張國樑救至大驚滿軍乘之賊遂敗而棄省城以走
公告捷於朝

上嘉歎晉頭品頂戴總統浙江軍務是月巡撫王壯愨自蘇州至公與
之繕城郭籌善後復以錢塘湧金清波三門皆瀕西湖募練水軍以壯
聲勢已而金陵大營潰賊陷蘇常踞嘉興分黨進逼下游逆氛日棘浙
省皆係客將潰兵驕而怯戰所過騷擾閭里公知事不可爲憤懣發病
時時閤中臥不復能治軍事矣明年金華嚴州相繼失守九月賊由富
陽餘杭直犯杭州眾數十萬合以重圍外援皆不得入十一月二十八

國豈不烈哉

果毅公傑純傳

陳繼聰

傑純公蒙古鑲白旗人官杭州駐防協領洞曉戎律深得士心歷任將軍皆倚重之咸豐十年春省城陷巡撫羅公縊死將軍瑞忠壯公亦欲自剄公與副都統來存言賊以偏師入犯必無後繼可力守駐防城以待外援忠壯乃止命公同來都統督軍登陴公身先甲士露宿壁壘閒巡警最嚴賊挑悍者來攻公率旗兵力戰滿城婦女亦捻矛刺賊賊憤甚屢攻死傷枕藉終不能克乃欲掘地道王家蕩埋火藥以轟城適六品軍功錢塘人李德昌偵知之遣軍功傅聚松潛至延齡門投書告將軍將軍使公豫防地道之賊斬其先入者數人擲首級營門外賊益喪膽會提督張玉良救至公遂怒馬突出闔營從之與外兵夾擊賊披靡遁去事平敘功擢甯夏副都統旋改乍浦仍留佐瑞公軍明年九月賊大至城中主客兵勇尚數萬人巡撫王壯愨議主堅壁以守賊遂合圍絕我餉道時公率部下及所募土勇列礮船結水營湧金錢塘兩門外用勇目王應棠計分防西湖節節設卡賊眾雖盛不能驟逼城下沿南山來者公出師禦之頻有斬獲已而兵士皆困於饑公殺一馬一牛則

鬻分之必徧得豆一斗翁分之必徧故士感激無叛志相持月餘賊已掠得小舟日與水軍戰於六橋上下一夕賊據湖心亭礮船往爭之不得水營遂潰應棠爲賊所殺十一月杭州再破進陷滿城公巷戰死之子婦鈕祜祿氏赫舍哩氏孫崇綸崇勳再勝女孫庚姑辰姑僕洪邦興僕婦王氏吳氏楊氏婢增祿桂香等十三人皆舉火自焚同日殉焉而德昌聚松督理鄉團至是亦與勇自俞廷鳳死於難公顏面美髯儀觀甚偉平時能弈棋詠詩自許儒將及臨陣挽鬚持大刀策騎馳突奮不返顧杭人無不壯之長子訥蘇鏗先戰死公收其尸具棺殮之笑曰汝先得所歸矣次子城破逸出回京呈闔門死事狀得

旨優卹

子諡果毅

論曰平浙紀略言辛酉賊再犯杭州將軍瑞公已病甚傑果毅公屢欲出戰副都統關福堅持不發兵蓋都統亦與王巡撫主守之意同也若使當事能從公言合滿漢之軍士令公督之背城一戰人知必死城圍或可立解惜乎以公忠勇徒領水軍一隊防守西湖雖能出師輒捷究亦小挫賊鋒卒至糧絕兵散公旣殉以全家而巡撫與都統亦罹於難

豈不哀哉

陳威肅公別傳 李元度

陳公大富字餘庵武陵人起行伍道光三十年以外委從提督向公榮出師廣西戰永安解桂林圍回援長沙追賊武昌轉戰金陵常為軍鋒游擢常德協都司

賜孔雀翎咸豐七年從浙江提督鄧公紹良復甯國屬之灣址黃池晉游擊尋援浙江勦賊金華處州除參將賊竄石埭太平皆擊走之又從復涇縣拔南陵擢副將八年十一月灣址師潰鄧公死之公左次南陵明年夏四月賊犯南陵力禦之賊百計環攻不得逞十年三月圍始解計苦守經年矣

顯廟嘉其績除皖南鎮總兵五月偽侍王李世賢圍甯國分黨攻金壇及南陵當是時湖南提督周公天受守甯國高州總兵蕭公知音參將周公天孚等守金壇公仍守南陵賊眾數十萬我軍勢不敵日夜血戰各死守待援七月十八日金壇陷賊屠其城周公天受見事不可為乃盡出甯城中兵民數萬人令各逃生獨誓以身殉甯民扶老攜幼走南陵投公公開門納之八月十二日甯國陷周公死之賊圍南陵益急城

中食且盡餓殍相屬公自分死矣以忠義激厲軍民皆誓弗去夜遣壯士縋城出求援於水師前後數輩爲邏賊所獲最後乃得達時福建提督楊公岳斌統水師而欽差大臣兩江總督曾公方駐祁門亦檄水師援南陵楊公投袂起九月水師次樅陽會大雨揚帆泊魯港聲言攻蕪湖而密部署各營扼要隘且結浮梁以俟十月四日水師驟起登岸出賊不意盡燔港左右賊屯呼聲與江潮聲相亂公方乘城見圍賊爭馳赴魯港眾囂且亂拊髀曰援師至矣乃枵腹出城夾擊憤甚手大旗衝陣十盪十決追殺十餘里與援師會計殲賊萬餘撲水死者無算圍立解是役也賊乘屢勝之勢視南陵掌中物氣驕甚圍攻六閱月竟爲我水陸軍所燬公於是再守南陵矣城中兵僅存皮骨民尤甚草根樹皮食盡雀鼠爲空楊公船粟來哺懼聲雷動公擬繕城垣固守楊公謂形勢不便乃帥師赴上游百姓從者十餘萬屯東流十一年正月公會水師復建德二月李世賢率黨數萬竄景德鎮江西大震乞援師公帥四千人自建德往援賊恨公刺骨知公勇難敵也思以計陷之盡伏悍賊於牛角嶺柳家灣回龍嶺等處距鎮三十里公至湖田不見賊將還賊渠忽率馬步隊繇鎮南雙鳳橋竄至李村誘官軍公帥師迎擊賊不戰

退次日大霧賊分黨潛逾橋伏各營左右日高春霧稍斂公率大隊躍馬直前參將田應科等繼之賊突從鎮東抄出師稍卻伏賊盡起公挺矛力禦礮洞左乳血如注仍裹創決戰賊從間道襲焚我營應科及游擊蕭傳科胡占鼇都司胡鳳雛熊定邦吳定魁千總羅廷材等皆戰死公見營中火起下馬北向叩首曰臣力竭矣投李村河而死

詔贈提督

賜卹如典例

賞騎都尉兼一雲騎尉

子諡威肅南陵建專祠應科鳳凰廳人

贈副將

子諡果毅傳科占鼇與應科同里定魁字玉堂長沙人鳳雛等佚其里籍各照本階加等議卹並祀南陵專祠

贊曰軍興楚人以善戰聞善守者推陳公爲最公守南陵始被困經年繼六閱月賊視前尤眾公以葺爾城當十萬方張之寇羅雀掘鼠忍死待援卒以此名聞天下方事之殷自謂無生理矣乃不死於南陵卒死景德鎮烏虜求其故而不得者命矣夫

石剛介滕武烈熊勤勇公別傳

李元度

石公玉龍鳳凰廳人充道標練勇道光中從征崇陽亂民鍾人傑及乾州逆苗石觀保新甯匪首李沅發所至有功

賜戴藍翎補外委咸豐元年隨提督向公榮解桂林圍遷把總尋繇長沙追賊至湖北敗諸洪山塔抵江南敗諸七甕橋進攻高瀆公皆爲前鋒俘賊不可殫數擢千總四年金陵賊自仙鶴門出竄高資下蜀街公身先陷陣擊走之又同膊賊於黃池擢守備移攻蕪湖五年五月克之晉都司六年十二月從大軍克甯國城敗援賊逐北數十里公手刃數十賊晉游擊當是時領涇防者爲總兵秦如虎以憂歸浙江提督鄧公紹良最重公言於浙撫晏公端書會疏請以公代詔許之以游擊充統將異數也公感知遇戰益力明年補建昌營游擊五月克復灣址及黃池又復南陵破賊於三里店除參將賜孔雀翎九年三月敗賊萬級嶺追勦至卓村斬賊目十餘人詔以副將用十月僞忠王李秀成大舉犯涇防眾十數倍公迎擊藍山嶺敗之手奪大旗而賊至益眾公擲旗怒馬突陣殺數十人賊圍之數重身受十餘創力竭死之事聞

詔贈總兵加提督銜

賜卹

賜祠

子諡剛介無子以弟子某襲世職

滕公家勝字謹亭乾州廳人起家鎮溪營戰兵咸豐二年出師廣西追賊至湖南北轉戰及江甯提督向公榮壁紫金山六戰皆捷公並從又從克高淳太平及上方橋秣陵關所向有功歷繇哨官充統將尋渡江進勦鳳陽臨淮等處收復郡縣以十數敢戰出諸將右在軍中十年游保總兵加提督銜

賞換孔雀翎

賜號濟特固伊巴圖魯九年奉

詔援勦淮徐隸欽差大臣袁公甲三戲下時淮北河南莠民稔亂曰擒匪公屢戰皆捷袁公特疏薦

詔授川北鎮總兵尋以擒匪披猖留軍未赴任是年十二月有

旨調徐州鎮明年正月抵任二月擒匪犯山東當是時科爾沁親王僧格林沁公帥蒙古兵勦賊都統伊興額公爲翼長嵐重公威名檄赴山

東堵勦公投袂起與伊公大破賊於東平州汶上縣殲賊盈千追擊二十餘里將旋師忽援賊大至寡眾不敵歸路斷公駐馬謂伊公曰男兒死耳當各努力多殺一賊卽爲天下除一害也伊公曰然併力決盪當者輒死手刃數十人親卒喪且盡力竭並死之王以狀聞

文宗震悼

贈提督

賜祭葬

予諡武烈

賞騎都尉兼一雲騎尉世職未幾當事疏稱公與伊公轉戰徐宿間忠勇有紀律深得民心請於死事地方合建專祠

制曰可

熊公天喜永綏廳人起軍校咸豐元年出師廣西敗賊於慶遠授鎮筸把總二年二月賊犯桂林力戰解其圍賊遂繇全州涉黃沙河衝永戒嚴南撫駱公檄防郴永八月長沙被圍公率隊來援十月十九日賊遁公追賊至湖北十一月燬洪山賊壘二十有八三年敗賊於九江擢永順協千總四年敗賊於廬州擢長沙協守備時賊踞廬久城以外屯壁

相望公深入決死戰時有斬馘五年三月攻得勝門燬賊十餘營右額
傷大帥嘉其勇奏授都司八月援柘皋

賜戴花翎十月廬州復公首登城晉游擊

賜號拔勇巴圖魯六年八月克三河鎮補岳州參將七年五月克句容
遷副將十月移師鎮江復其城

詔記名以總兵用會壽春鎮闕員得

旨命在軍署理未幾卽真帥師勦東路十年正月敗賊於湖州及下關
七里洲時杭州陷公帥師赴援復其城以次徇西安長興皆復三月回
常州駐丹陽閏月江甯賊悉黨來犯眾十餘萬公與湖北提督王公俊
力禦之相持一晝夜所殺傷相當然我軍止二千人賊至如燧王公力
竭落馬公力救之縱橫血戰賊當者輒靡而眾寡懸殊左右馳突莫能
出遂遇害時二十九日也狀聞得

旨贈提督

賜祭葬及世職入祀昭忠祠

予諡勤勇

贊曰古稱山西出將湖以南不與焉自嘉慶初苗匪底定奏設三廳鎮

算始成重鎮提刑傅公又舉屯政練屯兵七十年來鎮屯兵稱勁旅將才往往出焉三公之所成就卓卓如是地固益以人重哉予嘗周歷五

算見叢山刺天溪流箭激風氣特剛勁殆不後北方之強云

陳作霖

公諱家勝湖南乾州廳人也有勇略初爲鎮算鎮兵隸游擊傅振邦麾下咸豐二年粵寇圍長沙總兵鄧紹良率眾入援公以敢戰知名爲隊長三年隨大軍下江南戰屢有功五年淮北盜起侍衛伊興阿奉詔勦撫檄公爲前部往來徐宿間每戰輒先練壯士五百人爲親兵臨敵時公執旗前引令五百人沿途伏廬留數十人誘賊賊易其少輒墮伏中然性喜深入主帥屢戒之不能改也嘗獨追賊至靈璧傷還八年總兵傅振邦駐徐州公舊帥也復徙隸之時公已洊保至總兵記名提督矣蒙毫間有畢家圍者羣盜出沒之所盜魁韓狼子等咸在公攻之急羣盜求救於張澧張澧者據鳳陽之賊屢以乞降陷官軍者也其妻曰柳三娘嘗往來軍幕間澧詭請於勝帥曰畢家圍諸豪聞官保威名欲降久矣而傅營攻之急恐阻其自新之路請諭止之勝帥重違其意飛檄往傅公欲從之公憤然曰請賊兇狡未經大創何所畏而乞降若

舍之是養虎貽害非良計也擊之便傅公然其言限三日公親冒矢石
二日克之誅狼子等當是時皖北略定惟鳳陽未下傅公欲會勦勝帥
不可傅公遣公屯張家溝以逼之漴縱黨四掠公斬其游騎勝帥禁之
不止自是漴眾不敢東出泗州人倚爲保障多運米麥以饋軍故度支
雖絀而公營有贏糧焉十年勝帥以憂去左都御史袁甲三代之檄公
會勦漴猶陽乞撫袁公令總兵張得勝誘之出公遇諸途數其罪誅之
遂克鳳陽而還而練總苗沛霖驕橫如故也公欲乘勝勦之會伊帥復
至徐諸寨多殺豪自歸沛霖勢窘甚公遣人諭以禍福沛霖欲降而未
果十一年山東寇熾公隨伊帥還救賊遮道公破走之明日又戰於東
平之臥虎岡被圍不得脫死之伊帥聞而馳救亦陷陣死皖北民聞之
無不流涕

論曰皖北爲捻逆淵藪自勝帥以招撫爲功諸將雖遇賊不敢擊惟公
滅韓狼誅張漴毅然獨斷有古名將風焉乃或以輕敵訾之則是畏懦
退縮者反得借辭於持重哉

續碑傳集卷六十六

續碑傳集卷六十六

續碑傳集卷六十七

江陰繆荃孫纂錄

忠節十四

蔡東祥傳

湘陰圖志

蔡東祥世業農咸豐四年從水師隸李成謀營積功保千總加守備銜
七年五月營官牌夾賊船上駛成謀遣所部追之會大風舟入湖口為
賊所抄不得出時東祥領長龍戰艦一偃旗偽為賊須臾風止急槳貫
賊陣而出賊覺追之不及是役也失長龍戰艦五舢舨十三將弁死者
二十一人而東祥舟獨完由是知名十一年隨成謀剿賊安慶旋改隸
黃翼升軍攻克池州復銅陵及無為州同治元年隨大軍克金柱關襲
賊東梁山復蕪湖累保副將加總兵銜

賞花翎加雄勇巴圖魯名號是年戰歿嘉善之夏湖口照總兵例
賜卹從祀蘇州及長沙府城昭忠祠東祥勇決有謀其勦賊安慶也時
水師屢挫賊見水師輒爭出我師氣益索東祥請易戰艦白旗為紅旗
成謀從之賊見紅旗疑為援兵方駭愕東祥急率屬馳之賊大敗斬馘
無算軍威由是復振弟渭川亦從水師積功保總兵同治六年卒於軍

陳壯節江壯節蕭壯節三公別傳 李元度

陳公明志字澹如武陵人少入伍充湖南提標戰兵拔外委道光二十

二年出師廣東補把總湖北鍾人傑作亂奉檄征崇陽以功
賞六品翎頂稍遷辰州營千總二十九年李沅發倡亂新甯公進勦有
斬馘功擢桂陽營守備遂署常德協都司明年提督向忠武榮出師廣
西以公爲營將時賊勢陸梁官軍當者輒靡楚兵至連日與賊戰皆捷
而公尤驍勇嘗大呼躍馬陷堅陣手梟賊酋於馬上軍中壯之敘功
賞換花翎咸豐元年春勦賊金田村大黃江公皆在事有功會感瘴癘
得疾楚軍中病者三百有奇欽差大臣李文恭星沅檄公領病軍回營
休養病痊公赴桂陽任三年向公充欽差大臣督辦江南軍務奏調公
赴軍前領乾州鎮遠河溪三營兵與賊轉戰數月四年補永順協都司
五年遷廣西提標游擊帥師勦蕪湖大捷擢廣東雷州營參將六年奉
檄進勦丹陽破賊數十壘斬級數百以功晉副將會官軍進駐紫金山
戰事方殷檄公回大營充總理營務處五月十七日賊大舉來犯公帥
潮雷各營弁兵奮力迎戰殲賊無數血濡袍袴皆赤而賊來益眾公激
厲士卒血戰三晝夜十九日力竭死之年三十有七事聞

詔抵副將例從優

賜卹

敕祀昭忠祠

賞雲騎尉世職

予諡壯節

江公忠信字誠夫新甯人少跡弛不羈饒膽力咸豐二年族兄忠烈公忠源帥楚勇赴廣西助剿公年十六從行以獷悍數犯軍令忠烈將斬以殉眾為乞免及遇賊驍捷敢戰常為軍鋒攻永安州時楚勇壁城南賊悉銳來撲公斬數級以獻敘外委嗣隨忠烈援長沙戰湖北解江西省城圍皆在事有功洊擢千總及忠烈巡撫安徽公乞假歸亡何忠烈被圍廬州其弟忠潛及同知劉長佑募壯士赴援公二然曰此吾立功之會也遂充哨官比至壁平西門外五里墩時廬城中兵單餉絀賊圍之數日聲息不通公夜帥壯士十數人懷白鏹油燭潛越賊營縋而入告以援至因留營中賊屢用地雷轟城城崩數丈公率眾力禦斬悍賊數人城復完又數帥壯士下城攻賊壘斬馘多忠烈壯之奏以守備用賞孔雀翎亡何城陷忠烈死難揮公使速去公不忍忠烈趣之曰若歸

爲我復仇公跳而免時楚勇屯得勝門外七里站賊營羅列我軍與賊相持五年春諸將議逼賊而營公首櫻其鋒晝夜合諸營力戰遂破賊營八禽斬三千有奇敘功晉都司及廬州復再晉游擊

賜號毅勇巴圖魯會江忠濬假歸以所部屬公公遂爲楚勇統領六年五月提督和春帥師克三河鎮公與提督熊天喜攻南路破賊營二以功擢參將及克巢縣遷副將亡何總兵秦定三攻桐成久不下公奉檄帥所部往授時道梗不能通聲息公以計馳抵定三營中定議出奇兵夾擊遂破賊營十有六進逼桐城十六日賊大舉出犯公帥眾迎擊賊敗退追至東門外賊踰濠堅拒公持矛躍馬越重濠而進手殪悍賊數人賊雖鏖雨下中公左腋死之

詔賜副將例從優

賜卹

賜葬祭祀江忠烈專祠

予諡壯節

蕭公翰慶字黼臣清泉人咸豐元年從都司徐大醇勦賊廣西大醇死綏公冒險扶其覩歸三年曾文正治水師於衡州公投效軍中以戰功

淳保千總四年夏進攻岳州賊遁手紅旗報捷文正奇其文雅詢知爲
讀書士改敘從九品從克武昌擢府經歷再擢州判六年改隸彭公玉
麟部下克水師營官同攻武漢晉同知直隸州冬十月武昌克復晉知
府七年從彭公帥水師自外江會攻湖口將戰公察山後炊煙起知有
伏乃潛從山後進擣一鼓殲之遂拔湖口

詔賞孔雀翎八年四月官軍克九江公與副將孫昌凱等登岸截擊北
城逃賊無一漏網者敘功加道銜九年正月僞翼王石達開自江西南
安竄湖南道郴桂圍永州長沙戒嚴鄂撫胡文忠檄公帥礮船援湘四
月朔抵祁陽時沿江皆賊壘公躬入小河乘舢板督戰平之總兵周寬
世及賊戰於長葉嶺公帥礮船夾擊之賊大敗湖南肅清乃回鄂

詔以道員交軍機處記名簡放十年春江甯賊犯杭州浙撫羅公遵殿
疏調楚軍援浙公與羅公子忠祐有舊遂請行倉猝無見兵得唐君訓
方舊部號訓字營者四千人益以池州降卒二千馳赴之抵徽州而杭
城已陷時左副都御史張公芾方治徽甯防務疏留公辦賊尋攻石埭
太平克之

詔加鹽運使銜方進攻池州而常州趣援甚急乃分降卒圍池躬帥訓

字六營暨親兵二營赴之途次聞湖州被圍乃改援湖時前路賊騎充斥眾請緩行公曰湖州皖浙咽喉也儻有失則兩浙糜爛矣行抵禮義橋悍賊突出公截橋而戰勝之日暮大雨軍士竟夕持仗立風雨中平旦啟行距湖都四十里甫半而賊復大至我軍且戰且進抵同心橋賊來愈眾圍公數重參將吳修攷鄧茂先戰死公血戰良久力竭死之年三十有四事聞

詔加等賜卹

予諡壯節原籍及死事地方並建專祠

贊曰軍興以來楚之南荷易名之典者百餘人而陳江蕭三公並得諡壯節外此則江公忠濟童公添雲金公國太也諸公文武殊途事蹟亦各別而其無忝於令名則豈有異耶諡法猛厲無前曰壯好廉自克曰節烏虜諸公得此其皆無憾於九泉也夫

又記江壯節公死事

方宗誠

公名忠信字誠甫湖南新甯人前安徽巡撫江忠烈公之族弟也隨忠烈公擊賊剛果異常積功官至湖南候補參將加副將銜咸豐六年八月提督秦定三統兵勇來桐城營於欄杆山十里鋪月餘未得攻城術

而賊來益眾遂被圍十有八日是時公隸壽春鎮總兵鄭魁士麾下從鎮軍復巢縣有功鎮軍帥兵來桐會剿至則圍已解矣遂駐軍三十里鋪不急進公念是時大兵齊集當乘勢擊賊不可濡滯失機乃請獨率偏師逼賊壘賊出戰敗走公追賊首將生禽之賊中大譁亂而公忽中火鎗死年二十七公卒後諸將益不敢遽進而賊勢日多七年二月大兵盡潰先是公士卒得公尸歸面如生余與友人文鍾甫張季彝爲備冠服以斂焉

論曰秦提軍之始至桐也是時城中賊數百人聞廬江復軍威振恐懼思逃而提軍持重不進以失事機其後鄭鎮軍克復巢縣至桐兵勇數萬人賊又震恐而鎮軍復不知乘勢大進公以偏裨奮勇獨前其死也宜哉而或反以過勇爲公咎悲夫公生平戰功吾不盡知故特記其死

事

陳武烈郭勇烈王剛毅公別傳

李元度

王師之克江甯也圍攻近四載用地雷法穴城三十餘處皆不就傷亡不可選紀洎同治三年六月朔提督李公臣典請從賊礮最密處重闢隧道統帥曾公國荃聽之命各軍於城下築礮臺護地道別遣軍士刈

溼葦蒿草積城下覆以沙土陽爲肉薄攻城狀城賊用全方扞爭礮彈
雨下是月十五日賊出死黨犯隧道燒礮臺我軍血戰竟夕於是副將
陳公死於戰總兵郭公王公中礮亡十六日地雷發李公臣典及武公
明良伍公維壽朱公洪章劉公運捷等率各軍登城賊傾火藥數
十箱燒士卒多死勢稍卻彭公毓橋蕭公孚泗等手刃數人冒險入拔
之盡殲逆黨成大功而三公不及見矣予悲之爲作三忠合傳

陳公萬勝湘潭人初從把總蔡祥援江西克萍鄉分宜旋入吉字營
克吉安敘藍翎外委咸豐十年同擊退小池驛援賊進克太湖擢千總
嗣是屢戰皆與十一年大軍克安慶進規江甯同治元年克巢縣和州
含山渡江克太平府金柱關尋取丹陽鎮奪秣陵關暨六郎橋江甯鎮
猛攻雨花臺公皆爲軍鋒閏月江甯援賊大至九月十二日賊鑿隧道
轟我營公協力扞禦裏創戰苦守四十六日賊敗退累功洊擢副將
賜孔雀翎三年六月望李公臣典新闕地道成統帥曾公入隧親勘之
賊道死黨出太平門直犯地道別從朝陽門出數百人燒各礮臺及所
積蘆蒿公督隊血戰竟夕殲賊百餘人力竭死之賊裂屍竿其首於城
巽曰城拔

郭公鵬程湘鄉人咸豐六年隨羅忠節克義甯敘藍翎把總明年同擊
走武昌援賊擢千總武昌復再擢守備加都司銜又明年從李忠武擊
退九江援賊敗賊小池口童司籛討拔湖口遷都司

賞換花翎加游擊銜冬江西賊犯湖口從李公績宜往援八年克九江
晉游擊加參將銜充右營營官十年攻太湖偽英王陳玉成糾悍賊來
援會荊州將軍多隆阿公提督鮑公超敗賊羅山沖公與諸營夾擊禽
斬三千有奇九年從援寶慶圍解除參將十年從克太湖遷副將英酋
糾捻匪上犯繇新安渡撲湘軍我軍分八路進攻公出第三路大捷
賜號衝勇巴圖魯十一年五月英酋竄踞德安隨州圍解安慶圍候補
道金君國琛率八營會剿公與馬誘賊出城斬馘數百城破追剿至應
山斃賊近萬人

賞二品封典同治元年同提督蕭公慶衍攻銅城聞賊堅壘死拒公與
趙公太和攻第一壘藉其巢須臾眾壘皆破援賊至公設伏黃龍村與
蕭公夾擊敗之明年克東關及和州含山巢縣復江浦浦口皖北肅清
詔交軍機處記名以總兵簡放江甯久不下奉檄與蕭公等其帥八營
往助攻三年六月挖新隧道公遣卒刈蘆蒿積城下城上礮彈若飛蝗

公奮前督攻與王公皆中微沒於陣

王公紹義湘鄉人少入湘軍累功洵保記名總兵

賜戴孔雀翎隨攻江甯於同治三年六月十五日死綏十六日城克當
事上其功

詔曰花翎副將陳萬勝記名總兵郭鵬程王紹義功績卓著力戰捐軀
朕甚閔之其照提督例議卹各賞三等輕車都尉世職尋
賜祭葬入祀京師昭忠祠內閣以諡請有
旨萬勝

子諡武烈鵬程

子諡勇烈紹義

子諡剛毅

多忠勇公別傳 李元度

多隆阿公字禮堂蒙古正白旗人隸黑龍江部世居齊齊哈爾城咸豐
二年粵賊自江甯分黨北犯蒙古科爾沁王僧格林沁公統義師入衛
詔徵黑龍江騎兵助勦公以參領帥二起馬隊入關隨征高唐州連鎮
及馮官屯各賊巢平之五年奉檄援湖北隸江甯將軍都興阿公麾下

六年從克武昌漢陽加副都統銜補協領充行營翼長進剿蘄州敗賊於曹家河復黃梅廣濟進次孔隴驛賊來犯廣濟公敗之當是時李忠武續賓帥湘軍圍攻九江悍酋林紹璋死守不下復於對岸小池口築偽城號新城縣環以堅壘七年正月賊夜築土城於魏家園公曰舍此不擊賊將益據要害急擊之夷其城於是附近之桂家畝賊壘及土城悉破未幾賊復於段窯築壘以通饒道公破之尋會各軍攻拔小池口時三月九日也皖賊悉銳上犯都公命公分駐濯港扼賊衝別遣鮑總兵超帥霆字五營駐意生寺備策應賊於楚皖交界之楓樹坳陶家嶺獨山鎮一帶各築堅壘自固公揚言先取獨山鎮而暗襲楓樹坳拔之後二日復揚言先取二郎河而回軍擣獨山鎮又拔之賊自是見公旗幟輒喪膽矣偽英王陳玉成驍勇健戰眾稱四眼狗者也率悍黨踞黃梅縣境之停前驛號四十萬連營百餘里四月都公督兵進剿戰於渡河橋平賊壘二十有一賊黨移小併大謀堅守以抗我軍五月賊於大河埔迤北依山增壘遂攻黃梅縣城公與鮑公赴援連戰兩日賊始敗會捻酋李兆壽率黨六千人來援增壘於馬尾山錢家灣等處尋犯廣濟窺武穴公約鮑軍夜劫賊營陰伏兵要隘待之昏黑中賊不辨眾寡

大敗潰伏兵乘之遂拔數壘然來者愈眾以數路牽制我軍餘上竄蕪
州更分黨橫截童司牌黃蠟山以出我軍之後勢張甚會湘軍自九江
來援公會戰大破之夷賊壘百餘追奔至宿松城下克黃梅於是楚境
報二次肅清矣八月賊棄宿松遜公帥馬步軍壁城外令鮑軍戍二郎
河以防回竄九月賊陷太湖繇潛山石牌黃泥港三路來犯分黨踞涼
亭河公與鮑軍約先勦涼亭遲明大戰自辰至午蹋毀涼亭河諸壘而
悍酋偽陳天福等率四五萬眾仍踞石牌且結十三壘於楓香驛以犯
二郎河之軍十一月公進次二十五里墩約鮑軍進攻賊殊死鬪公輕
騎帥勁卒馳出賊後賊驚潰而潛匿民舍諸賊皆起賊見外援眾益憑
壘堅守公督軍鑿擊移時火其柵破十三壘禽斬四千有奇敗賊回竄
太湖罷戰已二鼓矣八年正月偽地官燕等率黨七八萬繇渡船口等
處上犯連營三十餘里將以綴我師而緩潯城之攻也公察其未成列
急擊敗之禽其酋及四月朔而九江復矣八月公與鮑軍進攻太湖先
破城外四堅壘賊棄城走潛山公遂與鮑軍進次石牌以規安慶石牌
者地衝要與安慶爲輔車者也賊據山阻水用重兵築壘堅守之輔以
礮船八月公進攻上石牌鮑軍攻下石牌縱火焚木城破卡十盡平其

堅壁而東岸賊壘四初猶死拒我軍奪賊礮船渡河進擊皆大潰計斃賊六千有奇其逃入安慶城者僅悍酋數十騎而已自石牌破安慶勢益孤公逼城而軍賊預從北門外築九壘引湖水灌濠以自蔽九月公與鮑軍合攻斬首數千級城賊出援又大敗反奔入城城酋急撤閘板不得入賊焉於是九壘悉破急移軍壁其閒城賊數出犯皆敗卻之又敗其掠食之眾十月賊將突圍遯爲官軍所遏勢窮矣亡何湘軍敗於三河舒桐潛太皆失陳玉成率悍黨七八萬回援安慶全局皆爲之動公不得已自焚其壘督騎兵殿後命步軍徐退賊數來犯數敗之行抵宿松決計守縣城次日賊大至天霧咫尺不辨人馬公分五道迎擊三路策應令民團列高阜按劍觀戰俟我軍勝凡賊中輻重任恣取之比戰公親帥鐵騎陷陣敢死士隨之刃旣接斫賊如瓜擲首陣外諸將夾攻呼聲震天賊稍卻民團立山椒觀者皆大呼曰賊敗矣遂驚潰自相蹂踐死者萬計鮑軍射陳玉成中肩賊引去是役值三河新敗後人心離邊得此捷實東南大轉機也於是楚督鄂撫交章薦公可大用然賊雖受重創猶不時來犯也乃命鮑軍戍二郎河而自當荆橋一路賊以全力犯鮑軍公濟師援之大破賊於黃泥港逐北二十餘里賊始不敢

闕鄂豈然玉成仍糾黨三萬餘踞宿松所屬之花涼亭阻險結營二十餘壁十一月公出不意大破之赭其營玉成精銳十七七八乃痛哭潰竄公遂偕鮑軍進規太湖屯王家畝一日賊犯霆營甚急來請援公戒勿輕動而張樂宴諸將酣呼達旦賊偵知其無備遽舍霆營乘夜來襲公預伏兵要隘賊至大敗之其出奇不測多類此是年冬都公奉命督師揚州疏舉公自代遂以皖事屬公矣當是時曾文正公方以侍郎持節督水陸軍東規江甯而尤以取安慶拔太湖爲先務九年正月太湖賊屢出犯皆擊敗之遂移營逼城下諸將謀稍遠避鋒公曰不入虎穴焉得虎子敢言退者斬賊憑城出鬪師小卻公力戰挫之壘卽日成賊亦增陴濬隍決上流引水入濠以相抗二月胡文忠檄督糧道唐訓方帥所部來會攻援賊分三路大至距太湖數十里而石牌復爲賊踞且築僞城公先破蠟樹柯茶婆嶺賊巢自三月至四月兩次攻城弗能下八月公以石牌與潛望宿太毗連必先取石牌而後太湖可下乃選精銳自茶婆嶺進兵用火攻困之正鏖鬪閒援賊一自潛山來一自安慶來公派馬隊分途擊卻之遂再克石牌令提督雷正綰駐之時太湖久不下

廷旨趣進兵胡文忠檄候補道蔣凝學來濟師時公已補授福州副都
統各軍在太湖者悉歸公節制十二月陳玉成勾合捻酋龔瞎子張落
刑悉黨十餘萬三路援太湖公令鮑軍壁潛山小池驛以當前敵移蔣
營駐龍家涼亭而自帥馬隊駐新倉賊犯霆軍公親帥馬步進戰鮑軍
夾擊之追至地靈港破東岸十一壘參領西林佈力戰死之其西岸賊
壘六爲參領喀爾庫等所破喀爾庫追賊中礮死我軍殲賊數千計雖
有傷亡猛氣益厲而陳玉成恃其人眾兇狡亦自若也於是胡文忠檄
趙克彰朱希廣二營移駐太湖東門以防賊鼠玉成忌霆左營之扼其
衝也築礮臺圍轟之子若飛蝗穿營幄如敝網士卒循牆蛇伏樵汲不
通穴地以爨鮑公請他營來代公命雷正綰楊朝林等各分軍半代戍
其壘移霆左於霆中營俾暫休養更以王可陞一營繼其後復派死士
百人夜襲礮臺掩殺守礮賊又以蔣鮑兩軍相距遠急抽營結壘以彌
其隙十年正月令唐營移駐蔣鮑兩軍之閒又以一營駐霆左傍俾霆
左仍駐原壘會胡文忠已派候補道金國琛帥六千人冒雪白潛山之
天堂進兵與諸軍夾擊二十六日公親帥馬步隊分五路進擣適東南
風緊火其柵館延燒七八里破賊壘百餘殪賊七八千生禽三百餘名

敗賊復爲桃花埔伏騎所截殺直追至潛山城下明日乘勝克潛山捷聞

詔賞公頭品頂戴潛太克後賊黨回竄桐城時湘軍攻安慶已合圍七月公由挂車河進兵駐桐城之西北是夕賊來劫營爲伏兵所敗公察城中守備嚴惟西北隅求雨嶺有橫嶺一綫高三丈許曲懸如弓山前有小岡號毛狗洞賊築石砦其間護以木城復於城外築磚壘水堡環之公僞作攻城狀別遣勁卒自山後屏風嶺直擣求雨嶺之背昏夜築礮臺三比曉臺成賊驚以爲神乃大治攻具分二十道進攻毀其木城水堡賊三次出撲並經擊退遂奪毛狗洞石砦全城在目矣尋掘隧道轟城不就十月玉成勾捻酋龔瞎子孫葵心等悍黨十萬自舒城廬江援桐城冀解安慶之圍以逆眷在圍城中也公迎擊於挂車河敗之賊於望鶴墩等處增築營壘公分三路進攻又大敗之賊仍嬰城抗拒時安徽按察使李續宜駐軍青草壩公函約夾攻自帥馬步各軍分路進所嚮披靡李軍亦破棠梨山賊巢與公軍合正酣戰聞各路兵馳至遂毀賊壘四十有奇賊館百餘處殪賊八九千墮水死者又數千生禽千三百有奇解散萬有數千陳逆敗竄廬江而桐賊遂閉城堅伏矣

詔賞穿黃馬鞋是年冬玉成仍勾合僞玕王洪仁玕僞璋王林紹璋等
眾號十萬旁繞英霍圖上犯楚置以牽掣圍皖之師公力扼其衝賊不
敢逞十一年三月公進屯高河埔扼水而軍紹璋等來犯大敗之賊爭
赴水死河水爲之不流遂分兵合攻安慶尋破賊於新安渡斬首二千
級是日部將穆圖善亦敗賊於挂車河四月敗陳玉成於磨山又敗之
於鮑家橋玉成復糾髮捻三萬眾分犯青草壩高河埔挂車河公先發
制之以馬隊二支步隊一支爲伏兵又分步軍爲六隊戰於江家橋賊
殊死力拒我伏騎衝入賊陣各營乘之賊大潰後路火起伏騎已焚項
家河賊館賊眾益亂玉成奔竄桐城遂焚江家橋麻子嶺及黃家埔諸
賊巢蓋玉成挾全力圖解皖圍微公五戰勝之安慶之圍弛矣胡文忠
疏稱公謀勇兼全忠勤倍至雖古名將無以過之因奉幫辦軍務之
命六月賊乘秋穫大舉來刈稻公敗卻之七月玉成率巨股一繇英霍
上趨太湖一繇潛山下踞高樓嶺等處連營數十里公命佯敗以誘之
詐稱病甚不能督軍賊至偃旗息鼓閉關不出賊大詈如弗聞也者如
是數日夕賊終疑之尋獲我閒諜謂公實病林紹璋大喜以告玉成遂
以十一夜來犯公預伏二十餘營於左右路賊至夾擊皆棄械奔桐城

以追兵急不能入城爭竄蔣家山遂燬其木城及賊館二百餘處次日
敗賊竄廬江爲我伏騎所截殺斬首四百餘級天曉城賊出援又敗之
遂將城外七壘蹋燬是夕公登輶車遠眺曰賊眾十倍於我連戰皆敗
今知吾所在夜必來劫營乃潛徙其軍賊夜至得空營大驚以爲神遂
引去八月二日五鼓遙望高河埔火光接天偵之則壘已空集賢關之
賊爭竄石牌一路公曰安慶破矣蓋曾公國荃業於朔日拔安慶也公
急召穆圖善密授機宜俾進攻桐城仍遣輕騎分截竄賊皆殲之而是
日穆公及雷公正綰已乘勝攻克桐城越四日遂克宿松又三日克黃
梅廣濟賊亦遯矣先是桐城旣克舒城賊膽寒公密諭穆公率捷師揚
旗境上而於走廬州之路伏甲伺焉舒賊果棄城走廬州途次將蓐食
伏發圍殲五百有奇於是舒城亦復捷聞
詔賞公雲騎尉世職十一月遷正紅旗蒙古都統又旬日擢荊州將軍
蓋未一歲而已三遷矣時三河賊亦棄僞城遯公遂規取廬州同治元
年正月公進兵廬州賊出數千人迎拒敗之遣騎軍斷其糧路二月奪
賊礮船二火大興集賊巢僞鑄天侯普祥甫等率賊千餘投誠散遣之
尋破西門得勝門賊壘四會袁端敏甲三檄建甯鎮總兵張得勝帥五

千人營於廬北之橫店公以玉成恃水爲險乃令掘隄決水賊數來撲皆敗之然濠長水深不能盡三月援賊大上乃停掘隄之役四月敗賊於北門遂併力攻城破東門三壘玉成出援大敗不敢入城嚮板橋河一路竄去賊大亂各營肉薄登城乘風縱火遂拔廬州分兵追玉成玉成斷浮梁以數百騎奔壽州是役殪賊近萬生禽八百有奇斬僞官二百十有三解散七千餘眾時十五日未刻也陳玉成走投練總苗沛霖入壽州公令穆圖善雷正綰帥師追之距城四十里逼獻陳逆沛霖不得已禽玉成解前督師勝保營誅之公以玉成爲第一兇渠今竭數年之力得殲之賊不足平矣捷聞

詔加賞騎都尉世職五月擒匪自河南竄陝西逼西安官軍迎擊失利詔公馳赴陝省督辦軍務公改轍而西途中兩奉

諭旨趣行其時僞扶王陳得才勾合擒首姜汰陵張落刑等二十餘萬三路窺秦公慮關隘爲其所奪命先鋒雷正綰以陶茂林等三千人兼程前驅令穆圖善等綴賊後而自帥大軍繼之七月抵商南陳得才已躡我軍之後截我餉道公與穆公回軍掩擊大破賊於荆紫關殲賊四千蹈水死者亡算遂復其城賊宵遁明日公令馬隊追賊步軍暫息自

以單騎入商南而姜汰陵已率黨三萬驟至商南城陋甚賊繇富水關來適當其衝公飛調留駐浙川之衛隊四營來商令官吏兵民男婦悉登陣協守洞開城門賊疑之終不敢逼迨夜來攻公已遣騎軍分伏城外爲疑兵而自帥衛隊開東門掩擊賊皆潰退詰旦公帥輕騎出城誘戰被賊圍抄公躍馬衝突立將部卒拔出賊不敢追是夕遙見火光燭天礮聲隱隱不絕偵之則部將朱希廣率四營自閒道來援夜半戰於穆家河距城十二里遲明再戰斃賊二千有奇以阻險回駐三角池公以賊眾且悍預調王萬年三營來援賊於二十九夜解圍西竄而公已預調陶茂林等設伏扼武關截其去路禽斬以千計又親督王萬年等躡擊之商境亂山叢雜兵勢難於展布公棄馬登山持令旗覘賊所向以旗指揮一敗之於石馬寨再敗之於武關於山口於捉馬溝又大敗之於太平山三角池前後殄賊萬餘姜酋僅以身免張落刑亦聞風遁是役以數千疲卒破五六萬悍賊

天子壯之賞黃馬褂一件及江綢被料荷囊挾拾小刀諸珍品而部將雷正綰亦遷固原提督奉

特旨幫辦軍務矣會有

詔命勝保督辦陝西軍務移公赴南陽力籌防勦公敗陳得才於樊城
 又敗諸唐縣鎮遂屯軍樊鄧閒亡何勝保覆軍回氛益熾
 詔授公欽差大臣仍督辦陝西軍務十一月公入潼關逆回圍同州公
 擊其背一戰大捷解其圍回酋倡亂九閱月受創自此始遂扼賊於洛
 河之南其地林木叢雜袤斜百餘里古稱沙苑產蒺藜公部多南勇跌
 足搏戰苦不便公多購草履令以布裹兩足著之兵威始壯又以滾營
 法逼賊而壘二年春連破羌白鎮王閣村末華喬店孝義倉渡諸賊巢
 馮翊悉平初公之破諸砦也沙苑林中零星回巢未嘗遣卒搜捕諸將
 慮未盡絕公笑曰君等尚謂賊未空出耶我扼其吭彼不合併庸有生
 路乎不信盜覘之翌日往探果如公言五月師次交河口公適患暴下
 憊不能督戰迺擇諸將中持重者得穆圖善陶茂林令分軍跨渭爲營
 以驍將朱希廣趙旣發輔之希廣與旣發素相善欲併營於北岸當賊
 衝公慮以勇僨事弗應二將請益力公不得已乃許之復戒曰君等當
 聽吾言賊至堅壁勿戰吾自有法破之慎勿輕出也二將初尚耐守後
 以公病久賊日辱罵不能堪遂背令而出果中賊計遇伏戰歿公聞信
 力疾乘肩輿以後隊二千人往援大破之克交口十三村等巢翦滅殆

盡尋又破南岸馬烏什東沙河諸賊若餘逆膽落不敢迎戰公慮其遁走遣卒招撫賊詭應之而陰以車馬運輜重西去公覺其詐密令曹克忠繞道截擊自率大軍進薄高陵無戰不克旬日閒連克高陵涇陽縣城及塔兒寨永樂店咸陽之渭城灣蘇家溝馬家堡白起營各賊巢六十餘處縱橫二百餘里賊尸徧野馬不能行於是京兆亦定尋遣雷正綰援甘肅命陶茂林解鳳翔城圍進攻白吉原等處賊巢悉平之關輔肅清公欲度隴窮勦回匪先埽盪漢南川賊以清後路賊偵知之乃東遁而悍酋藍大順自西蜀竄至陷盩厔公馳軍圍其城盩厔城小而堅藍酋又善守誘以計不出轟以地雷不墮公迺選各營健卒數百人力攻月城令將士曰賊雖善守月城破彼不能安處矣吾今分諸軍更番攻擊以逸制勞不出兩日賊必走西門近山必繇此出吾已預設伏兵藍酋可禽也迺親上礮臺擊鼓督軍力戰兩時之久悍賊死者十九公忽爲礮子中傷左目而鼓音猶不絕是夕賊果由西門遁伏起藍酋身中數鎗逸至南山遂成禽餘賊悉滅公自提兵討賊身經三百餘戰克城砦二百有奇酷暑嚴寒未嘗安枕至是以創甚卒於盩厔大營同治三年四月十三日也年四十有七事聞

天子震悼

卹贈太子太保

賞一等輕車都尉世職入祀京師昭忠祠其直隸山東山西河南安徽湖北江西陝甘等處立功省分均著建專祠賞銀千兩治喪

子諡忠勇公天性忠毅嘗誡其下曰我輩受

朝廷爵祿不能滅賊何以問心言次輒泣下治軍嚴重用法尤峻每戰身先士卒不避鋒鏑兵勇被傷者力撫慰之至以己所乘騎載之歸所得廉俸悉以充犒賞官文恭知其貧郵寄三千金贍其家公知之馳卒追取悉爲戰士購征袍傷疾篤時昏迷中頻呼殺賊無一語及家事料敵如神尤知人善器使賞罰無所偏生不識漢字遇公牘使人誦以聽爲指瑕而易之輒精當羣服爲天授云子雙全襲各世職併爲一等男贊曰

國初以神武定天下東三省勁旅實爲根本所嚮輒有功近稍陵夷矣然得公及都公爲之將則旌旗爲之立變戰勝攻取若操券烏虜豈不以其人哉乃者鄰氛狡逞三韓頗多故矣語云聽鼓鼙則思將帥之臣安得起公於九京俾奏廓清摧陷之力哉

將軍明緒公傳

陳繼聰

明緒公滿洲鑲黃旗人由生員官部郎累擢至伊犁將軍同治三年十月回部亂糾眾犯伊犁公督將士防守旋與葉爾羌參贊大臣額騰額出攻賊營連戰十有一日圍始解賊東竄犯巴燕岱城領隊大臣富勒敦泰出兵迎擊未能獲勝公遣額騰額同伊犁領隊大臣崇熙錫伯營領隊大臣烏勒德春綏定城總兵沈玉桂率師三次往援後先皆敗既而巴燕岱失守賊復屬集伊犁公與前任將軍宗室常清分兵堵剿籌布一切相持年餘而賊氛日張旬結哈薩克布魯特之眾十餘萬四面圍攻凡屬城關隘臺卡等處盡爲逆回蹂躪遠近數千里聲息難通僅存伊犁孤城外無援軍內少積餉勢岌岌不可支四年十一月公使同知增智往霍爾果斯城運糧回至沙果離伊犁城西三里許爲賊邀截增智及防禦圖山布陣亡由是伊犁之食遂絕官兵殍死過半乃用樹皮油渣磨麩散放充飢賊且直薄城下公偕諸將分守各門晝夜登陴親冒矢石與下同受艱苦眾感公之忠義俱無貳志五年正月十九日賊掘地道暗置大礮轟壞堞垣公急用土填完缺處二十二日賊又縱火延燒北門蓋擁而入常清富勒敦泰烏勒德春沈玉桂及理事同知

穆津五品藍翎什亮皆巷戰歿而常清庶母程氏妾王氏越氏子五品
蔭生德潤女貞格蘭格安格定格亦被賊害公同崇熙退守旗營賊懼
滿軍聲威不敢驟逼越三日賊攻陷旗營崇熙手持大纛率部兵一百
人衝出與賊鏖戰至北關火神廟力竭而死賊爭入署公命家人閉門
舉火借其妻及二子全家自焚其時崇熙妻宗室氏擊一幼子亦在將
軍署內焚死額騰額先在城外殺賊左膀受鎗傷繼而守城左目復被
鎗傷至是內營又破奔告其母母年已七十矣歎曰當與汝以死報
國耳遂召集眷屬十五人焚其廬帳成灰燼焉又知縣李應誥以事謫
戍伊犁亦與妻子殉難光緒元年將軍榮全疏聞於

朝均

賜卹如例

論曰自同治五年伊犁失守至光緒初相隔幾及十稔明將軍與諸大
臣殉難迢迢萬里無從訪問竟以錚錚之大節湮沒遐荒亦可哀已幸
天威震疊新疆以次恢復逆氛肅清而忠義諸公乃姓氏大顯得受
聖主之表揚不且與

高宗朝班尙書鄂侍郎後先爭光乎

忠壯公平瑞傳

陳繼

平瑞公滿洲正黃旗人性孝友好學喜讀史鑑及名臣言行錄諸書與人交恆以道義相砥礪官本旗參領惠卹兵丁而操守清介人不敢干以私咸豐閒番舶犯天津公每談及時事艱難往往慷慨泣下屢請從戎效力以款議就不果後洊升新疆參贊大臣同治元年擢授烏魯木齊都統至任直屬城兵餉支絀悍卒洶洶鼓噪公密禽渠魁陳忠置之法撫慰其餘事遂戢復捐銀十餘萬分給各營充餉奏開馬廠荒地招民墾種命司庾者歲儲糧備不虞烏城舊有義學頽廢日久公興復之延請師儒以課八旗子弟文教爲之一振三年五月逆回變起屬邑聞吉綏來阜康奇臺吐魯番等處先後數日相繼陷賊進犯烏城中精卒因前月庫車亂均征調赴援存者千餘人半係老弱公與將吏激以大義登陴守禦復募壯勇出戰於報恩寺南梁西山坡頻有斬獲終以賊盛未能全勝遂議嬰城固守以待伊犁援軍適署昌吉知縣恩謹率團勇突圍至躬督南山民戶運糧入城賊勢稍卻已而各路回逆麇集百計環攻鑿城外潰垣列礮其中擊東南角雉堞皆毀醜徒蟻附而登公急率士冒煙燄死拒之齊發火箭斃悍賊甚多乃退相持八十餘日

糧盡始以牛馬酒麪爲食繼則茹草根啖樹葉餓莩滿道上皆病莫能興而外援終不至九月十三日城陷公尚在西北堞樓督兵有謂宜暫時出走以圖後舉者公目皆盡裂叱之曰我邊疆大臣受朝廷厚恩豈能出此半步城亡與亡臣子之分因顧城上官兵曰有敢從我巷戰者乎滿營少年二十餘人肩擡鎗相隨下至鼓樓擊賊傷數人賊來愈眾公知事不可爲北向頓首訖持佩刀謂諸人曰我不可以身受辱汝曹各覓生路言已遂自到其妻妾二女二幼子及僕媪等在署中聞變俱殉焉十三年哈密協辦大臣景廉以公死狀奏聞

詔命從優議卹

予諡忠壯並立專祠祀之

論曰烏魯木齊之陷也由外無援兵時人多歸咎於伊犁將軍其實此時叛回四起凡西甯鎮西所屬之廳縣無不殘破伊犁亂雖稍後外須救巴燕岱內則自顧會城勢亦岌岌甚殆而將軍常公卒以是罷職及明將軍代任則烏魯木齊已淪沒賊氛大熾更日不暇給矣是伊犁不救烏城者力有不足而未可遽以罪將軍若夫平都護堅守危疆終殉之以軀視古蓋臣豈有愧哉

梁剛節公傳

王先謙

公姓梁氏諱洪勝字華彬湖南長沙人也縣人丁銳義募勇勦賊武昌公隸麾下以斬級功由六品軍功敘把總從克武昌漢陽擢守備加都司銜賊踞蘄州黃泥坂官軍攻之賊不出公請於銳義約諸軍退單騎至賊營前肆詈以誘之偽丞相韋朝綱帥羣賊徑趨公公馳馬斬悍賊三禽朝綱羣賊趨救公急斫朝綱朝綱回斫公負重創力持之不釋羣賊前公復噓其魁餘相顧莫敢近官軍自山嶺呼而下賊大潰平其七壘還師斬朝綱一軍稱神勇擢都司加游擊銜充營官銳義殉難三河公突圍出以所部屬都統多隆阿公卻舒城援賊擢游擊破援賊桐城功最擢參將加副將銜破安慶援賊擢副將

賞果勇巴圖魯號復桐城宿松黃梅加總兵銜隨多隆阿勦捻匪河南解陝西商南圍以總兵

記名簡放湖北巡撫嚴樹森素聞其勇檄令統一軍駐漢口捻賊數曠湖北圍王桐柏成大吉於霸山公赴援一日夜馳二百里未至霸山賊解圍去公追擊樊城卻之又躡之光化賊走河南時賊鋒銳甚官軍集敗襄樊獲安公之力也公自領軍聞警卽赴未嘗待大府檄調檄至如

其計滋重大府顧公既以勇名益剽悍自喜無紀律賊既入河南而粵匪賴汶洸自漢中出與之合竄天門據阜市眾號數十萬公孤軍轉戰大敗於花台被圍七晝夜僅以三百人免諸軍無捄者總督官文劾樹森落職欲殺公檄其軍駐蘄水賊大至公力戰卻之追至羅田解都統富森保之圍重賂官文左右官文更愛之奏公忠勇無兩益其軍專倚以辦賊賊踞黃陂之街埠公禦之輕騎摩賊壘賊夜伏隘攢刺之墜馬親兵二皆死其軍弗知也時同治五年正月四日年三十有二事聞照提督例從優議卹

子諡剛節

賞騎都尉兼一雲騎尉世職

前史官王先謙曰余甲子從公天門花台之敗賊追官軍急公持矛立馬橋上以過軍賊愕眙久之退得免者數百人及禦賊蘄水日與數十善騎者挑戰以勝反余謂公此非大將事也答曰命在天即大將不死耶余聞人言自公微時即輕財上義通任俠性儻募亡檢一日入酒肆擲巨金案上徧揖肆中客曰今日諸君盡醉酒直悉洪勝代償矣在軍日不殺賊不快及戰短衣橫矛馬上背刀手火彈火繩繆臂見賊輒大

笑伺其至然繩擲彈遠矛近刀當者輒靡重自負卒以是蹶云詩曰起
趙武夫公侯干城其公之謂乎濟之以整暇古良將莫過矣

曹仁美傳

湘陰圖志

曹仁美字毓楚一字澤庵咸豐六年投曾威毅伯國荃軍援江西鏖戰
吉安天華山力戰陷陣克復萬安八年克吉安九年克景德鎮浮梁仁
美功最多十年賊踞黟縣建德諸城勢猖獗時仁美改隸欽差大臣曾
文正公國藩軍屢戰失利堅垣與賊相持仁美曰兩軍相持日久當乘
其懈而擊之否則賊援至愈難圖矣夜分大霧率所部摩賊壘更籌寂
然乃梯人越壘入手刃賊之司柝者縱火燒賊壘後軍蜂湧至斃賊數
千賊驚潰克黟縣建德獲器械無算十一年國荃攻安慶久不下國藩
命所部往助仁美與焉一日偽英王合江淮賊來援國荃督戰中流矢
仁美負國荃登高阜揮諸軍奮擊遂下安慶以次克復銅陵含山和州
東梁山蕪湖太平府秣陵關六且橋降賊萬餘人同治元年從國荃圍
金陵仁美軍雨花臺西國荃以城中賊乏食爲持久計令諸軍毋得與
賊戰凡四十六日仁美恚曰當賊不擊將何待乃以其軍出毀石壘賊
頗死國荃以其勇薄責之仁美引疾歸投江蘇巡撫肅毅伯李鴻章軍

會大軍克復金陵餘賊突出麀戰湘淮諸軍失利於奔牛劉銘傳軍被
圍急議者欲退保丹陽仁美曰賊雖銳困獸之鬪也當出奇兵擊之次
日督諸軍進自駕小舟率健兒數人登輪船斃賊十餘人縱火船盡裂
奔牛大橋角賊悉平軍無錫執游兵擾民者斬以殉四年春僞侍王李
世賢犯漳州閩浙總督左宗棠檄蘇軍援勦鴻章遣仁美偕郭提督松
林楊提督建勳航海赴援至漳方築壘賊大至仁美令諸軍毋動獨率
所部三百人迎敵賊疑有伏不敢前仁美伺賊懈奮擊之礮傷僞侍王
賊潰數日復漳州積功保提督

實勵勇巴圖魯名號尋歸以兄仁賢領其眾五年二月國荃巡撫湖北
調仁美與郭松林募軍湖北進至河南唐縣會捻逆由信陽竄鄂仁美
與松林援鄂遇賊於德安薄而擊之至鍾祥賊大至戰歿羅家集事聞
照提督例

賜卹同治七年

詔建專祠於原籍及鍾祥死事處

張勇烈公事狀

方宗誠

公姓張氏名樹珊字海柯安徽合肥人始祖鼂明時由江西遷廬州數

傳至公高祖從周始居周公山曾祖世科太學生曾祖妣楊氏章氏祖
傑祖妣李氏父蔭穀廬州府學生妣孫氏繼妣魯氏李氏祖若父以公
兄樹聲官

誥贈資政大夫又以公攻克常州功奉

特旨賞給三代正一品封曾祖祖父得

誥贈建威將軍妣皆一品夫人公少讀書通大義因感世變習騎射不
復事章句咸豐三年粵逆入皖父建威公奉縣檄團練鄉兵命公兄弟
任其事時土匪譁起禽治數人里中以安四年同邑刑部郎中李公文
安奉

旨團練回籍公與兄樹聲往從之五年春擊賊巢湖以親兵二十人為
軍鋒破賊千生禽僞戶部五尚書斬之於是善戰聞於時冬從破巢
縣賊營六年八月克來安九月從今山東按察使李君元華克無為十
二月攻克潛山太湖遂助守太湖先是粵逆悍黨與提督秦定三鄭魁
士等相持於桐城至是回擾潛山潛山復失及太湖弁勇惴惴公所部
纔五百人意氣閒暇日增壘浚濠以待賊至開壁急戰斬賊目數人又
追賊敗之於新嶺下時當歲除無日不戰戰則身先挫銳賊氣大靡因

乘夜襲之遂遁走逆酋陳玉成最驍悍渡江奄至七年正月以全力撲公公下令嚴備勿譁羣賊排進如堵始鎗礮齊發前賊應聲倒後賊曳尸踵上如是者四五次始解去既而參互我營之間築壘十餘置竈晚炊矣時各營糧藥皆匱消息隔絕有勸公潛師夜走者公叱止之鞞刀帕首夜率敢死士百餘人緣河隄竹叢中蛇行而進直薄賊營中堅賊巡隊數千沿隄林立公令驍勇者數人一躍登岸執旗亂颭賊驚懼不知所爲公乘勢躍馬大呼隄賊倉皇走營賊不辨虛實遂俱潰委棄輜重山積公令曰拾遺者斬於是軍士人人自奮公往來盪決呼聲震山谷賊自相踐殺屍骸枕藉陳玉成遁回脅饑民沿江上竄巡撫福濟檄元華赴援無爲公拔隊從比至廬州則桐城大軍已潰無爲潛山太湖舒城六安相繼復陷公功未甄敘而威名由此大著於淮南矣是時皖省糜爛賊所至誘脅鄉民充僞官蓄髮納糧抗者焚殺公里居與兄約束練眾敢從賊者戮之遂率以鏹肥西匪寨敗捻張落刑於官亭八年七月十五日廬州復陷巡撫翁公退軍保定遠賊氛大熾公與兄謀曰練勇散處可遏小寇不足禦大敵乃築堡於殷家畝阻河環山以爲險逆酋陳玉成兩圍公堡皆敗之遠近歸者萬計堡舍不能容則分置兩

堡於東偏而捍衛之於是公邑人今直隸提督劉銘傳山東布政使潘鼎新甘肅涼州鎮總兵周盛波及其弟廣西右江鎮總兵周盛傳江蘇徐州鎮總兵董鳳高均以公制寇有方相率築堡峙糧儲械簡丁壯惠農商百餘里相望與公聯爲一氣歷四五年賊來則戰去則耕近則守遠則出擊屹立賊藪中晏然無恐公又嘗率練勇從復霍山解六安圍援壽州攻克三河城隘論者謂此爲淮軍勁旅之所基而不知勵同仇之志作敢戰之風實公有以倡之也帶練勇數年巡撫歷敘公功洊擢以都司補用

賞戴花翎初逆賊起粵西徵兵四集莫能制蔓延六七省今大學士曾公國藩以侍郎丁憂在籍奉

命督辦團練遂勅募勇之議是爲湘楚水陸各軍之所自始既克湖北平江西復安慶進攻廬州金陵時蘇省江以南盡淪於賊所存惟鎮江上海寶山松江四城蘇紳自至安慶乞師曾公以湘楚各軍勢分則力弱於是議募淮勇而以今協辦大學士李鴻章統之李公知公兄弟等忠勇可任手書召之公兄弟遂從至上海凡前與公築堡捍衛鄉里者皆應募各以其名爲幟卽今所謂樹軍銘軍鼎軍盛軍者也是爲同

治元年三月時賊酋李秀成僞號忠王擁眾百萬公等僅十一營抵滬
上背海面賊於兵家言爲絕地李公旋奉
命巡撫江蘇五月賊圍松江以圍上海分踞泗涇以扼援兵公從李公
禦之於滬西而賊圍程學啟等於新橋游氛逼上海公與兄進策曰賊
勢雖盛然氣驕而散宜乘其離巢遠植根未固急擊之李公曰善乃命
公從兄會諸將攻勦與程學啟內外夾擊遂乘勝進攻泗涇毀賊壘數
十松滬復安程學啟者亦安慶從李公其所部曰開軍後以提督死事
嘉興諡忠烈者也六月公兄回廬召募樹軍戰守事一以委公七月十
三日與攻青浦克之李秀成遣悍黨撲上海之北新涇以斷松青通滬
之路公與程學啟等回援賊圍之七寶鎮數重我軍壁立不動擊敗之
毀賊營十餘八月初新涇圍解賊奔嘉定李公命會諸軍進攻之九月
二日公奮勇以雲梯擁入克其城進據江橋時蘇崑杭嘉諸賊以青浦
嘉定相繼失懼我軍之乘勝進攻也合賊十餘萬銳意擊我四江口水
陸四營以爲復陷嘉青窺松滬之計公與程學啟郭松林等進攻以援
之賊迎拒乘賊半渡突擊大敗之然賊眾且悍不退也二十一日李公
率劉銘傳至公進曰賊阻江以守我軍非逼賊衝築一二壘則進戰無

地卽夕率隊潛伏賊營旁盡夜而壘成李公喜命詰朝會戰公率軍冒
煙直入學敏等大軍繼之四江口之圍立解由是滬上軍聲大振蘇常
各境之賊聞風惕息十二月常熟福山賊以城降附已福山復叛通蘇
賊攻常熟常熟降賊乞援滬距常熟三百餘里中阻太倉前軍攻之未
下援師不能達公乃與劉君秉璋劉君銘潘君鼎新吳君毓芬等議
由輪船航海而進李公嘉之同率所部三千人以往二年正月抵福山
上游之西洋港登岸進攻適賊援大至我軍病多傷亡者時西洋港口
淺狹軍糧船不能入寄泊海中或風潮一作則飄入賊巢否則駛歸大
海潮退又攔淺沙中或爲賊所焚非急克福山得口門則我軍無自立
地公乃與諸軍議曰危地則戰古無他策請滾營進戰可乎眾曰善公
首率樹軍進據蘆浦港距賊營里許諸軍次第進營壘未成而賊來撲
別賊率悍黨萬餘撲蘆浦先立之營營內不及百人公先令所部游擊
董鳳高守之曰鎗礮非中不發賊屢撲不動遂分犯銘鼎二營是時公
已擊退新營之賊乃回軍援之斃數悍賊賊鎗中公右臂左右驚問公
曰無恙也大呼奮擊賊始潰各營更番遞進距賊壘不及半里公會諸
軍日日攻擊二月常熟援賊至相持未下而常熟城中乞援者日不絕

先是公兄召募歸留守皖中及聞公被創率新軍由輪船駛至常勝軍
戈登亦至常勝軍者西洋人爲李公用者也水師提督黃翼升亦率所
部來會十八日克復福山石城是夜公與各營潛襲太又橋等處賊營
悉平之常昭城圍立解李公疏傳公等以福山危險之舉引爲己任竟
能由險入深以寡撼眾會同諸軍解此重圍爲蘇軍一大轉局功不可
沒公前已洊擢至參將

賞給悍勇巴圖魯勇號矣至是得

旨以副將儘先補用福山旣克公從兄駐軍守之值太倉崑山相繼復
五月初移駐常熟大河鎮爲進取江陰無錫計先是大河鎮以西自江
陰顧山起至無錫城連互數十里賊營密布意圖接應江陰賊內竄常
熟而李秀成復渡江合逆眾水陸分路內犯公從其兄會劉銘傳郭松
林周盛波分路進攻鳧河渡港更番苦戰顧山以西賊壘悉平七月劉
銘傳周盛波久攻江陰未下統領李鶴章檄公與郭松林繼之是時城
賊死守外賊十餘萬分道來援沿河木城十餘里石壘木柵百餘倚角
其間公至議與郭松林密由山後繞其背劉銘傳督所部依山前進直
擣其中周盛波等由城下橫穿其右東南援逆果大潰死者山積諸壘

盡拔惟水師攻西岸失利公時已回營見之立率勇西援各軍卻退者
乘勢回擊鏟壘焚舟援賊淨盡遂同諸軍分門布守公扼南門之衝斷
賊去路八月朔日城賊懼有內應者遂克之賊鮮得脫者以公扼斷去
路之力也是時公兄從李公擊退東路蕩口竄賊江陰常熟全境肅清
李公遂檄公從兄進駐張涇橋與盛軍松軍相犄角期以規取無錫截
斷蘇常要路松軍者今湖北提督郭松林所部也公軍旣屢敗賊禽斬
千人毀其石營土壘輜重舟楫追至城下賊懼甚忽聞李秀成合七偽
王之眾竝洋人白齊文水陸賊十餘萬以來攻撲大橋角守兵請援公
從兄奉檄而馳時賊圍守兵甚急舟師多被擊沈者見公軍至整隊以
待公命所部劉克仁等分路進攻公兄弟從旁抄擊火入輪船藥艙如
雷震礮船被焚陸賊爭渡踐蹋各軍乘勝蹙之禽斬溺死者以萬計時
九月一日也秀成敗退以爲無錫官軍一日不撤則蘇常咽喉一日不
通金陵杭州亦難孤立密約僞護王陳坤書自常州出犯江陰擾我北
路僞侍王李世賢由溧陽宜興出擾我西路而自率賊八九萬船千餘
連營來犯聲稱必竄常熟抄我後路營壘相接縱橫六七十里統領李
鶴章檄諸軍分道進攻樹軍由嵩山左路進十月初公率所部與賊相

值猛擊之賊隊大亂遂毀秀成營二十餘追至茅塘橋銘松盛三軍所
攻壘尙未下公與諸將議曰兵家要訣拊背扼吭若頓兵堅壁之下苦
攻折銳非計也今左路賊已擊退願率所部營中右二路間使賊不得
相合十三日營成賊大驚各軍三面環攻之夜復暗繞賊後奪賊前營
敗賊後壘節節敗潰死者逾萬時蘇軍程學啟亦克泔關秀成奪氣援
賊皆退走李公督程學啟戈登諸軍急攻蘇州令其弟鶴章率諸軍急
攻無錫公與盛軍逼東北城而壘賊來撲會諸軍夾擊敗之諸軍營壘
皆定二十四日蘇城賊窮蹙乞降秀成乃率死黨入太湖構結常州賊
水陸分進以援無錫城賊死守傍運河城河周築土城各門均立四五
營護之時銘軍專擊外援公同諸軍分圍城賊十一月朔公兄弟激勵
將士攻破亭子橋前營賊驚懼次日公從兄先克東門土營四各軍皆
一鼓登城遂拔無錫李公以無錫一軍斷蘇常要路擊退援賊使攻取
蘇城之軍不被牽制功甚偉疏上公由總兵得

旨以提督記名簡放方是時議者以將士過勞宜稍休公與諸軍請於
李公曰賊勢甚窘而常州民不聊生宜急進蹙之以救民約銘軍並進
時守常賊酋陳坤書擁眾十餘萬誓與城存亡以爲金陵犄角官軍既

抵城下各奪賊十餘壘公與銘軍隔城東北隅一大賊壘乃併力克之
惟東門附濠兩石壘不下公怒自率隊連攻之適奔牛賊壘降銘軍奔
牛爲西路要區羣逆復爭守將被困公命部將會諸軍急援之圍解三
年二月賊十數萬冒雨越江陰犯常熟福山聲言直竄蘇滬以冀北解
常州之圍南緩嘉興之攻勢張甚公兄與劉銘傳等率隊回剿公方疾
留守賊夜犯皆擊走之三月公兄回營李公親抵常州環視城西及運
河左右賊壁如列星西北通丹陽西南通金壇眾十餘萬乃檄公與諸
將先攻外賊以斷其援絕而附城石壘一潰一降遂合圍李公以不
速克城慮生他變令公於城東附濠數武外修築長牆蔽護諸軍移礮
進擊四月六日克常州時浙江巡撫曾公國荃攻金陵未幾亦克復李
秀成伏誅江南悉平是役也以公從兄與銘軍先抵常州城下又與開
軍踊躍先登奉

特旨賞給三代正一品封十月又奉

旨以廣西右江鎮總兵補授四年正月公統樹軍駐鎮江三月擒匪任
柱賴汶洸等竄運河東岸擾及海贛公奉檄赴淮徐剿捻四月僧忠親
王戰亡於曹州

上命大學士兩江總督曾公復爲欽差大臣督辦勦擒事宜而以李公
器兩江總督時親王新敗徐方震驚李公以公兄備兵徐海道檄公軍
佐之公內修軍政外佐其兄修團寨緝土匪徐境又安初金陵旣克楚
軍湘軍多散遣及曾公奉

命北征乃議用淮軍從以公所部爲親軍九月初擒逆由豫竄曹濟圖
犯運河公奉檄援山東賊回竄追擊於魚臺之谷亭樹軍勦擒戰事由
是始十月公由魚臺追賊一日已行六十里聞鼎軍被圍急往援與鼎
軍夾擊敗走之先是曾公鑒僧忠王追賊疲敝疏請於東豫江皖四省
要害設四重鎮江蘇則徐州山東則濟甯安徽則臨淮河南則陳州之
周家口均駐勁旅賊來則戰去則守爲以逸待勞之計願逆擒奔突靡
定是年冬南竄豫鄂

廷旨屢飭追賊曾公乃檄銘軍爲游擊之師逐賊入鄂而以公軍移駐
周家口以扼回竄之賊時捻眾馬步數萬樹軍僅六營無騎兵曾公令
募馬步三營以助之豫中連年苦兵甚於苦賊公至日嚴部伍勤訓練
聯堡寨安居民豫人感之五年三月公兄奉

命爲直隸按察使公聞賊眾二萬將北趨急拔軍禦之於沙河乘賊不

備橫斷其首尾賊眾踵至公分軍三路直衝橫擊賊不支乃竄趨周口
攻撲營壘時公弟樹屏以副將留守公回顧首尾夾勦賊大挫追奔至
淮甯北而還自是捻匪析爲二枝分竄齊豫皖境上均在沙河以東五
月聞賊欲合攻周口周口一鎮跨沙河東西爲兩寨夙稱繁富自曾公
設四鎮西路軍火糧餉全貯於此是時寨東賊氛甚劇公令各營嚴備
而自率精銳渡河進勦追殺十餘里賊夜遁越沙河而西時勦捻各軍
皆步多馬少疲於奔命劉銘傳因建修守沙河之策冀蹙賊於沙河之
西不令東竄七月公率所部會諸軍築牆濬濠布置嚴整而豫軍所守
不慎賊乘釁東竄沙河之防因以無成公慮賊之過運河也以追勦請
曾公許之遂爲樹軍游擊之始八月曾公由濟甯抵周口旋疏請令李
駐徐州或清江主持東路軍事湖北巡撫曾公國荃駐南陽或德安主
持西路軍事九月公追賊至鄢陵聞賊圍許州遂晝夜兼程行一百三
十餘里忍飢苦戰乘夜進擊遂解許圍時豫撫議守賈魯河曾公檄公
率部回周口旋聞張總愚竄秦中任柱賴汶洸等合竄東境河防之議
又寢公自周口東發仍作游擊之師十月謁李公於徐州極陳馬賊飄
忽步隊鈍滯慷慨激發請增馬隊二三千誓滅此賊以餉絀未如所請

時銘軍追逐任柱等於魚臺金鄉之間李公令公與諸軍會勦之十一日擊賊於豐縣南敗之十二日追擊於豐西又敗之是夜乘勝急追賊方憩息不爲備斬獲千餘十三日追至豐北賊方攻寨聞官軍至急竄走公軍自是與銘軍日躡賊賊飢狂奔我軍亦迅進行塵相及日有禽斬二十五日賊由曹州竄定陶遂急馳抵定陶時已二更兩軍東西進擊二十六日黎明復追賊至曹縣殲斃不可勝計賴汶洸僅率數十騎南遁餘黨數百名棄械乞降是時羣賊將竄渡運河公與銘軍日行百里又往往夜戰使賊一日不息一寨未破賊是以不得渡運河而東十一月公旋軍周口時曾公奉命回任江督李公督勦捻之師公拔隊追賊抵汝甯聞賊由光固竄鄂中十二月鄂將郭松林敗績於白口賊燄復張公自黃岡追至棗陽逆眾又竄擾黃德之間鄂撫曾公駐節德安檄援兵甚急或言賊悍且眾不可輕發有寓書阻公者公曰援師無中途需次理且湘淮兩軍休戚相關可徘徊瞻顧乎東書不顧率所部疾進至德安賊眾數萬公以游擊日久雖挫賊氛恨未撲滅見賊屯楊家河東岸縣互十餘里遂分部夾進衝撲過河賊死傷無數弁勇中見賊酋有騎白馬遁者識其爲任

桂也指以告公公怒髮上指督隊迅追冀痛斃而生礫之不意賊眾分
路回抄斷我軍公督親兵苦戰屢陷賊陣被圍垓心昏夜莫辨親兵二
百餘人傷亡將盡公猶大呼衝突手刃數賊墜馬被害是夜大霧公部
之爲賊斷者皆分據邨莊拒戰賊退德安圍解公軍獲全十二月二十
二日也次日黎明得公屍三軍之士哭聲震野李公疏公死事且歷陳
公忠勳

天子震悼優卹敕本籍及立功之地均建專祠
賜諡勇烈節相曾公又疏稱其忠貞遺愛復奉

旨於陳州周家口建立專祠七年捻逆蕩平

天子追念前勳諭同忠親王僧格林沁副都統伊興額等各賜祭八月
以李公復疏其忠

加贈太子少保銜公孝友忠義根於至性平居訥訥若無異於人遇危
難則傾身赴援不少退避其始以親年衰遭世亂不忍違棄鄉里治團
築寨身捍大敵迨親沒旣葬乃佐其兄治軍江南一戰弗從意弗得也
當蘇賊猖獗羣情震悚之秋往往義氣勃發奮臂爭先嘗以救拔諸軍
出圍身受數創旣克回營解衣就臥袖中乾血片片墜地當苦戰時負

痛而不自知也故雖一偏裨而忠勇之名聞於

九陛及統軍而北也亦知步卒四千不足制騎賊數萬而念

宵旰之憂勤中原之塗炭時以忠果血誠激勸所部追逐千里迭挫狂

氛卒以身殉

王事生平淡於榮利遇大捷他將攘臂論功公則默無一語治軍秋毫

無犯士卒未食不先食未飲不先飲有疾者雖廝養必親診治曾公稱

其仁愛惻怛出於篤誠故人樂爲之用沒後所部守公遺法從平捻匪

凱撤後猶人人痛思公不置云公以道光丙戌年七月初八日生殉節

時年四十一公兄弟九人長樹聲今直隸按察使公居次妻吳氏繼妻

黃氏側室王氏長子雲達嗣子雲翔女一公功績忠節例得登於史官

公兄命宗誠狀公行因采諸章疏參以見聞稍加論次上之史館謹狀

同治九年夏